



#VIC 122 f30



EVERH. BRONCHORSTI,

Dum in vivis erat,

JCTi & in Academ. Leydenſi Antecessoris
Primarii,

IN

TIT. DIGESTORUM

DE [DIVERSIS]

REGULIS JURIS

Antiqui,

COMMENTARIUS:

Recognitus & ſubinde auctus

A

J. L. BLASIO, JCTo.



AMSTELODAMI,

Apud JOANNEM à MAANEN.

M. DC. LXV.



V I R O

Amplissimo, Spectatissimo,

D. D.

CORNELIO

BAKKER,

Augustæ *Amstelodamens.* Reipubl.

Senatori & Ex-Scabino,

Societatis Orientalis Indiæ Præfe-
cto, &c. &c.

*Cognato & Mæcenati suo pluri-
mum suspiciendo.*

S. & F.



Tū dulce periculum sit, aut,
ut cum Hesiodo loquar, ἀγασθῆναι
ἐκ τῆς ἰδίας βροβίσου, officio & be-
nevolentię studiis inter se con-
tendere, observantior tamen sum Amici-
tię, quā me dignatur tua benignitas, quā
ut eam promiscuis contentionibus obsole-
fieri ac veluti prophanari velim. Tuę ete-
nim humanitatis recordatio, Vir Amplif-
sime & Cognate observande, aurem mihi
vellicat, ut, quando majoribus officiis
in præsentia animum memorem testari non
possum, saltem Commentarii munere &

Bronckhorstii recogniti oblatione defungar. Et quamvis plurimis concinnarum dictio-
num parasangis adornatisque dicendi cir-
rhis beneficam tuam Comitatem exæqua-
re adniterer, jam tamen, ubi vires pa-
trimonii, quod summi numinis dono mihi
obtigit, diligentius excuterem, non repe-
riebam in bonis, quæ functionem in suo
genere reciperent, unde nomen expunge-
re potis essem, si ex lege mutui mecum ex-
periri in animum induceres. Verum ut in
beneficiis tuis non tam κτήματος δόσιν,
quam πρῆς σημεῖον spectari vis, sic Tu
quoque animum nostrum gratiæ referendæ
cupidum, non indicaturâ muneris, sed
propensâ tribuentis voluntate metieris,
quæ in gratiarum ratione utramque mihi
paginam facit.

Accipe, ergò, Vir amicissime, hunc,
Illustri Nomini tuo dicatum, Consultiss.
*νῦν ἐν ἀγλαίᾳ Everardi Bronckhorstii ad Re-
gul. Juris Commentarium*, quem nova E-
ditione donavi, in qua illum recensui, à
sphalmatibus non paucis vindicavi, in er-
roneâ legum quarundam allegatione re-
stitui & correxi, legibus paragraphisque
quæ subinde in prioribus Editionibus de-
esse videbantur, cum Explicationibus ad
illas auxi, & deinde adjunctis legum in hoc
tractatu æquisonarum concordantiis locu-
pletavi. Pri-

Primus hic studii mei Juridici Embryo ,
imbecillus adhuc , benevolentiaē tutelæque
tuæ fasciis involvi etiamnum , & librari e-
gens , ad liberales amoris tui ingenui aras
deponitur : Cui tum manus admove-
re poteris , quum te pigebit otii , & bonas horas
non bene collocare , sed animum tuum à
gravioribus curis subducere atque per o-
tium delinire tibi libido fuerit. Illum , quasi
symbolum , genii mei , Tibi gratissimi , &
patrocinio tuo unicè suffulti , publicè apud
Te interpono , imò publicè tibi redhosti-
menti loco offerre volui , debui ; quippe qui
etiam *ingratus habetur , qui remotis arbi-
tris gratias agit* , secundum *Senecam lib. 2. c.*
23. de Benef.

Fruere itaque , pro libitu , me & hoc primo-
genito meo , dum aurâ ætheriâ adhuc frueris
incolumis , quod ut Ecclesiæ , & Reipubli-
cæ Privatæque bono D. O. M. diu tibi lar-
giatur , animitus Tibi precor & medullitus
voveo. Vale , Vir honorande , & bene vel-
le , ut cepisti , persevera

*Ampliss. dignit. Tua observan-
tissimo*

J. L. B L A S I O , J Cto.

Ad Amstelam, Ipsis Septembr.

Idib. clō 10 c LXIV.

✧

3

Gene-

Generosis & Nobilissimis,
EQUESTRIS ORDINIS
VIRIS,

N E C N O N

Amplissimis, Clarissimis, Prudentissimis
DOMINIS PRÆTORIBUS,
CONSULIBUS, SENATORIBUS,
& SCABINIS, Sex Primaria-
rum Urbium Bataviæ,

Putā, { **DORDRECHTI,**
HARLEMI,
DELPHIS,
LUGDUNI,
AMSTELODAMI,
& GOUDÆ.

Dominis ac Meccœnatibus suis clemen-
tissimis, & reverenter colendis.

Illustres, Amplissimi & Potentes
Domini Ordines :

D *Vo sunt ad bene beateque consti-*
tuendam, fundandam & con-
servandam Rempub. precipue
necessaria, videlicet vera ac
Orthodoxa religionis sincera & recta con-
stitutio, deinde legum bonarum auctoritas,
ac

ac juris cuique sui & iustitia aqua distributio.

Primò omnium autem recta & vera religionis constitutio, quæ ex præscripto verbi divini, & sacrosanctæ scripturæ norma & autoritate proponitur & confirmatur, firmissimum est Reipubl. benè ordinanda fulcrum, vinculum, & firmamentum. Hac unica est religio, quæ conscientias nostras coram Deo quietas ac pacatas reddit, quæ nos ad Deo obediendum promptos & paratos efficit, dum confisi certâ animi ὁληγοφoεiæ, in unico Christo Mediatore & Redemptore nostro nobis salutem repositam, Deum purâ & sincerâ mente colimus, illius præcepta ad benè beatèque vivendum proposita, vita & factis, quantum possibile est, exprimimus & observamus. Quod qui faciunt, proculdubio Deus in eorum animis gratam sedem sibi collocavit. Vbi enim pietas pro scopo, fine ac regula actionum nostrarum proponitur, ibi omnia rectè & convenienter fiunt & procedunt, ibique proculdubio ut Respub. fœlix, florens atque beata sit, necesse est.

Secundò, post religionem rectè in Repub. constitutam, necessarium est, ut aequissima leges à Magistratibus Populo præscribantur, eaque, severè, sanctè, & inviolabiliter custodiantur, & executioni mandentur.

Bona siquidem leges sunt nervi & vincula totius Reip. & civilis societatis firmamenta, cujus salus & tranquillitas ex observatione legum dependet. Harum legum hæc est prima utilitas, ut sint norma humanarum actionum, ac secundum eas externi mores honestè placidèque regantur. Altera est, quod adminiculo legum & juris quisque suum tenere possit, atque legitimis modis bona opesque suas tueri, vitam famamque suam & existimationem ab improborum injuria sartam tectam conservare. Quod graviter & eleganter Cicero in oratione pro Caccinna confirmat, dum inquit, Nihil in civitate tam diligenter quam jus civile retinendum. Etenim hoc sublato nihil est quare exploratum cuiquam esse possit, quid suum aut quid alienum sit, nihil est quod æquabile inter omnes, atque unum omnibus esse possit. Proinde & Jurisprudentia, quæ justitiæ doctrinam & præcepta tradit, necessarium est Magistratibus & Gubernatoribus Reipubl. moderanda instrumentum. Hæc jus suum cuique tribuit. Deo cultum, magistratibus honorem & reverentiam, minoribus comitatem & benevolentiam, oppressis & afflictis tutelam, dubiis consilium, omnibus innocentiam.

Quamobrem summo in honore & pretio merito semper habitusunt illi, qui justitiæ colunt, bonum & æquum administrant,
æquum

aquum ab iniquo separant, licitum ab illicito discernunt, ac inprimis Magistratus amplissimis laudibus dignissimi censentur, per quos leges & jura recte reguntur, ac executioni mandantur. Quod eleganter Imp. Fredericus in Auth. Habita. C. Ne fil. pro pat. laudabili sanctione confirmat, dum inquit. Cum omnes bona facientes laudem & protectionem mereantur, tum ii maxime, qui divinarum humanarumque legum sunt periti, utpote quorum scientia totus illustratur orbis, & ad obediendum Deo & magistratibus subjeutorum vita informatur, speciali dilectione ab omni injuria defendi debent.

Quinimo illos, qui justitiam recte sancteque administrant, aeterna manent pramia, uti eximius Propheta Dei Daniel praeclare scriptum reliquit, inquiens: Qui justitiam recte exercent, fulgebunt quasi splendor firmamenti, & sicut stellæ in perpetuas æternitates. Habetis Illustres & Amplissimi Domini Ordines hæc duo ornamenta & subsidia in vestris provinciis, religionem scilicet reformatam, bonas & salutare leges, quæ Rempub. vestram beatam, fœlicem & florentem constituunt. Vos omni ope, cura studioque (prout facitis) adniti decet, ut cum Deus vos ad clavum Reipub. collocaverit, vestra prudentia, consilio & patrocinio,

Ecclesia & Respub. vobis commissa bene beateque vigere, & in perpetuum foeliciter efflorescere possint. Porro ut ego etiam, tum ad Reipub. propagationem, tum Academia vestra amplificationem (in qua Clarissimi Domini Curatores me ad instruendam in civili sapientia juventutem collocarunt) aliquid opera subsidiique conferrem, volui haece expositiones & commentationes ad utilissimum & celeberrimum Titulum de diversis Regulis Iuris antiqui studio meo elaboratas in lucem proferre. In quo opusculo hoc meum praeipuum institutum, hic finis & scopus mihi propositus fuit, ut studiosorum Iuris conatus & labores pro virili promoverem, ac in difficilioribus & obscuris Iuris Regulis explicandis lucem aliquam ostenderem, & veritatem variis Interpretum opinionibus involutam eruerem, & in medium proferrem.

Porro cum hunc Commentarium repetita vice in lucem ediderim, causa & occasio hac fuit, quod cum ante annos quadraginta aliquot studiosis hunc titulum in Academia Marpurgensi interpretatus essem, illi me in seio & inconsulto eundem Commentarium rudem & impositum typis excudi curaverunt. Cum itaque plerumque accadat, ut Professores in praelectionibus saepe aliquid obiter & precipitanter dicant, quod tamen no-
lunt

lint publicam lucem aspicere, omniumque oculis ac lectionibus exponi, hinc factum est, ut pleraque non satis maturè & exactè examinata in primam editionem à discipulis sint congesta; unde volui ab hisce mendis & defectibus hunc librum repetita editione vindicare. Quamobrem cum omnia priora exemplaria jam essent distracta, sub incudem hunc Commentarium revocaui, eumque longe exactiori diligentia & cura exornatum iterum in publicum dedi, & amplius quam centum exemplis illustravi, ut non dubitem, quin hic labor studiosis luris gratus, acceptus, utilis, & commodus sit futurus.

Porro maxima & summa est Regularum juris utilitas. Nam primò ad conservandam & stabiliendam memoriam eorum quæ in jure prolixè & diffusè traduntur, plurimum momenti & utilitatis hic Titulus adfert. Siquidem Pandectarum compilatores, cum de universi juris partibus fuisse lateque disseruissent, idque opus in immensum excrevisset, tandem regulas quasdam & quasi locos communes subnectere consultum fore judicarunt. Unde si ad quamlibet controversiam specialis decisio juris statim non occurreret, perinde atque ex communi thesauro & supellectile excerpere possemus, quod ad propositam questionem faceret,

faceret, ut quod juris est, quodammodo ex tempore responderemus. Regula namque juris brevi compendio complectuntur omnia, qua speciatim fusè & prolixè in vastissimo juris Oceano pertractantur, atque generalem indicem in universum jus continent. Secundo ad hunc utilissimum Titulum perdiscendum studiosos incitare & commovere debet, quod ex Regularum Juris cognitione maxima tum in disputando solertia, tum in decidendis causis promptitudo comparetur. Siquidem in controversis dubiisque juris questionibus, rei veritas & intellectus plurimum illustratur, si aliquod axioma seu regula juris ad ambigui dissolutionem sit in promptu. Quod argumentandi genus ex allegatione regularum juris desumptum, ad cognitionem veritatis ita necessarium est, ut sine eo nec scholasticus proficere, nec Doctor jura interpretari, nec Advocatus causas defendere, nec denique judex controversias rectè definire possit. Cum enim in foro & judiciis ambigua causarum merita hinc inde trutinantur, & in utramque partem disputantur, certè qui regulam juris pro se habet, is claram, certam & fundatam suam intencionem habere dicitur, & secundum Regulam pronunciandum est, nisi de contrario aut specialitate probetur, per tex. in l. ab ea parte. ff. de probat. Accedit

dit ad utilitatem hujus tituli, quod utriusque juris antea scripti censura in hisce regulis earumque exceptionibus resolvatur, & propemodum ex hisce regulis recta ratio dari possit, cur ita quaque in jure sint constituta. Sunt enim Regula prima juris principia, seu generalissima quadam sententia & decisiones, quas Dialectici maximas vocant, Geometra Problemata, Medici aphorismos, ad quas veluti ad Cynosuram recurritur in qualibet facti specie decidendam.

Porro ideo volui hunc commentarium meum sub patrocinio & auspiciis Illustrum Statuum, hoc est, equestris Nobilium Ordinis, nec non sub tutela primariarum sex civitatum Hollandiæ in lucem emittere, quod jam per xxxvi. annos in celeberrima Academia vestra munere Professoris sum defunctus, in eaque juventutem mihi commissam fideliter docendo ac scribendo in iure civili institui & erudiui. Cumque à Clarissimis & Prudentissimis Dominis Curatoribus, liberali stipendio benigne sim cohonestatus, volui hoc quaecunque gratitudinis testimonium & symbolum, erga Amplitudinem & Nobilitatem vestram publicè extare. In primis autem hunc libellum vobis Nobilibus & primario Illustrum Equitum Ordini dedicatum volui, quod hic
vester

vester Status sit totius Batavia suprema dignitas, summumque decus atque ornamentum. Cum enim sedeatis primo loco ad clavum & gubernacula Reipub. & ante omnes suffragia in Comitibus publicis proferatis, tum imprimis amplissima & honoratissima quaque officia vestro Ordini deferuntur. Idque merito & summo jure receptum est, cum verisimile sit, semper ex melioribus prodire meliores. Sic primo ex Nobiliam Ordine eliguntur & constituuntur praefecti sylvarum, & Domini venationum. Quo munere hodie maxima cum laude fungitur Nobiliss. Dominus Johannes de Wasse-naer, Dominus in Duvenvoorden, Voorschoten, & Sterrenburgh. Secundo ex Ordine Equestri semper unus nominatur & eligitur ad amplissimum munus Curatorium Academia Leydensis. Cui officio jam summo cum honore praest Nobiliss. & Strenuissimus Vir, Dominus Adrianus de Svieten, Dominus in Svieten, Rhénolandia Baillivus & Dijckgravius. Adhuc ex hoc Ordine ut plurimum eliguntur Praesides Curiarum suprema & provincialis, justitia supremi administratorum & vindices. Quo munere jam summa laude defungitur, suprema videlicet Curia Praeses, Clarissimus & Nobilissimus Vir, Dominus Reginaldus à Bredero-den, Baro in Wessenbergh & Sevenhufen &c.

Deni-

Denique ex hoc Ordine plerunque viri graves & spectabiles deliguntur, qui ad diversos Reges, Principes & Monarchas praclaris legationibus funguntur. Sic inter ceteros praecipue memorandus est vir Clarissimus & Nobilissimus D. Franciscus ab Arlens, Eques, Dominus in Somersdijck, &c. Qui cum apud Potentissimum Regem Galliarum, Henricum Magnum, tum quoque apud Serenissimum Regem magna Britannia Iacobum legationibus diversis honorifice defunctus est, resque & negotia Belgii summa cum gratia, dexteritate & solertia, magnoque Reipubl. bono feliciter administravit.

Porro sunt haec sex majores & principales Hollandiae civitates totius Reipub. Batavicae columnina & munimenta. Haec enim civitates una cum Equestri Nobilium Ordine solum magnum Senatum ante civilia bella & intestinas dissensiones Belgicas constituebant, haec tantum ad Comitia vocabantur, de pace & bello decernebant, Leges & Statuta condebant, vectigalia & tributa imperabant, omniaque quae ad statum Reipub. pertinent, foeliciter administrabant. Quod aperte comprobant in edicto Philippi II. Regis Hispaniae, promulgato Anno 1556. 17. Decembris, posita haec verba, Quod Rex Philippus ad petitionem Nobilium & Equitum & sex majorum civitatum Hol-

Hollandiæ (qui constituunt & repræsentant Status Hollandiæ) per modum gratiæ, permissionis & consensus, certum modum procedendi constituit in judiciis & litibus forensibus in Curia provinciali Hollandiæ.

Inter quas civitates primo loco occurrit DORDRECHTUM, quod habet amplissimum privilegium, scilicet jus Stapula, adamantinum illius Reipub. nervum & vinculum. Quo continetur, quod omnes merces exotica, puta fruges, vina, ferrum, ligna, & alia quæ Rheno, Vahali, Mosaque deportantur, ibi primum, sisti & stabulari debent, ut ibi primum, si fieri commodè potest, vendantur, sin minus, liceat eas merces aliò vendendas transferre, etiam non soluto stato portorio.

Urbi vero HARLEMENSI, summo jure debetur præter celebrem Damiatæ expugnationem, gloriosum & nobilissimum artis typographica inventum, quo omnes Libri manuscripti, qui in Monachorum claustris antea latitabant, nunc hujus artis beneficio ab omnibus legi & intelligi possunt, cum maximo usu & commodo totius Christiani orbis.

DELPHENSIVM Cerealis potus sua bonitate & præstantia omnes alias cerevistas superat, & ita passim expetitur, ut vix alio potu bona Flandria pars utatur, præter Zelan.

Zelandiam , & potiozem Hollandia tra-
ctum. Quæ res magnum & uberem qua-
stum civitati isti adfert , tot passim taber-
nariorum & cauponum millibus Ordini Ce-
revisiariorum (qui nervus & columen est
Reipub. & trientem ferè civitatis consti-
tuit) obnoxiiis & addictis. Præterea ma-
gnum quoque ornamentum & uberrimum
quæstum civitati Delphensi adfert , quod
in eam urbem ditissimi quique mercatores
Angli nuper commearunt , ibique jus Sta-
pula exercenda in mercatura pannorum An-
glicorum collocarunt. Vnde ad eam urbem
quotidie ex Belgii unitis provinciis ditissi-
mi quique mercatores ad negotiationem pan-
norum exercendam se conferunt , uberr-
imumque isti urbi commodum & quæstum
adducunt.

In urbe vero LEYDENSI Poten-
tissimi & Illustrissimi Domini Ordines Hol-
landia , nec non Illustrissimus Guilhelmus
Princeps Auræcus , propter strenuè nava-
tam operam , & fortiter toleratam obsidio-
nem , Anno Domini 1575. ad 8. Februarii
diem , instituerunt Academiam , apud ex-
teras nationes valde celebrem & efflore-
scentem , eamque celeberrimis & doctissimis
Professoribus exornarunt , in qua non so-
lum Batavica juvenus , sed etiam Geldri-
ca , Zelandica , Frisica , Ultrajectina , vera
pieta-

pietate, doctrina, omnibusque liberalibus artibus & scientiis imbuitur. Quinimo non solum in hac Academia subditi liberarum Belgii provinciarum, verum etiam exterarum regionum incola, Germani, Galli, Angli, Scoti, Dani, Sueci, Poloni, Moscovita & alii liberalibus artibus & scientiis diligenter incumbunt, & inde pietate, doctrina, moribus politioribusque literis exculii discedunt, & domum revertuntur.

Porro AMSTELODAMUM, vere emporium est totius orbis celeberrimum, viris & operibus dives ac prepotens. Certe nullum aliud emporium frequentioribus classibus corbitarum & onerariarum navium aditur, ut cetera emporia ad Amstelodamum collata nihil sint. Sape enim experientia compertum est, trecentas naves onerarias, & amplius, frumento aliisque mercibus Cimbricis & Scythicis saburratas intra octidui spacium appulisse, & onus magna ex parte expedivisse. Quinimo ex altero novo Orbe, India puta Orientali & Occidentali, quotannis plurima naves, pretiosissimis mercibus, gemmis, auro, argento & aromatis repleta in hanc urbem appellant, summasque opes & divitias in regiones & provincias Belgicas important. Præterea hac urbs admodum erga externos est hospitalis & officio-

officiosa. Hic enim videas hospitio excipis Italos, Hispanos, Lusitanos, Britannos, Scotos, Gallos, Armenios, Sarmatas, Cimbrōs, Suecos, Noruegos, Danos, Livonos, & si qui alii sub habitabili orbe latent, & reperiuntur.

Postremo Gouda urbs ab Illustribus Comitibus, & Ordinibus Hollandia destinata est, ut in ea haberetur conditorium atque Gazophylacium, in quo asservantur omnia privilegia, diplomata atque indulta, quae tum Comites Hollandia, tum alii Potentes Principes & Reges equestri Ordini, & civitatibus Batavia donarunt, & benignè concesserunt. Præterea nulla usquam urbium Hollandia frequentiora vel feliciora alit producitque plantaria & pomaria, non vicinis modò Belgis, sed longè dissitis quoque regionibus expetita, quibus tum intra muri ambitum, tum extra urbem in prædiis suburbanis, civitas ista supra modum abundat.

Vestrum est, Illustres, Amplissimi & Potentissimi Domini Ordines hæc mea studia, labores & conatus meos hilari & benigna fronte, animoque placido & sereno suscipere, sicque ad majora & præclariora ingenii monumenta, quæ adhuc in jure civili exarata in scriniis habeo, proferenda, & in lucem edenda me animare, provehere, & excitare.

DEUS

DEUS OPT. MAX. vestram Celsitud.
Amplitudinem & Nobilitatem ad divini sui
nominis gloriam, Ecclesia & Reipub. salutem
atque incolumitatem diutissime & felicissime
protegat, conservet, & defendat. Valete Am-
plissimi & Potentissimi Domini Ordines, me-
que clientulum vobis addictissimum & obse-
quentissimum, favore, gratia & patrocinio
vestro sublevate. Dat. Lugduni Batav. An-
no reparata salutis, clō Io cxxiv. Cal.
Martii.

Vestræ Celsitud. & Nobilitat.
obsequentiss

EVER. BRONHORST, J. C.

PRO.



PROLEGOMENA

Ad Titulum de Regulis Juris.

Quandoquidem ea quæ præsentem alicujus rei fructum nobis ob oculos statuunt, solent nos libenter ad ejusdem materiæ cognitionem & studium perducere, animosque discentium acriter inflammare; operæ pretium visum mihi fuit, ut paucula de celeberrimi & utilissimi hujus Tituli dignitate & præstantia, præfationis loco præmitterem. Summa itaque & potissima hujus Tituli commoditas hæc est, quod ad conservandam & stabiliendam memoriam, eorum quæ passim in Jure confusè & tumultuante traduntur, plurimum momenti hic Titulus adferat. Siquidem Pandectarum compilatores cum de univer-
si

si juris partibus fusè latèque differuissent, idque opus in immensum excrevisset, tandem regulas quasdam & quasi locos communes in ordinem redigere & subnectere, consultum fore judicarunt. Unde si ad quamlibet controversiam specialis quædam juris decisio statim non occurreret, perinde atque ex communi thesauro & suppellectile excerpere possemus, quod ad propositam quæstionem faceret, ut quod juris est, quodammodo ex tempore responderemus. Quæ ratione quid aliud efficere conati sunt Regularum juris auctores, quam ut ejus scientiæ studiosi immodicam illam veteris Juris perplexitatem facili compendio assequerentur? Regulæ enim generali atque brevi tramite ea complectuntur omnia, quæ speciatim fusè & prolixè in vastissimo Juris Oceano pertractantur, atque generalem indicem in universum jus ostendunt. Secundo ad hunc utilissimum Titulum perdiscendum vos incitare & commovere debet, quod ex hujus materiæ cognitione, maxima tum in disputando solertia, tum in decidendis causis promptitudo comparetur.

Si-

il. re. & re. o. et. it. 2. 1.
Siquidem in controversiis dubiisque
quæstionibus rei veritas & intelle-
ctus plurimum illustratur, si aliquod
axioma seu regula juris ad ambigui
dissolutionem in promptu sit. Quod
subjecto exemplo manifestum evadet.
Perplexæ est & ardua in Jure dispu-
tatio, *An malæ fidei possessor sumptus*
quos impendit in ædificando vel reficien-
do rem alienam, recuperet. Et post va-
rios legum & rationum conflictus de-
ciditur, *Eum necessarios, & utiles etiam*
sumptus, si modo sine læsione status prio-
ris rei auferri possint, deducere posse. l.
domum 5. C. de rei vend. l. in fundo 38. ff.
eodem. Quod ex hac regula juris pla-
num & expeditum redditur, quia pe-
titor non debet ex aliena jactura lu-
crum facere, l. plane 38. ff. de pet.
her. Jure enim naturæ æquum est, ne-
minem cum alterius jactura locupletari
debere, l. jure naturæ 206. de Reg. jur.
Quod argumentandi genus ad cogni-
tionem veritatis ita necessarium est,
ut sine eo nec scholasticus proficere,
nec Doctor in scholis jura interpreta-
ri, nec Advocatus causas in foro de-
fendere, nec denique Judex contro-
versias recte definire possit. Cum e-
nim

nim in foro & judiciis ambigua cau-
farum merita hinc inde trutinantur,
& in utramque partem disputantur,
certè qui regulam Juris pro se habet,
is certam, claram, & fundatam in-
tentionem suam habere dicitur. Est
Gloss. in l. omnis definitio, 202. infr.
eod. & secundum regulam pronun-
tandum est, nisi de contrario aut spe-
cialitate probetur. l. ab ea parte 5. ff.
de probat. Accedit ad utilitatem quod
utriusque juris antea scripti censura in
hisce regulis, earumque exceptioni-
bus resolvitur, & propemodum ex
hisce regulis recta ratio dari possit,
cur ita quæque in jure sint constituta.
Sunt enim regulæ prima Juris princi-
pia seu generalissimæ quædam senten-
tiæ, quas Dialectici maximas, Medici
Aphorismos vocant, ad quas veluti ad
Cynosuram recurrimus in qualibet fa-
cti specie.

LAUS

LAUS REGULARUM JURIS,

Ex Oldend. in locis communi-
bus actionum.

Quo consilio ICti. quoque legibus
omnium negotiorum & rerum
diligenter præscriptis subjecerunt Re-
gulas & Theses Juris velut summa-
rias quasdam & generales positiones
ex tota civili disciplina collectas, qui-
bus quasi in fascem contraxerunt ea,
quæ per singulas rerum circumstan-
tias diffusè tractarunt, ut videre est
ex l. i. ff. de Reg. Jur.

FRANCISCUS COR-
NELIUS BRIXIENSIS,

In Præfatione ad Commentaria
Dyni in Regulas Juris.

Andreas Alciatus, vir cum in o-
mni alio genere doctrinæ summa
* * cum

*cum laude versatus , tum incredibili
& penè divina in interpretandis legi-
bus scientia , Commentariis Dyni in
Regulas Juris Canonici tantum tri-
buere solitus est , ut quoties eorum
mentio inter publicè docendum orire-
tur , non dubitaverit dignos pronun-
tiare , quos Iure operam dantes nun-
quam de manibus deponerent , ac ad
verbum ediscere niterentur.*

CORASIUS

In libello de Arte Juris , c. vi.

P*Rimò omnium universi Juris Re-
gulas , moxque tractatum de Ver-
borum significatione percurrat studio-
sus , quæ sunt generalia Juris princi-
pia & elementa. In docendis enim ar-
tibus ab universalibus & nobis notio-
ribus , ad singularia procedendum est.
Deinde pari cura Titulos tum civilis
tum Pontificii Juris relegat , deni-
que*

que quatuor Institutionum Juris libros evolvat : atque hac uno plus minus anno perficiet.

CUJATIUS

Libro VII. Observ. c. xxxvi.

B *Ulgarius & Placentinus qui scripserunt ad Regulas Juris, sunt propter scribendi puritatem commendabiles, veteres Juris interpretes, qui tempore Accursii floruerunt. Bulgarus singulas regulas exemplis ex ipsis Legibus desumptis illustravit. Placentinus verò additiones, seu exceptiones Regularum adjecit, & Bulgari notis subjunxit.*

D. EVER. BRONCHORSTII

Juris Antecessoris præstantissimi
commentationes extrema fene-
strute editas,

PETRUS CUNÆUS, J.C.

Perfunctæ quondam laudibus cunctis
senex,

Privaque felix luce claritudinis,

Tu, cui senectæ portus haud ingloriæ,

Poterat quietis esse: quæ cupido te,

Quis tantus ardor mente concita rapit,

Tot ut subinde grandiora industriæ

Monumenta vulges usibus mortalium?

Sic nempe res est. Dîa mentis indoles,

Quanto propinquat ultimus dies magis,

Cognata cum jam visitabit sydera,

Deoque conjungetur & cœlo suo,

Hoc plura tentat quæ suis natalibus

Condigna credit. Summa virtus hæc Dei est

Se publicare mundo. Is est par numini

Qui plurimum auget seculi sui bona,

Prodestque cunctis. Petitur hâc cœlum viâ.

Ad

Ad Clarissim. & Excellentissim.
Juris-Consult.

E V E R A R D U M
BRONCHORSTIUM,

Cum suas in Tit. De Regulis Juris
Commentationes publicaret.

Romani tutela fori, quo preside terras
Lugdunice colit mœnia sancta The-
mis,

Felix, cui longos Lachesis virtutibus annos
Æquat, & emerito non sinit esse seni.

Sic sua consueti veniunt ad prælia tauri,

Sic sua longævus præmia poscit equus,

Exhausta est Astræa tibi, neque crescere no-
men,

Materiâ famam deficiente, potest.

Restabat legum titulo digesta sub uno

Pagina, qua juris totius instar habet.

Hac canis servata tuis: neque dignior illo est,

Qui jam Romani Regula iuris erat.

DAN. HEINSIUS.

Honori & memoriæ

Clarissimi Viri,

D. JOANNIS BLASII,

JC. Advocati, & Poëta eximii,

Cum novo Commentario illustra-
set Scripta

D. EVERARDI
BRONCHORSTII.

Quantum est, in terris Laudum sta-
tuisse Trophæa,

Et cum venturâ Posteritate loqui.

Sub juga Barbarie primùm, vitisq; reda-
ctis;

Perpurgasse suis sordibus inde Forum.
Ne mala per Civem innocuum contagia ser-
pant

Simplicitasque vetus protinus exul agat.
BLASIUS hoc fieri, Herculeo Cona-
mine contra est,

Restituens THEMIDI Fasque fidem-
que suæ.


Cui nunc in teneris Sapiencia nascitur annis;
Orditurque potens qui nova facta Vi-
rûm.

Dum

Dum Magni est ausus BRONCHORSTI
vellere manes,
Illius & scriptis addere ritè manum.
Ut, quod tanta Viri, forsan, nec viderat
ætas,
Viderit hoc oculis altera cura suis.
Vos BATAVI, quorum obtusa est non
amplius auris,
BLASIA DÆ hæc jugi volvite scri-
pta manu.
Et Phœnica novum sic, credite, posse rena-
sci,
Exuvias posuit cum Pater Ipse suas.

REINERUS NEUHUSIUS,

Alcmæia cId Id c LXIV.
V. Cal. Sept.





IN TITULUM
De
REGULIS JURIS
COMMENTARIUS.

BIBLIOTHECA
ROMA
VITTORIO EMANUELE

Ad Rubricam.



Inscrip̃tio hujus tituli hoc modo
legitur: De DIVERSIS RE-
GULIS JURIS ANTIQVI.
Ex qua duo sunt observanda.

I. Quod de diversis regulis, ac non de
universis, vel simpliciter de regulis juris
titulus hic inscribatur: Non enim omnes,
sed multiplices ac quam plurimæ regulæ
hic referuntur, eæ tamen potissimæ. Non
illa sub hoc titulo ponitur, quæ est in l. pen.
C. de pact. Vnicuique licere favori & juri
pro se introducto renunciare: Nec illa,
quam Paulus regulam vocat, in l. regul. 9. de
jur. & facti ignor. Iuris ignorantia nocet,
facti vero ignorantia non nocet. Plures
hujus-
facti vero
facti

A

hujusmodi regulas notarunt ad principium hujus tituli *Petrus Faber*, & *Cujacius*, quos consulere potestis.

II. Nota, jus antiquum hoc loco denotare illud, quod Juliani, Pauli, Ulpiani, Papiniani, & cæterorum Jurisconsultorum tempore in usu fuit, & quod per Impm. constitutiones, qui ante Justinianum vixerunt, introductum est. Justiniano autem antiquum dicitur. Simili modo Imperator noster omne jus antiquum in 50. libros Digestorum, seu Pandectarum se collegisse refert, §. *igitur*, 4. *in procem. Instit.*

CONTINUATIO.

Ordinis ratio h. t. hæc assignatur, quod cum novum non sit in legibus nostris, ut, specialibus quibusdam casibus enumeratis, generalis clausula subjiciatur, quæ præcedentia summam comprehendat, *l. si servus* 27. §. *cum eo* 15. ff. *ad leg. Aquil.* Hinc post varias juris materias præcedentes, titulus *de regulis juris*, veluti compendium superiorum omnium subjungitur, in quo sub unum adspectum rediguntur quæ in toto juris corpore fuse lateque disceptantur. Primo autem anno studiorum proponi debent regulæ studiosis juris ediscendæ, quia hæc est conveniens & optima docendi ratio,

tio, ut à generalioribus fiat initium: Nam ad cognitionem specierum debet præcedere cognitio generis. *Decius hic num. 5.*

AD L. I.

Paulus libro 16. ad Plautium.

Regula est, quæ rem, quæ est, breviter enarrat: Non ut ex regula jus sumatur: sed ex jure, quod est, regula fiat. Per regulam igitur brevis rerum narratio traditur, & ut ait Sabinus, quasi causæ conjectio est, quæ simul sum in aliquo vitiata est, perdit officium suum.

Explicatur hic etiam l. omnis definitio. 202. inf. h. t.

EXPLICATIO.

TRaditur in hac l. definitio regulæ satis obscure, quæ apertius hoc modo proponi potest. *Regula est generalis & brevis definitio ac sententia*, quando videl. plures casus similes brevi traditione concluduntur, non per specialem casuum expressionem, sed ejusdem rationis assignationem.

Nota I. ex hac l. quod regula similes casus brevi enarratione colligit, quando scil. generalem rationem proponit, quam juris prudentes in variis causis decidendis secuti sunt, l. jure natur. 206. l. secundum naturam 10. inf. h. t. Vel, quando singularia quædam diversis in jure locis occurrentia in unam summam colligit, memoriæ facilioris

ris gratia, ut in *l. fœmina sequ. leg. contractus* 23. & *l. actus legitimi* 77. *inf. eod.* Et hoc est, quod Sabinus hic vocat regulam causæ conjectionem, sumpta translatione ab Oratoribus vel Causarum Patronis, qui orationis summam initio causæ breviter judici exponere solent, ut attentum & instructum reddant judicem, *Duar. lib. 1. annivers. disputat. cap. 46.* Ut igitur coniectio causæ summam continet: ita regulæ earum rerum, quæ jure constitutæ sunt, breviaria atque summæ complectuntur. Sic *Ascon. Padianus* 3. in *Verrem* notat: *Est enim causa coniectio, quasi causa in brevem summam coactio.* Vide *Bernard. Walterum lib. 1. Miscellan. cap. 21.* ubi hanc sententiam perspicuè & dilucidè illustrat.

II. Nota, quod ex regula non sumatur jus, sed ex jure, quod prius erat receptum, regula constituatur. Quemadmodum Grammaticorum regulæ ex usu probatorum authorum & scriptorum constant, non autem usus ex præceptis. Regula namque jus, quod ante receptum est, & per singulas species observatum, id-generaliter & in universum quale sit, breviter ac simpliciter quoad ejus fieri potest, exponit. Objiciet aliquis, Quod regula Catoniana novum jus constituat, *l. 1. & tot. tit. ff. de R. Caton.*

ton. Quæ regula Catoniana tradit, quod legata quæ ab initio sunt inutilia, tractu temporis non confirmantur, etiamsi causa impediementi submoveatur, *d. l. 1. ff. de reg. Caton. l. cater. 41. §. 1. ff. de leg. 1.* Cui objectio-
ni responde, quod regula in casibus prius à jure decis, jus novum non constituat, sed quod ante constitutum erat, breviter enarrat. In casibus autem prius non decis, regula jus facit. Et sic accipe, quod de regula Catoniana obijcitur.

Postremo nota, quod regula vim suam & potestatem amittat, simul atque exceptio à regula proponitur. Ratio est, quod nulla regula tam generalis & firma inveniatur, quæ non patiatur aliquando exceptionem. Idque propter diversitatem circumstantiarum, ex qua jus certum limitationem recipit, vel propter speciales casus, qui à regula discrepant. Nam in toto jure generi per speciem derogatur, & illud potissimum habetur, quod ad speciem directum est, *l. in toto 80. infr. eodem.* Debet autem exceptio sub regula contineri. Puta, si de actione reali regula statuatur, non recte subjungeretur exceptio in actione personali. Et si de homine regula constituatur, non valet exceptio de asino. *Dynus in procem. ad h. tit. num. 18.*

AD L. 11.

Ulpian. lib. 1. ad Sabin.

Famina ab omnibus officiis civilibus vel publicis remota sunt: & ideo nec judices esse possunt, nec magistratum gerere, nec postulare, nec pro alio intervenire, nec procuratores existere.

§. 1. *Item impubes omnibus officiis civilibus debet abstinere.*

EXPLICATIO.

TRaditur in hac regula primo generale axioma, quod fœminæ publicæ & civilia officia non possint administrare: illudque deinde per aliquot exempla illustratur. Cujus regulæ duæ sunt rationes. Prima est, quia contra pudicitiam muliebri sexui congruentem foret, si virilibus fungerentur officiis, & alienis causis se immiscerent, *l. 1. §. secundo loco §. supr. de postul.* Quas conditio naturæ & verecundiæ stola, ut in foro & judiciis taceant, cohibere debet, *Valer. Max. cap. 3. lib. 8.*

Alteræ est, quod infirmum & fragile sit muliebri consilium, multisque captionibus expositum, *l. fin. C. de arbitr. argumento. l. 1. ff. de minorib.* Unde & illud responsum Papiniani extat, in multis juris articulis deteriorem esse conditionem fœminarum, quam masculorum, *l. in multis. 9. supr. de stat.*

stat. hominum. Vide *Specul. in tit. de procur.* ubi notat 37. casus, quibus deterior est conditio fœminarum, quam masculorum, & xi. quibus est melior fœminarum, quam virorum conditio.

Nota primo, quod mulier neque judicare, nec magistratus officio fungi possit, *l. cum prator 12. §. non autem 2. supra de judiciis l. 3. §. corporalia 3. ff. de muner. & honor.* Quod notabiliter fallit tribus in casibus. I. Si contrarium consuetudine receptum sit. Cum enim hæc prohibitio moribus introducta sit, contrario usu abrogari poterit. *c. dilecti, ex. de arbitris.* Ubi sancitur, quod mulieres, quæ habent jurisdictionem jure communi vel consuetudine, arbitri officio fungi possunt, & in eas valide compromitti potest, cum tamen jure civili mulier non possit esse arbitra, *l. ult. C. de arbitr.*

II. Si id mulieri jure hæreditario competat; ut in Reginis & Comitissis receptum videmus, *- Decius hic, num. 3.* Ita Angelus, referente hic Decio, Johannam Siciliæ Reginam in solio regali sedentem vidisse testatur, & tulisse sententiam contra Dominos de B. A. L. S. O.

III. Ex privilegio Principis mulier judicare potest. Sic 4. *cap. Judic.* universos filios Israël ad Deborah uxorem Lapidoth,

in iudicium abiisse, & populum Israëliticum 40. annos cum omni gloria rexisse legimus. Sic in Angliâ, Scotia, Lusitania, Hispania, sceptrâ regni etiam fœminis deferri satis superque historiæ testantur, & nostro sæculo etiam plurima exempla id apertè ostendunt.

Secundo nota, quod mulier in iudicio pro alio postulare, id est, advocacy officium exercere, & procuratrix esse non possit, *Concordat. l. alienam 18. C. de procur.* Cujus constitutionis origo ab improbissima muliere Calphurnia introducta est, *l. 1. §. 4. ff. de postul.* Limita, ut mulier, causâ cognitâ, procuratrix esse possit pro parentibus, cum morbo vel ætate sint impediti, nec alium quenquàm, qui agat, habeat, *l. fœminas 41. sup. de procur.* Et hæc vera sunt de procuratore ad iudicia: nam extra iudicium mulier procuratrix esse potest, & aliena negotia administrare, tam cum mandato, quam sine mandato, *l. 3. ff. de neg. gest. l. idemque 10. § si cui manda vero, ff. mandat.* *Petr. Fab. h. num. 48.*

Tertio nota, quod mulier intervenire, hoc est, intercedere, fide jubere, & obligare se pro alio non possit. Cujus ratio est, quod in hoc officio non solum nudum ministerium, sed etiam periculum rei familiaris

ris

ris vel setur, *l. 1. ff. ad SC. Vellejan.* Fœmina itaque, si pro alio intercesserit, fide jubendo, mandando, novandi animo alienam obligationem in se transferendo, suave res alterius causa pignorando, vel in judicio quemquam defendendo, vel cum eo, qui alioqui cum alio contracturus erat, contrahendo, hisce omnibus casibus beneficio SCti Vellejani tuta est, *l. cum ad eas 19. C. Ad SC. Vell. l. quamvis 8. §. si cum essem 14. ff. eod.* Quod beneficium cessat octo casibus, quos gloss. notat *in d. l. 1.* Extra hos casus in reg. positos à cæteris etiam virilibus functionibus mulier remota est; Cujusmodi est officium arbitri, tutelæ, *l. ult. C. de arbit. l. ult. ff. de tutel. executoris*, atque id genus alia. Sic etiam in testamento fœmina testis adhiberi non potest, *l. qui testamento 20. §. mulier 6. ff. de testam.* at in judiciis testis esse potest, *l. ex eo 18. ff. de testib.* Plures casus infinitos, quibus mulier virilia officia non potest subire, prolixè hic tractat *Decius*. Porto quia regula generalem prohibitionem continet, hinc, qui fœminam civile officium exercere posse contendit, id probare debet, cum regulam habeat è diametro contrariam, *Decius in l. 1. supra eod.*

Ad §. Item impubes.

Impuberes sunt, qui nondum 14. annos impleverunt, si masculi sint, 12. si foeminae. Hi ab omnibus civilibus officiis removen-
tur, propter infirmum & lubricum animi
judicium. Incivile enim esset, eos, qui pro-
priis rebus superesse nondum possunt, &
alieno indigent auxilio, ad res publicè vel
privatim gerendas adhiberi. Ea enim ætas,
quidquid videt, ignorat, *l. 1. C. de fals. mon.*
§. praterea 1. Institut. quibus non est permiss.
fac. testament. Quæ regula limitatur, si im-
puberes jurisdictionem aut hujusmodi of-
ficia habeant jure hæreditario: puta, si pa-
rentibus in dignitate, Regno, Ducatu, Co-
mitatu aut Imperio succedant, quia hoc
casu per tutores ea administrare possunt,
c. grandi, de supplenda neglig. praelatorum,
in 6. Sed hic convenienter quæritur, cum
dicatur in hoc loco, tum in *l. cum Prator 12.*
§. 2. ff. de judic. impuberem judicare non
posse, quid juris sit in pubere? Et statuen-
dum est, quod minor XVIII. annis non pos-
sit judicare, major autem XVIII. annis, quia
plenam pubertatem attigit, judicis officio
fungi possit, *l. quidnam consulebat 57. ff. de*
re jud. Nec obstat *l. cum lege 41. ff. de arbit.*
ubi dicitur, lege Julia cautum esse, ne mi-
nor

nor xx. annis judicare cogatur, quia respondendum, quod minor xx. annis non potest cogi ut judicet, sed tamen si sponte velit judicis officium suscipere, valet sententia ab eo dicta, *d. l. quidam consulebat*. Ex eo enim quod Lex Julia dicit, cum non cogendum judicare, colligitur, eum posse judicare: alioqui frustra Lex caveret, ne cogeretur, quod omninò facere aut præstare non posset, *Govea. ad l. 2. ff. de jurisd. Duaren. ad d. l. quidnam consulebat. Vide latius in centuria mea 1. ἐκχρηστικῶν assert. 65*. Illud notandum, quod ante pubertatem, honorarius titulus magistratûs, & nuda dignitas sine administratione defertur impuberi. *l. ult. C. de testam. milit.* ubi pupillus tribunus numerorum vel militum creatus dicitur: quia hoc de imaginariæ militiæ honore accipiendum, quo etiam absentes & titulo tenusungebantur, ut *Petrus Faber hic num. 32.* annotavit, & de Claudio Imperatore Suetonius admonuit.

AD L. III.

Ulpian. lib. 3. ad Sabinum.

Ejus est non nolle, qui potest velle.

EXPLICATIO.

DUplex hujus regulæ lectio est. Prima sic habet: *Ejus est non nolle, qui potest & velle*: Quæ est lectio Florentina, quam Rævardus hic recepit, & approbat Anton. Augustinus libro 1. emendat. c. 2. id est, ille potest pati & permittere, qui expresse velle & consentire potest. Velle enim apertum & disertum consensum requirit: non nolle, est tacendo consentire, & idem significat, quod non contradicere, l. 1. §. scientiam 3. ff. de trib. act. Ubi dicitur, quod non nolle est medium inter nolle & velle, & patientiam denotat. Vulgata & recepta lectio hæc est: *Ejus est nolle, qui potest & velle*, quam omnes Græci & Latini interpretes probant, teste Fabro hic. Et in summa hoc notat; Ei patet licentia nolendi, qui habet potestatem volendi. Quoties itaque in jure quæritur, an quis aliquid noluerit; imprimis inspiciendum, an etiam voluisse potuerit. Velle enim & nolle tanquam relata quædam & consequentia sese contingunt, quorum alterum
fine

sine altero consistere non potest. Quæ regula frequenter in materiâ testamentariâ usu venit. Exempli gratia, finge; Titius instituit Mævium hæredem sub conditione; Si navis ex Asia venerit: pendente conditione Mævius hæreditatem repudiat. Quæritur, an hæc repudiatio subsistat, & num ejus sit nolle, qui potest & velle: Mævius autem pendente conditione, etsi voluisset hæreditatem adire, tamen non potuit, propter incertum conditionis eventum. Consequens igitur, repudiationem quoque non subsistere, *l. is, qui hæres 13. in princ. sup. de acquir. hæred.* Quia nolle adire hæreditatem non videtur is, qui non potest adire, *l. 4. d. tit.* Unde idem Ulpian. ait, Ejus est actionem denegare, qui potest & dare, *l. qui vetante 102. §. 1. infr. eodem.* Aliud elegans exemplum sumi potest ex *l. pater Severiana m. 101. in princip. ff. de condit. & demonstr.* Excipitur ab hac regula unus casus. Nam locum non habet in tutore, qui nomine pupilli agnoscere bonorum possessionem potest, sed tamen eam repudiare non potest; atque ita tutori velle eo casu licet, non etiam nolle, *l. tutor. autem 8. ff. de bon. poss.* Ratio est, quia tutor ad commodum alterius adire dicitur, scilicet pupilli, ideoque non potest in præjudicium ejus,

14 IN TIT. DIG. DE REG. JUR.
ejus, hæreditatem, aut bonorum possessionem repudiare: cum semper tutor commoda pupilli promovere & adjuvare teneatur.
Decius h. num. 5.

AD L. IV.

Ulpian. lib. 6. ad Sabin.

Velle non creditur, qui obsequitur imperio patris, vel domini.

In h. l. etiam exponitur l. ad ea. 1 § 7. ff. h. tit.

EXPLICATIO.

Patria potestas, quam soli cives Romani in liberos suos exercent, item dominica, per quam servus in dominio domini esse censetur, ita constringunt libertatem servorum & filiorum fam. ut liberam voluntatem faciendi quicquid velint, non habeant: sed domino vel patre cogente & imperante, omnia administrare censeantur, §. *¶ libertas* 1. *Instit. de jur. pers.* §. 1. *Instit. de patria potest.* Hinc recte J Ctus Ulpian. hic infert, *Velle non creditur, qui obsequitur imperio patris vel domini.* Ad quam regulam duo alia juris axiomata referri possunt, videl. quod cogente imperio fit, id sponte fieri non dicitur, l. *si quis major.* 41. C. de *transact.* Item, actus non censetur voluntarius, ubi fit per eum, qui compelli potest, l. *novissime* 7. ff. *quod falso tut. gestum est.* Exempli

pli gratia. Qui est in aliena potestate, non potest invito patre vel domino, hæreditatem sibi relictam adire, ne pater invitus æri alieno obligetur. *l. qui in aliena 6. in princ. ff. de acq. har.* sed iussus ejus, qui cum habet in potestate, præcedere debet, *l. si quis mihi 25. §. iussum 4. ff. de acqu. har.* Contra si repudiet hæreditatem filius invito patre, ei non nocet, quia cum voluntate patris acquirere & repudiare hæreditatem debet, *l. is qui hares 13. ult. ff. de acqu. har.* quia velle & nolle non intelliguntur, qui imperio patris vel domini parere coguntur.

Contra hanc regulam glossa tale movet argumentum, quod coacta voluntas censeatur nihilominus voluntas, *l. si mulier 21. §. pen. ff. quod metus causa.* textus elegans in *l. si patre 22. sup. de ritu nupt.* ubi dicitur, *Si patre cogente filius duxit uxorem, quam non duxisset, si sui esset arbitrii, contraxit tamen matrimonium, quod inter invitos non contrahitur, maluisse hoc videtur.* Cui objectioni respondendum, quod coacta voluntas vera & spontanea voluntas non sit, sed qualificata & conditionalis, improprieque dicatur is velle, qui non ex libero animi motu & arbitrio quid facit. Præsens autem regula de propriâ, purâ & spontaneâ voluntate loquitur, quæ ex alieno non pendet

det arbitrio. Vel rectius ita responderi potest: Quod dicitur, *Si filius cogente patre duxit uxorem, maluisse hoc videtur*: hoc intelligendum est de metu reverentiali, quando filius propter reverentiam patris, & verecundiam, non ausus est patri contradicere, tunc maluisse id videtur, quod pater voluit, verecundiâ voluntatem mutante. Sufficit enim in nuptiis qualis qualis voluntas, & taciturnitas filii & filię pro consensu habetur, *l. sed quæ 12. ff. de sponsal. Cujac. lib. 16. Observe. c. ult.* Secus autem est, si pater filium verberibus, carcere, vel alio metu, qui in constantem virum cadit, coëgit, ad ducendam uxorem: tale enim matrimonium justo metu contractum, non subsistit, *l. si mulier 21. §. si dos 3. ff. Quod met. cau. c. cum Locum ex de sponsal.* Ubi dicitur, quod ille metus qui cadit in constantem virum, puta, qui infert periculum mortis vel cruciatum corporis, vel amissionem omnium bonorum, impedit & rescindit matrimonium. Idem traditur in *c. Abbas, & c. cum dilectus. ex. De his quæ vi met. cau.* quia matrimonia debent esse libera ab omni coactione, & plena libertate gaudere, cum coacta matrimonia difficiles soleant plerumque habere exitus, *c. Gemma. ex. de sponsal. & l. 134. ff. de V. O.*

AD L. V.

Paulus lib. 2. ad Sabinum.

In negotiis contrahendis alia causa habita est furiosorum, alia eorum qui fari possunt, quamvis actum rei non intelligerent. Nam furiosus nullum negotium contrahere potest: pupillus omnia tutore auctore agere potest.

EXPLICATIO.

L Ex hæc utilis & quotidiana est, & assignat differentiam inter furiosos & pupillos in contrahendis negotiis. Ex qua duæ notandæ sunt regulæ, quibus tota hæc controversia deciditur.

Prima de furioso hæc est, quod furiosus nullum negotium efficaciter gerere possit, licet meliorem suam conditionem faciat, etiam curatore auctore, *textus hic, & in l. furiosus 63. ff. de acquirenda hereditate. l. 1. §. furiosum. 12 ff. de obl. & act. l. furiosi 40. inf. h. t.*

Ratio est, quod in furioso nihil sit iudicii, menteque plane careat, habeaturque loco absentis & dormientis, *l. 2. §. furiosus 3. ff. de jure cod. l. ubi non voce 124. §. fin. l. furiosi 40. infr. eod.*

Nec distinguimus hic inter dementes & furiosos, quia rerum suarum neuter est dominus, & uterque curatorum consilio regitur,

18 IN TIT. DIG. DE REG. JUR.
gitur, *l. virum. 14. ff. de curat. furios.* Quare non modo non contractum inire, sed nec testamentum condere, aut codicillos facere furiosus potest, *§. praterea 1. Institut. quibus non est permiss. facer. testamentum, l. 5. C. de codicillis.* Item nec hæreditatem adire potest, *dict. l. furiosus.* Denique nec matrimonium aut sponsalia recte contrahit, *l. furor. 8. ff. de sponsalib.*

Secunda regula in pupillo ita procedit, quod pupillus omnia negotia tutore autore gerere potest, dum videlicet se aliis obligat; nam sine tutoris auctoritate alios sibi obligare potest stipulando, contrahendo, paciscendo, &c. Conditionem enim suam meliorem per se facere potest, *Instit. de auctor. tutor. in princ. l. puberes 101. de verbor. obligat.* Ratio est, quod in pupillo sint semina crescentis iudicii, & intellectus initium adsit, quod suppletur auctoritate tutoris, *l. quamvis 32. §. infans 2. de acquir. possess.*

Prædicta limitantur quando ex re actio venit. Tunc enim sine curatoris vel tutoris auctoritate obligantur furiosus & pupillus: puta, si communem fundum cum aliis habeant, & aliquid in eum sit impensum, ab iis repetitur, propter communionem, *l. furiosus 46. ff. de obligat. & act.* Item si pupillus

pillus sine tutoris autoritate contraxit, & locupletior ex eo contractu factus est, naturaliter obligatur, *l. naturaliter 13. §. fin. sup. de condict. indeb. l. quamvis 8. §. ult. sup. ad SC. Vellejan.* Imo post rescriptum Divi Pii efficaci etiam actione conveniri potest pupillus, in quantum locupletior factus est, *l. pupillus 5. sup. de autor. tutor. l. 3. §. pupillus, ff. de negot. gest. l. 3. in princ. sup. commodati.*

Ad finem legis nota, quod regula nostra de pupillo, qui fari possit, loquatur, ideoque infans (hoc est, qui infra septennium est, *l. in sponsalibus 14. sup. de spons.*) à furioso nihil distat, à contrario hujus regulæ sensu, *l. pupillus. 9. de acquir. hered. l. quod infans 69. sup. de rei vendic.* Quibus in L. L. comparantur infantes & furiosi, & idem jus in utroque statuitur.

AD L. VI.

Ulpian. lib. 7. ad Sabinum.

Non vult hæres esse, qui ad alium transferre voluit hereditatem.

EXPLICATIO.

USUS & effectus hujus regulæ in hoc consistit, ut quoties dubitamus, an pro hærede quis habendus sit, nec ne, statim

tim considerari oporteat, an gesserit aliquem actum, ex quo contraria voluntas adeundi appareat, ut si omisisse atque repudiassse hæreditatem debeat. Quæ voluntas declaratur verbis, vel facto: verbis, veluti si expresse protestatus sit, se adire nolle, aut si hoc ex certis indiciis colligatur, puta, si ob mittendam hæreditatem certum pactus sit precium: tunc enim statim successio ad proximum ordinem, puta ad substitutum vel legitimum hæredem in favorem creditorum devolvitur, *l. fuit questionis 24. supra, de acquir. vel omitt. hered. l. 2. supra, si quis omissa causa testamenti, ab intestato vel alio modo, &c.* Quando tamen semel quis hæres effectus est, non potest mutato consilio ad alium hæreditatem transferre, propter regulam juris, qua asseritur: Qui semel hæres factus est, non potest desinere esse hæres, §. *restituta 3. instit. de fideicommissar. hereditatib. l. sicut major 4. de repud. heredis.*

AD L. VII.

Pomponius lib. 3. ad Sabinum.

Ius nostrum non patitur, eundem in paganis & testato & intestato decessisse; earumque rerum naturaliter inter se pugna est, (testatus, & intestatus.)

EXPLICATIO.

IN *paganis*] id est, in non militantibus. Hæreditas res individua est, *l. Pomponius 8. ff. de rei vendic.* Una autem, & eadem res diverso jure censi non debet, *l. eum qui 23. ff. de usucapion.* Hinc fieri nequit, ut hæreditas, quæ velut imaginarium corpus personam defuncti repræsentat, pro parte testatorem referat, pro parte non referat. Itaque necesse est, ut vel ex testamento, vel ab intestato universa hæreditas deferatur, *Cagnolus hic.* Quæ regula eo pertinet, ut si quis decedat in una parte bonorum testatus, & in alia non sit testatus, causa testamenti trahat ad se causam intestati, id est, hæres scriptus universam hæreditatem obtineat, excluso legitimo hærede, qui ab intestato successurus fuisset, *l. quamdiu 89. infr. h. t.* Si enim testator unum tantum in semissem hæredem scripserit, totus as in semisse erit, & *Hæreditas. 5. Instit. de hered. instit.* Ex hac regula jus accrescendi profluxit. Quia si aliqui scripti



scripti hæredes portionem suam repudient, aliis adeuntibus, pars deficiens jure accrescendi iis adjicitur, *l. unic. C. quando non petent. part. &c.* Extenditur hæc regula, ut locum habeat, etiamsi testatoris dispositio sit in contrarium. Nam si testator scripserit, se in reliquis bonis vel intestatum decedere, hæres scriptus nihilominus in universa bona succedet, propterea quòd nemo facere possit, ut in suo testamento leges locum non habeant, *l. nemo potest 55. de legat. 1.* Quæ sententia est Fabri, Angeli, & recentiorum, in *§. hereditas 5. Instit. de hered. instit.* contra Bart. in *l. quoties, 9. §. si duo 13. ff. de hered. institu.* quod scilicet testator non possit in testamento suo prohibere jus accrescendi. Ita communi D. D. sententia receptum esse notat *Julius Clarus lib. 3. sentent. §. testamentum. quest. 74. nu. 2. per l. unic. C. Quando non peten. part. petent. accresc.* Dissentit Bart. qui vult, testatorem prohibere posse jus accrescendi, motus argum. *L. quoties 9. §. si duo ff. de her. instit.* ubi dicitur, *si duo sunt hæredes scripti, unus ex hisse fundi Corneliani, alter ex tertia parte ejusdem fundi, quod perinde erit, ac si ex aequis partibus scripti essent hæredes, nisi testatoris voluntas manifestè refragetur.* Quæ verba ita accipit Bart. quod hi hæredes inæqualiter

ter scripti hæredes ex certis partibus erunt hæredes, nisi testator voluerit eos scriptos hæredes fore tantum ex partibus fundi adscriptis, & reliqua bona velle pervenire ad hæredes ab intestato. Sed hoc non vult dicere Lex, sed ille est sensus Legis, quod scripti hæredes ex inæqualibus partibus fundi, perinde habebuntur, ac si æqualiter scripti sint hæredes, nisi testator voluerit eos inæqualiter succedere pro ratione partium fundi expressarum, ut illæ partes fundi repræsentent portiones hæreditarias totius assis: quia nemo potest facere ut leges in suo testamento locum habeant, *arg. d.l. nemo potest.* Leges autem volunt, ne quis decedat pro parte testatus, & pro parte intestatus, & per consequens testator non potest prohibere jus accrescendi.

Limitatur hæc Regula 4. potissimum casibus.

I. Si testamentum per querelam inofficiosi rescindatur; ut puta si duobus instituentibus querelam inofficiosi, hæres scriptus alterum superavit, & ab altero victus est: tunc decedit quis pro parte bonorum testatus, & pro parte intestatus, sed hoc fit ex postfacto, non ab initio, *l. nam etsi 15. §. fin. l. circa 24. sup. de inoffic. testamento.*

II. Si

24 IN TIT. DIG. DE REG. JUR.

II. Si testamentum non valet ex causa exheredationis, vel præteritionis: Tunc enim nihilominus legata debentur in eodem testamento relicta, *Auth. ex causa, C. de liber. præterit.*

III. Fallit, quoties alicui non est permissum de bonis universis disponere ex lege vel statuto, *l. 1. & ibi Dd. de secundis nupt.*

IV. Fallit in militibus, qui pro parte à testato & pro parte ab intestato decedere possunt, *l. similes 6. l. quarebatur 19. in princ. & l. si duobus 37. sup. de milit. testamento.* Eorum enim nuda & sola voluntas pro testamento est, *d. §. hereditas. Inst. de hered. inst.*

AD L. VIII.

Pomponius lib. 4. ad Sabinum.

Iura sanguinis nullo jure dirimi possunt.

EXPLICATIO.

Ius naturale usque adeo perpetuum & immutabile est, ut nullo humano jure tolli aut labefactari possit, nisi quod postulante Reip. & civium tranquillitate à jure civili aliquando temperamentum recipiat,
§. fin.

§. *fin. Instit. de jure natur. gent. l. jus civile*, 6. *sup. de justit. & jure*. Hinc scitè à Pomponio hìc relatum extat, quod jura sanguinis nullo jure civili dirimi possint. Per jura sanguinis intelligè jura cognationis, quæ naturali vinculo constant, *l. si. sup. de just. & jur.* Fieri siquidem nullo civili jure potest, ut qui filius est, non habeatur pro filio: Et rursus, qui patens est, non sit parentis loco, *l. jus agnationis 34. supra, de pact.* Etsi jus civile quandoque effectus cognationis quoad successiones ab intestato, & tutelas, certis de causis impedire possit, §. *fin. instit. de cap. dimin.* Sic per maximam capitis diminutionem, ut si in servitutem quis redactus sit, vel per mediam, ut si quis deportatus sit, amittitur jus sanguinis quoad successionem ab intestato, *l. i. §. filio 4. ff. ad SC. Tertull.* ubi dicitur, quod deportati liberi non succedant parentibus ab intestato.

Ex hac regula duas elegantes practicas notant Dd. I. Quod per statutum filiis legitima, quæ in locum alimentorum succedit, licet minui, non tamen possit in totum adimi, quia jure naturæ ipsis debetur, *Authen. de hered. & Falcid. §. primum itaque 2.* II. Quod non valeat pactum inter patrem & filium, ne filius à patre alatur, tanquam

juri naturæ contrarium, *Spec. in tit. qui filii sint legitimi*. Necare quidem videtur, & fame prolem mori cogit, qui liberis alimenta denegat, *l. necare. 4. ff. de agnos. & alen. liber.* Quod limitatur duobus modis hic à Decio.

I. Si filius seipsum alere possit, tunc enim à parentibus alimenta denegari poterunt, *l. si quis à liberis. 5. §. item Divus Pius, 5. ff. de agnoscend. & alend. liber.*

II. Sicut legitima, ita etiam alimenta tolli possunt per statutum ex gravi causa. Unde ex quibus causis filius exheredari potest, ex iisdem alimenta ei subtrahi possunt, *arg. l. si quis à liberis. 5. §. idem iudex 11. ff. de agnos. & alen. lib.* ubi dicitur, quod si filius patrem criminaliter accuset, posse patrem propterea filio tanquam ingrato denegare alimenta: ergo & poterit eundem filium propter eandem ingratitudinis causam exheredare. Rectè enim ibi Bart. tale colligit argumentum vel axioma, quod quibus causis pater potest filio denegare alimenta, ex iisdem potest filium exheredare. Nec hoc est contra naturam, quippe ut natura æquum est, filium in lucem editum alere, ita rursus æquum est, filium esse memorem sui officii, ne paternam pietatem usquam offendat. Ingratitudo enim, ut ait Imperator in §. *Optimè*,

mè, No. de nupt. tollit debitum naturæ. Et rectè piéque scriptum reliquit Bernardus, quod ingratitudo est ventus urens, siccans fontem misericordiæ, rorem pietatis, & fructum gratiæ.

AD L. IX.

Ulpian. lib. 15. ad Sabinum.

Semper in obscuru, quod minimum est, sequimur.
Exponuntur in *h. lege* etiam *l. semper in 34. l. semper in dubiis 56. l. quotiens 67. &c. in obscuris. 114. ff. infr. h. t.*

EXPLICATIO.

ORdo in obscuris interpretandis hic observari debet, ut primo inspiciatur quod inter contrahentes cogitatum & actum sit. Unde illa juris regula deprompta est: In contrahendo quod agitur pro cauto habendum, *l. cum quid. 3. ff. de reb. credit.* Quod si non appareat, quid actum sit, videndum quid verisimilius, & quod plerumque fieri solet in hisce negotiis, *l. in obscuris 114. inf. eod.* Si nec ita obscuritas tolli possit, ad regionis consuetudinem confugiendum, in qua contractus celebratus est, *l. semper 34. inf. h. t.* Quia ea quæ sunt moris & consuetudinis, etiam si conventum non sit, veniunt in bonæ fidei judiciis, *leg. quod si nolit 31. §. quia assidua 20. ff. de adil. edic. l. si fundus 6. ff. de evict.* Tandem in subsidium,

hisce omnibus deficientibus, ad hanc regulam recurritur, quod in obscuris id quod minimum est inspicere debeat, quia nemo suum facile jactare præsumitur, *l. cum de indebito 25. ff. de probat.*

Quæ regula procedit in ultimis voluntatibus, contractibus, delictis, & judicium sententiis. Hinc receptum est, ut nummis indistincte legatis, in dubio minimi, & exiguiores debeantur, *l. nummis 75. de legat. 3.* Sic etiam si in testamento scriptum esset, ut uxor tantam partem haberet, quantam unus ex heredibus, si non æquales essent partes heredum, uxor habebit partem minimam, quam unus ex heredibus habiturus erat, quia cum heres dare damnatus sit, in potestate ejus esset, quam partem daret, *l. qui concubinam 29. §. cum ita 1. ff. de leg. 3.* Similiter si testator duos fundos ejusdem nominis, sed diversi pretii habens, unum ex his alicui legaverit, nec legatarius doceat majoris precii fundum relictum, in dubio minorem legatum dicemus, *l. cum servum 39. §. scio, 6. ff. de legat. 1.* Ratio etiam specialis in legatis hæc redditur, quia in dubio semper testator intelligitur velle gravare heredem in eo quod minus est, *l. unum ex familia 67. §. si rem tuam 8. ff. de legat. 2.*

I. Excipe, nisi quid ad pias causas legatum

tum sit, ut puta Ecclesiæ: tunc enim optimū videtur in dubio relictum, *l. Titia* 38. §. *fin. sup. de auro & argent. leg.* ubi statuitur, quod si testator disposuit in testamento, ut heres in templo collocaret certam statuam vel imaginem; non expresso eo, ex qua materia esset conficienda: atque cum in eodem templo positæ essent æneæ & argenteæ imagines, in dubio heres tenebitur ad collocandam imaginem pretiosiore, hoc est, argenteam: idque favore Dei seu religionis Scævola respondit.

II. Fallit regula, si id quod debetur, in re minima non habeat utilitatem. Tunc enim res mediocris præstanda est, utpote homine legato, vel promisso, neque optimus, neque pessimus, sed mediocris præstandus est. Nec enim vilissimum servum habere expedit, *l. legato* 37. *de lega. 1. l. si quis argentum* 35. §. *similique modo*; *C. de donat.*

III. In contractibus hæc quoque regula obtinet. Unde qui stipulatus est decem aut quindecim, sola decem recte peter. Nam in summis, semper quod minus est, promitti videtur, *l. inter stipulantem* 83. §. *si stipulante*, 2. & *l. si ita* 109. ff. *de verb. oblig.* Item si post annum aut biennium sibi dari quis stipuletur, longius tempus tan-

30 IN TIT. DIG. DE REG. JUR.
tum in obligationem deductum videtur, itaque post biennium primo debitum exigetur. *l. si ita stipulatus* 109. *de verbor. oblig.*

IV Hæc regula locum habet in delictis, & sententiis judicum, proinde in dubio mitior pœna imponi debet, *l. interpretatione*, 42. *ff. de pœnis*. Unde decisum est, quod si judex pronuntiaverit, vim à reo commissam esse, nec adjunxerit publicam aut privatam, neque de eo aperte constet, de vi privata intelligenda erit condemnatio, *l. si praeses* 32. *de pœnis*.

AD L. X.

Paulus lib. 3. ad Sabinum.

Secundum naturam est, commoda cujusque rei eum sequi, quem sequuntur incommoda.

Interpretatur author in h. l. etiam l. quò tanta reddis. 73. ad princ. infr. h. 4.

EXPLICATIO.

CUM nihil æque ad conservationem rerum humanarum pertineat, quam legitimæ æqualitatis observantia, rectissime hic à Paulo Jcto relatum est, æquum esse, commoda cujusque rei eum sequi, quem sequuntur incommoda. Concord. text. notabilis, in l. unic. §. pro secundo 4. C. de cad. toll. ubi inquit Imp. Non est ferendus, qui lucrum quidem amplectitur, onus autem ei annexum contemnit. Cujus regulæ exempla

pla passim obvia sunt. Unde si post perfectam emptionem fundo vendito, & nondum tradito, per alluvionem quid accedat, emptoris lucro cedit, cum & incommodum & periculum rei venditæ ad eum pertineat, etiam antequam traditio interveniat, §. *cum autem* 3. *Instit. de empt. & vend.* Similiter & si domus vendita ante traditionem sine venditoris culpa incendio consumpta est, damnum ad venditorem non pertinet, sed ad emptorem, l. *si vendita* 11. ff. *de peric. & com. rei vend.* quia ad eundem spectat commodum rei venditæ.

Sic maritum fructus dotis lucrari æquum est, quia & onera matrimonii sustinere cogitur, l. *dotis fructum* 7. ff. *de jure dotium*. l. *pro oneribus* 20. *C. de lur. dot.*

Regula hæc & à contrario eleganter procedit, ut qui sentit lucrum, onus quoque sentire debeat. Unde si conventum sit, ut duæ partes lucri ad socium pertineant, eadem quoque partes damni ad eum pertinebunt, §. *illud*, 3. *Instit. de societ.* Tum deum autem regula locum habet, quoties par est ratio commodi & incommodi, & æqualitas in personis. Ideoque mulier ad successionem proximorum agnatorum admittitur, tutelam tamen non administrat. *Inst. de legit. agnat. tutela.* & *Instit. tit. de legit.*

legit. patro. tute. quia tutela munus virile est, *l. ult. ff. de tutel.* Ideoque tutela ad agnatum masculum etiam remotiorem, deferretur, exclusa fœmina proximior, *l. i. §. interdum 3. ff. de legit. tutor.*

AD L. XI.

Pomponius lib. 5. ad Sabinum.

Id quod nostrum est, sine facto nostro ad alium transferri non potest.

EXPLICATIO.

USus & effectus dominii in eo est, ut quod jure tenet quisque suum, id ab eo invito auferri non possit. Cum enim quilibet sit in re sua moderator & arbiter, *vulgata l. in re mandata, 21. C. mandati,* recte Jctus Pomponius sic infert: *Id quod nostrum est, sine facto nostro ad alium transferri non posse.* Per factum hic intelligimus traditionem cum voluntate nostra conjunctam, præcedente aliqua iusta causa, ad translationem dominii idonea, quales sunt donatio, stipulatio, emptio, legatum, & id genus aliæ innumeræ, *l. nunquam nuda 31. de acquir. rerum dominio, §. per traditionem, 40. Instit. de rer. divis.*

Unde recte responderunt Jcti, *Eum pro emptore rem non possidere, sed pradonem esse, qui eam emit, nec traditam accepit,*
 & abs-

Et absque voluntate venditoris nactus est possessionem, l. si ex stipulatione §. l. fundi 33. sup. de acquir. possess.

Nec obstat quod in usucapione rerum dominia invitis & ignorantibus dominis auferantur, quia hoc ob supinam negligentiam dominorum, res suas debito & statuto à lege tempore non petentium, tum etiam bono publico permittitur, ne rerum dominia diu deserta & in incerto jaceant; & ut aliquis litium sit finis; *l. ult. ff. Pro suo. Instit. de usucap. in princ.* Adde quod is qui patitur rem suam usucapi, alienare, & alienationi consentire intelligitur, *l. alienationis 28. ff. de V. S.*

Hæc regula non procedit, si Princeps ex justa causa privato rem suam auferat. Potest enim id facere propter commoditatem Reip. puta, si publicæ utilitatis causa veteranis militibus agri ab hostibus capti assignentur in præmium bellicæ virtutis, *l. item si verberatum 15. §. 2. sup. de rei vendicat. l. Lucius 11. ff. de evictionibus.* Quo tamen casu precium domino restituendum est, aut recompensatio facienda, *bonus text. in l. venditor 13. §. 1. communia prædiorum.* Secundo limitatur regula, quando vertitur bonum publicum, *per l. conventionum. 5. ff. de pact.* Ideoque Princeps & civitates

34 IN TIT. DIG. DE REG. JUR.
propter pacem ineundam possunt damna
& injurias subditis tempore belli illata re-
mittere, per c. in nostra. ext. de injur. Cagnol.
& Francus h.

AD L. XII.

Paulus lib. 3. ad Sabinum.

*In Testamentis plenius voluntates testantium inter-
pretantur. [alii legunt interpretamur]*

EXPLICATIO.

Publice expedit, suprema hominum judi-
cia exitum habere, l. vel negare, 4. ff.
quemadmodum testament. aper. Quare la-
borandum est, ut in obscuro magis valeant,
quam ad nihilum recidant defunctorum
voluntates, & plenius, id est, aliquanto lar-
gius interpretandæ sunt. Quibus & illa ad-
di potest ratio, quod semper credendum
sit, defunctos aliquid voluisse, & tamen
morbo impeditos, vel morte præventos
non rogasse vel scripsisse, l. si sponsus 5. §. si
quis rogatus, 15. sup. de donat. inter vir. & u-
xor. Huc pertinet illa vulgatissima juris re-
gula, *In contractibus plenam, in testamentis
plenioram, in beneficiis plenissimam interpre-
tationem faciendam*, text. in c. cum dile-
cti, ext. de donationib. Exemplum est in
l. 3. §. si vinum, 1. ff. de vino & trit. legat.
Ubi asseritur, quod vino legato, vasa quo-
que

que legata censeantur. Item deciditur in *l. cui vinum 6. ff. d. r.* ubi statuitur, quod vino legato vasa quoque debeantur, quamvis in legato vasorum nulla sit facta mentio. Nam id quod liquidæ materiæ est, quia per se esse non potest, rapit secum in locum accessionis id, sine quo esse nequit, *l. 4. supr. de penu leg.* Non tamen dolia, id est, vasa majora, quæ ad perpetuum fundi usum reservantur, legatarius consequetur, *l. vino 14. cum l. sequent. ff. de vino & trit. leg. Vi- de Cujac. lib. Obs. 2. c. 36.* Notanda porro hæc est differentia inter vinum venditum, & legatum, quod vino in doliis vendito possit id effundere venditor, nisi juxta præscriptum tempus auferatur, *l. 1. §. licet au- tem, 3. ff. de peri. & com. rei vend.* quod non potest hæres facere vino legato; *l. si hæres 8. de vin. trit. ol. leg.* ubi rectè Accurs. hanc differentiam notat inter vinum venditum & legatum. Simile exemplum de usu habemus in *l. plenum 12. §. sed si pecoris, 2. su- pra, de usu & habitat.* Ubi dicitur: quod pecoris vel ovium usu legato, neque lana, neque lacte, neque agnis uti poterit usufructuarius, quia hæc magis in fructu quam in usu sunt, attamen ad stercoreandum agrum pecore uti potest, & medico etiam lacte, quantum sibi necesse erit, ob hanc rationem, quod

non stricte, sed liberius & plenius interpretandæ sint voluntates defunctorum. Similiter legatis alimentis, & cibaria, & habitationem, & vestimenta contineri constat, *l. legatis 6. & l. ult. ff. de ali. & cibar. leg.* Et tamen qui transigit de alimentis, quod Prætor auctore facere debet, neque de habitatione neq; de vestimentis transegisse videtur, *l. cum hi 8. §. qui transegit 12. ff. de transf.* Idq; ex hac ratione est receptum, quod benignior & plenior interpretatio in testamentis, quàm in contractibus accipienda est.

Ex hac regula depromitur etiam ratio, quam ob rem is cui simpliciter ædium usus legatus sit, potestatem habeat, hospites, inquilinos, libertos, clientulos ad se in habitationem recipiendi, *l. 1. 2. 3. 4. & 5. supr. de usu & habitat.*

AD L. XIII.

Ulpianus lib. 19. ad Sabinum.

Non videtur cepisse, qui per exceptionem à petitione remouetur.

In *h. l.* etiam agitur de *l. is, qui actionem. 1 §. l. non videtur 51. l. Marcellus 66. l. nihil interest 112. l. si quis 115. §. 1. l. minus. 204. ff. h. t.*

EXPLICATIO.

CReditor in jure dicitur is, qui efficacem habet actionem ad rem petendam, hoc est, qui nulla exceptione perpetua

tuarepelli potest, *l. creditor 55. de verb. signific.* Itaque non videtur is cepisse, hoc est, cum effectu & pleno jure acquisivisse, cujus actio exceptione opposita eliditur, & in vanum prorumpit, *l. Marcellus 66. inf. eod.* Pariaque sunt, non habere actionem, aut eam habere, quæ per exceptionem repelli potest, *l. nihil interest 113. inf. eod.* Notabile exemplum ad hanc regulam retulit Ulpianus, in *l. si creditori 28. de legat. 1.* Ubi debitor creditori suo id, quod ei debebat, legaverat, cum tutus esset adversus eum exceptione, ut puta pacti de non petendo, vel simili: quæritur an hoc legatum utile sit? Et respondet Ulpianus, legatum valere, quia remissa creditori exceptio videtur, motus procul dubio hac regula, quod non videatur cepisse, id est, obligationem acquisivisse, qui per exceptionem à petitione removeri potest. Capere itaque in h. l. nostra cum effectu est accipiendum, ut significet, ita acquirere, ut acquisitum retineamus, *l. aliud est capere 71. supra de V.S.* Exemplo etiam sunt legata in testamento rursus adempta vel deleta. Ea enim cepisse legatarii non intelliguntur, cum heres eos legitima exceptione repellere possit, *l. 1. ff. de his quæ in test. del. l. 3. ff. de adimend. legat.* Et hæc est vera &

ra & genuina ad hanc legem interpretatio. Alii vero non infimæ autoritatis viri, ut *Iohannes Ramus quondam apud Lovanien- ses' Professor Regius, & Iuris Antecessor doctissimus, & Ferrarius*, hic ita hanc l. sunt interpretati, ut verbum *cepisse* pro *incepisse*, positum arbitrentur, ut hæc sit regulæ nostræ sententia: Non videtur iudicium incepisse, aut litem contestatus esse, quoad præscriptionem adversarii interrompendam, qui exceptione repulsus est, ex *l. mora litis, 16. C. de rei vendic. ubi* Imp. Diocletianus & Maximus pro regulâ tradunt, quod litis contestatio præscriptionem longi temporis interrompat, ut ita hæc Lex pro exceptione illius regulæ sit accipienda, quod illi iudicium incepisse, seu litem contestatus esse non videatur, qui per exceptionem à petitione remotus est, quasi pro non cœpto habeatur id quod iure reluctante cœpit. Quæ explicatio licet per se vera sit, tamen ad hunc locum nimis est contorta, & ab instituto satis aliena, siquidem Ictus hic ostendere voluit propriam significationem verbi *capere*, quod *capere* sit, *cum effectu accipere, & ita acquirere, ut acquisitum retineamus, l. aliud est capere 71. de verb. signif.* Posterior interpretatio ex hoc errore nata, quod verbum *cœpisse*
cum

cum diphthongo legerunt, ut idem sit quod incoepisse, quod in Pandectis Florentinis sine diphthongo emendatius legitur.

AD L. XIV.

Pomponius lib. 5. ad Sabinum.

In omnibus obligationibus, in quibus dies non ponitur, presenti die debetur.

EXPLICATIO.

QUod pure debetur, quando neque dici, neque conditionis dilatione obligatio suspensa est, confestim peti potest, *text. hic & in leg. cum qui calendis 41. §. 1. de verbor. oblig.* Incivile tamen & inhumanum foret, debitorem statim ad solutionem urgeri, ideoque laxamentum aliquod ei ad solvendum datur, quod ad minimum est decendium, ut in constituto observatur, *l. promissor 21. §. si sine die. 21. de constit. pec.* Neque enim creditor statim cum sacco paratus venire debet, ad recipiendam pecuniam, *l. quod dicimus 105. supr. de solution.* In exequenda re judicata quadrimestre spacium à ll. indultum est, *l. fin. §. ult. C. de usur. rei judic. l. si debitori 21. de judiciis.* Quod commodè hoc disticho expressit Accurs.

*In personali post menses quatuor, in re
Protinus est omnis sententia perficienda.*

Hæc

Hæc regula non procedit, si tacitè in ipsa obligatione dies comprehendatur, ut cum locus adjectus est obligationi: puta, promittit aliquis Argentinæ, se Francofurti soluturum: Eo enim casu licet pura sit obligatio, tacitè tamen inest tempus, ut non ante solvatur, quam Francofurtum ventum sit, §. *locus* 5. *Inst. de verb. obligat.* Similiter fallit regula, si quis promittat id, quod in utero est, aut fructus futuros: non enim ante ex ea obligatione conveniri poterit, quam per rerum naturam foetus editus, aut fructus in fundo nati fuerint, *l. interdum* 73. *de verb. oblig.* Idem dicendum est, si ex promittentis voluntate aut qualitate contractus dies tacite adjectus appareat, Unde si testator relinquat puellæ dotem, sane ea non præstari debet ante nubilem ætatem, argumento, *l. qui filium* 4 *ff. ubi pupillus educari debeat.* Decius hic nu. 2. ubi notat, Christophorum Porcum annotasse, se respondente ita judicatum fuisse. Dos etenim sine matrimonio non intelligitur, *l. 3. sup. de jur. dot.* Sic qui mutuam pecuniam dat, non potest eam confestim repetere, antequam debitor ea uti potuerit, cum ea sit mutui natura, ut in usum rei familiaris expendatur. Adhæc requiritur ut debitor ex mutuo aliquam habeat utilitatem, quia
non

non decipi quis debet beneficio, sed adjuvari, *l. in commodato 17. §. sicut. in fi. 3. ff. Commod. Decius h. nu. 3. Theophil. in §. 1. Institution. quibus modis re contrahitur obligatio.*

A D L. XV.

Paulus lib. 4. ad Sabinum.

Is qui actionem habet ad rem recuperandam, ipsam rem habere videtur.

Dictum quoque de hac *l. in l. non videtur 13. supr. h. t.*

E X P O S I T I O.

Magnus actionum usus est, & incomparabilis utilitas, per quas sine armorum strepitu, quod nostrum est, consequimur, & ne injuria nobis auferatur, legitimis modis tuemur, adeo ut teste JCro Paulo hic *qui actionem habet, rem ipsam habere videatur.* Quæ regula ad omnes actiones, tam in rem, quam in personam, recte extenditur, per *l. id apud se 143. de verb. signif.* Ubi generaliter JC. loquitur, *Id apud se quisque habere videtur, de quo habet actionem: habemus enim quod peti potest.* Item quod in actionibus, petitionibus, persecutionibus est, id in bonis nostris esse videtur, *l. bonorum 49. de verbor. signif.* Quibus egregiè concordat responsum Modestini in *l. rem in bonis 52. de acquiren. rer. dominio.* Rem, inquit, in bonis nostris intelligi-

42 IN TIT. DIG. DE REG. JUR.
telligimur habere, quoties possidentes, exceptionem, aut amittentes, ad recuperandam eam, actionem habemus. Proccedit autem hæc regula, non secundum rei veritatem, sed juris quadam interpretatione & fictione, quia si veritatem ipsam spectamus, minus est, habere actionem, quam rem; *l. minus 204. infra eodem.* Idque fit ideo, quia multa accidere possunt, ut rem petitam non consequaris, forte propter debitoris inopiam, quia inanis est actio, quam excludit debitoris inopia, *l. nam is 6. supra, de dol. malo.* Adde, quod dubius & incertus sit litis eventus, cum possit quis causam justam per iniquam judicis sententiam perdere, & cogitanda est mora temporis quæ in executione judicatis datur, *l. quod debetur 51. de pecul.* Quibus adde probationum defectus, sumptus litis, & innumeras fori molestas, quas actor subire cogitur, antequam rem petitam consequatur.

AD L. XVI.

Ulpian. lib. 21. ad Sabin.

Imaginaria venditio non est, precio accidente.

EXPLICATIO.

QUoniam emptionis substantia partim ex precio constat, *Inst. de empt. & vend. in pr.* fit, ut imaginaria, id est, simulata

lata & ficta venditio dici non possit, si forma contractûs, hoc est, precium in numerata pecunia consistens interveniat. Quod adeo verum est, ut licet non iustum, sed exiguum & inæquale precium numeretur, forte si donationis causa res minoris vendatur; imaginaria tamen venditio dici nequeat, sed utilis & valida venditio dicatur, *l. si quis donationis* 38. *de contr. empt.* Inter virum autem & uxorem viliori precio facta venditio, nullius est momenti, *d. l. si quis donationis in fi. l. vir uxori* 17. *in princ. ff. ad SC. Vell.* si cum animum vendendi maritus non haberet, ideò venditionem commentus est, ut donaret, *l. si sponsus* 5. §. *circa*, 5. *ff. de don. int. vir. & uxor.* Si tamen unico nummo contracta sit venditio, præsumitur imaginaria & simulata, exemplo antiquæ illius imaginariæ venditionis, quæ fiebat olim in testamentis, quæ per æs & libram condebantur, *Institut. de testamentis, in princip.* nam unus nummus verum precium non constituit, quo res ipsa æstimari possit. Quinimo uni nummo precium opponitur, *l. si quis ante* 11. §. *ult. de acquir. possess.* Ideoque emptio uno nummo contracta, speciem tantum refert, & imaginem emptionis. Quod tamen sic accipiendum est, ut non valente eo, quod simulatè

mutatè geritur, id est, venditione, valeat tamen id quod agitur, id est, donatio, *l. empti 9. in fin. de contrah. empt.* Similiter si quis conduxerit uno nummo, conductio nulla est, quia donationis speciem refert, *l. si quis 46. ff. locati.* Habet tamen emptio, quæ uno nummo fit, aliquando effectum aliquem, utpote expediendarum rerum gratia celebrata, *l. si ususfructus 66. in fin. ff. de jur. dot.* Ubi remedii loco ususfructus dotis causa datus à proprietario, uno nummo uxori à marito vendi potest divorzio facto, quia alioqui restitui non poterat mulieri ususfructus: cum ususfructus extraneo cedi non possit, sed tantum domino proprietatis.

AD L. XVII.

Ulpian. lib. 23. ad Sabinum.

Cum tempus in testamento adjicitur, credendum est, pro herede adjectum, nisi alia mens fuerit testatoris: sicuti in stipulationibus promissoria gratia tempus adjicitur.

Concordat cum *h. l. lex, nihil peti 186. ff. b. t.*

EXPLICATIO.

CUM in dubio favorabiliores sint debitores quam creditores, hinc recte J. C. Ulpianus respondit, *Quoties tempus legati solvendi in testamento adjicitur, in favorem & utilitatem heredis id adjunctum censi,*

cenferi, quia in exequendis & solvendis Legatis & fidei commissis heres debitoris partes sustinet. Ex quo maxima ad heredem spectat utilitas, quia medii temporis fructus ante diem Legati venientem perceptos lucratur, *l. si ita* 43. §. *Pegasus* 2. *de legat.* 2. Et in heredis erit arbitrio, utrum ante diem præstitutum solvere velit legatum, nec ne, *l. post mortem* 12. *C. de fideicommiss.* Quod tamen limitatur, si non præjudicium aliquod generetur legatariis, ex anticipatâ solutione. Exempli causa: Testator fidei heredis commisit, ut post mortem suam Titio aut Sempronio, cui velit, fundum restituat, non potest heres vivus in præjudicium alterius, cui velit, legatum restituere; Quia ea fuit defuncti voluntas, ut illi qui defuncto jam herede superesset, legatum restitueretur, *l. uxorem* 41. §. *Sejum* 12. *de legat.* 3. *l. cum pater* 77. §. *à filia* 10. *de legat.* 2. *Cujac. lib. Obs.* 10. *c. penult.*

Secundo limitatur regula, si tacitè vel expressè aliud colligatur ex voluntate testatoris, quod voluerit legatarii causa tempus differti. Velut si fundus impuberi in tempus pubertatis per fideicommissum relinquatur: hoc enim casu videtur magis tempus adjectum pupilli causa, quasi si pu-
bes

bēs esset, possetque res suas administrare, statim ejus restitutione gravaretur hæres, ideoque veniente pubertate fundus cum fructibus medio tempore perceptis pupillo præstabitur. *dict. l. si ita* 43. §. *Pegasus* 2. *l. in fideicommissi*, 3. §. *cum Pollidius*, 3. ff. *de usuris*. Objicitur *l. nec semel* 12. §. 1. ff. *Quan. di. leg. ced.* & *l. 1. C. eod.* ubi proponitur responsum adversarium, videlicet in hac facti specie: Dato Sempronio disciplinæ vel studiorum causa aureos centum. Studiosus vix finit elabi primum diem Januarii in petendo legato. Quæstio, an possit petere legatum? Si sequamur hanc regulam, quoniam mens testatoris apparet, usque ad finem anni retinebit hæres pecuniam. Contra scribit JC. ab initio anni statim legatum præstandum. Resp. Legati annui naturam non posse concludi regulæ nostræ terminis, *l. si cum* 20. ff. *Quan. di. leg. ced.* ubi dicitur, annum legatum ejus esse naturæ, ut relictum censeatur propter alimenta, disciplinam, vestiarium &c. & sic totum relictum est in commodum legatarii. Itaque nisi apparet mens testatoris dividendi in plures partes, statim debetur initio anni. Ratio est, quia si vento quis vivere posset usque ad finem anni, tunc posset differri legatum: sed natura legati hoc non fert: itaque hoc tempus

pus

pus adjectum est in gratiam legatarii. Regula autem nostra loquitur de tempore adjecto in gratiam debitoris seu hæredis.

AD L. XVIII.

Pomponius lib. 6. ad Sabinum.

Quæ legata mortuis nobis ad heredem nostrum transeunt, eorum commodum per nos hæ, quorum in potestate sumus, eodem casu acquirimus, aliter atque quod stipulati sumus: nam & sub conditione stipulantes omnino eis acquirimus, etiamsi liberatis nobis potestate, domini conditio existat.

EXPLICATIO.

Regula hæc adsignat differentiam, quod ad modum acquirendi in conditionalibus stipulationibus & legatis, & tali syllogismo commodè poterit explicari: *Quæ legata nobis mortuis ad heredem nostrum transeunt, ea quoque per eos qui sunt in potestate, adquiruntur domino vel patri, si ve remaneant, si ve exeant de potestate. At pura legata & in diem certum relicta ad hæredes nostros transeunt, l. si post diem, §. ff. quando dies legati, &c.* Ergo quoque talia legata domino vel patri adquiruntur, si ve in potestate existat, si ve emancipatus sit filius. Regula à contrario sensu hæc statuitur: *Quæ legata ad hæredes non transmittimus, ea quoque non acquirimus domino vel patri:*
condi-

conditionalia vero legata ad heredes non transmittimus, si ante existentem conditionem discedamus, dict. l. si post §. sed si sub conditione, l. unica. §. sin autem 7. C. de cod. toll. Ergo eadem legata non acquirimus domino vel patri, si existente conditione eorum potestate liberati sumus. Sed ipsi filio vel servo acquiruntur, si tempore existentis conditionis sui juris reperiuntur, tex. h. à contrario sensu. text. in l. si usufructus 14. §. ult. ff. Quan. di. leg. ced. Et hæc vera sunt in legatis. Aliud in contractibus, & stipulationibus obtinet. Ubi hæc regula locum habet. Quod sub conditione stipulantes, etiam moriente stipulatore ante eventum conditionis ad heredem spem debiti transmittimus. §. sub conditione 4. vers. ex conditionali. Inst. de verb. obl. ac proinde omnimodo iis acquirimus, quorum in potestate sumus, etiamsi nobis liberatis à potestate existat conditio. In cujus diversitatis ratione reddenda anxie desudant Interpretes. Tu ita breviter statuas: In stipulationibus contractus initium inspiciamus, seu tempus quo contrahimus, l. si filiusfam. 78. de verb. obligat. Quo tempore cum jam vires ceperit stipulatio, omnimodo per filium & servum acquiritur patri vel domino, etiamsi post emancipationem vel manumissionem existat conditio. In legatis
 item

item spectatur dies, quo conditio existit, l. Legata 41. ff. de cond. & demonstr. quia hæc fuit mens & voluntas testatoris, ut post existentem conditionem demum aliquod jus legatario conferatur. Ideoque talia legata non aliter acquiruntur domino vel patri, quam si existente conditione in potestate servum vel filium habeant.

AD L. XIX.

Ulpianus lib. 24. ad Sabinum.

Qui cum alio contrahit, vel est, vel debet esse non ignarus conditionis ejus. Heredi autem hoc imputari non potest, cum non sponte cum legatariis contrahit.

EXPLICATIO.

PLurimum interest ut quis sciat conditionem ejus, cum quo contrahit, quia si ignarus conditionis ejus cum aliquo contrahat, & detrimenti quicquam inde sentiat, sibi hoc imputare debet, quod non melius conditionem ejus investigarit, cum postea nullus poenitentiae locus relictus sit. Itaque si quis filiofam. mutuam pecuniam dederit, quam ipse aut immodicis comestrationibus aut scortationibus impudicis foedè abliguriverit, eam creditor repetere non potest, obstante exceptione SCti Mac. qua patri & filio prospectum est: neque

C

credi-

creditor se circumventum conqueri poterit, cum scire debuerit, filiumfam. hoc beneficio frui posse, *tot. tit. ff. ad SC. Maced.* Item si quis cum socio communionem inierit, qui parum frugi aut diligens erat, de se queri, hoc est, sibi imputare debet, quod parum diligentem socium assumpsit, §. *fin Instit. de societ.*

Ex hac regula etiam infertur, quod qui fidejussorem accepit minus idoneum, sive hoc sciens, sive ignorans fecit, non possit eum reprobare, & fidejussorem magis idoneum petere. Debit enim prius facultates ejus diligentius explorare, *l. 3. ff. de fidejussoribus.*

Denique huc refertur, quod si quis rem furtivam emerit, non solum cogitur eandem domino restituere, sed etiam pretio suo carebit, & recte ei hoc Imper. responsum objici poterit; *Disce cautius mercari,* ne non tantum in damna hujusmodi, sed etiam in criminis suspicionem incidas, *l. incivilem, 2. C. de furt.* Non enim tantum rei emtæ jacturam facit, sed etiam famæ & existimationis damnum patitur qui à furibus emere pro more habet. *Francus h.* Fallit regula in heredibus, qui cum non sponte contrahant cum legatariis, sed potius ex facto testatoris incidenter obligentur, non impu-

imputatur eis, si legatariorum & creditorum conditionem non adeo exactè exploraverint. Unde notabilis infertur decisio, quod, quando debitor defunctus promisit sub pœna, se soluturum ad certum tempus, hæres ejus excusandus sit à pœna, si ignoraverit. Itaque propter probabilem ignorantiam restituitur in integrum contra pœnam commissam ex generali clausula: *Si qua mihi justa causa videbitur.* Dyn. in ca. cum quis in alterius locum, ext. de R. l. in 6. Notant D. D. ad l. ad diem 77. ff. de verb. oblig. per l. qui in alterius 42. inf. eod.

Ad §. Non solet.

Non solet exceptio doli nocere his, quibus voluntas testatoris non refragatur.

EXPLICATIO.

Regula alias prodita est, *dolo facere eum, qui petit id quod restituere cogitur, cap. dolo facit, de R. l. in 6.* Quæ regula fallit, quoties testatoris voluntas petenti non refragatur. Exempli gratia: Titius debebat testatori centum pure, testator eadem centum Titio sub conditione legavit, interim hæres nihilominus ea centum à Titio petere potest, nec exceptione doli removendus est, si modo cautionem interponat hæres, quod existente conditione

legatum restituat, *l. purè §. in princ. ff. de doli Except.* Aliud exemplum elegans & notabile desumitur *ex l. fin. §. avus i. de doli Except.* ubi avus nepotib. legatum reliquit his verbis: Ignoscite mihi, amplius vobis non legavi, quia à patre vestro non potui habere debitum. Ibi decisum est, si scriptus heres petat à nepotibus debitum paternum, doli exceptionem obtaturam, quia facit contra voluntatem defuncti. Nam testator videtur reliquisse liberationem nepotibus propter hæc verba: *quia à patre vestro debitum habere non potui*: quæ tanquam singularia & mirabilia observanda notavit Ludov. Romanus, *singul. suo 535.*

AD L. XX.

Quia de servis tractat, omittitur, Vide l. 32. infr.
 Concordat *l. 56. l. 85. l. 106. l. 122. l. 125. l. 168. l. 176 §. 1. l. 179. l. 192. §. fin. ff. h. t.*

AD L. XXI.

Ulpian. lib. 27. ad Sabinum.

Non debet, cui plus licet, quod minus est, non licere.
 Addi potest *l. 146. §. 1. l. 163. & l. 165. ff. h. t.*

EXPLICATIO.

EX hâc regulâ probari potest, quod argumentum à majori ad minus affirmativè sumptum, validum sit & usitatum in jure, *Authen. multo magis, ubi notant Dd. C. de SS. Eccl.* Sic habet regula Canonica, *Cui licet quod plus est, utique licet quod minus*

nus est. Exempla regulæ permulta in jure occurrunt. Ex quibus hæc sufficiant. Pater potest occidere filiam adulteram cum adultero in ipso flagitio deprehensos, multo magis licebit ei, verberibus aut contumeliis eos afficere, *l. nec in ea 22. §. 2. & 3. ad l. lul. de adult.* Item si mulier corpus suum fidei mariti concedere ausa est, dotem etiam illi commissam esse oportet; *l. 1. & 2. C. Ne fidejus. dot. dent.* Quibus in legibus deciditur, quod marito quamvis pauperi dos uxoris non est auferenda, etiamsi pro ea dote conservanda omnino sufficientem cautionem præstare non possit, idque ex ratione hujus regulæ, quia cum uxor crediderit marito corpus suum, quod plus est, etiam dotem, quod minus est, ejus fidei commississe censetur, *c. per vestras, ext. de donat. inter virum & uxorem.* Ad hæc cum filiusfam. qui castrense peculium habet, testamenti factionem habeat, poterit etiam mortis causa donare, cum plus sit, testari posse, quam donare, *l. filiusfam. 7. §. fin. ff. de donation.* Regula nostra notabiliter duobus limitatur casibus.

I In exercitio meri imperii: ibi enim non procedit argumentatio à majori ad minus, sed cuique magistratui ea tantum competunt de mero imperio quæ speciali-

ter illi à lege deferuntur. Sic præses provincie, qui jus habet gladii, quod majus est, deportare in insulam tamen non potest, quod est minus, *l. illicitas, 6. §. qui universas, 8. de offic. præsid. l. 1. §. hi quibus, 2. de legat. 3. l. inter poenas 6. §. 1. ff. de interd. & releg.* Sic judex, qui cognoscit de capite hominis, qui larrunculator dicitur, vulgo **de morte**; de re tamen pecuniaria cognoscere non potest, *l. solemus 61. §. fin. ff. de jud.* Ratio decisionis est, quia singula quæ ad merum imperium pertinent, nulli competunt, nisi specialiter & nominatim à lege deferantur, *l. 1. ff. de off. ejus, cui mand. est. jurisd.*

II. Fallit Regula in individuis. Nam qui totum potest, perinde partem non potest. Sic totam hereditatem adire vel repudiare quis potest, partem vero ejus adire, & alteram repudiare non potest, *l. 1. & 2. ff. de acquirend. hered.*

AD

AD L. XXII.

Ulpianus lib. 28. ad Sabinum.

In personam civilem nulla cadit obligatio.

Lex hæc in prioribus Editionibus non extat, nos propter § sequentem inferendum putavimus, & super h. J. Lectorem remittendum ad l. 32. l. 107. l. 118. l. 175. l. 209. l. 211. ff. h. t. ubi eadem materia tractatur.

Ad §. Generaliter.

Generaliter probandum est, ubicunque in bona fidei judicium confertur in arbitrium domini vel procuratoris ejus conditio, pro boni viri arbitrio hoc habendum esse.

EXPLICATIO.

DOcet hic Ulpianus in summa, quotiescunque quid confertur in domini vel procuratoris arbitrium, quod is debeat adhibere in arbitrando boni viri judicium: nam bona fides exigit, ut tale præstetur arbitrium, quale viro bono convenit, l. si in lege 24 ff. locat. Non itaque arbitrabitur talis ex stomacho vel affectione propria, favori aut pecuniæ adstrictus, sed tanquam vir bonus suum moderabitur arbitrium. Est autem arbitrium boni viri, quod in rebus suis quis faceret, vel quod vellet sibi fieri ab aliis, Bart. in l. 1. supra, de solut. Decius h. nu. ult. Unde si arbitrium hoc aperta fronte pugnet cum bona fide & æquitate, judex interpellatus infringendi potestatem habebit, & ad boni viri arbitrium reducet, l. un-

56 IN TIT. DIG. DE REG. JUR.
de 79. ff. pro socio. Exempli gratia: Si in lege locationis dictum sit, ut arbitrato dominii opus approbetur, perinde erit, ac si boni viri arbitrium comprehensum fuisset, d. leg. 24. ff. locati.

Item, Si inter socios convenerit, ut alter eorum partes lucri constitueret, tota ea res ad boni viri arbitrium est redigenda, & habenda est ratio operarum, pecuniarumque in societatem collatarum, l. si societatem 6. & l. societatem 76. cum duabus legibus sequentibus. ff. pro socio.

Item, in hac venditione servi, si rationes domini venditoris computarit arbitrio, hac conditio ita accipitur, si boni viri arbitrio, non suo computarit, l. hac venditio 7. ff. de contrah. empt. Hic tamen diligenter advertendum est, tum demum valere conditionem in arbitrium alterius contrahentium collatam, si ea versetur in iis, quæ accidunt contractui, non in iis, quæ ad contractus substantiam pertinent; neque enim debet in arbitrium rei conferri, an sit obstrictus nec ne: unde nulla erit hæc emptio: Fundum habeas, si tibi placuerit, emptum aureis tot, l. in vendentis 13. C. de contr. empt. l. quod sæpè 35. §. 1. ff. de contrah. emp. Hæc tamen emptio jure valet: Si domus tibi placuerit intra quadriennium, sit tibi emptæ aureis tot: quia

quia illa emptio propter adjectionem temporis non habet perpetuam causam nullitatis, §. pen. *Instit. de empt. & vendit.*

AD L. *Contractus* XXIII.

Ulpianus lib. 29. ad Sabinum.

Contractus quidam dolum malum duntaxat recipiunt, quidam & dolum & culpam. Dolum tantum, depositum & precarium; dolum & culpam, mandatum, commodatum, venditum, pignori acceptum, locatum, item dotis datio, tutela, negotia gesta. In his quidam & diligentiam. Societas & rerum communio & dolum & culpam recipit. Sed hac ita, nisi si quid nominatim convenit, vel plus vel minus, in singulis contractibus. Nam hoc servabitur, quod initio convenit. Legem enim contractus dedit excepto eo, quod Celsus putat non valere, si convenerit, ne dolus praestetur: hoc enim bonae fidei iudicio contrarium est, & ita utimur. Animalium vero casus, mortes, quaque sine culpa accidunt, fuga servorum, qui custodiri non solent, rapina, tumultus, incendia, aquarum magnitudines, impetus praeconum, à nullo praestantur.

Interpretatur in h. l. etiam l. 36. & l. 174. ff. h. t.

EXPLICATIO.

Quia in hac l. singulari brevitate traditur, quid in singulis contractibus ratione doli vel culpa praestandum sit, praemittendum est, quid dolus, culpa & casus fortuitus sit, & quam variè hæc in iure accipiantur.

Dolus malus est omnis calliditas, fallacia, machinatio, ad circumveniendum, fallendum, decipiendum alterum adhibita, l. 1. supra de dol. malo.

Culpa nihil aliud est, quàm desidia & negligentia circa custodiam vel usum rei aliena, quæ jure culpari & reprehendi potest, §. præterea 3. Institution. quibus modis re contrahitur obligatio. Ea communiter dividitur in tres species, in latam, levem, & levissimam.

Lata culpa est nimia, crassa & supina negligentia, id est, non intelligere, quod omnes homines intelligunt. l. cedere diem 213. §. ult. ff. de verbor. signific. Veluti, si quis, quod publicè propositum, literis affixum, aut præconis voce proclamatum est, non observaverit, l. sed si 11. §. proscribere, 3. ff. de instit. act.

Aut si quis, quod omnes in civitate sciant, ipse solus ignoret, l. regula 9. §. sed facti 2. de jur. & facti ignor. Et hæc lata culpa doli speciem habet, & dolo proxima dicitur, l. 1. ff. si mensor fals. mod. dix. l. quasitum, 8. §. 3 ff. de precario. Imo aliquando dolus absolutè dicitur, l. magna 226. ff. de V. S. Ubi Ulpianus ait, Magna negligentia, culpa est: magna culpa, dolus est. Quod tamen de dolo præsumpto solum intellige, qui ex legis præsum-

præsumptione inducitur. Hinc quotiescunque dolus malus præstendus est ex legis dispositione, præstabitur etiam lata culpa. Sic, licet in deposito & precario veniat tantum dolus, appellatione tamen doli lata culpa continetur, *l. quod Nerva, 32. ff. depos. d. l. quasitum*. Quæ regula vera est, quoties agitur ad pœnam pecuniariam, ubi vero corporalis pœna infligitur, lata culpa non æquiparatur dolo, nec punitur ut dolus, *l. in lege Cornelia 7. ff. ad l. Cornel. de fisco*. Ut si quis mulieri poculum amatorium, vel medicamentum ad conceptionem dederit, ex quo ipsa moriatur. Licet enim non malo animo fecerit, & extra dolum sit, tamen lata culpa & satis incircumspectè deliquit, eaque res mali exempli est. Ideoque nec ordinaria pœna *l. Cornelia*, sed extraordinaria & mitiori pœna, puta relegatione mulctatur, *l. 3. in princ. & §. 2. vers. sed ex Senatus consulto, ff. ad l. Corn. de fisco*.

Levis culpa est ea negligentia, quâ quis in rebus alienis eam curam non adhibet, quam communiter frugi & diligentes patresfam. adhibent, tamen in rebus suis minime sit diligentior, *l. socius socio 72 ff. Pro soc. Alciat. in l. 213. §. lata culpa, 2. de V. S. Velut si quis pignus domi permittat à muribus & tineis corrodi, aut si quis seruum per insi-*

diosa loca mittat, ubi peritit. Quo loco illud diligenter notandum, quod quoties culpa simpliciter à lege profertur, pro ea accipiatur quæ levis est, nisi ratio subjæctæ materiæ aliud suadeat, §. *præterea* 3. *Instit. quib. modis re contrah. d. l. socius socio*, ff. *Pro soc. Alciat. in d. l. magna*, n. 1.

Levissima culpa est, quando quis non adhibuit eam curam, quam diligentissimus quisque paterfam. rebus suis adhibet, §. item is 2. *Instit. quib. modis re contrah.* Veluti si quis passus sit rem à furibus auferri, si quoquo modo hoc potuit præcavere. Furtum enim regulariter inter casus fortuitos non numeratur, sed culpæ levissimæ adscribitur, cum casus fortuiti sint, qui nulla humana industria evitari possunt, quod in furto dici non potest, *l. cum duob. §. 2. §. damna* 3. *pro socio.* ubi furtum removetur à casibus fortuitis, sicut nec in h. l. inter casus fortuitos recensetur, quia plerumque circumspecti hominis diligentiam furtum præcaveri potest.

Casus fortuitus, est vis major & damnum fatale, cui humana fragilitas resistere non potest, ut incendium, rapina, aquarum magnitudo, hostium & piratarum incursus, item casus, mortesque animalium, ut regula hæc ostendit inf. Cui concordat, l. si merces 25. §. *vis major* 6. ff. *locati, & dict. §. damna.*

SE-

SEQUUNTUR TRES REGVLÆ,
quibus luculenter ostenditur, quid in singulis contractibus præstandum veniat ratione doli vel culpa.

I. R E G U L A.

Quotiescunque in contractibus dantis tantum versatur utilitas, dolus solum præstatur, & lata culpa. Exemplum est in deposito, textus hic & in l. quod Nerva 32 ff. de pos. Quia cum gratuitum ejus sit officium qui depositum suscepit, & alterius commodi gratia contrahat, non debet redundare in ejus damnum, si quid levi culpa deliquerit. Quod tamen aliquibus casibus fallit, veluti I. Si depositarius precium aut mercedem acceperit pro custodia; tunc enim & de levi culpa tenetur, l. 1. §. si vestimenta, 8. & ibi Gl. ff. de positi.

II. Si ad depositum se ultro obtulerit, d. l. 1. §. sed et si quis 24.

III. Si depositarii causa factum sit depositum; Nam eo casu nihil differt à commo-
dato; l. si quis nec causam 4. ff. si certum petatur. Hisce omnibus casibus levissima culpa, id est, exactissima diligentia à depositario præstabitur. Ad hanc regulam refertur etiam mandatum, quia illud frequen-

quentius mandatis gratia contrahitur: sed cum mandatum actuosum sit, & sine industria vix expediri possit, ideo in hoc contractu communiter præstatur levis culpa. Si tamen negotium mandatum non usque adeo magnam requirat industriam, sufficit, dolum & latam culpam præstari, ut in fidejussore, cui mandatum solvendi factum est, obtinet *l. si fidejussor. 29. ff. mandati*. Quod si mandatum per se maximam requirat diligentiam, non solum dolus, sed omnis etiam culpa præstanda est, ut in procuratore dato ad judicia responsum est, *l. à procuratore 13. C. mandati*. Ratio est, quod in judiciis maxima requiratur diligentia, cautio & industria, & procurator harum rerum se peritum & idoneum profiteatur.

Ad hanc regulam pertinet etiam negotiorum gestio, in qua præstatur dolus & culpa levis: eadem ratione, qua in mandato. Deinde, qui negotia amici gerit, ultro se offert administrationi rerum alienarum, & sufficit, vel in paucis amici rebus commodare, *l. tutori 20. C. de negot. gest.*

De levissima autem culpa negotiorum gestor non tenetur, nisi alius quis diligentius administrare negotia volebat, cui gestor credere noluit, *l. si pupilli 6. §. videamus, 12. ff. de negot. gest.*

Tutela

Tutela quoque contractus est, qui alterius gratia fit. Proinde tutor tenetur de dolo & lata culpa. Præstat tamen quoque levem culpam, ut plenius cautum sit pupillis, *l. quicquid 7. C. de arbitr. tutel.*

Duobus tamen casibus tutor saltem de lata culpa tenetur, ut puta, I. Si cessaverit in exigendis debitorum nominibus, *l. 2. C. arbitr. tutel.*

II. Si emerit prædia ex pecuniâ pupillari. Sufficit enim, cum neque sordidè neque gratiosè versatum, licet minus bonam conditionem elegerit, *l. tutor. 7. §. competit. ff. de administr. tutorum.*

II. REGULA.

Quoties contractus celebratur tantum accipientis gratia, in eo præstatur dolus, & omnis culpa, etiam levissima, ut in commodato, *§. item is, 2. Instit. quib. mod. re contrah.* Excipe, nisi commodantis gratia res sit usui data, veluti si sponsæ meæ commodem ornamenta, ut ad me honestius culta deducatur: Tunc enim de dolo tantum & latâ culpâ tenebitur commodatarius *l. si ut certo §. interdum ff. commod.* Quod si utriusque gratia fuit commodatum, tam dantis quàm accipientis, præstabitur lata & levis culpa, *l. in reb. 18. vers. hac ita ff. d. r. puta, si*
commu-

64 IN TIT. DIG. DE REG. JUR.
communis convivii gratia pocula argentea
ab altero contrahentium commodentur.
Huc pertinet etiam precarium, quod & i-
psum fit accipientis gratia: sed in eo præsta-
tur tantum dolus & lata culpa, propterea
quod differat à commodato. Nam com-
modatum ad certum usum datur, nec re-
peti potest ante usum expletum; preca-
rium vero quandoque revocari potest, ad
libitum precario concedentis, & sibi impu-
tet, qui cum suspectam haberet diligentiam
precario tenentis, non revocarit precarium
ad libitum precario concedentis, *l. 1. & l. quasitum 8. §. eum quoque 3. ff. de precar.*

III. R E G U L A.

Quoties utriusque contrahentis gratia
contractus celebratur, in eo præstatur do-
lus, lata & levis culpa, ut in venditione,
locatione, pignore, societate, & dote da-
ta, *l. si ut certo 5. §. nunc videndum 2. ff. Commod. l. si servus 108. §. cum quid 12. ff. de lega. 1.* Hinc in emptione & venditione
quicquid sine dolo vel culpa venditoris ac-
cidit, in eo securus est venditor, & ad eam
tantum diligentiam tenetur, quam dili-
gens paterfamilias in rebus suis præstat, *§. cum au-
tem 3. Instit. de empt. & vend.* Similiter in
locatione & conductione, si conductoris la-
tâ vel

tâ vel levi culpâ res conducta perierit, aut deterior facta sit, locati iudicio tenetur.

Sed videtur, quod conductor quoque teneatur ad levissimam culpam, ex §. *fin. Inst. locati*. Ubi ait Imperator: *Qui pro usus vestimentorum, argenti aut jumenti mercedem, aut dedit aut promisit, talem diligentiam præstare debet, qualem diligentissimus paterfam. suis rebus adhibet*. Ad quem §. respondendum, quod ibi dictio, *diligentissimus*, pro diligente ponatur, superlativus gradus pro positivo: quemadmodum & vice versa, *diligens*, pro diligentissimo, in *l. heredes 25. §. non tantum 16. fam. hercisc.* ponitur. Et exacta diligentia pro exactissima usurpatur in §. *item is 2. Inst. quibus modis re contrah.* Aliter Vultejus respondit in commentar. ad *Inst. ad d. §. ult.* quod scilicet ibi conductoris gratia inita est locatio, quia conductor initium dedit locationi, & à locatore primus usum rei petiit, & antequam usus esset re, mercedem dedit aut promisit, quo facilius locatorem ad contrahendum secum induceret, unde hoc casu tenetur de levissima culpa, & ad exactissimam diligentiam, *Vultej. ad. d. §. ult. Inst. loca & c. 15. discept. scholast.* Item si res sit fragilis, hoc est, quæ facillime frangi potest, & summam requirit industriam & cau-

cautionem, tum præstanda quoque est exactissima diligentia, in locatione & conductione: veluti, si quis columnam transportandam conduxerit, eaque dum tollitur, aut reponitur, fracta sit, is periculum præstat, *l. si merces 25. §. qui columnam 7 ff. locati.*

Pignoris quoque contractus, utriusque tam debitoris quàm creditoris gratiâ celebratur, §. *creditor 4. Instit. quib. mod. re contrah. &c.* Ideoque creditor in custodiendo pignore, de dolo, latâ & levi culpâ tenetur, non de levissimâ aut casu fortuito, *l. si cum venderet 13. §. venit, 1. cum l. seq. de pign. act.* Quod verum est in pignore conventionali. Nam in prætorio & judiciali pignore tantam lata culpa præstat, non levis, *l. prætor ait 9. §. est præterea 5. ff. de reb. auth. jud. p. ssid.*

Societatis quoque contractus utriusque gratiâ initur; quocirca socius socio tenetur de latâ & levi culpâ: & ideo sufficit, si socius talem diligentiam communibus rebus adhibeat, qualem suis adh. ber, §. *fin. Instit. de societat.*

Postremo contractus dotis, utriusque etiam, cum mariti tum uxoris gratiâ contrahitur: mariti, quo facilius onera matrimonii sustineat; uxoris, ne soluto matrimonio decoctis rebus à marito, egestate laborare

borare cogatur. Unde maritus eam diligentiam præstare tenetur in rebus dotalibus conservandis, quam suis rebus adhibet, *l. si constante 24. §. si maritus 5. ff. sol. matrim.* Quare si dolo aut culpâ mariti res dotales interiissent, iudicio dotis maritus subjacebit, ut eleganter ostenditur, in *l. his rebus 66. ff. sol. mat.* ubi ex sententia Publii Mævii ita pronunciatur: Nam is in Licinia Gracchi uxore statuit, quod res dotales in ea seditione, qua Gracchus occisus erat, periissent; (ait) quia Gracchi culpa ea seditio facta erat eas Liciniæ præstari oportere.

Ad extremum notandum, quod casus fortuiti nunquam præstantur: siquidem nulla humana industria præcaveri vel averti possunt. Fallit hoc, nisi fuerit commissæ mora, aut præcesserit culpa, *l. quod te 5. ff. de reb. cred. l. si ex legati causa 23. ff. de verb. obl. §. item is cui 2. in fi. Inst. Qu. mo. re cont. obl.* Ubi dicitur, quod debitor teneatur de casu fortuito, quando mora vel culpa præcessit casum fortuitum, aut denique expresse de eo conventum sit. Nam contractus ex conventionem legem accipiunt.

Paulus lib. 5. ad Sabinum.

Quatenus cujus interfit, in facto, non in jure consistit.

EXPLICATIO.

Regula paucis hoc declarat, quod quotiescunque exurgit quæstio de eo quod alicujus interest, id in facto consistere, & per partem ipsam probari debere, siquidem ejus nulla certa regula in jure constituta est, sed quatenus quisque ob moram vel culpam adversarii sua interesse probarit, eatenus habet eum obligatum. Facti enim veritas tota in probationibus consistit, *l. ex plagis 52. §. in clivo 2. ff. ad l. Aquil. l. triticum 49. de verb. obl. l. in bello 12. §. facti 2. ff. de capt. & postl. rever.* ubi dicitur, quod quæ in facto consistunt, quia non presumuntur, debent probari. Interesse ergo, in facti qualitate, non in jure consistit, quia jus semper finitum, certum & clarum est: factum vero incertum & obscurum, *l. 2. ff. de jur. & fac. ignor.* ideoque etiam interesse ex variis circumstantiis personarum, locorum & temporum, tum in majori, tum in minori quantitate consistit.

Est autem interesse lucrum cessans, vel damnum emergens, ob moram vel culpam debi-

debitoris, & ut ait Jctus, quantum mihi abest, quantumque lucrari potui, *l. si commissa* 13. *supra*, rem rat. haberi.

Idque triplex est: Singulare, commune, & conventum.

Singulare est, quod ex speciali circa rem affectione proficiscitur, veluti si quis pluris æstimet librum, quod eum doctissimis annotationibus & apostillis illustraverit: aut rem majoris æstimet quæ à majoribus suis ad eum translata fuit, propter singularem quandam affectionem, quod ea res, puta domus aut fundus, à majoribus suis ad eum pervenit, *l. si in emptionem* 35. *de minor.*

Et hoc interesse in casibus, qui habent certam quantitatem & naturam, non debet excedere duplum communis, & veræ æstimationis.

In casibus autem incertis, ut sunt facta, quæ plerumque incerta sunt, totum interesse & damnum quod in rei veritate datum esse probetur, à judice æstimari debet, idque judicis arbitrio, vel actoris jurejurando in Litem æstimatur, *l. semper* 15. §. *hoc interdicto* 7. ff. *Quod vi aut clam.*

Ita intellige *l. 1. C. de sent. qua pro eo, quod interest*, &c. Cujus l. unicæ exemplum aptum tale tradit Alcia. 16, *Parerg. c.*
15. Ven-

15. Vendidisti mihi fundum centum aureis; habita fide de pretio, ego non solvi pretium, sed interim fundum per triginta annos possedi: petis id quod tua interest, probasque, singulis annis te potuisse septem ex centum percipere, ideoque sortem ipsam centum aureorum petis, & rursus ducenta decem, pro eo quod interest: sanxit Justinianus, me liberari, si tantum ducenta solvam: eo quod in casibus certis interesse non debeat excedere duplum. Imputet enim sibi creditor, qui tam diu cessavit in exigendo pretio, ut ipsæ usuræ duplo sortem excederent.

Interesse commune dicitur, quo ex communi opinione & sententia hominum res æstimari solet, *l. pretia 63. supra, ad leg. Falcid.* Et hoc regulariter præstatur.

Conventum est, quando de certa summa, ratione interesse solvenda, inter contrahentes convenit, § *fin. Institut. de Verbor. Obligatio*. Plura qui hac de materia, scilicet de eo quod interest, cognoscere cupit, videat *Alciatum, Fumeum, Feretum, Donellum & Carol. Molin. in tractat. de eo quod interest. & Cujac. lib. Obser. 9. c. 31. & in parat. ad dict. leg. unic. C. de sent. qua pro eo quod interest, &c.*

Adde ad illam *l. d. Groenvvegen, in tract. de ll. abrogat.*

AD L. XXV.

Pomponius lib. II. ad Sabinum.

Plus cautionis in rem est, quam in personam.

EXPLICATIO.

EX omnibus cautionum formulis & modis; nulla securiorem reddit creditorem, quam pignoris datio. Huc pertinet illa juris regula: *Melius est pignori incumbere, quam in personam agere*, §. *furti autem* 5. *Instit. de obligat quæ ex del.* Satius enim & tutius est, rem sibi habere devinctam, quam in personam agere. Huc alludit eleganter Martialis in hoc Epigrammate: *Cum rogo te nummos sine pignore, non habeo, inquis.*

Idem, si pro me spondet agellus, habes.

*Quod mihi non credis veteri, Thelesine, sodali,
Credis colliculis arboribusque meis.*

Unde infertur, securiorem esse creditorem per pignora, quam per fidejussores, quia fidejussor nos fallere potest; labitur subinde facultatibus; sæpe foro cedit: interdum creditum abjurat. Contra in pignore magna est securitas. Nam obligatio, sive jus quod in re consistit, quemcunque possessorem cum suo onere comitatur, l. *pro heredit.* 2. *C. de her. act.* Actiones enim reales contra quem-

quemlibet possessorem exercentur, etiamsi in mille manus res pervenerit, §. *omnium* 1. *Inst. de act.* Actiones vero personales infixæ sunt in persona obligati, quemadmodum character baptismi in anima: & personam obligati sequuntur, quemadmodum lepra leprosum, & umbra corpus comitatur, *l. fin. ff. de contrah. empt.* non autem in singularem successorem extenduntur, *l. 1. §. si heres* 16. *ff. Ad SC. Trebell.*

Nec obstat superioribus, *l. 7. de prat. stipul.* ubi ait JCtus Paulus; neque pignoribus, neque pecuniæ depositione in vicem satisfactionis aliquem fungi, quia hoc intelligitur, ut reus non cogatur pignoribus cavere; potest tamen si velit, tam pignoribus, quàm fidejussoribus datis satisfacere, *l. 1. §. jubet* 9. *ff. de coll.* ubi dicitur, posse tam reis. id est, fidejussoribus, quam pignoribus rectè & idoneè caveri, *l. 2. §. pen. ff. Quod Leg.* Potest etiam alio modo responderi, quod in stipulationibus prætoriiis hoc sit speciale, quod quis dando pignore non liberatur, sed fidejussorem dare cogitur. Ratio specialitatis est, quod ad Prætorem in foro non deferrebat arca cum argento, sed eo adducebantur fidejussores. Hodie autem, quia jure novo non est tanta facilitas conveniendi fidejussorem, sicut jure veteri, quia fide-

fidejussores jure novo conveniri non possunt, nisi prius excusso principali debitore, receptum est, etiam pignoribus in judicio caveri posse, *Gl. & DD. in l. 1. ff. Qui satisfacti cog. Wesemb. in paratit. eod. tit. nu. 7. per tex. in l. si mandato 59. §. ult. ff. Manda.* ubi dicitur, quod idonea cautio sit, si quis dederit pignora vel fidejussores. Idem traditur in *l. promissor 21. §. ult. ff. de const. pec. Franc. hic num. 4.*

AD L. XXVI.

Ulpianus lib. 30. ad Sabinum.

Qui potest invitis alienare, multo magis & ignorantibus, & absentibus potest.

EXPLICATIO.

Ratio regulæ est, quod frustra expectatur præsentia aut scientia ejus, quo invito etiam actus explicari potest, *l. aliquando 13. §. fin. supra, ad SC. Vellejan.* Ex quâ regulâ pulchra infertur decisio, quod nunquam debeat citari is, quo etiam invito actus expediri potest, *Castr. consil. 34. cum similibus allegatis hic per Decium.* Exemplum regulæ conveniens esto: Rem cum fratre communem & indivisam habeo, is cum peregrè esset, portionem meam ignorante & absente eo alienavi. Reversus frater postulat portionem alienatam soluto.

D

sibi

sibi pretio restitui, & deciditur, quod frustra agat, *l. 3. §. 4. C. de commu. rer. alienat.* Idque per hanc regulam ita constitutum est, quia possessionem rei communis invito socio alienare possum, ergo multo magis eo absente vel ignorante, *l. 1. C. Commun. divid.* Et licet regula loquatur solum in alienatione, tamen extenditur ad omnem actum, qui altero invito celebrari potest, *Francus hic num. 4.*

Limitatur regula nostra à Decio multis modis. Primò, in iudice qui non potest ferre sententiam in absentem, licet possit in invitum, *l. de unoquoque 47. ff. de re judic.*

Similiter nec electio Prælati uno Canonico absente facta subsistit, licet eo præsen- te & invito majoris partis electio suffecisset, *cap. venerabilem 34. de electio.* plus enim nocet unius contemptus, quam contradi- ctio multorum. Item duorum ex tribus judicibus delegatis sententia, tertio absente & ignorante, lata non valet, licet eo præ- sente & invito valeat, *l. sicuti 18. ff. de arbitris. l. duo ex tribus 39. ff. de re jud. l. si unus 17. §. ult. ff. de arbitr.* ubi rationem addit J.C. quia si tertius fuisset præsens, potuisset alios sua inductione & oratione in suam sententiam trahere.

Sed regulam nostram intelligimus, quan-
do

do absens & ignorans, si adfuisset, aut scivisset, factum non potuisset infirmare.

AD L. XXVII.

Pomponius lib. 16. ad Sabinum.

Nec ex pratorio, nec ex solenni jure, privatorum conventionione quicquam immutandum est, quamvis obligationum causa. pactione possunt immutari & ipso jure, & per pacti conventi exceptionem: quia actionum modus, vel lege, vel per prætorem introductus, privatorum pactionibus non infirmatur, nisi tunc, cum inchoatur actio, inter eos convenit. Facit huc l. neque pignus 45. §. privatorum 1. ff. h.t.

EXPLICATIO.

Introduxit jus civile certas & solennes quasdam contractuum formulas, certosque modos, quibus aliquid deberi incipit vel definit, *l. obligationum 44. §. 1. vers. placet. de actio. & obligatio.* à quibus neminem recedere posse, recte constitutum est, ne ad cujusvis privati hominis arbitrium & censuram jus publicum infringatur. Habent namque quilibet contractus propriam substantiam & essentialem à jure præscriptam formam, quam si detrahas, contractus corruat necesse est, *l. Iulianus. 9. §. si quis rem 2. ff. ad exhib.*

Quare nec conveniri potest, ut sine interrogatione & responsione stipulatio contra

trahatur, aut emptio sine precio, locatio sine mercede consistat. Sed quia principaliter hæc regula de obligationibus agit, intelligi non potest, nisi, quæ sint substantialia, naturalia & accidentalia contractuum, præmittamus.

Substantialia sunt, ex quibus contractus nascitur, & sine quibus consistere omnino nequit, ut, in emptione precium, §. *item precium* 2. *Inst. de empt.* in locatione merces, *l. 2. ff. locat.* in societate rerum communio, *l. 1. & 2. ff. pro socio.* Et ea (salva manente contractus substantia) nulla conventionem immutari possunt.

Naturalia sunt, quæ natura sua contractui insunt, secundum proprios fines cujusque contractus introducta, quæ duplicia sunt: Alia sunt interna, quæ perpetuò contractui insunt, eique necessario adhærent, ut in emptione traditio, & domini translatio. Nec enim conveniri potest, ut rei venditæ dominium in emptorem non transferatur, *l. cum manusata* 80. §. *fin. de cont. empt.* In societate lucris & damni participatio: nec enim pacto fieri potest, ut alter sociorum lucrum, alter damnum sentiat, *l. si non fuerint* 29 §. *Aristo 2. ff. pro socio.* In deposito, ut rei dispositæ dominium in accipientem transferatur, quod pactum dicitur excedere

dere notissimos depositi terminos, *in l. Lucius 24. ff. Depos.*

Alia sunt naturalia externa, quæ ex consuetudine quadam contractibus insunt; de quibus pacisci possumus, ut præstentur, vel non: ut est in emptione evictio: item ut culpa & casus præstetur, ubi non insunt regulariter contractui, *l. 1. §. sepe 35. depos.* Sic in emptione conveniri potest, ne venditor de evictione teneatur, *l. ex empto 11. §. Et in primis 1. & 2. ff. de act. emp.*

Accidentalia dicuntur, quæ omnino sunt extra naturam contractus, & hæc variè à contrahentibus adjiciuntur, veluti ut res vendita emptori locetur, donec precium solvat, *l. cum venderem 21. ff. locati*, ut sub conditione vel ad diem res tradatur.

Quamvis obligationum causæ.] Solennia contractus, quæque ad ipsius negotii substantiam & formam pertinent, mutari non possunt privatorum pactis: obligationum tamen causæ, id est, qualitates & accidentia contractuum, item naturalia externa, contrahentium pactioibus possunt alterari. Nam contractus ex conventionem legem & formam accipiunt, *l. 1. §. si convenit 6. ff. depos.*

Idque fit vel ipso jure, si videlicet pacta in continenti adjiciantur, & in ingressu con-

78 IN TIT. DIG. DE REG. JUR.
tractus fiant, quia tunc informant ipsam
actionem, vel per exceptionem, si perfecto
contractu partes ex intervallo aliquid pa-
ciscantur, *l. juris gentium 7. ff. de pactis. l. pa-
cta conventa 72. ff. de contr. emp.*

AD L. XXVIII.

Ulpianus lib. 36. ad Sabinum.

*Divus Pius rescripsit, eos qui ex liberalitate conve-
niuntur, in id quod facere possunt, condemnandos.
Respicitur in h. l. etiam ad l. 173. infr.*

EXPLICATIO.

Sunt, inquit Imp. *quadam actiones,*
quibus non semper solidum, quod nobis
debetur, persequimur, sed modo solidum, mo-
do minus, §. sunt prater ea 36. Institut. de a-
ction. In eodem numero sunt illæ actionum
species, quibus non ultra reus condemna-
tur, quàm quatenus facere potest, §. item si
de dote 37. Instit. eod. Personæ autem, quæ
in id, quod facere possunt, tenentur & con-
demnantur, ferè sunt hæ; socius omnium
bonorum, parens, patronus, ejusque pa-
rentes & liberi: item maritus, qui de do-
te convenitur, miles, & donator, *l. sunt qui*
16. cum trib. ll. seqq. ff. de re judic. Hæ per-
sonæ tantum tenentur in id, quod facere
possunt, id est, ita conveniuntur, ut salva eis
maneant, quæ ad alimenta, hoc est, ad vi-
ctum

Etum & vestitum pertinent. In quo ratio, conditio & status cujusque personæ spectatur, *l. inter eos 19. §. 1 ff. de re jud. l. si extraneus 33. ff. de jure dot.*

Inter hos omnes, qui in id, quod facere possunt, tenentur, pinguius succurritur donatori. Is enim solus æs alienum, quod debet aliis creditoribus, prius deducit, & deinde ipsius etiam habetur ratio, ne egeat & alimentis careat: Cæteri omnes, quod aliis creditoribus debent, non prius detrahunt, *l. & exheredatum 49. de re jud. l. in condemnatione 173. inf. eodem.* Ratio est, ne donator ex liberalitate sua inops fieri periclitetur, *l. 50. ff. de re jud.* Cavere tamen debent hæ personæ, sese, ubi ad meliorem pervenerint fortunam, etiam solidum, & residuum debitum soluturos, *tex. in l. unica §. cum autem in exactione 7. C. de rei ux. act.* Proccedit autem regula nostra tantum in donatione simplici, quæ ex merâ liberalitate procedit, non etiam in donatione, quæ fit ob causam. Nam in hac solidum, quod petitur, præstandum est; *l. hoc jure 19. §. Labeo 1. & §. fin. ff. de donat.* ut in donatione remuneratoria: quæ proprie non est donatio, sed potius quædam remuneratio, & beneficii permutatio, seu compensatio, *l. sed et si 25. §. consuluit 11. de petit. heredit.*

II. Fallit regula, nisi forte solverint, qui hoc privilegio uti poterant: nam tunc solum repetere non possunt, *l. nam & maritus 9. de condict. indebiti.*

III. Limitatur in heredibus & fidejussore donatoris: illi enim in solidum tenentur & condemnantur, propter quod hoc beneficium sit personale, & personam non egrediatur, *l. & si fidejussor 24. l. sciendum 25. ff. de re judicata.*

AD L. XXIX.

Paulus lib. 8. ad Sabinum.

Quod initio vitiosum est, non potest tractu temporis convalescere.

Satisfit etiam in *h. l. legi 85. §. 1. & l. 201. & l. 210. infr. h. t.*

EXPLICATIO.

Ratio regulæ est, quod sicut tempus non est modus inducendæ vel tollendæ obligationis, *l. obligationum, §. placet. de action. & obligation.* ita solum tempus sine alterius causæ adminiculo actum ab initio invalidum confirmare non potest: cui concordat, *c. non firmatur, de R. l. in 6. Non firmatur tractu temporis, quod ab initio jure non subsistit.* Quæ regula procedit in testamentis, contractibus; matrimoniis, sententiis, usucapionibus & quibuscunque aliis negotiis.

In testamentis hæc regula constituitur;
Qua ab initio inutilis est institutio, ex post-
facto non potest convalescere, l. pen. infr. eod.
 Exempli causa: Impubes furiosus & filius-
 familias si testamentum fecerint, invalidum
 & nullum est, quia nullum habent animi
 iudicium, nec corroboratur, licet impu-
 bes postea pubes, aut furiosus mentis com-
 pos, aut filiusfamilias sui juris factus fuerit,
§. praterea 1. Instit. quib. non est permiss. fac.
testam. Pari ratione, si res mea mihi legata
 sit, non convalescit legatum, licet post te-
 stamentum res mea esse desinat, quia ab
 initio non valuit, *l. cetera 43. §. 2. de le-*
gat. 1.

Exemplum in contractibus extat, in *§.*
1. Instit. de inutilib. stipulat. Si rem sacram
 vel publicam stipuler, non valet stipulatio,
 licet postea efficiatur profana aut privata,
 & in hominum commercium perveniat.
 Similiter si sententia ab initio ipso jure nul-
 la sit, quia contra LL. vel Constitutiones
 prolata fuerit, non validabitur, licet appel-
 lans fatalia appellationis labi passus sit, *l. si*
expressim 19. ff. de appell. Illud singulariter
 notandum, quod res, quæ ab initio vitiosa
 fuit, tractu temporis robur sumat, si impe-
 dimentum cesset, & nova causa superve-
 niat, quæ actum confirmet: Exempli causa,

I. minoris bona alienata sunt sine decreto judicis, licet non valeat hæc alienatio, si tamen postea major factus ratam habuerit, vel si post annum vigesimum quintum passus est elabi quinquennium, ut de alienatione non sit conquestus, valebit alienatio, *l. fin. C. si major factus, alienat. sine decr. fact. rat. hab.* Similiter legatum vel fideicommissum à filiofam. relictum non valet: si tamen filiusfam. sui juris factus in eadem voluntate perseverans mortuus sit, legatum vel fideicommissum debebitur, *l. i. §. 1. de Leg. 3.* Quod ita demum verum est, si filiusfam. sui juris factus, indicio aliquo, puta codicillis aut aliis literis declaravit, se eodem testamento mori voluisse: ut notat Accur. *in d. l. i. §. i.*

II. Nuptiæ inter impuberes contractæ solo temporis lapsu non confirmantur: si tamen post pupillarem ætatem novus accedat consensus, valebunt, *cap. i. §. i. extr. de desponsat. impub.*

AD L. XXX.

Ulpianus lib. 36. ad Sabinum.

Nuptias non concubitus, sed consensus facit.

EXPLICATIO.

Quemadmodum sponsalia, ita & nuptiæ solo consensu contrahentium fiunt: ideoque etiam absens absenti desponsari potest, *l. 4. l. II. supra, de sponsalib.*

Eadem ratione in nuptiis contrahendis parvi refert, coram ne, an per internuncium vel epistolam initæ fuerint, *l. fin. ff. de sponsalib.*

Neque enim ad earum perfectionem defloratio virginitatis desideratur, sed pactio conjugalis, & ut ait eleganter Ictus Ulpian. non coitus matrimonium facit, sed maritalis adfectio, *l. cum hic status 32. §. si mulier. 13. ff. de don. inter virum & uxorem.* Adeo autem hoc matrimonium solo consensu contractum, validum & firmum est, ut nec summus Pontifex illud queat dissolvere, aut in eo dispensare, etiam si copula carnali non sit confirmatum, *Abbas in c. ex publico, de convers. conjugator.* Debet autem iste consensus verbis, aut alio externo signo declarari. Nam ut ait Baldus, forma matrimonii stat in verbis, sed radix in consensu.

sensu. Unde & matrimonium per verba de
 præsentis contractum præfertur secundo
 matrimonio postea contracto, etiamsi in
 eo secuta sit copula. *tex. in c. fi. ex de spons.*
duor. Illud hic *quæritur* ab interppr. *An ma-*
trimonium sine consensu parentum contra-
ctum valeat. Et sane jure civili consensus
 parentum necessario requiritur, *l. 2. ff. de*
rit. nupt. §. 1. Inst. de nupt. adeo ut si filius
 ex hujusmodi matrimonio, cui parentum
 consensus defuerit, natus sit, negetur esse
 legitimus, *l. Paul. 11. sup. de statu hominum.*
 Imo etiam verior est sententia Jure Cano-
 nico, non solum de honestate, sed etiam de
 necessitate requiri consensum parentum
 ad nuptias liberorum, ut plenè & exactè
 tradidi *cent. 3. ἐναντιοφαιῶν, assert. 1.* Quod
 adeo verum est, ut si filiusfam. ducat uxo-
 rem invito patre, quæ dedecori sit toti fa-
 milia, puta si mimam, meretricem, vel
 aliam infamiae nota laborantem, duxerit in
 uxorem, possit eo nomine à patre exhereda-
 ri, *text. not. in l. 3. §. si emancipatus §. ff. de*
bon. pos. con. tab. Ita elegantur quoque tradit
Cuj. l. 3. Obs. c. 5. Appr. Andr. Gail. l. 2. pract.
Obs. c. 95. Præses Ever. Consil. 128. Ea; com-
 munis est & recepta DD. opinio teste Co-
 verruvia in tract. de sponsal. 2. par. c. 3. §. 8.

Filia vero invitis parentibus nubens in-
 distinctè

distinctè exheredari potest, quæ minor est viginti quinque annis. Probatur *in Novell. 115. §. sed si filia*, ubi dicitur, quod si filia ante xxv. annum impudicam vitam eligat, vel parentibus invitis, qui illi honestum maritum offerant, in alterius mariti nuptias consentiat, alimenta illi denegari, & hoc nomine eam exheredari posse, *d. §. sed si filia, & ibi pulchre Cujacius*. Et hoc Jure Canonico nusquam reperitur mutatum, teste Hostiense & Abbate *in c. 1. ex. de disp. imp.* Nam Pontifices volunt, tantum valere matrimonium liberorum, invitis parentibus contractum, postquam copula est consummatum, ne majus inde sequatur scandalum, neve vitiatæ personæ fiat injuria: non autem probant inobedientiam filii; nec injuriam quæ patri illata est, impunitam relinqui volunt. *Duar. ad tit. de nupt. c. 2. in fi. Castr. ad l. si filiam 19. de inoff. test.*

Contra hanc l. pugnant acriter duæ ll. Primo, *l. 6. C. de dona. ant. nup.* ubi dicitur, non sufficere solum consensum ad nuptias, sed quod præterea requiratur deductio in domum mariti; nam hotâ, antequam deducatur in domum mariti, valet donatio, post non valet, quia inter maritum & uxorem facta est, *d. l. 6.* Secundo obstat, *l. mulierem 5. ff. de rit. nup.* ubi etiam deductio in domum

mum mariti requiritur ad perfectionem
 matrimonii, neque sufficit solus consensus
 sine deductione uxoris. Resp. quod hæc
 regula ita accipienda sit, quod uxore dedu-
 cta in domum mariti jam consensus perfi-
 ciat nuptias, neque requiratur concubitus.
 Post deductionem itaque in domum mariti
 solo consensu constant nuptiæ, neq; requi-
 ritur præterea deductio in cubiculum mari-
 ti, vel concubitus, aut confectio tabularum,
 five instrumentorum dotalium, aut quid a-
 liud præter consensum, *l. cui fuerit. 15. ff. de
 cond. & dem. l. pen. ff. de dona. int. vi. & ux.
 l. neque sine 13. C. de nupt.* Unde & ante con-
 cubitum dos & de dote actio virgini esse
 potest, si forte maritus subitanæ morte, an-
 tequam uxorem cognoverit, mortuus sit, *l.
 ideoque 7. ff. de rit. nupt.* Præterea Legatum
 alicui relictum, sub hac conditione, si nu-
 ptias contraxit: statim contracto matrimo-
 nio, & uxore deductâ in domum mariti,
 conditio impleta videtur, absque copulâ
 carnali: nupsisse enim videtur, quæ ducta
 est, tametsi non concubuerit, *d. l. cui
 fuerit.*

AD L. XXXI.

Ulpian. lib. 24. ad Sabinum.

Verum est, neque pacta, neque stipulationes factum posse tollere. Quod enim impossibile est, neque pacto, neque stipulatione potest comprehendi, ut utilem actionem aut factum efficere possit.

Respicit hæc l. etiam l. 135. & l. quod nullius 182. & l. impossibile. 185. ff. h. t.

EXPLICATIO.

CUM ex communi ratione satis constet, quod factum est, infectum fieri non posse, rectissime hic ab Ulpiano responsum est, neque pacto, neque stipulatione effici posse, ut factum infectum fiat. Quare nec obligatio aut utilis actio ex hoc pacto produci potest, cum impossibile nulla sit obligatio, *l. impossibile 185. inf. h. t.* Neque enim id fieri aut curari à Contrahentibus ulla ratione potest, ut non sit, quod revera est, vel sit, quod revera non est.

Exemplum regulæ est: Vendidi tibi servum, & pacto promisi, cum furem non esse, fugitivum non esse, aut vespertilionem, id est, erronem nocturnum non esse, cum tamen sit vespertilio aut fur, aut vespillonem non esse, ut alii legunt, id est, funeratorum cadaverum, *l. si ita quis 31. ff. de evict.* Ex hoc pacto non obligor ad hoc, ut tradatur probus, qui est improbus. Valet tamen hæc stipulatio, & in ea, quod interest, continetur.

88 IN TIT. DIG. DE REG. JUR.
netur, *l. sciendum* 19. *l. si fundum* 52. ff. de
adil. edic. agetque emptor ex tali promissio-
ne in id quod sua interest, se pro frugi & in-
dustrio servo ignavum & vagabundum ac-
cepisse, *text. notab. in d. l. si ita quis* 31. ff. de
evict. Sic si quis promittat virginem, quæ
corrupta sit, pacto effici non potest, ut vir-
go tradatur, quæ non est: Castitas enim vel
virginitas corrupta restitui non potest, *l. un.
in princ. C. de rapt. virg.* Agitur tamen ex
tali promissione ad id, quod interest em-
ptoris, se non esse deceptum, *arg. d. l. si
ita quis stipulanti* 31. *sup. de evict. fac. l. ex
empto* 11. §. *si quis virginem* 5. ff. de act. emp.

AD L. XXXII.

Ulpianus lib. 43. ad Sabinum.

*Quod attinet ad jus civile, servi pro nullis habentur.
Non tamen & jure naturali: quia quod ad jus na-
turale attinet, omnes homines aequales sunt.*

Quia ea, quæ de servis dici possunt, hoc
seculo exiguum fere habent usum, ut-
pote antiqua servorum conditione prorsus
extincta, ideo ad has ll. quæ de servis tra-
ctant, supervacuum est multa commen-
tari.

AD

AD L. XXXIII.

Pomponius lib. 22. ad Sabinum.

In eo, quod vel is, qui petit, velis, à quo petitur, lucrifactorius est, durior causa est petitoris.

Concordat hac l. cum l. 98. l. 126. §. 2. l. 128. l. 154. ff. h. t.

EXPLICATIO.

Varie hæc Lex explicatur ab Interpretibus. Verior autem regulæ sensus hic est, quoties utraque pars de lucro sive commodo certat, semper duriores esse causas actoris, qui petit & asserit, & ex assertionem sua ad lucrum & victoriam causæ contendit: Favorabiliorem autem reum haberi. Nam in pari causa semper melior est possidentis conditio, *l. in pari 129. infr. h. t.* Unde in obscura causa semper durior est actoris conditio, quia adstringitur ad onus probandi, & eo suam intentionem non probante, reus etsi nihil præstiterit, nihil probaverit, tamen absolvendus est, *l. Actor. 23. C. de prob. l. qui accusare 4. C. de edendo.*

Exemplum huic regulæ accommodatum extat in *l. quoties 15. in fi. C. de rei vendic.* Duobus donatariis res quædam erat donata, uterque contendebat, quis in ea re potius jus haberet? & decidunt Impp. cum de lucro captando ambo contendat, potior habendum cum, cui prius possessio rei donatæ tradita est.

Simile

Simile exemplum est in *l. siue autem 9. §. si duobus 4. sup. de Publ. in rem action.* Ubi inter duos emptores, qui rem eandem à diversis non dominis emerant, disceptatur, uter eorum Publicianâ uti possit: & respondet Ulpian. possidentem ea uti posse, subiungens hanc rationem, quod cum par sit utriusq; conditio, melior possidentis, quam petitoris causa habeatur. Regula hæc non tantum procedit in causâ lucrativâ, sed etiam onerosâ, uti est pignus: ut si res una duobus creditoribus, non diversis temporibus, sed simul uno tempore sit pignori data in solidum, præfertur possessor. *l. si debitor. 10. ff. de pigno. l. 1. §. Si Colonus 1. ff. de Salv. interd.*

AD L. XXXIV.

Ulpianus lib. 45. ad Sabinum.

Semper in stipulationibus & in ceteris contractibus id sequimur, quod actum est: aut si non pateat quid actum est, erit consequens, ut id sequamur, quod in regione, in qua actum est. frequentatur. Quid ergo, si neque regionis mos appareat, quia varius fuit? Ad id quod minimum est, redigenda summa est.

Recurre ad *l. 9. supr. h. tit.*

EXPLICATIO.

Quoties ambiguitas quædam occurrit in hominum commerciis, tunc ad hanc interpretationem recurrimus, ut primo sequamur id, quod inter contrahentes actum

actum est : Regulariter autem id actum esse censetur , quod verba mentis indicia denotant , *l. Labeo 7. §. Tubero 1. ff. de supell. leg.* Nam nemo , inquit Celsus , existimandus est , id dixisse , quod non mente prius secum agitaverit.

Tamdiu autem verbis adhærendum est , donec de contrariâ pronunciantis voluntate appareat , *l. in conventionibus. 219. ff. de verb. signif. l. non aliter 69. de legat. 3. l. 1. §. licet 20. ff. de exerc. act. in verb. in re dubia melius est servire verbis edicti.*

Huc pertinet , quod respondit Paulus , *in leg. 115. infr. eodem.* In obscuris inspicere , quod verisimilius est , aut quod plerumque fieri solet. Si enim dubia contrahentium intentio ex verborum significatione non colligatur , tunc id , quod actum est , solemus interpretari ex naturâ contractûs , ex rei qualitate , aut personæ conditione , vel ex aliis indiciis & circumstantiis. Sic inter contrahentes actum id esse præsumitur , quod ex naturâ contractûs dari vel fieri consuetum est , *l. cum quid 3. ff. de reb. cred.* Ubi dicitur , quod in contrahendo agitur , id est , quod tacitè venit ex naturâ contractûs , pro cauto habetur , licet expressè non sit dictum vel conventum. Itaque si vinum vetus mutuò datum sit , non licet pro vino
veteri

vetere reddere novum, quia hoc tacitè actum censetur, ut in eodem genere eademque qualitate; & bonitate qua datum est, mutuum reddatur, *d. l. 3. fac. l. eum qui Calendis 41. in princ. ff. de V. O.*

Unde etiam, si vendidisti mihi librum 20. florenis, nec adjecisti, de quibus florenis senseris, quod actum est, colligetur ex libri qualitate, valore & præstantia, *Bart. in l. Pautus 101. ff. de solutionib.* Secundò colligitur interpretatio dubii ex consuetudine loci, in quo actus celebratus est: consuetudo enim sicut est optima legum interpres, *l. si interpretatione 36. sup. de ll. ita & quorumcunque aliorum contractuum & negotiorum* Unde si dubites, quid quantumque evictionis nomine daturus sit venditor, qui simpliciter de evictione cavit, nulla expressa quantitate, ilico ad consuetudinem regionis, in quâ emptio celebrata est, recurre, *l. si fundus 6. sup. de eviction.* Quia ea, quæ sunt moris & consuetudinis, tacitè insunt bonæ fidei judiciis, *l. quod si nolit. 31. §. quia assidua 20. ff. de Ædil. edicto.* Similiter si in contractu locationis specialiter certæ mercedis mentio facta non est, secundum præcedentium annorum consuetudinem solvenda est merces, *l. excepto 18. ubi gl. in fin. C. locati.* Consuetudo enim ipsorum con-

contrahentium in dubio præcipuè exquirenda est, *l. si servus 50. §. si. ff. de legat. 1.* ubi inquit J.C. Ulpianus: *Si numerus nummorum legatus sit, neque appareat quales sint legati, ante omnia ipsius patrisfam. consuetudo, deinde regionis in qua versatus est, exquirenda venit.*

Reliqua ad hanc legem pertinentia dixi, *in l. semper in obscuris 9. sup. eod.*

AD L. XXXV.

Ulpianus lib. 48. ad Sabinum.

Nihil tam naturale est, quam eo genere quicquid dissolvere, quo colligatum est: ideo verborum obligatio verbo tollitur: nudi consensus obligatio contrario consensu dissolvitur.

Satisfit hic *l. omnia 100. l. Fore. 153. h. t.*

EXPLICATIO.

Est hoc axioma juris usitatissimum, quod multis juris quæstionibus potest accommodari. Omnis enim res per quasque causas nascitur, per easdem dissolvitur. Quæ regula primo procedit in omnibus contractibus & obligationibus, item in acquirendis rerum dominiis, & eorundem amissionibus; ut testatur Paulus, *in l. fere 153. inf. h. t.* Ubi ita scribit; *Fere quibuscunque modis obligamur, iisdem in contrarium actum liberamur, & quibus modis acquirimus, iisdem in contrarium actum amittimus.*

mittimus. Ideoque in iis obligationibus, quæ re contrahuntur, vel per restitutionem vel solutionem rei, naturale est obligationem tolli, *l. prout quidque 80. ff. de solut.* Similiter in contractibus, qui consensu ineuntur, ut in emptione, locatione, &c. per contrarium utriusque partis consensum ab iisdem recedere licet, si modo res sit integra.

Nam si præter consensum rei traditio accesserit, non solvitur contractus, nisi actus retro similis intercedat, *l. ab emptione 58. ff. de pact. l. 1. C. quând. lic. ab empt. reced.*

Fallit regula in contractu societatis & mandati, §. *manet 4. Instit. de societ. §. recte 9. Inst. mand.* Illi enim licet duorum consensu contrahantur, unius tamen voluntate invito altero dissolvi possunt. Ratio est, quod in iis contractibus quamdiu nullius cœpit interesse, locus est pœnitentiæ: in aliis contractibus, mox post utriusque consensum editum, alterutrius interest. Ideoque etiam contractus adimplendus est, & non potest in iis ab uno contrahentium invitâ alterâ parte discedi, *l. sicut 5. C. de obligat. & act.*

Secundò hæc regula in omnibus aliis civilibus negotiis & actionibus obtinet. Unde Cajus in *l. omnia 100. infr. eod.* inquit:

Omnia

Omnia quæ jure contrahuntur, contrario jure pereunt. Unde infertur, quod si ad aliquem actum ineundum certa requiratur sollemnitas, eadem etiam adhibenda sit in actu tollendo. Sicut ergo ad confectionem solemnisi testamenti requiruntur septem testes, ita etiam ad ejus revocationem totidem testes desiderantur, §. *ex eo autem solo 7. Instit. quib. modis testam. infirm.* Itaque testamentum minus solenne posterius non tollit aliud prius solenne, l. *heredes 21. ff. Si quod post 1. ff. Qui test. fa. pos.* ubi dicitur: *Si quid post testamentum factum mutari placuit, omnia ex integro facienda sunt.*

Fallit regula in spiritualibus negotiis, ut in matrimonio, baptismo, & sacris ordinibus semel susceptis, in quibus imprimitur character spiritualis, qui contrario facto tolli non potest, *Decius hic in fin.* Unde & matrimonium, quod solo consensu contrahitur, tamen solo dissensu dissolvi non potest: imo nullo modo dissolvi potest, quia quos Deus conjunxit, homo separare non potest, c. 2. ex. de translat. episc. c. ex parte. de convers. conjug.

AD L. XXXVI.

Pomponius lib. 27. ad Sabinum.

Culpa est, immiscere se rei ad se non pertinenti.

EXPLICATIO.

Regula monet, debere unumquemque intra professionis suæ metas se continere, nec aliorum negotiis ad se non pertinentibus temerè se involvere, ne promiscuis rerum actibus turbentur officia, ex quo confusa discordiarum semina excitari sæpe solent, *consulta diuina* 23. *C. de testament.* Qua ratione constitutum est, quod Judex Ecclesiasticus secularibus causis se immiscere non debeat, *c. si duobus. §. ult. extr. de appell. &*, *Nemo militans Deo*, ut inquit Apostolus Paulus, *negotiis secularibus se implicare debet.* E contra, ne judex Laicus Ecclesiastica aut spiritualia negotia tractanda suscipiat, *c. Lator, ex. Qui fil. sint legit.* Pulchrum exemplum hujus regulæ extat in *l. eum qui* 46. *ff. de minor.* ubi Paulus respondet, *Eum qui ex sua voluntate, id est, sine mandato minorem xxv. annis in judicio defendit, & condemnatus est, ex causa judicati posse conveniri, nec ejus quem defendit, aetatem ad restitutionem impetrandam ei prodesse, cum causam judicati recusare non possit: ideo quod culpæ ejus*

ejus imputetur, quod ultro negotiis ad se non pertinentibus se immiscuerit. Similiter qui invadit possessionem ad se non pertinentem, in culpa est non levi, cum omnes scire debeant, quod suum non est, ad alium omnibus modis pertinere. Ideoque qui absente domino in vacuam possessionem sine Judicis auctoritate involavit, interdicto *Vnde vi*, tanquam prædo tenetur, ad restitutionem possessionis, cum omnibus fructibus, & omni damno dato, *l. ult. C. Vnde vi*. Huc pertinet lex *imperitia* 174. *inf. eod. Imperitia*, inquit Cajus, *culpa annumeratur*. In culpa enim non levi versatur is, qui se temere alicui professioni aut artificio ingerit cujus se imperitum esse cognoscit. Unde judex, qui imperitiâ malè judicavit, ex quasi delicto obligatus est, litem suam facit, & in tantum tenetur parti læsæ, quantum religioni judicantis æquum videtur. *Instit. obligation. qua ex quasi delict. in princip. l. si quis 5. §. si judex 4. ff. de oblig. & act. l. ult. ff. de extraord. cognit.*

Similiter si medicus per imperitiam hominem malè curavit aut perperam medicamentum ei dedit, L. Aquiliæ actione tenetur, §. *praterea* 6. *Instit. de L. Aquil. l. illicitas* 6. §. *sicuti medico* 7. *ff. de off. præf.*

Tantundem fere de assessore, avvocato,

E

tabel-

tabellione seu Notario, per imperitiam male consulentibus aut scribentibus, dicendum est, *l. 2. ff. quod quisque juris, &c. l. fin. C. de magistr. conveniend.*

Denique illud notandum est, ita accipiendam hanc regulam, nisi quis ex officio aut amicitia gerat negotia alterius: humanitatis enim ratio postulat prodesse & benefacere alteri, cum hominis naturaliter intersit, hominem beneficio adfici, *l. servus 7. ff. de servis exp.* Et ideo qui absentis negotia utiliter gerit, adeo non est in culpa, ut etiam dominum negotiorum gestorum actione sibi habeat obligatum, ut sumtus in absentis negotia utiliter factos restituat, *l. 2. ff. de negot. gest.*

AD L. XXXVII.

Ulpianus lib. 51. ad Sabinum.

Nemo, qui condemnare potest, absolvere non potest.

EXPLICATIO.

Duplex hujus regulæ lectio traditur ab interpp. Vulgata & antiqua est hæc: *Nemo qui condemnare non potest, absolvere potest.* Cujus hæc est sententia, quod quicumque propter defectum jurisdictionis & potestatis non potest condemnare, nec absolvere possit. Correlativorum enim eadem est natura: & uno posito aut sublato, alte-

alterum concedatur aut tollatur, necesse est. Altera recentiorum lectio est, ab Ho-
loandro ex Pande&ctis Florentinis restituta,
hoc modo: *Nemo qui condemnare potest,
absolvere non potest.* Cum qua concordat, *l.*
3. ff. de re judic. Cujus hæc est sententia:
Qui habet potestatem damnandi, multo
magis absolvere potest: Sumpto argumen-
to à majori ad minus: idque ex hac ratione,
quod jura proniora sint ad liberandum &
absolvendum, quam ad obligandum seu
condemnandum, *l. Arrianus 47. ff. de act.*
& obligat. Exemplum regulæ esse potest, ut
si cui simplex cognitio tantum causæ com-
missa sit, non vero facultas pronunciandi,
is nec condemnare possit, nec absolvere, *l.*
solent 6. in pr. ff. de offic. proconsul. Fallit re-
gula, si potestas condemnandi sit propter
aliquod privilegium personarum impedi-
ta. Nam delegatus Principis non potest vi-
ros illustres & patricios condemnare, quos
tamen absolvere potest, *l. quoties 3. §. A-*
deo 3. Cod. ubi senatores, &c.

Pomponius lib. 29. ad Sabinum.

Sicuti pœna ex delicto defuncti heres teneri non debeat : ita nec lucrum facere , si quid ex ea re ad eum pervenisset.

Explicatur hic etiam *l. toties 44. l. pupillum 111. §. fin. l. cum prator 127. l. hoc jure 152. §. fin. l. ad ea 157. §. fin. ff. h. t.*

EXPLICATIO.

Quemadmodum justum est, ex delicto defuncti heredem non teneri: (quia pœna suum auctorem excedere non debet, *l. sancimus 22. Cod. de pœn. l. crimen 26. ff. eod.*) ita æquum est, ut ex defuncti maleficio lucrum quoque non sentiat, quia turpia lucra heredibus extorquenda sunt, ne alieno scelere ditentur, *l. in heredem 5. ff. de calumniat.* Huic regulæ adjungenda est *l. pupillum 111. §. fin. in heredem non solent actiones transire, quæ pœnales sunt ex maleficio, veluti furti, damni, injuria, vi bonorum raptorum, & injuriarum.* Notandum autem hic singulariter, quod ipsa actio pœnalis adversus heredem non detur, sed conveniatur heres de eo, quod ad ipsum pervenit, actione in factum, vel condictione furtiva, in solidum, *l. 2. §. fin. ff. vi bon. rapt. l. 9. sup. de condict. furtiva.* quæ pœnales non sunt, sed rei persecutoriæ. Item diligenter nota, quod heres non teneatur pœnâ, quæ ex maleficio defun-

defuncti descendit: secus est in pœna, quæ ex conventionē aut contractu ejus debetur. Nam ea etiam in heredem transit in solidum, *l. fin. ff. de nautic. fœn.* Sic in actione mandati, commodati, tutelæ, depositi, & negotiorum gestorū heres ex dolo defuncti in solidum tenetur: etiam si ex illo dolo nihil ad heredem pervenit. Ideoque vel unus vel plures heredes simul omnes in solidum conveniuntur, singuli vero pro ea parte qua quisque heres est, *l. si hominem 7. §. 1. ff. Depos.* Et ratio est, quia ex contractu, rei que persecutione dolus hic descendit, *l. ex depositi 12. sup. de act. & obligat.*

Limitatur regula nostra, nisi lis per defunctum contestata sit. Tunc enim actio pœnalis transit ad heredem etiam in solidum. Quod duabus regulis comprobatur, *l. 164. inf. eod.* Ubi Iustus Paulus inquit, *Pœnalia judicia semel accepta in heredes transmitti possunt.* Item regula 139 ubi Cælius respondit, *omnes actiones, quæ morte aut tempore pereunt, semel inclusa iudicio salva permanent.* Quæ tamen posterior regula non solum accipi debet de pœnalibus judiciis, sed regulariter de omnibus actionibus quæ quocunque temporis curriculo extinguuntur, quod scilicet omnes actiones litis contestatio faciat perpetuas, & nova præ-

scriptio inchoanda sit à litis contestatæ tempore, *l. 1. C. ne de stat. defunctor. & c. l. unic. C. Ex delict. defunct. in quantum her.*

Ratio limitationis hæc est, quod in iudicio per litis contestationem quasi contrahatur, *l. 3. §. idem scribit 11. ff. de pecul.* Tacite namque uterque contrahentium sese in id obligat, quod iudicis sententia constituetur: Itaque fit, ut post litis contestationem quælibet actio in heredem transeat, cum omnes actiones ex contractu vel quasi descendentes, perpetuæ sint, & in heredem transitoria, *§. 1. Instit. de perpet. & tempor. action.* Et hæc vera sunt, quoties civiliter ad pœnam pecuniariam & privatum commodum partis agitur, non si agatur criminaliter. Nam in criminalibus iudiciis non sufficit, litem contestatam esse, sed etiam condemnatio sequi debet, antequam in heredes pœna transmittatur; excepto crimine læsæ Majestatis, & repetundarum, quæ etiam mortuis reis, cum quibus nihil est actum, contra heredes exercentur, *l. ex judiciorum 20. ff. de accusat.* Illud ad extremum observandum, quod regula nostra limitatur ex Pontificii juris æquitate, quo cautum est, heredem teneri ex defuncti maleficio in solidum, quatenus scilicet facultates matrimonii ejus patiuntur, etiamsi nihil

hil ad eum pervenerit, *c. fin. de sepulturis. c. in literis, ex. de raptorib.* Eaque est communis Dd. sententia, teste Hieronymo Franco *hic num. 13.* Idque ea ratione statutum est, quod heres teneatur exonerare conscientiam defuncti; & quo minus ad restitutionem bonorum iniquè à defuncto ablatorum teneatur, ignorantia eum non excusat. Sic heredes usurarii ad restituendas usuras quas defunctus exegit, jure conveniuntur, *c. Michaël, de usur. sicuti furis heres ad rem furto subtractam restituendam tenetur, l. si pro fure 7. §. 2. ff. de cond. furt.*

AD L. XXXIX.

Pomponius lib. 32. ad Sabinum.

In omnibus causis pro facto accipitur id, in quo per alium mora sit, quo minus fiat.

Concordat *l. in Iure Civili 161. ff. h. t.*

EXPLICATIO.

HÆc regula bifariam quoque legitur. Veterum hæc est lectio: *Pro facto accipitur id, in quo quis alium perhorrescit, quo minus fiat:* Ex Holoandri vero emendatione vel in Pandeët. Florentinis ita legitur; *In quo per alium mora sit, quo minus fiat, &c.* quasi paria sint, aliquem quid facere, vel per eum non stare, 'quo minus fiat, *l. uter 23. supr. de condit. inst: tut.* Utraque lectio vera est, prior tamen hoc loco magis oportune

tunc explicanda se offert. Nam de posteriori intellectu, *in l. in jure civili*, 161. *infra. eod.* commodius differemus. Docet autem regula, quod si quis justo metu vel terrore impeditus non fecit id quod facere debuit, tamen juris fictione id haberi pro facto; quod præ timore factum non est. Exemplum est *in l. 2. C. de his, qui propt. met. jud. &c.* Ubi appellatio omissa propter metum judicis habetur pro interposita; saltem si facta fuerit intra tempus legitimum appellationi præfixum protestatio à parte, se absque periculo appellare non potuisse. Similiter si in meo fundo ædifices, egoque tua violentia aut justo metu impeditus sim, quo minus tibi novum opus nunciaverim; siquidem protestatus sim de hoc impedimento, perinde erit, ac si tibi novum opus nunciaissem, ita ut quicquid à die protestationis ædificatum est, cogaris demoliri, *l. 1. §. sed & Aristo. 8. ff. quod vi aut clam. Bart. in l. de pup. llo 5. §. si quis ipsi 7. ff. de nov. oper. nunciat.* Debet autem metus justus esse, & talis, qui salutis, vitæ, famæque periculum, vel corporis cruciatum contineat, *l. isti quidem 8. §. pen. & ult. ff. Quod met. cau. l. 3. ff. Ex qu. cau. maio. in integr. restit.*

Nam vani timoris justa non est excusatio *l. vani 146. infra. eod.* Unde qui minis & vanis

vanis jactationibus perterritus est, non autem atrocitate facti, frustra restitutionem implorat, *l. interpositas. 13. C. de transactionib.* Quare qui metum allegat, & causatur se timore impeditum neglexisse, quod facere deberet, non est ei credendum, nisi metum probet, qui in atrocitate facti consistit, *d. l. interpositas.* Unde si quis tyranni alicujus minis aut jactationibus perterritum se dicat, hoc pro justo metu haberi non debet, nisi talis tyrannus solitus sit exequi suas minas, & sœvire carceribus vel tormentis contra inobedientes, *l. metum 9. C. de his quæ vi. met. cau. l. ult. §. 1. ff. Quod met. cau.* Si vero vanæ & illusoriæ sunt minæ, non curantur, *l. 4. & ibi Gloss. ff. Si plus quam per L. Falcid.*

A D L. XL.

Pomponius lib. 34. ad Sabinum.

Furiosi, vel ejus, cui bonu interdictum sit, nulla voluntas est.

Respice *l. in negotiis §. supr. h. t.*

E X P L I C A T I O.

C O m p a r a n t u r i n h a c r e g. furiosi & prodigi. Ut enim furiosus propter defectum naturalis judicii omni caret intellectus: Ita prodigus quoad bona sua mentis est abalienatæ, & instar furiosi ea administrat. De furioso diximus *supr. in l. in negotiis §.*

Quibus hoc tantum adnotandum, quod furiosorum duo in jure sint genera: Unum eorum, qui perpetuo furore agitantur, & ut ait JC. Macer in *l. Divus 14. de offic. pras. continua mentis alienatione omni carent intellectu*. Hi nullum omnino negotium per se gerere possunt, *d. l. 5.* Imo si delinquant, non plectuntur, quia satis ipso furore puniuntur, *dict. l. Divus: l. congruit 13. §. 1. ff. de off. pras.* Alii sunt, quorum furor intermissus est, & dilucida habent quietis intervalla, sive inducias, *l. si cum dotem 22. §. si maritus 7. ff. solut. matrimon. l. qui testamentum 20. §. ne furiosus 4. ff. qui testam. fac. poss.* & hi omnia negotia tempore furoris intermissi recte gerunt, *dict. §. ne furiosus*. Unde & furiosi qui dilucida habent intervalla, tempore intermissi furoris testamentum condere possunt, *l. furiosum 9. C. Qui testam. fac. pos.* Videamus nunc de prodigis. Est autem prodigus, qui neque finem, neque modum expensarum habet, sed omnia bona sua dilapidando profundit; & huic quidem Prætores curatorem dare solent, exemplo furiosi, ut in ejus curatione sit, donec sanos mores receperit, *l. 1. sup. de curat. furiosi*. Est tamen prodigus longe melioris conditionis, quam furiosus. Nam furiosi voluntas plane nulla est, tam in ac-

quiren-

quirendo, quam alienando : Prodigus vero comparatur furioso, quatenus se obligat, vel alienat, potest tamen sibi acquirere & alium sibi obligare, & conditionem suam meliorem facere, etiam sine curatore auctore, *l. is cui 6. ff. de verborum obligationib.* Unde & stipulari, & hereditatem adire prodigus, cui bonis interdictum est, potest. *d. l. 15. l. mutum 5. ff. de acqu. hered.* Idque hac ratione receptum est, ne interdictio facta in favorem prodigi, in ejusdem odium detorqueatur, *contra l. quod favore 6. C. de leg.*

Illud hic anxie disputant interpretes, an prodigo statim interdicatur ipso jure bonis, an vero prius requiratur decretum Pratoris? Et communior probabiliorque hæc est sententia, quod necessarium sit judicis decretum, ut quis habeatur prodigus, atque ante interdictionem illi à magistratu factam prodigum omnia facere posse, sive contractum sive testamenti jura respiciamus, ne decipiantur, qui cum illo contrahunt. Unde & hæc formula interdictionis bonorum, qua prodigis bonorum administratione interdicebatur, recitatur à Paulo, *lib. 3. sent. c. 5. Quando tu bona paterna, tuâ nequitia disperdis, liberosque tuos ad egestatem perducis, ob eam rem tibi ea re-*

108 IN TIT. DIG. DE REG. JUR.
*commercioque interdico. Vigl. ad tit. Quib.
 non est permissum fac. testam. §. item pro-
 digus. 2. Debet itaque præcedere sententia
 Judicis declaratoria, antequam quis pro
 prodigo habeatur, per text. in l. Iulianus 10.
 ff. de curat. furios. Ubi dicitur, prodigum
 postquam ei bonis à Pratore interdictum
 est, nihil posse de bonis suis alienare. Uno
 tamen casu prodigo ipso jure interdicta est
 administratio rei suæ; Veluti si quis cum lu-
 xurioso contrahat, quem sciat illico pecu-
 niam scorto daturum, aut alias turpiter con-
 sumpturum: illa enim emptio non subsistit, l.
 si quis cum sciret 8. ff. pro empt. Leges itaque
 quæ dicunt, prodigis interdici lege bonis, ad
 vetus jus XII. Tab. sunt referendæ; Quæ e-
 leganter confirmantur per c. veritatis, ext.
 de dol. & contum. Ubi Episcopus licet fue-
 rit manifestè prodigus, non tamen dicitur,
 nisi remotione facta ab officio per superio-
 rem, in dolo fuisse.*

AD L. XLI.

Ulpianus lib. 26. ad Edictum.

*Non debet actori licere, quod reo non permittitur.
 Consule l. Favorabiliores. 125.*

EXPLICATIO.

Monet hæc regula, æqualitatem in-
 ter litigantes esse observandam, ut
 quod reo non licet, nec actori licere debeat
 & c

& è contra. In Judiciis enim nulla est personarum acceptio habenda, *c. in iudiciis, de R. l.* Exempla regulæ hæc esse possunt: Quod si actor impetraverit per aliquod rescriptum, ut appellatione remota terminetur iudicium: ipse etiam in causa reconventionis victus non poterit appellare, *c. fin. & ibi gl. ex. de mut. pet.* Item cum reo non liceat Procuratorem revocare post litem contestatam, nisi causâ cognitâ, ita nec actori hoc permittitur, *l. post litem 17. l. qua omnia 25. ff. de procurat.* Postremo sicut reo non licet producere testes, post didicta testificata, id est, aperta & publicata testium dicta: ita nec actori hoc licebit, *Auth. at qui semel. C. de probat.* Sunt tamen nonnulla, quæ actori conceduntur, non autem reo, & è contra; de quibus commodius dicemus in *l. favorabiliores. inf. eodem.*

Ad §. in re obscura.

In re obscura melius est favere repetitioni, quam adventitio lucro.

EXPLICATIO.

Quotiescunque contròversia est inter diversi generis creditores, cujus in solutione primum sit habenda ratio, magis favemus ei, qui suum repetit, & qui ex contractu vel titulo oneroso experitur, quam

illi, qui ex causâ lucrativâ agit, puta ex testamento, donatione, vel legato. Exemplum est: Si incertum est, an hereditas sit solvendo, prius creditoribus, quam legatariis solvendum est; cum satis absurdum sit, creditoribus quidem jus suum persequentibus, & de damno vitando sollicitis, legitimum auxilium denegare: Legatariis verò, qui pro lucro certant, subvenire. Ideoque si heres prius Legatariis solverit, possunt creditores Legatariis soluta, per conditionem indebiti repetere, & auferre, *l. fin. §. sin vero creditores §. C. de jure deliber.* Ex his rectè inferunt Dd. quoties duo privilegiati inter se contendunt, quis præferri debeat, potiorē esse causam ejus, qui de damno vitando certat, quam lucrum capiat, *l. fin. ff. ex quib. causis majores. l. verum II. §. item quaritur 6. ff. de minor.* ubi deciditur, quod si minor xxv. annis petat se restitui in integrum contra minorem, cui pecuniam mutuam dederat, quam ipse minor, qui mutuum accepit, consumsit inutiliter & dilapidavit, quod potius faveatur ei, qui pecuniam consumsit & perdidit, quam alteri minori, qui mutuum dedit, & repetit.

AD L. XLII.

Cajus lib. 9. ad Edictum provinciale.

Qui in alterius locum succedunt, justam habent causam ignorantia, an id quod peteretur, deberetur. Fidejussores quoque non minus, quam heredes justam ignorantiam possunt allegare. Hæc ita de herede dicta sunt, si cum eo agatur, non etiam, si agat. Nam planè qui agit, certus esse debet, cum sit in potestate ejus, quando velit, experiri: & ante debet rem diligenter explorare, & tunc ad agendum procedere.

EXPLICATIO.

CUM ignorantia facti alieni probabilis sit, & nemini damnosa esse debeat, *l. fin. ff. pro suo. l. si mulier II. ff. ad SC. Vell.* recte hic pro regula traditur, eum, qui in alterius locum succedit, id est, heredem, justam habere ignorantia causam, an id, quod petitur, debeatur: Unde heres propter justam ignorantiam facti alieni solvere recusans, non est in mora; & ideo ob inoram ad usuras non tenetur, neque in expensas in lite factas condemnari debet, *l. si quis solutioni 24 ff. de Usur.* quippe non videtur moram facere, qui ex justâ causâ ad judicium provocat, & ignorat, an id, quod petitur, debeatur, *l. quod te 5. sup. si cert. pet. l. qui sine dolo 63. inf. eod.* Unde etiam heres, qui ignorans

ignorans vendidit rem apud defunctum depositam aut ei commodatam, non tenetur, nisi ad rei venditæ precium, quia extra dolum versatur, *l. 1. §. fin. sup. depos.* Sic heres vasalli aut emphyteutæ, qui feudum aut fundum emphyteuticum inscius sine directi domini consensu vendidit, aut canonem non solvit, non cadit à jure suo, sed excusatur, propter ignorantiam, quæ consistit in factò alieno, *gl. in l. 2. C. de jure Emphyteut. text. apertus. in c. 1. de controuv. inter domin. & empt. lib. 2. feud. tit. 42.* ubi dicitur, quod vasallus alienans feudum, tunc demum amittat feudum, si sciens esse feudum id alienet, secus si id ignoranter alienet. *Gagnol. h.* qui dicit, se quendam clientulum, qui prædium emphyteuticum sine licentia domini directi ignorans alienaverat, per hanc l. à pœna privationis seu caducitatis fundi emphyteutici defendisse. Excusatur itaque heres æquitatis ratione, nunc à dolo, nunc à pœnâ vel morâ, quæ alioqui stricto jure commissa esset, *l. ad diem 77. de verb. oblig.* Quod de successoribus dictum est, ad fidejussores quoque extenditur: hi enim si ignoranter exceptionem prætermiserint quæ competebat debitori, aut solverint quod solutum erat à principali debitore, excusantur propter ignorantiam, & mandati

dati actio eis competit, *l. si fidejussor. 29. ff. mandati*. Adversus hanc regulam vehementer obstat, *d. l. ad diem 77. ff. de verb. obl.* ubi ex promissione à defuncto facta ad diem sub pœnâ, heres tenetur ad pœnam, si post mortem promissoris ignorante herede dies extiterit. Idem dicitur in *l. ult. C. de naut. fœn.* Respondet Dynus, in *c. cum quis. de reg. jur. in 6* jure stricto & summo pœnam committi contra heredem, ex æquitate non item, sed restitutionem in integrum propter probabilem ignorantiae causam ei concedendam esse, *arg. l. 1. Ex qu. cau. maj.* Quæ solutio in scholis recepta est.

Regula hæc procedit, quoties ipsi heredes conveniuntur, quia cum præter spem ad judicium trahantur, instructi & parati esse non possunt ad litem, *l. 2. C. de dilat.* Non quoties actionem intentant. Quo casu observare debent, ne judicio eum temerè fatigent, qui non est obligatus, quia cum in potestate eorum sit, quando agant, diu satis deliberare secum possunt, ut litem rectè instituant. Hinc est quod actio doli certo tempore finitur: exceptio vero doli perpetua est, *l. purè 5. § fin. ff. de doli except.* Et ideo etiam actori tot dilataciones non conceduntur, quot reo, *d. l. 2. petenda. C. de temp. restit. in integrum. l. ult. ff. de fer. & dilat.*

AD

AD L. XLIII.

Ulpian. lib. 28. ad Edictum.

Nemo, ex his, qui negant se debere, prohibetur etiam alia defensione uti, nisi lex impedit.

EXPLICATIO.

Cum juris sui defensio ex primis naturæ igniculis procedat, & jure naturali nemini auferri debeat legitima sui defensio; *l. ut vim 3. ff. de just. & jur.* rectè hic ab Ulpiano traditur, quod reus judicio pulsatus pluribus etiam diversis exceptionibus contra actorem se tueri possit; Concordat *l. nemo 8. ff. de except. & c. nullus plurib. ext. eod.* Ideoque qui dicit se jurasse, potest etiam aliis exceptionibus uti, puta rei judicatæ, transactionis, & præscriptione longi temporis, *l. 5. ff. de exceptionib.* Potest etiam reus simul objicere exceptiones aliquo modo contrarias, puta si dicat: Rem, quam petis, præscripsi, quod nisi probetur, dico, meam esse ex privilegio Cæsaris, *c. auditis, ex. de præscript.* Unde etiam reus si dubitet de intentione actoris, ita excipere poterit, ut neget se debere, & si actor probet eum esse debitorem, dicat, se pactum de non petendo fecisse, *l. si quidem 9. vers. nam si C. de exceptionib.* Unde sequitur, reum qui excipit, de intentione actoris non confiteri, cum

cum à suâ exceptione discedere possit, *l. non utique. 9. ff. de exception.* Deinde cum reus exceptione sua intentionem agentis excludere conatur, non videtur illam approbare velle, *l. 2. ff. de except.*

Fallit regula, si lex impediât proponi plures exceptiones, quod fit in pœnam mendacii, cum lex calumniosè negantem eâ pœnâ adficiat, ne ad alterius exceptionis auxilium recurrere possit. Unde qui negat proprium chirographum, convictus in duplum condemnatur, nec auditur, si exceptionem novam, puta solutionis, vel aliam, proponere velit, *Auth. contra, Cod. de non numerat. pecun.* Et qui negat debitum, compensationem obijciens, in re minus liquidâ repellitur, *l. fin. Cod. de compensat.* Denique heres, qui testamento aliquid relictum negat, si contrarium probetur, non potest postea opponere, testamentum, ex quo relictum est, minus solenne fuisse, *§. si. Instit. de fideicommiss. hereditat.* Item qui negavit pignus esse debitoris, non potest excipere, & dicere se in ea re priorem habere hypothecam, *Auth. Item possessor. C. Qui pot. in pig.* Sic qui negat se esse possessorem, privatur possessionis commodo, & transfertur rei petitæ possessio in actorem: idque in pœnam mendacii est statutum, *l. ult. ff. de rei vend.*

Ad §. Quoties.

Quoties concurrunt plures actiones ejusdem rei nomine, unâ quis experiri debet.

EXPLICATIO. •

Actor experiri non potest pluribus actionibus quæ ad eandem rem & idem jus tendunt, & ex eadem obligatione seu causâ nascuntur, sed unam eligere debet, quâ propositâ ad aliam non datur regressus, *l. quod in herede 9. §. eligere 1. de tributor. action.* Et quidem simul eas in eodem libello proponere nequit, quia singulis controversiis singulæ constitutæ sunt actiones, & unus judicati finis sufficit, ne litium modus multiplicatus, summam atque inexplicabilem faciat difficultatem, *l. singulis 6. ff. de excep. rei jud.* Alia post aliam proponi nequit, quia bona fides non patitur, ut idem bis exigatur, *l. bona fides 57. inf. eod.* Exempli gratia: Si tecum mihi societas sit, & res ex societate communes, si quam impensam in eas fecero, aut si quos fructus ex iis rebus percepis, vel pro socio vel communi dividundo actione consequar, altera tamen per alteram tolletur, *l. pro socio 38. §. 1. pro socio.* Nonnunquam tamen plures actiones simul proponere licet, quando nimirum quis incertus est ex facto adversarii, qua actione

ctione experiatur, si modo protestatus sit, se ex altera tantum velle debitum consequi, *l. i. §. quia autem 4. sup. quod legat.* Planè in pœnalibus actionibus, quando plures ex eodem delicto descendunt, una aliam non consumit, sed quatenus in alterâ amplius est, persequi possumus, *l. nunquam 130. inf. eod.* Veluti si quis rem rapuit, & furti & vi bonorum raptorum tenetur. Eo casu si egeris cum raptore actione furti nec manifesti in duplum, superest actio de bonis raptis in id quod amplius in ea est, *l. i. ff. vi bonorum raptorum.* De concursu & cumulatione actionum vide eleganter differentem Cujaci. *lib. observat. 8. cap. 24. & Hotoman. in Illustr. quest. c. 27. Vincentium Cabotium lib. 1. disput. iur. cap. ult.* Vide etiam quæ notavi de cumulatione actionum *centur. 4. ἐναυποφανών, assert. 35.*

AD L. XLIV.

Ulpian. lib. 29. ad Edictum.

Toties in heredem damus actionem de eo, quod ad eum pervenit, quoties ex dolo defuncti convenitur, non quoties ex suo.

Concordat c. 26. *supr. h. t. & l. 9. §. fin. ff. de trib. act.*

EXPLICATIO.

Ratio hujus regulæ est, quia cum ex proprio delicto heres convenitur, pœna suum autorem tenere debet, & proinde in

in solidum obligatur; ex defuncti autem dolo in id quod ad eum pervenit, tantum tenetur ideo, ne ex aliena jactura commodum sentiat. *Concordat l. quod in herede 9. §. ult. vers. toties. ff. de tribut. act.* Excipitur heres furis, qui, conditione furtivâ conventus, non quatenus ad eum pervenit, sed solidum præstat, *l. 9. ff. de condict. furtiv.* Rationem tradit Bart. in *l. 1. de privat. del.* ut compescatur furtorum frequentia. Dissentit Cujacius *lib. observat. 7. cap. 37.* qui conditionem furtivam negat in solidum dari contra heredem furis, refragante aperto *tex. in d. l. 2. ff. de condict. furt.* & *l. contra 6. §. si post 3. ff. de action. Rer. amot.* Et hæc de dolo defuncti in delictis commissio sunt intelligenda: dolo siquidem, qui defuncto ex contractu imputari potest, heredem in solidum obligat, quod explicatur in *l. ad ea 157. §. fin. inf. eod.* In contractibus, inquit Ulpianus, *successores ex dolo eorum, quibus successerunt, tenentur in solidum.* Facit huc etiam *l. hoc jure 152. §. fin. infr. eodem.* qui ita habet; *In contractibus, in quibus doli præstatio vel bona fides inest, heres in solidum tenetur.* Idem traditur in *l. ex depositi 12. & l. ex contractibus 49. ff. de oblig. & act.* & in *l. si hominem 7. §. 1. ff. de pos. ubi dicitur, quod in actione mandati, com-*
mo-

modati, depositi, tutelæ, negotiorum gestorum & aliis similibus, heres tenetur ob dolum defuncti in solidum, licet ex illo dolo nihil ad eum pervenit, additâ hâc ratione, quia ex contractu rei que persecutione hic dolus descendit. Ratio est, quia in contractibus eadem persona censentur heres & defunctus, *l. heredem 53. inf. eod.* Unde si agatur ex dolo defuncti descendente ex contractu contra heredes, & unus tantum heres existat, is in solidum tenetur: si plures sint, pro ea portione, qua quisque heres est, conveniuntur, licet ad eos nihil pervenerit ex dolo defuncti: Ita intellige §. *fin. d. l. ad ea*, qui paulo obscurius loquitur.

AD L. XLV.

Ulpianus lib. 30. ad Edictum.

Neque pignus, neque depositum, neque precarium, neque emptio, neque locatio rei sua consistere potest.

EXPLICATIO.

Ratio regulæ est, quod nemini res sua servire potest, nemoque in re sua aliud jus habere potest, quam dominium & proprietatem, *l. uti frui 5. ff. si ususfruct. pet.* item quod res non nisi ex unâ causâ nostra fieri possit, quia quod nostrum est, amplius nostrum fieri non potest, §. *sic itaque*, 14. *Inst.*

Inst. de act. Nota itaque primò, rem meam mihi pignori dari non posse. Unde si rei pignori mihi datæ postea dominium acquiram, confestim extinguitur pignus, & pignoratitia actio evanescit, *l. si rem 29 ff. de pignoratitia act.* Pariter nec depositum, nec precarium, aut locatio rei suæ consistere potest. Sane uno casu rei suæ precarium valet: videlicet si debitor non proprietatem, sed possessionem rei suæ à creditore precario roget. *Quotidie enim creditores precario rogantur ab his, qui pignori dederunt, ut possessionem, quæ sola transfertur ad creditores in pignore, concedant. l. certe 6. §. ult. de precar.* Emptio quoque rei suæ inefficax est, si ve sciens, si ve ignorans quis emat rem propriam, & quod ignoranter ex hac causâ solutum est venditori, per conditionem indebiti reperitur ab emptore, *l. sua rei 16. de contrah. empt.* Nisi quis rei suæ non dominium, sed possessionem emat. Hæc enim valebit emptio, *l. si in emptione 34. §. rei sue 4. d. tit.* Similiter id quod meum est, sub conditione emere possum, si res mea interim esse desinat, *l. existimo 61. ff. eod.* Denique hæc omnia vera sunt, si irrevocabiliter res mea sit, non etiam si quovis casu à me auferri possit. Ita valebit etiam legatum rei meæ, si res à me evinci & auferri potest, *l. non quocunque 82. §. 1. de leg. 1.*

§. Privatorum.

Privatorum conventio juri publico non derogat.

Jus publicum dicitur, quod principaliter continet utilitatem publicam, quod & alibi dicitur jus commune vel solenne. *l. 7. §. & generaliter ib. l. jus publicum 38. ff. de pact. l. nec ex pratorio 27. supr. eod.* Hoc jus publicum privatorum conventionibus tolli aut mutari non potest. Exempla sunt: Jure publico statutum est, ut liberi primo loco parentibus succedant ab intestato. Unde pactum non valet, ut filia dote contenta excludatur ab hereditate paterna, *l. ult. ff. de su. & legit. l. pactum dotali 3. C. de collat.* Alterum exemplum: Donatio inter maritum & uxorem moribus prohibita est propter utilitatem publicam, ne concordia maritalis, quæ obsequio & virtute paranda est, pretio concilietur, *l. 3. ff. de dona. int. vir & uxor.* Si igitur maritus donavit uxori, hoc pacto adjecto, ne res donatas repetat, hoc pactum, contra jus publicum initum est invalidum, quia hoc pacto jus publicum, quod donationes inter conjuges inhibet, infirmatur, *l. 5. ff. de pact. dotal.* Sed objicitur *l. pacisci 31. ff. de pact.* ubi dicitur, contra adilium edictum pacisci licere. Si enim venditor pactus est, ne ob vitium

F

ven-

venditi animalis teneatur actione redhibitoria, vel quanti minoris, quæ ædiliū edicto sunt introductæ, *l. 8. ff. de edil. edict.* standum est huic pactiōni, & non dabitur emptori ad actiones quas pacto remisit, regressus, *l. quaritur 14. §. si venditor 9. ff. de edil. edict.*

Resp. Per hoc pactum non impeditur mens & intentio juris Prætorij. Nam ædiles currules voluerunt suo edicto definire, ne quis ex venditione morboſi animalis deciperetur, *l. 1. §. causa 2. ff. de edil. edict.* Itaque cum venditor paciscitur cum emptore, ne de vitio vel morbo animalis contra eum agatur, huic pacto standum est, quoniam emptor hoc casu non decipitur, dum sciens & prudens jus suum remittit. Scienti enim & volenti non fit injuria, neque dolus.

AD L. XLVI.

Gajus lib. 10. ad Edictum provinciale.

Quod à quoquam pœna nomine enactum est, id eideſt restituere nemo cogitur.

EXPLICATIO.

CUm publicè expediat, delicta non manere impunita, *l. ita vulneratus 51. ff. ad l. Aquil.* recte hic pro regula traditur, si quid ab aliquo ratione pœnæ exactum est, ad ejus restitutionem neminem cogendum.

Exem-

Exemplum regulæ est in procuratore, qui si propter suam contumaciam pœna aliqua à judice mulctatus est, non potest eam à domino recuperare, quia sibi imputet quod rem illicitam aggressus est, *l. qui proprio 46. §. item contra §. de procurat. in verb. pœnam autem, quam ex suo delicto præsstitit, procurator recuperare non debet.*

Simile exemplum extat in *l. 3. §. condemnatio 11. de tab. exhib.* ubi legatarius contra non exhibentem testamentum interdicto de tabulis exhibendis egit, & ob contumaciã non exhibentis tantum consecutus est, quantum in legato sub conditione relicto inesse potuit, licet postea conditio legati deficiat, tamen non cogitur legatarius ad restitutionem pœnæ; quia pœna contumaciæ ab eo præstatur, qui non exhibet tabulas testamenti, pœnæ vero semel depensæ non solent repeti, *l. pœna 24. de condict. indeb.*

Sic si quis damnatus sit *l. Iulia ambitus*, licet restitutus sit postea in integrum, pœnam tamen pecuniariam repetere nequit, quamvis res videatur rediisse ad causam indebiti, *l. 1. sup. ad l. Iuliam ambitus*. Sic etiam debitor à creditore repetere non potest pœnam quam ipse pignoris surrepti nomine ipsi præstitit, *l. si pignore 22. in princ.*

124 IN TIT. DIG. DE REG. JUR.
supra de pign. act. l. si debitor 79 ff. de furt.

Sed an hæc regula Jure Canonico vera sit, vehementer disceptant interpretes: verior tamen est sententia, quod etiam in foro conscientię libitè possit exigi pœna, & exacta retineri; cum obligatio ad pœnam delicti juris sit naturalis, *c. decenter, dist. 89. c. in legibus 12. q. 2.* & publicè intersit, ne impunita maneant maleficia, *l. ita vulneratus § 1. in fin. ff. ad L. Aquil. Ioan. Ferrarius hic.*

AD L. XLVII.

Ulpianus lib. 30. ad Edictum.

Consilii non fraudulentum nulli obligatio est. Caterum si dolus & calliditas intercessit, de dolo actio competit.

EXPLICATIO.

Hujus regulæ duo sunt membra. Primum est, quod consilium alicui sincerè & citra fraudem datum, consultori non debeat esse damnosum. Ratio est hæc, quia liberum est cuique, apud se explorare, an expediat sibi sequi consilium, nec ne. Exempli causa, si mandem tibi aut consulam, ut pecunias tuas in emptionem prædiorum potius collices, quam ad usuras, ex eo non obligabor; quia consilium magis

gis est, quam mandatum, §. *tua tantum*, 6. *Inst. mand. l. 2. §. ult. ff. Mand.* Quod verum est, nisi mandavero tibi, ut certo homini, puta Titio, pecuniam crederes? Si enim aliàs crediturus pecuniam non fuisses, actione mandati tibi obligatus ero, l. 6. §. *si tibi 4. ff. mand.* Nam meo jussu videris cum debitore illo contraxisse. Et ita de facto observatum & judicatum se vidisse notat Hieronymus Francus *h. in commentariis ad hanc L.* qui fuit JCtus celeberrimus & Professor Juris eximius dum viveret in Academia Duacensi, & reliquit erudita commentaria ad 50. priores Leges hujus Tituli.

Alterum regulæ membrum est, quod ex consilio dolo in consultorem doli actio detur. *Malum enim consilium*, ut proverbio celebratur, *consultori pessimum est.* Veluti cum sciret consultor, debitorem, qui à me mutuam pecuniam petebat, facultatibus labi, & affirmaverit, eum idoneum esse, cui credatur pecunia, merito actio de dolo in eum dabitur, cum mei decipiendi gratia nomen falso laudaverit, l. *quod si 8. cum l. seq. de dolo malo.* Hinc actio de servo corrupto manavit, ubi persuadendi verbum de malo consilio Ulpianus interpretatus est, in l. 1. §. *persuadere. 3. ff. de ser. corr.* Quid vero de imperito consilio dice-

mus, cum in professore artis imperitia culpæ adnumeretur, *l. qua actione 7. §. ult. cum l. seq. ff. ad L. Aquil.* Sed in medicis id singulare est, quod L. Aquilia teneantur, si hominem imperitè curaverint, vel malè secuerint, quia medici in libris nostris iidem sunt qui chirurgi & pharmacopolæ, *l. 4. in fi. ff. Ad L. Corn. de sicar. l. si medicus 3. ff. de extraor. cogn.* Itaque manu sua damnum dant. In Jurisperitos, aliosve qui imperitè de jure respondent, nulla actio est proposita, quia consulentis potius culpæ assignatur, qui neque secum, neque cum amicis, neque cum aliis, quorum copia fuit, deliberavit, an sibi consilium expediret sequi, nec ne, *l. 2. in fi. ff. Manda.* Ita tradunt *lason & Zasius ad l. 2. nu. 3. ff. Quod quisque jur.*

Ex hoc textu hanc notant regulam Dd. quod in delictis consulens eadem pœna plectatur, qua principalis perpetrator, maxime si is, cui consulitur, alias delictum non commisisset, nisi ejus consilio instigatus, *l. non solum 11. §. Attilicinius 6 ff. de injur. in verb. si persuaferim aliàs nolenti §. non solum 11. Instit. de injur.* Si vero absque consilio alias tale delictum patrasset, mitius puniendus est consultor, si delictum sit leve, secus in atrocioribus, *text. elegans. in c. sicut dignum, §. qui vero, extr. de homicid.* Decius
hic

hic nu. 5. Denique si post malignum consilium non subsequatur delictum aut effectus, consultor non tenebitur, §. *interdum* 11. *Inst. de oblig. qua ex de l. ubi Mynsing. l. si quis uxori* 52 §. *neque verbo* 19. *ff. de furt. l. sape* 53. *in fi. ff. de verb. sign.* ubi dicitur, consilium dedisse non nocet, nisi furtum, ut aliud quoddam delictum sit secutum.

Ad §. Socii.

Socii mei socius, meus socius non est.

EXPLICATIO.

CUM societas mutuo consensu contrahatur, non potest is meus dici socius, quem in societatem non admisi. Ideoque quem meus socius admittit, illi tantum socius est, non mihi, *l. qui admittitur* 19. *cum l. seq. l. cum duobus* 52. §. *cum duo erant. ff. 5. pro socio.* Hinc recte inferunt Dd. quod vasallus mei vasalli, meus vasallus non sit. Ideoque nec ad obsequia, servitia aut homagia à me cogi poterit, *Dec. hic. num. 1. fac. l. Modestini.* 105. *ff. de verb. sign.* ubi dicitur, quod libertus mei liberti meus libertus non est.

AD L. XLVIII.

Paulus lib. 35. ad Edictum.

Quicquid in calore iracundiæ vel fit, vel dicitur, non prius ratum est, quam si perseverantia apparuit, judicium animi fuisse. Ideoque brevi versa uxor nec divortisse videtur.

EXPLICATIO.

CUM ea quæ repentino quodam calore aut subitâ animi perturbatione accidunt, neque considerate, neque constanter fieri possint, rectè hæc statuit regula, quod calore iracundiæ fit vel dicitur, non prius firmum ratumque haberi, quam si accesserit perseverantia, & apparuerit ex perseverantia, deliberatè id esse factum. Cum enim *ira furor brevis sit*, Cic. 4. *Tusc. quest. inimica consilio, & contraria rationi*, & ab *Ennio*, bene dicatur, *ira initium insania*, & *iratus ab insano tempore tantum distet*: quicquid iratus agit vel loquitur, tanquam ab insano profectum æstimari debet: Ideoque si uxor jurgii causa per calorem iracundiæ misso repudio à marito discedat, brevi reversa, non censebitur divertisse; & hoc, jurgium potius, seu frubusculum, hoc est, de re frivola subitanea ira, l. 32. §. *si divortium* 10. ff. de don. int. vir. & ux. quam divortium appellari debet, *tex. hic, & in l. 3. sup. de divort.*

vort. Sic qui in rixâ in consulto calore lapsus malè alicui dixit, aut crimen temerè objecit, nisi id vel iterare sit ausus, vel adstruere, non obligatur, *c. si quis iratus 2. q. 3.* Sic exheredatio ex iracundiæ calore facta, non valet, nisi ex perseverantiâ firma voluntas appareat, *l. si filiam 19. C. de inoff. testam.* Exemplum aliud accommodatum huic regulæ depromitur ex *l. licitatio 9. ff. de publ. & vect.* ubi traditur, si quis vectigalium licitationem, calore iracundiæ ultra modum solitæ conductionis fecerit, non aliter admittendus est, quam si fidejussoribus idoneis, aut aliter satis caverit, se vectigalia, ut est licitatus, soluturum, quod tunc non iræ fervore, sed animo plane sedato & consulto id fecisse existimetur.

Fallit regula in delictis talibus, quæ per poenitentiam revocari non possunt, ut si quis per iracundiam vulnerasset aut occidisset hominem, tunc non posset ullatenus factum revocari aut poenitentiâ excusari, etiamsi id fecisset calore iracundiæ. Ita notat Angelus in *l. si non convicii 5. C. de injur.* & Lanfranc. in praxi. tit. de confessione nu. 3 & 4. *tex. est in L. Lex Iulia 7. §. ult. ff. Ad L. Iul. rep.* ubi dicitur, quod qui calore iracundiæ hominem interfecit, non minus capite plecti juberetur, quam qui innocentem

peremit. facit *l. aut facta* 16. §. *causa 2. in verb. puniuntur*, cum quis ab extraneo per iram pulsatus est, ff. de pœn. Decius h. num. 7.

Si quis ergo à delicto promiscuè excusari posset propter iracundiam, raro delictorum fieret animadversio: mitius tamen puniendus est, qui fervore iracundiæ deliquit, *l. 1. C. si quis Imp. mal. in verb. si ex insania processit maledictum*, miseratione dignissimum.

facit in argumentum *l. si adulterium cum incesto* 38 §. *Imperator* 8. ff. *Ad L. Iul. de adult.* ubi dicitur, quod difficillimum est justum dolorem temperare. Itaque ille, qui,

provocatus ad iracundiam, deliquit, mitius debet puniri, Decius h. fac. *l. famosi* 7. §. 3. ff. *ad L. Iuliam. majest.* ubi dicitur, lubricum linguæ ad pœnam facile non est trahendum, scilicet magnam. Ita tradit Roman. singul.

514. Denique fallit regula in contractu ad pias causas facto. Si quis enim ex inconsulto & præcipiti animi calore bona sua Ecclesiæ reliquerit, forte ut bona consanguineis suis ex invidiâ præriperet, non potest ea hoc prætextu revocare, quod per impetum & subitum animi calorem hanc donationem fecerit, c. *sunt qui opes* 17. q. 4.

AD L. XLIX.

Ulpian. lib. 35. ad Edictum.

Alterius circumventio alii non præbet actionem.

EXPLICATIO.

Quemadmodum ex proprio delicto nemo meliorem suam conditionem facere potest: Ita nec ex alieno dolo actionem sibi querere potest, quia quod alicui suo nomine non licet, nec alieno licebit, *cap. quod alicui, ex h. t.* Alias facile esset, dolos & technas per alium struere, si hoc modo actionem querere cuique liceret. Unde quod servus dolo malo acquisivit, ex eo, domino non competit actio, *l. quod servus 24. ff. de acquir. poss.* ubi dicitur, quod illicitè servus acquisivit, puta vi aut clam, id ad domini possessionem non pertinet. Sic etiam quod socius illicitè acquisivit, non confert in societatem, nec actione pro socio ad id compelli potest, *l. cum duob. 52. §. 6. cum l. seq. sup. pro socio.* ubi subjungitur elegans ratio, *quia delictorum turpis atque fœda communio est.* Ad hæc in illicitis non videtur quis consentire aut velle, arg. *l. si pater 12 ff. Quæ in fraud. cred. &c.*

Sic si tutor in rem pupilli contrahens aliquem circumvenierit, actionem pupillo querere non potuit, & experienti ei doli

exceptio obstabit, l. 4. §. *illa etiam questio* 23. *sup. de doli except.* Similiter ex circumventionem procuratoris domino nulla quæri potest actio, ideoque etiam dominus agens ex fraudulentâ circumscriptione procuratoris, exceptione doli repellitur, d. l. 4. §. *quisitum est* 18. ff. *de dol. excep.*

AD L. L.

Paulus lib. 39. ad Edictum.

Culpâ caret qui scit, sed prohibere non potest.

Explicatur hic etiam l. *nullum Crimen* 109. ff. *h. t.*

EXPLICATIO.

IN multis Juris articulis scientia aliquem culpæ insinuat, atque nocere solet eatenus, ut nisi ipse prohibeat, teneatur. Unde si domino sciente & non prohibente servus noxam committat, dominus tenetur in solidum, id est, ad plenam & integram totius litis æstimationem, & facultatem noxæ dedendi servum amittit, l. 2. ff. *de nox. act.* Si quis autem prohibere non possêt, licet sciverit, excusatur à dolo & omni culpa. Itaque casu dominus tantum noxaliter tenetur, non in solidum, l. 4. ff. *de nox. act.* Quod procedit etiam in famulis & ministris nostri temporis, quia factum ab illis domino sciente, & non prohibente, domino imputatur. Unde responsum est, quod si servi vel famuli alicujus coloni vileam exussissent, & do-

& dominus scivit eos esse male conditionis
& homines noxios sive perditos, tenetur de
incendio, quia in culpa est dominus, quod
in domo & familia sua hujusmodi noxios
alat personas, & malorum ministrorum
operâ utatur, *l. si servus servum* 27. §. *Pro-*
culus 11. ff. *ad L. Aquil. Cognolus hic num. 8.*
Concordat J. C. Paulus in *l. 109. inf. eodem*
Nullum crimen patitur is, id est, extra cau-
sam delicti est, *qui non prohibet, cum pro-*
hibere (non) possit. Exempli causâ: Si exer-
citu transiente per agrum, milites ex do-
mo conductâ fenestras & ostia effregerint,
vel aliquam prædam sustulerint, conductor
judicio locati non tenebitur, si modo im-
perium militum non potuit impedire, *l. i-*
tem quar. 13. §. *exercitu* 7. ff. *locati.* A con-
trario sensu hæc statuitur regula, quod cul-
pa non careat is, qui prohibere potest deli-
ctum, nec tamen prohibet. Nam ut elegan-
ter Cicero testatur *lib. 1. Officior.* *Qui non*
defendit alium cum potest, nec obsistit in-
juria, tam est in vitio, quam si parentes,
patriam aut amicos deserat. Et recte Sene-
ca in Troade: *Qui non vitat peccare, cum*
possit, jubet. Unde hæc exurgit quæstio, va-
riis opinionum fluctibus agitata; *An tenea-*
tur quis defendere alterum, in periculo vi-
ta constitutum, si potest? Cui quæstioni
latè

latè inhæret Decius *hic*. Bartoli sententia est, quam fere catervatim Dd. sequuntur, jure civili neminem teneri ad defensionem alterius; idque probat ex *l. metum 9. §. sed licet 1. ff. quod metus causa*. Ubi dicitur, quod quis licitè pecuniam accipiat, ut alium defendat ab incurso prædonum vel latronum, quam certè turpiter acciperet, si gratuitò & ex officio ad hoc obligatus esset per *l. ult. ff. de condict. ob turp. cau.* ubi dicitur, quod turpiter facit, qui pecuniam accipit, ut id faciat, quod gratis facere tenetur, & quod eo nomine datum est, restituere cogitur. Quæ sententia Bartoli Baldo adeo displicuit, ut dicat, *Bartoli animam propter hanc opinionem in inferno cruciari*. Canonistæ autem communiter sentiunt, in foro conscientia teneri eum de delicto, qui cum prohibere posset, & avertere periculum alteri imminens, hoc neglexit facere, *c. quanta. de sentent. excommun.* Ubi ita rescribit summus Pontifex: *Eos favere delinquentibus interpretamur, qui cum possunt, manifesto facinori desinunt occurrere*. Et ita Decius & Franc. hic decidunt.

AD L. LI.

Gajus lib. 15. ad Edictum Provinciale.

*Non videtur quisquam id capere, quod ei necesse est alii restituere.*Repete *l. Non videtur.* 13. *supr. h. t.*

EXPLICATIO.

C*apere* verbum cum effectu accipitur:

Ideoque illud non videtur quis capere, quod ei necesse est alii restituere. *Accipere* vero dicitur, etsi quis sic non accepit, ut habeat, sicut pervenisse propriè illud dicitur, quod est penes aliquem permansurum, *l. aliud est capere* 71. *supra de verb. sig.* Verba enim cum effectu sunt accipienda. Usus regulæ esse potest, quod si quis in testamento sit exheredatus, & legatum ei relictum, quod tamen alteri restituere debet, poterit ille nihilominus querelam inofficiosi testamenti proponere, quod si legatum sibi acquireret, non posset per querelam inofficiosi testamentum expugnare, *l. post legatum* 5. *ff. De his quib. ut indig.* quia petendo legatum sibi relictum tacitè videtur ultimum defuncti elogium approbare, *l. si pars* 10. 6. *fin. de inof. test.* Nec obstat *l. cepisse* 140. *de verb. sig.* ubi dicitur, *Cepisse quis intelligitur, quamvis alii acquisiverit.* Eatenim lex intelligenda est de filiofamilias & servo: hi namque capere videntur, licet iis, quorum

in

in potestate sunt, restituant, cum propter vinculum dominicæ vel patris potestatis unius personæ loco habeantur. Aliud exemplum esse potest; Cuidam incapaci, qui certam partem bonorum tantum potest accipere, puta filio naturali, cui ultra unciam extantibus legitimis liberis nihil à patre potest testamento relinqui, l. 2. C. de nat. lib. amplum fideicommissum est relictum, ut id alteri restituat, quod ipse capere non potest. Quæritur *an id legatum seu fideicommissum cogatur agnoscere, seu ex testamento adire?* Et responderetur, quia id non videtur quisquam capere, quod alteri tenetur restituere, eum cogi posse, ut hoc Legatum seu fideicommissum adeat, & alteri restituat, l. cogi 16. § hi qui 15. ff. ad SC. Trebel. l. cum ei qui 42. ff. de legat. 2.

AD L. LII.

Ulpianus lib. 44. ad Edictum.

Non defendere videtur, non tantum qui latitat; sed & is qui præsens negat se defendere, aut non vult suscipere actionem.

EXPLICATIO.

Pertinet hæc regula ad contumaciæ explicationem, ut sciamus, qui contumaces dicantur, & quæ pœna à jure erga eos sit statuta. Fit enim locus contumaciæ, quo-

quoties quis non defenditur in iudicio, quod triplici fit ratione.

Primò, se defendere reus non intelligitur, qui fraudationis gratiâ turpiter latitat, & ne iudicium suscipiat contra creditores, se occultat, *l. Fulcinius 7. §. quid sit 4. supr. quibus ex caus. in poss. eat.*

Secundò, non videtur defendere, qui actionem non vult suscipere, quod maximè fit, quando post litem contestatam in suscepta defensione non perseverat, vel si in litis initio de iudicâto solvendo satisfacere nolit, *l. 2. supr. quib. ex caus. in poss. l. recte defendi 63. supr. de iudiciis.*

Tertiò, non videtur se defendere, qui præsens negat se id facturum, vel qui interrogatus à Prætore omnino non responderet, sed tacet. Nam & hic tanquam contumax & emansor punitur, *l. de atate, §. qui tacuit, de interrog. in iur. faciend. & interrog. action.*

Pœna autem contumacium hæc est, quod in expensas omnes, in lite factas, condemnentur, item quod in eos, ac si præsentes essent, sententia feratur, denique quod eorum bona prætor à creditoribus possideri, distrahi ac alienari decernat, *l. consentaneum 8. iuncta Aut. qui semel. C. quomodo & quand. iud. sent. prof. deb.*

Quartò, quod verus contumax non auditur,

138 IN TIT. DIG. DE REG. JUR.
dicitur, si appellare velit, *l. & post edictum* 73.
§. ult. ff. de iudic.

AD L. LIII.

Paulus lib. 42. ad Edictum.

Cujus per errorem dati repetitio est, ejus consultò dati donatio est.

EXPLICATIO.

CUM hæc regula tractet de repetitione indebiti, præmittendum est pro faciliiori intellectu, quot modis indebitum dicatur. Est autem indebitum quadruplex, Nam aliud est indebitum jure civili, sed naturaliter debitum, ut si servus domino, filius patri, frater fratri in patris potestate constituto, sit obligatus, *l. naturaliter* 13. *l. frater à fratre* 38. *ff. de cond. ind.* Item heres ultra Falcidiam ad solida legata præstanda, obligatus est naturaliter, non civiliter, *l. error* 9. *C. ad l. Falcid.* Et hoc indebitum si errore facti solutum sit, repetitur, veluti si heres, existimans, hereditatem satis esse locupletem, integra legata solverit, absque retentione Quartæ: quod ultra quadrantem errore facti solutum est, heres à legatariis repetet, tanquam indebitum, *d. l. error.* Is autem, qui inscius juris, beneficium Falcidiæ sibi competere ignorans solvit, solida legata non

ta non repetit, *d. l. error. l. cum quis jus, 10. C. de juris & fact. ignor. l. 1. C. ad L. Falcid.*

Secundò, indebitum quid, est jure naturali, sed civiliter debitum, veluti in obligatione literarum, cum quis chirographo emissio spe futuræ numerationis confessus sit se debere, quod non acceperit, & hoc quocunque errore solutum est, repetitur, nisi biennium præterierit à tempore obligationis. Tunc enim efficax redditur hæc obligatio, & exceptio non numeratæ pecuniæ cessat, *l. indebitam 47. de cond. indeb. in verb. ipsum repetere posse, quia indebitam jure gentium pecun. solvit. l. quod si maritus 3. §. 1. ff. de const. pec. Instit. de liter. obligat.*

Tertio indebitum quid est omni jure, & civili & naturali. Veluti cum quis id, quod semel solutum est, denuò solvit, aut cum decem solum deberet, viginti solvit. Et hoc etiam quocunque errore solutum repeti potest: ex hac ratione, quod iniquum sit aliquem cum alterius detrimento locupletari, *nam hoc natura 14. ff. de cond. ind.*

Quarto indebitum quid est ope exceptionis. Ubi distinguendum est, an sit exceptio perpetua, an verò temporalis. Si perpetua sit, tunc siquidem est exceptio favorabilis, qualis est SCti Vellejani, quæ in favorem mulierum intercedentium introducta

ducta est, solum repeti potest: si odiosa est, uti ex exceptio SCti Macedon. quæ in odium creditorum filios. mutuo dantium recepta est, solum repeti non potest, *l. qui exceptionem 40. ff. de cond. indeb.* Si vero sit exceptio temporalis, veluti si quis id, quod ad certum diem debebat, ante diem solvit, & hoc condici nequit, *l. in diem 12. ff. d. t.* His ergo præmissis ad regulam propius accedamus, quæ hoc vult; quemadmodum indebitum quod per errorem solutum est, repeti potest, ita qui consulto & ex certa scientia indebitum solvit, donare censetur, & cessat hoc casu repetitio, *l. 1. ff. de cond. ind.*

Donatio autem hoc in casu ita demum intelligitur, quando tam solvens quam recipiens scit esse indebitum, quia in donatione utriusque requiritur consensus, duoque extrema in donatione, animus scilicet erogandi & accipiendi ex liberalitate, concurrere debent, *l. 2 l. hoc jure 19 ff. de dona. Dec. hic num. 1.* Postremo notandum, quod tum demum donatio intelligatur, si nulla alia extet præsumptio aut conjectura, ex qua alius, quam donandi animus inducatur. Nemo enim in dubio donare, & suum jactare præsumitur, *l. cum de indebito 15. ff. de probat.* Unde qui sciens usuras indebitas solvit,

solvit, cum sortem falso se debere existimaret, eas repetet; cum eas non donasse præsumatur, sed ideo solvisse, ut creditorem benigniorem haberet in exigendâ sorte, neve à creditore importunè vexaretur ad solutionem sortis vel principalis debiti, *l. si non sortem* 26. §. *si quis falso* 2. *supra*, de *cond. indeb.*

AD L. LIV.

Ulpian. lib. 46. ad Edictum.

Nemo plus juris ad alium transferre potest, quam ipse haberet.

Sensum accipit etiam *l. nemo plus commodi*. 120. & *l. aliud*. 160. §. *fin. ff. h. t. item l. 167. eod.*

EXPLICATIO.

Quotidiana & usitata hæc est regula, & ex naturali æquitate suam trahit originem. Natura enim non patitur, ut quis plus dare aut transferre possit, quam ipse habeat. Huc pertinet *l. trad. 20. ff. de acquir. rer. domin.* Ubi ait Ulpianus, *Traditio nihil amplius transferre debet vel potest ad eum, qui accipit quam est apud eum, qui tradit.* Si igitur quis dominium in fundo habuit, id tradendo transfert, si non habuit, ad eum qui accipit, nihil transfert. Locum autem habet regula non solum in alienationibus, verum etiam in successioneibus; ut *nemo plus juris in successorem suum transferre possit, quam ipse habet.* Quo pertinet regula

gula 120. *Nemo plus commodi heredi suo relinquit, quam ipse habet.* Item reg. 160. §. fin. *Non debeo melioris conditionis esse, quam author meus à quo jus in me transit.* Denique huc referenda est reg. 167. *Qui in jure dominiumve alterius succedit, ejus jure uti debet.* Et hæc tam de singulari, quam universalis successore intellige, ita tamen ut tantum realia vitia, non etiam personalia transeant in singularem successorem, veluti in emptorem, donatarium, legatarium, *l. sicut aquum 37. ff. de act. empti.* Nec enim mala fides venditoris aut donatoris nocet emptori, aut donatario præscribere incipienti, seu præscriptionem à sua persona inchoanti, *l. an vitium 5. ff. de divers. & temp. præscr.* Porro, hoc casu multum interest, inter successorem singularem, veluti emptorem, donatarium & legatarium, & universalem, puta heredem. In successore universalis hæc regula obtinet. *Quod defunctus non potuit usucapere propter malam fidem, id nec heres potest usucapere, licet bonam fidem habeat.* E contra si defunctus bonam fidem habuit, heres propter suam malam fidem non prohibetur usucapionem implere. *l. cum heres 11. ff. de div. temp. præsc.* In successoribus singularibus aliter obtinet, ubi hæc regula procedit, *quod vitium*

tium auctoris singulari successori neque pro-
sit, neque noceat. Unde venditoris bona fi-
des non prodest emptori malæ fidei in usu-
capiõibus, quia emptor non sustinet per-
sonam venditoris, ut defuncti personam he-
res sustinet. E contra mala fides auctoris
non nocet singulari successori, præscribere
incipienti, id est, si nolit uti accessione
possessionis sui auctoris, sed ex sua persona
velit usucapionem inchoare, *d. l. an vitium*
5. ff. de divers. & temp. præscript. l. sed etsi
7. §. Prator ait 11. ff. de Publ. act.

Talis itaque res ad eum transit, qui acci-
pit, qualis fuit apud eum, qui tradidit, & a-
lienatio tum fit, cum suâ causâ dominium
transfertur, quæ esset futura, si apud nos
remanfisset; præterquam si esset aliquid no-
minatim conventum, *l. alienatio 67. supra,*
de contrah. empt. Si tamen alicui speciale
mandatum alienandi, aut libera universo-
rum bonorum administratio à domino
permissa sit, isque rem vendiderit & tradi-
derit, facit eam accipientis. Quia perinde
est, ac si ipsi fecissemus, §. *vendita 41. Instit.*
de rer. divis. Idem est in creditore pignus a-
lienante, transfert enim dominium, quod i-
pse non habet, sed hoc ex pacto & conces-
sione debitoris facit, §. *contra 1. Inst. quib. a-*
lien. licet. Idem de tutore & curatore dicitur,
qui

qui ex causa bona pupilli & minoris vendunt, *l. lex qua tutores 22. & l. ult. C. de admin. tuto.* quia quicquid faciunt, nomine domini facere censentur. Judex etiam adjudicat alteri dominium rei, quod non habet, §. *ult. Inst. de off. jud.* & Episcopus confert beneficia quæ non sunt sua, sed hoc fit ratione officii. Publicus executor quoque, fiscus & Imperator dominium transferunt, quod non habent. §. *ult. Inst. de usucap. l. 2. C. de com. rer. alie. l. Lucius 11. ff. de evict.*

AD L. LV.

Gajus libr. 2. de testamentis ad Edictum Urbicum.

Nullus videtur dolo facere, qui suo jure utitur.
Exponitur hic etiam *l. nihil dolo. 129. l. factum. 155. §. 1. ff. h. t.*

EXPLICATIO.

Nemo præsumitur dolo facere, qui utitur jure sibi concesso. Quod enim fit Legum permissione, id sincere & sine dolo malo factum interpretamur. Exempli causa: Titius in suo fundo fodiens, dum sibi puteum extruere vult, præscindit venas vicini putei, & vicino aquam avertit, de damno dato non tenetur, cum jure suo id faciat, *l. 1. §. denique Marcellus 12. sup. de aqua & aq. plu. v. arc.* Item qui utitur re communi, dolo facere non videtur; quia credendum est, ple-

plerumque eum qui partis dominus est, jure suo potius uti, quam furti consilium inire. Si tamen per fallaciam evidentem, dolo malo rem communem amovit, furti quoque tenetur, *l. rei communis 45. & l. merito 51. ff. Pro socio.* Huc pertinet lex 151. *Nemo damnum facit, nisi qui id facit, quod facere jus non habet, & lex 155.* Non videtur vim facere, qui jure suo utitur. Unde si creditor ex conventionis lege ingrediatur fundi sibi oppignorati possessionem propria auctoritate, cum jure suo utatur, vim facere non videtur, *l. 3. & ibi gl. C. de pignor.* Huc etiam facit lex 129. inf. cod. *Nihil dolo creditor facit, qui suum recipit:* puta, si creditor pecuniam sibi debitam acceperit, antequam bona debitoris ex edicto possideantur, quamvis sciens eum solvendo cæteris non esse, edicto, qui in fraudem creditorum facta sunt, ut restituantur, non tenebitur, quia vigilantibus, non dormientibus, jura subveniunt, *l. quod autem 6. & §. sequ. l. pupillus 24. ff. qua in fraud. credit.* Huc etiam pertinet lex Domum, inf. hoc tit. *Domum suam unicuique reficere licet, dum non officiat invito alteri, in quo jus non habet, i. e. in quo servitutem non habet.* Ergo si jus, hoc est, servitutem habet, ita ædificare potest vel reficere, ut vicino etiam invito noceat,

veluti si tignum immissum in vicini parietem habeam, atque ædes meæ refectionem desiderent, possum etiam invito eo, cujus paries est, novum tignum immittere, atque ædes meas pro servitutis illius jure, etiam cum vicini incommodo restaurare. Jure enim meo utor, & propterea damnum facere non præsumor, *l. 6. ff. de servit. urb. præd.* Unde etiam inferunt notabiliter Dd. quod nemo juxta parietem vicini tam contigue fornacem extruere potest, unde ignis periculum metui possit, vel unde fumus gravis vicino incommodet, sed justum spacium intermittere debet. Cagnolus *hic nu. 4. per l. sicut, 8. §. Aristo. §. si servit. vendic.* ubi dicitur, *In suo hæcenus facere quid licet, quatenus nihil in alienum immittatur.* Poterit itaque quis prohibere vicinum ædificantem propè parietem vicini fornacem, si ex igne vel fumo grande damnum inferatur vicino, aut saltem ita longe ab ædibus vicini ædificabit, quod damnum non patiat, *l. Imperatores 14. in verb. intermisso legitimo spatio. ff. de servit. urb. præd. Addit. ad Decium hic.*

AD L. LVI.

Gajus libr. 3. delegatis ad Edictum
Urbicum.

Semper in dubiis benigniora præferenda sunt.

Dictum de h. l. in l. 9. & l. 34. supr. h. t.

EXPLICATIO.

BENIGNIUS id dicitur, quod debitori
patrocinator, quod reo est commodius
& tolerabilius, ut præstatio minimi, *l. semper in obscuris 9. supra eodem, l. veteribus 39. supra de pact.* Quod tam in poenalibus, quam civilibus causis observatur. Ad mansuetudinem enim & clementiam potius, quam ad acerbicatem leges compositæ sunt. Huc pertinent hæ regulæ; *Capienda est occasio, qua præbet benignius responsum.* Item *reg. 192. In re dubia benigniorem interpretationem sequi, non minus justius est, quam tutius.* Huc denique referenda *lex 155. §. fin. In poenalibus causis benignius est interpretandum.* Quare si iudex interlocutus est, *Vim fecisti; & crimen cum ex L. Julia de vi publica, tum ex L. Julia de vi privata sit propositum, legem mitiorem, quæ est de vi privata, sequemur, quæ non deportationem irrogat, sed tertiam partem bonorum saltem auctioni subjicit, cum irrogatione infamiae, l. si Praeses 32. & l. penult. ff. de poen. l. 1. ff. Ad L. lul. de vi privat.*

Tum autem pervenitur ad interpretationem benignitatis, cum res dubia est & incerta. Hinc est decisum, ut quod socius de re communi removet, potius pro suæ partis jure, quam animo furandi removisse præsumatur, *l. merito § 1. supra, pro socio*. Similiter si dubitetur, unde bona pervenerint, quæ mulier acquisivit vel possidet, præsumitur, verius & benignius esse, si non demonstretur unde habeat, ea bona à viro ad eam pervenisse; idque ideo responsum est, ut turpis quæstus evitetur suspicio, *l. Quintus § 1. ff. de donat. int. vir. & uxor. l. etiam 6. C. d. tit.* In dubio enim ea capiendæ est interpretatio, ut ne quis præsumatur deliquisse, *aureus tex. in l. merito. § 1. ff. Pro soc.*

Sic si pares numero iudices diversas sententias in causa liberali protulissent, quorum altera pro libertate est, altera contra, benignius & commodius est ejus responsum sequi, quod secundum libertatem est, *l. inter pares 38. supra, de re jud.* In aliis causis si pares numero sint sententiæ, illa prævalebit, quæ pro Reo facit: quod & in publicis judiciis obtinere oportet, *d. l. inter pares*, quia satius est, impunitum relinqui facinus absentis, quam innocentem condemnare, *l. absentem § ff. de pæn. & mitior seu beni-*

benignior in dubiis sequenda est interpretatio. Reliqua vide *in l. semper 9. & in l. semper 34. supra eod.*

AD L. LVII.

Gajus libr. 18. ad Edictum Provinciale.

Bona fides non patitur, ut bis idem exigatur.

EXPLICATIO.

Bona fides, quæ in contractibus exigitur, summam æquitatem desiderat; ideoque non permittit, ut quod semel exactum est, iterum exigatur; quia *solutione ejus quod debetur, omnis tollitur obligatio, Instit. quib. mod. toll. oblig. in pr. c. bona fides. de R. l. in 6.* Unde si duo sunt correi debendi, quorum unus solvat, non licebit, quod ab uno exactum est, ab altero denuo exigere, quia solutione unius utriusque tollitur obligatio, §. *ex hujusmodi 1. Instit. de duob. reis.* Similiter si legatarius celato testamento consecutus est ab herede nolente exhibere tabulas testamenti, pendente conditione per indictum de tabulis exhibendis, æstimationem legati, quam consequi debuit conditione existente, deficiente postea conditione non restituit, quia pœna contumaciæ præstatur ab eo, qui non ex-

bet

bet tabulas testamenti, & pœnæ non solent repeti, si depensæ sunt, *l. pena 42. ff. de cond. indeb. l. quod à quoquam 46. supr. h. t.* Si autem postea existente conditione legatum petat, audiendum non esse, Ulpianus respondit, hanc subjiciens rationem, quia *bona fides non patiatur, ut idem bis ab eodem ex eadem causa exigatur, l. 3. §. condemnatio 11. supr. de tab. exhib.*

Règula hæc procedit, quoties ex eâdem causâ bis res eadem petitur. Cæterum si ex diversis obligationibus res eadem petatur, singulæ causæ singulas præstant solutiones, *l. fundum Cornelianum 28. ff. de Novationib.* Item à diversis eadem res sæpius exigì potest. Unde si à diversis in duobus testamentis eadem res mihi legata sit, bis eam petere poterò, ita ut ex altero testamento rem consequar, ex altero æstimationem, *l. planè 34. §. 1. de legat. 1.* Non obstat, quod qui eum convenit, qui dolo desit possidere, postea rectè in possessorem agat. Nam ipsius interest rem habere, & ideo si prius possessorem convenerit, non potest eum, qui dolo possidere desierat, exigere: Quia jam ipsius nihil interest, cum rem habeat, *l. Stichum 95. §. dolo 9. supra de solutionib. l. nec ullam 13. §. item si quis 9. ff. de pet. hered.*

AD L. LVIII.

Ulpian. lib. 2. Disputationum.

Ex pœnalibus causis non solet in patrem de peculio actio dari.

EXPLICATIO.

PEculium, authore Tuberone, est, quod servus vel filiusfam. domini aut patris permisso separatim à rationibus dominicis vel paternis habet, deducto inde si quid dominio aut patri debetur, *l. 5. §. peculium 3. ff. de pecul.* Qua ratione etiam, quod filius extra paternas rationes habet, peculium appellamus. Cum ergo ex permissione patris domini filius & servus hoc habeant, ex suo contractu eos, quorum in potestate sunt, obligant. Quia eorum consensu tacite contractum videtur, dum filiis concedunt rerum suarum administrationem, *l. si quis 44. de pecul.* Ex delictis autem in pœnalibus causis in patrem non dabitur actio pœnalis de peculio, qui in concessâ administratione & mandato, quamvis generali, numquam continetur delictum aut illicitum, *l. si procurator 6. §. Celsus 2. de cond. indeb.* Proinde etiam publicatis bonis filii, propter ejus delictum, non censetur publicatum ejus peculium, *l. 3. C. de bon. proscr. Vide Decium h. nu. 3.* Similiter si filius-

liusfam. damnum dederit, aut injuriam alicui intulerit, quia hoc ad pœnalia judicia pertinet, in patrem non dabitur de peculio actio, sed pro suo delicto ipse filius convenietur, ad præstandam pœnam, §. *fin. Instit. de noxalib. action.*

Item si filiusfam. scorsum à parte cœnaculum conductum habuerit, & inde quid dejectum vel effusum sit, in eum locum, quò vulgò iter fit, unde damnum alteri datum sit, in patrem actio non competit, sed in ipsum filium, quia ex quasi delicto hæc oritur obligatio, l. 1. §. *si filiusfam.* 7. ff. *de his, qui dejecerunt.*

Limitatur regula tribus casibus.

Primo si filius in iudicio conventus fuerit, & condemnatus. Tunc enim pater de peculio tenetur actione judicati, quasi iudicio & condemnatione cum filio contractum sit, l. 3. §. *idem scribit* 11. ff. *de peculio. l. tam ex contractibus* 57. ff. *de judic.*

Secundo limitatur, si ex delicto filii pater sit factus locupletior: quia iniquum est ex alieno delicto lucrum facere.

Tertio fallit regula in muneribus publicis. Veluti si filius decurio aut consul sit factus aut aliquo magistratu functus patre consentiente. Quo casu pater pro filio videtur fidejussisse. Ideoque in solidum tenetur,

tur, si filius male in officio versatus sit, l. 2. ff. ad Municip.

A D L. L I X.

Ulpian. lib. 3. Disputationum.

Heredem ejusdem potestatis jurisque esse, cujus fuit defunctus, constat.

Dilucidatur hic etiam l. quod ipsis 143. l. invitus 156. §. 2. l. inhib. 157. §. fin. & l. qui in jus 177. ff. h. t. item l. Hereditas 62. ff. h. t.

E X P L I C A T I O.

Hereditas est successio in universum jus, quod defunctus habuit tempore mortis suae, l. hereditas 62. inf. eod. id est, in jus succedit, quod repræsentat personam defuncti, quod tantisper nomen suum retinet, donec adeatur: Post aditionem verò confusum cum bonis heredis, amittit nomen hereditatis, l. sed si plures 10. §. filio. de vulg. & pup. subst. Itaque jam non amplius nudum jus, sed persona heredis incipit locum defuncti obtinere. Unde recte Ulpian. hic definit, *heredem ejusdem juris esse & potestatis, cujus fuit defunctus*: & iterum l. in pari. §. 1. inf. eod. Hi qui in universum jus succedunt, heredum loco habentur. Quibus adde & eos, qui jure civili exclusi, Prætorio jure ad bonorum possessionem admittuntur. Hi epim & heredum loco habentur. Quo pertinet, l. 117. inf. eod. Prætor bonorum possessorem heredis loco in omni

causa habet. Nam licet prætor heredem facere directò non potest, (per leges enim, SCta, & principum constitutiones heredes tantum fiunt) quando tamen prætor alicui dat bonorum possessionem, heredis loco habetur, & in effectù idem quod heres consequitur, §. *quos autem* 2. *Inst. de bonor. possess.*

Quod dictum est de heredibus, non solum de primi gradus successoribus intelligitur, sed & de aliis, qui in remotiore gradu sunt constituti. Huc pertinet reg. 194. *inf. eodem*. Exemplum est in *l. in Annalib. 22. C. de legat.* Ubi rescriptum est, quod legatum vel fideicommissum annuum, heredi relictum, ejus quoque heredibus in infinitum relictum censeatur. Effectus hujus regulæ est, quod omnia commoda & incommoda, virtutes & vitia, quæ in defuncto fuerunt, omneque jus defuncti transeat in successorem, *l. vitia* 11. *C. de acquir. possess.*

Quare si defunctus ab initio malam fidem habuit, nec heres ejus inceptam usucapionem implere potest, tametsi bonam fidem habeat, *l. cum heres* 11. *ff. de divers. & tempor. præscript.*

Item pactum à defuncto factum ad heredem quoque ejus extenditur; & qui pro se stipulatus est, heredibus suis quoque cavisse censetur, *l. si pactum* 9. *ff. de probat.*
quia

quia heres una.& eadem persona cum defuncto esse censetur. Hinc & illud est, quod heres non potest improbare aut rescindere factum aut contractum defuncti, *l. cum à matre* 14. *C. de rei vend.* Fallit regula in pœnalibus actionibus, quæ contra heredes non exercentur, ut plenius tractatum est ad *l. sicuti* 38. *supra eod.* Item nec pactum personale, privilegium, aut usufructus ad heredes extenditur, quia hæc omnia personæ coherent, *l. privilegia* 196. *infra eodem*, *l. idem* 25. §. *personale* 1. *supra de pact.* ubi dicitur, quod personalia pacta non pertinent ad heredes paciscentis.

AD L. LX.

Ulpianus lib. 10. Disputationum.

Semper, qui non prohibet pro se intervenire, mandare creditur. Sed & si quis ratum habuerit, quod gestum est, obstringitur mandati actione.

Aperitur in *b.l. etiam l. Hoc jure* 2. §. *fin ff. b. e.*

EXPLICATIO.

DUæ sunt hujus regulæ partes. In prima dicitur, quod qui pro debitore non prohibente, sed præsentem & patientem fidejussit, mandati actionem habeat. Cujus hæc affertur ratio, quod sciens & tacens in actu, qui alicujus favorem respicit, habeatur pro consentiente, *l. si remunerandi* 6. §. *si passus* 2. *ff. mandati.* Non idem dicendum est

in actu, qui in alicujus tacentis tendit præjudicium, *l. sicut re. 8. §. non videtur 15. ff. quibus modis pignus solvitur.*

In altera parte regulæ traditur, quod qui id ratum habet, quod alius suo nomine absens gessit, mandati actione obstringatur. Ratihabitio enim retrahitur, & mandato comparatur, *c. ratihabitionem, ext. eod.* Unde si debitor falso procuratori solvit, & dominus postea ratum habeat, quod solutum est, liberatur debitor, *l. vero 12. §. sed etsi 2. supra, de solut.* Item quæ à procuratore falso, vel mandatum non habente, gesta sunt in judicio, confirmantur per ratihabitionem domini, *l. licet 56. sup. de judiciis.* Extenditur etiam hæc regula ad delicta. Quo pertinet *l. hoc jure 152. §. 1. infr. eod.* In maleficio ratihabitio mandato comparatur. Unde si aliquis nomine meo quem de fundo dejecit, si ego hanc dejectionem ratam habui, tenebor interdicto *Vnde vi* ad restituendam possessionem, ac si à principio mandassem, *l. 1. §. quoties 13. ff. de vi & vi arm.* Hæc regula limitatur tribus modis. I. Si quod gestum est, meo nomine gestum sit. Nam quod alieno nomine gestum est, ratum habere non possumus, *c. ratum. extra eod.* ut ex tali ratihabitione nobis aliqua actio aut commodum quæratur, *l. si pupilli 6. §. sed si ego*

ego 6. vers. nam etsi, de negot. gest. Potest tamen quis ratum habere, quod suo nomine gestum non est, quantum ad juris sui iacturam, *l. si fundus 16. §. 1. supra, de pignor. & hypoth.*

II. Limitatur regul. ut locum habeat si negotium ratum habeatur intra illud tempus intra quod actus expediri potuit, alias nihil agitur ratihabitione, *l. bonorum 24. ff. rem ratam haberi.*

III. Limitatur, si mandatum pro forma negotii à lege requiratur. Quia ratihabitio tunc non exæquatur mandato. Unde tutor, qui ab initio suam auctoritatem interponere debet in negotio pupilli, si postea ratificet, nihil agit, *§. tutor 2. Inst. de auth. tutorum. l. obligari 9. §. tutor. 5. ff. de auct. tuto.* ubi dicitur, quod pro forma requiratur in interpositione auctoritatis, ut tutor in ipso negotio seu tempore quo geritur contractus cum pupillo, interponat auctoritatem. Igitur si post perfectum contractum tutor adhibeat auctoritatem, deficit forma ipsius actûs; ubi vero forma actus deficit, corrumpitur actus, *l. Iulianus 9. §. sed si quis 3. ff. Ad exhib.* Accedit & hæc ratio, quod ea quæ pertinent ad solennitatem contractûs, uti est auctoritatis interpositio, à contractu dividi non possunt, *l. 1. §. 8. l. continuus 137. ff. de V. O.* Igitur non potest tutor ex postfacto seu

158 IN TIT. DIG. DE REG. JUR.
seu ex intervallo ratificare contractum à
pupillo gestum. *Vide Cujac. lib. Obser. v. 13. c.*
31. In summa quando mandatum vel aucto-
ritatis interposito certo tempore pro forma
actus à lege vel statuto requiritur, tunc ra-
tificationis postea secuta nihil operatur. *Pec-*
kius ad c. ratificationem. num. penul. &
ult. ext. h. tit. post Decium h. nu. 17.

AD L. LXI.

Ulpian. lib. 3. Opiniorum.

Domum suam reficere unicuique licet, dum non offi-
ciat invito alteri, in quo jus non habet.

Hæc lex explicata est cum *l. nullus vide-*
tur § 5. *supra eod.*

AD L. LXII.

Julianus libr. 6. Digestorum.

Hereditas nihil aliud est, quam successio in univer-
sam jus, quod defunctus habuerit.

Hæc lex exposita est ad *l. heredem* § 9. U-
bi quoque variae aliæ ea occasione explica-
tæ sunt, quas omnino vide.

AD

AD L. LXIII.

Julianus lib. 17. Digestorum.

Qui sine dolo malo ad Iudicium provocat, non videtur moram facere.

V. l. non potest improbus 99. supr. h. t.

EXPLICATIO.

Agitur in hac lege, quomodo quis à mora excusari possit. Quemadmodum autem mora committitur, quoties debitor oportuno tempore & loco interpellatus non solvit, *l. mora 32. de usuris*: Ita si ex justâ causâ solutionem recuset & bona fide ad iudicium provocet, à mora excusatur. Justam autem causam habet, si ignoret, quantum aut cui solvere debeat, *l. non potest videri 199. infra eod.* Item justam causam litigandi habet, si successerit in locum alterius, ita ut ignoret ex quâ causâ debitum sit contractum, *l. qui in alterius 42. supr. eod.* Vel si alleget, debitum non esse liquidum, aut si justam aliquam exceptionem proponat, propter quam dare non debeat. Quibus casibus ad usuras, interesse, rei interitum, & reliquos moræ affectus non tenetur, *l. illud 40. de hered. petit.*

Quemadmodum autem eximitur à moræ periculo, qui ex justa causa ad iudicium provocat, ita quoque moræ non fit obnoxius,

xius, in quem nulla efficax petitio, id est, actio exerceri potest. Quod *Scavola* tradidit in l. 88. infra eod. Nulla intelligitur ibi mora fieri, ubi nulla petitio est. Exemplum est in pupillo, qui sine tutoris autoritate se obligavit, qui ut actione non potest pulsari, ita nec moram committit, l. si pupillus 127. de verb. oblig.

AD L. LXIV.

Julianus lib. 29. Digestorum.

Ea quæ raro accidunt, non temere in agendis negotiis computantur.

EXPLICATIO.

Non temere, id est, non facile: quod etiam apud bonos authores in hac significatione reperitur. Sic *Quintil.* *Illud ingeniorum præcox genus non temere, id est, non facile unquam ad frugem pervenit.*

Varie hæc lex ab interpp. intelligitur: Ea tamen sententia, quam communiter Dd. hic sequuntur, non videtur improbanda: nimirum. In condendis legibus, ea potius respiciunt legislatores, quæ frequenter & ut plurimum eveniunt, quam ea, quæ forte uno aliquo casu emergunt. Quod enim semel aut bis tantum accidit, id prætereunt legis-

legislatores, *l. nam ad ea §. cum l. seq. ff. de legib.*

Unde cum lege civili statutum sit ne fœminæ propter lubricum animi consilium ad publica & virilia officia admittantur, licet una aut altera fœmina reperiatur, quæ virili constantia & prudentia polleat, tamen quia hoc perratum est, fortuitus iste casus non evertit legem.

Ad regulam pertinet exempli loco, quod de Lazaro à mortuis excitato non sit quæsitum in jure nostro, an recipiat bona, liberos & uxorem: de quo tamen si quid constituendum esset, justius foret, eum bona, liberos & uxorem recuperare, *Costal. ad l. 3. ff. de legib.* Comparatur enim ei, qui ex indulgentia principis restituitur à pœna mortis, qui recuperat honorem, famam, & omnia bona, *l. 1. & ult. C. de sent. passis.* Aliud exemplum adfertur de fure, qui semel suspensus & patibulo confracto fune vivus delapsus est. Qui tamen cum quasi per divinum numen & miraculose liberatus sit, dimittendus erit, si ante protestatus fuerit de sua innocentia, *Dec. ad l. favorabiliores 125. infra eod.* Postremò notandum, quod illa quæ fiunt & contingunt à natura, licet rarius, tamen in jure considerantur. Exemplum est in *l. si major 12. C. de legit. hered.*

red. ubi statuitur, quod filius qui nascitur ex muliere quinquagenaria, licet rarò id accadat, legitimus dicitur, & ideò ad parentum successionem tam ex testamento quam in intestato admittitur. Similiter statuitur in §. *Insula* 20. *Inst. de rer. divis.* quod Insula quæ in mari nascitur, licet raro id fiat, occupanti cedat, quia quod nullius est, occupanti acquiritur. Sic & Literæ licet aureæ, quod rarò accidit, cedunt chartæ, §. *litera* 28. *Inst. de rer. divis.* Denique nec pupillus hereditatem quamvis lucrosam sine tutoris auctoritate acquirat. §. *neque* 1. *Inst. de auct. tuto.* rarum enim est, ut non sint suspectæ & damnosæ hereditates, *l. si hereditatem* 32. *ff. Manda.* Postremo & leges de eo statuunt quod præter naturam, licet perrarò, accidit. Ut puta de eo qui nascitur ad monstrum vel prodigium declinans: Talis enim prodigiosus vel monstrosus partus ab hereditate paterna repellitur, & præteritus testamentum non rumpit, *l. 3. de posth. hered. l. non sunt liberi* 14. *ff. de stat. hom. l. quarec aliquis* 135. *de V. S.*

AD L. LXV.

Julianus lib. 54. Digestorum.

*Ea est natura cavillationis, quam Græci οὐκ ἴστω
appellant, ut ab evidenter veris per brevissimas
mutationes disputatio ad ea, quæ evidenter falsa
sunt, perducatur.*

EXPLICATIO.

Cavillari variis modis accipitur, Cavil-
latur, qui agit calumniosè. Cavillari e-
tiam est irridere. Denique cavillatur is, qui
primum proponit, quod evidenter verum
est, dissimiliter tamen acceptis terminis,
quod falsum est, infert, *Alciat. ad l. natura*
177. de verb. signif. Exemplum cavillationis
hoc esse potest: Quod nullius in bonis est,
occupanti conceditur, §. *fera* 12. *Inst. de rer.*
divis. Res divinæ nullius in boni sunt. §. *nul-*
lius 7. *Inst. de rer. divis.* Ergo cedunt occu-
panti. Cavillatio hic committitur ratione
termini seu ambiguae propositionis. Nam
propositio accipitur de iis rebus, quæ in sin-
gulorum hominum commercio versantur,
& possunt in hominum dominum perveni-
re, ut sunt feræ bestiæ, aves, pisces, gem-
mæ in littore maris inventæ. Assumptio au-
tem accipitur de iis, quæ dominio nostro
adjici non possunt, uti sunt, res quæ divi-
ni Juris sunt, puta res sacræ, sanctæ, & reli-
giose.

gioſe. Sorites etiam cavillationis ſpecies conſtituitur, quando videlicet plures termini non neceſſario cohærentes conjunguntur, & ex iis gradatim aliquid concluditur. Talis eſt collectio Themistoclis ducis Athenienſium de filio ſuo, qui Græciæ imperabat:

Tota Gracia paret Athenienſibus;

Athenienſes mihi parent:

Ego uxori meæ pareo;

Vxor mea paret filiolo meo. Ergo

Tota Gracia paret filiolo meo.

Illud hic quæritur; *An Advocatus, qui juſtam fovet cauſam, poſſit etiam fallacibus & captioſis uti cavillationibus ad obtinendam cauſæ victoriam.* Quod exiſtimat hic Decius *num. 3.* cum calumniam calumnia pellere, & artem arte deludere liceat, *arg. l. infundo 38. ff. de rei vend.* Quod Ferrarius hic reprehendit, cum gravi viro non conveniat, huiusmodi fallaciis uti, ut in Deum peccet, qui iudicem hiſce malitiis decipiat. Vide *Mynſing. cent. 3. obſerv. 6.* qui approbat & amplectitur ſententiam Decii, quod advocatus qui fovet juſtam cauſam, poteſt adverſarium Fallaciis & captionibus circumvenire, ad obtinendam cauſæ victoriam, ut puta ſi quis revera mutuum reddiderit, poteſt, etiam cum juramento affirmare,

mare, se nihil ab actore habuisse. Illud bene hic notat *Dec. n. 7. & 8.* quod dicit, si Judex promisit delinquenti liberationem & impunitatem, si confiteatur delictum, non possit eundem postea ex tali confessione damnare; & refert, malè fecisse Pontificem Alexandrum tertium, quod propter extortam confessionem spe impunitatis condemnavit quendam Simoniacum. Cujus suæ decisionis hanc adfert rationem, quia si fides data à privato hosti est servanda, *l. conventionum §. ff. de pact.* multò magis à Judice data fides servari debet, quia gerit personam publicam, *fac. l. inter claras 7. C. de sum. trinit.* ubi dicitur, quod nihil clariore lumine præfulgeat, quam recta fides in Principe, seu magistratu, & eo qui in aliqua dignitate positus est, qualis est ille qui publico munere judicandi fungitur. Quam Decii sententiam in notis ad h. l. approbat & tuetur Gothofredus, & ante eum Cagnol. h. idque ex ea ratione, ne bona fides venientem decipiat, & auctoritas publica, *cont. l. 1. C. de his qui ven. eta.* ubi dicitur, quod auctoritate Principis nemo debet decipi. Hanc eadem sententiam probat & tuetur *Bart. in l. si quis reus ff. de publ. lud.* ubi decidit, salvum conductum concessum bannito debere servari, ne sub fide publica ille deceptus remaneat.

AD

AD L. LXVI.

Julianus libr. 60. Digestorum.

Marcellus ait: Dyssinit debitor esse is, qui nactus est exceptionem justam, nec ab aequitate naturali abhorrentem.

Hæc lex opposita est in l. non videtur 13. supra eod.

AD L. LXVII.

Julianus libr. 87. Digestorum.

Quoties idem sermo duas sententias exprimit, ea potissimum excipiat, quæ rei gerenda aptior est.

EXPLICATIO.

Verba ad hoc inventa sunt, ut mentem voluntatemque hominis explicent: sed cum aliquando fiat, ut unus idemque sermo diversum recipiat intellectum, (plures enim res sunt, quam vocabula: cœpit itaque unum verbum pluribus quandoque rebus adaptari, l. 3. & 4. de præscr. verb.) recte hic Julianus tradit, in hac ambiguitate accipiendum esse id, quod rei, de qua agitur, & accommodatissimum. Cujus ratio in eo consistit, quod in omnibus actibus & negotiis ea interpretatio facienda est, ut res, de qua agitur, in tuto sit, ut negotium potius valeat, quam pereat, l. quoties 80. de verb.

verb. oblig. Eodem modo dicitur, verba in jure secundum contractus naturam, & subjectam materiam esse accipiendā, *l. Imperator 16. supra, de in diem add. bonus text. in l. si stipulatus 4. ff. de Usur.* Cujus exemplum est, si dominus colono ob sterilitatem fructuum donaverit pensionem præsentis anni, deinde sequentibus annis maxima sequatur ubertas, nihil impedit, quo minus dominus pensionem remissam petere possit. Et si enim donationis verbo sit usus, illud tamen sic accipiendum, non quod donaverit, sed quod transegerit & distulerit tamdiu pensionem petere, donec compensetur sterilitas cum ubertate sequentium annorum *l. ex conducto 15. §. Papinianus 4. ff. loc.* Similiter si ita sit cautum, ne luminibus officiatur, quia ambigua est scriptura, utrum ne his luminibus officiatur, quæ nunc sunt, an his etiam, quæ postea quoque fuerint. Et humanius esse respondit Pomponius, verbo generali omne lumen pro subjecta materia significari, sive quod in præsentis, sive quod post tempus conventionis contigerit, *l. si servitus 23. ff. de serv. urb. præd.* Unde & hæc notabilis decisio inferitur, quod in contractibus aliisque negotiis discernendis magis substantia rei quæ geritur, quam impropria rei appellatio attendatur,

datur, l. insulam 6. de praescript. verb. ubi deciditur, si quis insulam hoc modo vendiderit, ut aliam reficeret, non esse contractam venditionem, sed potius initum contractum innominatum, Do, ut facias. Ratio est, quia cum venditio fieri non possit, quando pretium non intervenit, ideo verbum venditionis hic improprie accipitur, & contractus potius innominatus celebratus intelligitur, quam ut propter falsam nominationem venditionis contractus vitietur.

AD L. LXVIII.

Paulus libr. singulari de dotis repetitione.

In omnibus causis id observatur, ut ubi persona conditio locum facit beneficio, ibi deficiente ea beneficium quoque deficiat: ubi vero genus actionis id desiderat, ibi ad quemvis persecutio ejus devenit, non deficiat ratio auxilii.

V. l. privilegia 196. infr. h. t.

EXPLICATIO.

TRactat hæc regula materiam privilegiorum, quæ & latissima est, & in humanis negotiis frequentissima. Est autem privilegium, beneficium, quod à Principe certæ alicui personæ contra jus commune concessum est, *l. 1. ff. de constit. Princip. l. jus singulare 16. ff. de legib.* Cujus duo sunt genera. Unum est personale, ubi personæ conditio

ditio locum facit beneficio , hoc est , quando persona proxima est causa beneficii , & hoc cum persona extinguitur , & in heredes non transit , *text. hic , & in l. privilegia 196. infra eod.*

Tale beneficium est , quod competit marito , ne ab uxore soluto matrimonio in plus quam facere possit conveniatur , deducto ne egeat , & ne alimentis careat. Hoc privilegium heredibus non datur , exceptis solis filiis mariti , *l. maritum 12. cum l. seq. & l. etiam 18 ff. solut. matrim.* Tale etiam privilegium est , quod datur mulieri , quo præfertur cæteris creditoribus in repetitione dotis. Quod nec ad heredem mulieris transfertur , *l. unica. C. de privil. dot. l. ultim. 12. §. ad hac 1. C. qui potior in pign. in filium tamen transmittitur. N. 91.*

Aliud est privilegium reale , quod non personæ , sed rei , causæ , aut actioni tribuitur , & hoc ad quosvis successores transit. Tale est privilegium actionis funerariæ , ut scilicet is , qui in funus defuncti aliquid impendit , omnibus creditoribus præferatur , *l. penult. sup. relig. & sumpt. funer.* Tale quoque est beneficium , quod datur condemnatis scilicet , ut judicati actione non conveniantur , nisi post quatuor menses post sententiam latam , quod condemnatis datur

H

huma-

humanitatis gratia, *l. cum militi* 16. §. 1. ff. de com. quod tempus etiam heredibus condemnatis indulgetur, quia causæ magis quam personæ hoc beneficium præstatur, *l. tempus* 29. ff. de re judic. Simile est privilegium, quod rei conceditur, puta ne fundus ille vectigalibus aut tributis sit obnoxius. Hoc enim res ipsas sequitur, & ad quemlibet successorem transit, seu ad quemcunque fundus pervenit, *l. 3. §. reb. 1. ff. de censib.* Talia sunt privilegia, quæ civitati, Academia, collegio & familiæ tribuuntur, quæ transeunt ad omnes, qui in civitatem, familiam, & collegium concedunt, & commigrant, *l. forma* 4. §. *quancq. 3. de censib.*

Sunt etiam privilegia quædam partim personæ, partim causæ, quale est beneficium restitutionis in integrum minorum xxv. annis. Conceditur enim hoc non tantum propter personam minoris, sed præcipua causa restitutionis est læsio, ideoque non restituitur minor, nisi causæ cognitione adhibita à prætore probet se læsum, *l. quod si minor* 24. §. *non semper 1. l. non omnia* 44. *supra, de minor. l. nam posteaquam* 9. §. *si minor* 4. ff. de jurej. Itaque hoc beneficium etiam heredi & fidejussori minoris competit, *l. except. 2. sup. de except. l. non solum* 18. §. *ult. ff. de minor.* In quo tamen articulo

ticulo ita distinguendum est: Aut minor xxv. annis captus est dolo adversarii, & tunc beneficium restitutionis etiam fidejussori ejus competit: Aut in re ipsa captus est minor, hoc est, sua facilitate & levitate, sine dolo adversarii: & eo casu fidejussori ejus non est danda restitutio, *l. exceptiones 2. in fi. ff. de exception. l. 2. C. de fidej. minor. Dinius in c. privileg. ext. eod. l. in causa 13. in princ. ff. de minor.* Sic quoque exceptio SCti Vellejani datur non solum mulieri, sed etiam heredibus ejus, *l. heredes 20. C. ad SC. Vellej.* Quia Senatus totam obligationem improbat, & à prætore restituitur prior debitor creditori. Denique quod dictum est, privilegium personale ad alios non extendi: limita, nisi personæ privilegio donato necessariae sint, utpote si per exclusionem earum privilegii usus impediretur. Sic privilegia Studiosis, Professoribus & Doctoribus Academicarum concessa ad eorum famulos, nuncios, bibliopolas & pedellos extenduntur, *Auth. habita, & ibi Sichard. C. ne filius pro patre.* Quod & hic defendit, & approbat *Decius num. 8. & 9. per text. notab. in l. si stipulatus fuero per te non fieri III. ff. de V. O.* cui sententiæ & subscribit Cagnolus hic.

AD L. LXIX.

Paulus libr. singulari de assignatione
libertorum.

Invito beneficium non datur.

Facit huc *l. invitus* 156. §. f. *infra h. t.*

EXPLICATIO.

CUM quilibet juri & favori pro se intro-
ducto renunciare possit, *l. penult. C. de pact.* recte hinc sequitur, invito & nolenti beneficium non conferri: invito enim quid auferri potest, dari non potest. Sic Ulpian. in regul. 156. §. *fin. infra eod.* Quod cuique pro eo praestatur, invito non tribuitur. Regula locum habet in beneficiis à jure alicui concessis, quibus invitus quis uti non cogitur. Sic mulier potest renunciare beneficio SCti Vellejani, *l. ult. §. pen. ff. ad SC. Vell.* Sic minor potest omittere restitutionem in integrum, si sit læsus, *l. si iudex 41. ff. de minorib.* Limitatur regula, ut locum non habeat, si non solum ejus, cui beneficium datur, sed etiam alterius publicè vel privatim interfit, tunc enim invito praestari potest beneficium. Unde potest quis invito debitore creditori ejus solvere, & ille invitus liberatur. Quia non solum debitoris, sed etiam creditoris interest, liberationem consequi & pecunias recipere, §. 1. *Instic.*

stit. quib. mod. tollitur oblig. l. solutione 23. & l. solvere 53. ff. de solut. Sed qui pro debitore invito solvit, non repetit. Sibi enim impitet, quod pro invito solverit, *l. si pro te 40. ff. mandati.* Sic potest quis invitus ad honores & dignitates eligi, quia Reipubl. etiam interest bene meritis honores & præmia conferri, *l. 3. §. præses 15. ff. de muner. & honorib.* Hinc etiam receptum est, ut pro eo, qui ad supplicium ducitur, injustè condemnato, etiam eo invito, quilibet appellare possit, quia nemo audiendus est, se ipsum perdere volens. Et hominis interest, hominem conservari, & beneficio affici, *l. non tantum 6. ff. de appellat.*

AD L. LXX.

Ulpianus lib. i. de officio Proconsulis.

Nemo potest gladii potestatem sibi datam, vel cujus alterius coercitionis, ad alium transferre.

EXPLICATIO.

HÆc lex pertinet ad jurisdictionis materiam, cujus explicatio intricata est, ut ferè tot sint hac de re opiniones, quot sunt interpp. Nos ea tantum attingemus, quæ ad hujus regulæ intellectum pertinent. Docet autem hæc regula, quod ea, quæ meri sunt imperii, ut gladii potestas, damnatio in metallum, deportatio in insulam,

H 3

con-

confiscatio bonorum, relegatio, & omnis enim animadversio corporalis in facinorosos homines, *l. solent 6. l. si quid erit 11. ff. de off. proconsul. l. 1. ff. de off. ejus, cuj. l. 3. ff. de jurisd. l. unic. C. Ne sine jus. Princ. cert. judic. lic. confisc. l. illicitas 6. §. qui universas 8. ff. de offic. Praef. nulli demandari, aut delegari possint, sed iis solum competant, quibus hoc à lege vel Principe nominatim concessum est. Habent autem eam potestatem meri imperii Jure Romano Princeps, Præfectus Urbis, Præfectus prætorio, Proconsul, & præses Provinciæ, *l. 1. de off. ejus cui & c. l. 2. de in jus vocand. l. si quid erit 11. ff. de off. procons.**

Ratio decidendi hæc est, quod majus negotium visum fuit majoribus nostris, si de liberi hominis capite ageretur, aut jus diceretur, quam ut cuilibet mandari aut concedi posset, qui non mandatum à tota Repub. haberet: adeo quidem, ut nec Consuli, cujus tamen summa potestas erat, injussu populi in caput civis Romani animadvertere licuerit, *l. 2. §. quod ad magistrat. 14. de orig. jur.* Addi potest & hæc ratio, quod in hisce gravibus & majoribus causis, quando videlicet tribuitur potestas de capite civis Romani statuendi, electa viderur singularis personæ industria, *l. inter artifices 31. ff. de solut. l. 1. §. 1. ff. de off. præf. præ. fac.*

fac. l. 2. § populo deinde aucto 18. ff. de orig. jur.
 Quo casu actus potest exerceri per substitutum, *d. h. inter artifices 31. ff. de solut.*

Hoc merum imperium hodie tenent omnes superiores magistratus secularesque iudices dignitate præfulgentes, quales sunt Duces, Comites, Marchiones, Barones, & reliqui domini terrarum particulares. Item Imperii civitates, quæ superiorem non recognoscunt, idque vel ex privilegio, consuetudine, aut præscriptione. *Zassius ad l. Imperium 3. de jurisd.*

Sed ab hujus legis observatione plurimum moribus recessum est. Videmus enim passim, non ipsos Reges, Duces, Comites, & Barones gladii potestatem exercere, nec pro tribunali de causis criminibus cognoscere, sed istud exercitium delegare suis Prætoribus & Satrapis. Sic Episcopi & Abbates passim suos habent vice-comites, per quos gladii potestatem exercent. Unde ist fast kein Gottes Haus oder Kloster/das nicht seinen Richter hat/ modo merum imperium vel jus gladii habeat. Denique sciendum, quod quia Jure Canonico merum imperium Juri magistratus competit, causæ meri imperii etiam hodie mandari & delegari indistincte
 H 4 possunt,

176 IN TIT. DIG. DE REG. JUR.
possunt, etiam quoad poenam ultimi supplicii, *c. quod sedem, & ibi Gloss. de off. ordin.* Alberic. & Decius in *l. 1. ff. de off. ejus cui mand. est &c.* Cagnol. *h. in fine.*

AD L. LXXI.

Ulpian. lib. 2. de officio Proconsulis.
Omnia quaecunque causæ cognitionem desiderant, per libellum expediri non possunt.
Explicatur hic *l. 105. infr. h. t.*

EXPLICATIO.

QUædam sunt causæ, quæ à magistratu de plano, id est, absque figura & strepitu judicii deciduntur. Veluti ut obsequium parentibus & patronis præstetur, *l. nec quicquam 9. §. de plano 3. de offic. procons.* Ut servi manumittantur, *§. multis autem modis 1. Instit. de libertinis.* Ut pupillis alimenta decernantur, *l. 3. §. sciendum 15. ff. ad exhib.* Quæ omnia cum sint voluntariæ jurisdictionis, & sine conflictu partium conficiantur: sufficit si ad simplicem partis petitionem & libellum supplicem judex subscribat, *l. libertus 15. de injur. vocand.* Quædam vero causæ sunt, quæ tribunal & selam prætoris desiderant, item causæ cognitionem & decretum Prætoris, *l. 3. §. si causa cognita, de bonor. possess.* In his plena inquisitione jubet procedere, citare eos, quorum interest, & utriusque partis allegata audire,
l. ju-

l. jubemus. C. de judiciis. Huc pertinet lex 105. inf. cod. *Ubicunque causa cognitio est, ibi prator desideratur.* Exempli gratia: Bona minoris immobilia debent cum decreto Judicis alienari. Unde non sufficit, quod tutor adeat prætorem, & proponat se bona minoris venditurum, sed requiritur, ut de causis venditionis solemniter apud acta cognoscatur, utrum eæ justæ sint, ac legitimæ, nec ne, *l. minorum 6. C. de prad. minor. sine decret. non alien.* Idem dicendum est de restitutione in integrum minorum xxv. annis, quia nec hæc decernitur, nisi solemnis causæ cognitio pro tribunali præcedat, *l. 3. ff. de restit. in integ. l. 1. §. 1. ff. de off. præs. urb.* Ex quibus hæc infertur practica, quandocunque summarie judex decernit, ubi requiritur plena causæ cognitio actum ipso jure nullum esse, nec appellationis remedio opus esse, *l. ex stipulatione, C. de sentent. & interloc. omn. jud. c. ad audientiam. extra de appellat. l. cum hi 8. §. si Prator. 17. ff. de transact. Ferrar. h.*

AD L. LXXII.

Javolenus libr. 3. ex posterioribus La-
beonis.

Fructus rei est, vel pignori dare licere.

EXPLICATIO.

EX pignoratione rei non exigua commoditas percipitur, cum per eam facilius creditorem inveniamus, qui nobis mutuam det pecuniam. Nam pignus in tuto ponit creditum, & securum reddit creditorem, *l. plus cautionis 25. sup. eod.* Hic potest esse usus & effectus regulæ, si quando res nostra ab alio mala fide possideatur, tenetur is ad restitutionem rei cum omnibus fructibus, qui percepti sunt, & percipi poterunt. Itaq; etiam appellatione fructuum veniet pignorandi commoditas. Si enim res fuisset suo tempore restituta, facilius creditorem invenissemus, qui sub pignore mutuo pecuniam dedisset, *Concord. l. ult. ff. de Usur.* Hinc etiam recte deciditur, fructuarium usumfructum, id est, jus utendi fruendi, & fructus ipsos posse pignori dare, tametsi proprietatem oppignorare non possit, *l. si is qui 11. §. ususfructus 2. ff. de pign. l. interest. 6. C. de usufruct.*

AD

AD L. LXXIII.

Quintus Mutius Scævola libr. singulari ὁγών.

Quo tutela redit, eo hereditas pervenit, nisi cum fœmina heredes intercedunt.

Hujus legis initium explicatum est cum l. secundum naturam 10. supr. eod.

Ad §. 1.

Nemo potest tutorem dare cuiquam, nisi ei, quem in suis heredibus, cum moritur, habuit, habiturusve esset, si vixisset.

EXPLICATIO.

DOcet Scævola brevi compendio, qui & quibus testamento tutores dari possint, nempe parentes liberis impuberibus, quos in potestate habent, non modo jam natis, sed etiam posthumis. Unde mater licet tutelæ officio aliquando fungi queat, tamen liberis tutorem dare non potest, nisi forte filium heredem instituerit, quo casu dat tutorem, non ratione potestatis, sed ratione hereditatis, quam filio reliquit, qui tamen tutor à magistratu cum inquisitione confirmari debet, l. pater herede 4 ff. de testament. tutel. l. 2. ff. de confirmant. tut. In posthumo ratio hæc est, quia per juris prærogativam pro jam nato habetur,

qui in utero est, quoties de ejus commodo agitur, §. 4. *Inst. de tutel.* Item pater filio emancipato non rectè tutorem dat, datus tamen confirmari debet à Judice, nulla adhibita inquisitione in ejus mores, §. ult. *Inst. de tutel. d. l. pater ff. de test. tute.*

Ad §. 2.

Vi factum id videtur esse, qua de re quis, cum prohibetur, fecit: clam, quod quisque cum contrariam haberet, habiturumve se putaret, fecit.

EXPLICATIO.

PRÆTOR generale edictum proposuit, *Quod vi aut clam factum est, qua de re agitur, cum experiundi potestas est, restituas.* Quo interdicto jubet prætor in pristinum statum restitui, quicquid omnino vi vel clam factum est. Nec interest, faciendi jus habuerit, nec ne. Quia contra edictum prætoris facere non debuit. Tueri enim debet jus suum legitimis modis, actionibus scilicet & judiciis, non armis, neque dolo & calliditate alteri injuriam inferre, l. 1. ff. *quod vi aut clam.* Vi autem factum videtur, qui contra quàm prohibetur, quid facit; id est, qui contemptâ prohibitione quid molitus est. Item qui, cum sciret se prohibendum iri, per vim molitus est ne prohiberi posset, periculum puta denunciando adversario,

sario, aut januâ præclusâ, *d. l. 1. §. quid sit §. & §. sed & Aristo. 8. l. vi facit. 20. ff. quod vi aut clam*. Clam facere videtur, qui celavit adversarium, neque ei denunciavit, si modo timuit, aut timere debuit ejus controversiam, ne melioris conditionis sint stulti, quam periti, *l. 3. §. fin. & l. sequ. ff. dict. tit.* Teneturque hoc modo in alieno opus faciens interdicto *quod vi aut clam*, ut opus licet jure factum restituat, id est, destruat, & demoliatur, *l. 5. §. 1. ff. eod.*

Ad §. 3.

Quæ in testamento ita sunt scripta, ut intelligi non possint, perinde sunt, ac si scripta non essent.

EXPLICATIO.

CUM suprema hominis voluntas tabulis testamenti mandetur, necessarium est, ut defuncti arbitrium ex ejus scripto palam nobis fiat. Quare si in testamento quid fuerit scriptum, quod intelligi non possit, perinde habetur ac si scriptum non esset, *tex. h. concordat. l. 2. ff. De his qua pro non script. hab.* Quod tamen verum est, si ex conjecturis & præsumptionibus de mente testatoris constare non possit. Satis enim clarum ac evidens est, quod per conjecturas intelligi potest, *l. licet imperator 74. de legat. 1.* Qua ratione fit, ut neque incerti hæredis institutio valeat, *l. in tempus*

62. § 1. ff. de hered. Instit. Neque incerti tutoris datio, *l. duo sunt Titii* 30. ff. de testamen. tutel. Neque legatum incertæ personæ relictum, §. *legari* 24. Instit. de legat. Quod autem dictum est, legatum incertis personis relictum non valere, ei graviter obstat, *l. si quis servum* 8. §. *si inter* 3. ff. de leg. 2. ubi dicitur, si legatum relictum sit Titio, cum duo essent Titii ejusdem nominis, quod ei legatum præstatur, cui heres paratus est solvere. Resp. Ibi Accurs. rectissimè statuit, quod ibi heres ultrò paratus fuit legatum solvere, quò casu potest ei præstare cui velit gratificari, sed tamen ad id præstandum non tenetur. Sensus itaque *d. §. si inter.* est, quod legatum incertæ personæ relictum non valeat, neque heres ad id præstandum compelli possit, nisi ultro ad illius præstationem se offerat, *Bart. ad d. §. si inter.*

Ad §. fin.

Nec paciscendo, neque legem dicendo, nec stipulando quisquam alteri cavere potest.

EXPLICATIO.

TRibus modis cavere, id est, obligationem acquirere nobis possumus: paciscendo, id est, pacto nudo, stipulando, & legem dicendo, id est, cum pactum bonæ fidei contractui in continenti adjicitur, quia

quia hoc legem & formam dat contractui ,
l. juris gentium 7. §. adeo 6. ff. de pact.

Hiscæ autem modis alteri cavere non possumus. Ratio est, quia obligationes & stipulationes ad hoc inventæ sunt, ut unusquisque sibi acquirat, quod sua interest. Cæterum ut alii quid detur vel fiat, parum nostra refert, §. *alteri 19. Instit. de utilib. stipul.* Potest tamen alteri quis stipulari, si pœnam stipulationi adjiciat, puta, si sic dicat: *Sempronio decem dabis, & nisi dederis, quinque pœna nomine promittis?*

Si enim hoc, quod promissum est, datum non sit, pœna exstipulati peti potest, §. *alteri. vers. plane, Instit. de tit.*

II. Limitatur regula, ut procedat in extraneis. Nam filius in potestate constitutus patri, servus domino, & contra, stipulando & paciscendo acquirit, §. *si quis alii 4. & §. sed & si quis. Instit. d. t.* Idque fit hac ratione, quod propter vinculum potestatis pater & filius una & eadem persona esse censeantur, *l. fin. C. de impuber. & al. substit.*

III. Notarius tanquam publica persona, alteri stipulari potest, §. *cum autem 3. Instit. de adoptionib.*

IV. Tutor pupillo, Curator minori, Syndicus civitati, Procurator & negotiorum gestor

184 IN TIT. DIG. DE REG. JUR.
gestor suo domino utiliter stipulantur, *l. 5. §. penult. de constit. pec.*

V. Si nostra interfit, alteri stipulari possumus, veluti si à te stipuler, ut creditori meo solvas, *dicto §. alteri.*

VI. Ex pacto vel stipulatione super re propria paciscentis, seu ejus, cui stipulatione vel pacto acquirere volumus, utilis actio competit. Unde donator paciscens, ut donatarius post certum tempus alteri rem donatam restituat, ei cui res donata restitui iussa est, utilem actionem parit, benigna jurisinterpretatione à Principibus facta, *l. 3. C. de dona. quæ sub mod.* Similiter ex pacto deponentis aut commodantis res alterius, ut illæ domino reddantur, utilis actio domino conceditur, *l. si res tuas 8. C. Ad exhib.* Sic creditor in pignore vendendo debitori actionem in factum acquirere potest, si paciscatur creditor, ut quandocunque velit emtori solvere pretium debitor, tunc pignus ei restituatur. Ex hoc pacto creditoris potest debitori super re propriâ acquiri actio in factum, ut pignus suum recipiat, pretio quo pignus venditum est emptori à debitore restituto, *l. si cum venderet 13. ff. de pig. act.*

VII. Propter affectionem personarum singulari jure introductum est, ut pater filix

liæ & nepti stipulando acquirat. Sic avus maternus dotem datam sibi neptive reddi stipulatus, utilem nepti moriens actionem relinquit, *l. Gajus 45. ff. Sol. mat.*

VIII. In mutuo singulari jure introductum est, ut si quis nummos suos alterius nomine mutuos dederit, ei etiam absenti & ignoranti certi condictioem acquirat, *l. certi condictio 9. §. si nummos 8. ff. de reb. cred. & l. 2. C. Per qu. pers. nob. acquir.*

AD L. LXXIV.

Papinian. lib. 1. *Quæstionum.*

Non debet alteri per alterum iniqua conditio inferri.
Hic etiam explanatur *l. factum 155. l. in condemnatione 173. §. 2. & l. neque 198. ff. h. t.*

EXPLICATIO.

TRia sunt juris præcepta; *honestè vivere, alterum non ladere, & jus suum cuique tribuere*: ex quorum secundo hæc regula, tanquam ex fonte quodam profluxit, quod *alteri per alterum non sit iniqua conditio inferenda*. Quilibet enim ex divino præcepto prohibetur, alteri facere, quod ipse sibi fieri nolit. Sic non debet mihi præjudicium fieri, si quis per dolum vel desidium mei procuratoris aut coloni in fundum meum irrepserit, ne ex aliena malignitate damnum nobis inferatur, *l. fin. C. de acq. possess.* Sic quoque divisio hereditatis facta, quibusdam coheredibus absentibus, vel

ignorantibus

ignorantibus , non debet eorum conditionem deteriore reddere, *l. coheredib. 17. C. famil. hercis.* Huc pertinet lex 155. *inf. eodem. Factum cuique suum , non advers. nocere debet.* Item regul. 198. *Neque in interdicto , neque in ceteris causis , pupillo nocere oportet dolum tutoris.* Unde si tutor pupilli nomine calumniosam litem movit , aut alter justè agenti se iniquè opposuit , & ea de causa tanquam temerarius litigator in expensas condemnatus sit , non potest eas pupillo imputare, *l. quoties 9. §. sicut autem 5. ff. de admin. tutor. l. non est ignotum 6. C. eod. tit.* Planè in hoc tantum tenetur pupillus ex dolo tutoris , ut actionibus cedat , quas habet contra tutorem , sed non ut aliquid pro tutore præstet , quoniam ob admissum dolum constat tutorem pupillo obligari , sed liberatur pupillus cessis actionibus quas contra tutorem habet , *l. 3. §. si servus pupilli 1. ff. de trib. act.* Quod si pupillus factus locupletior sit ex dolo tutoris , tenetur tanquam ex dolo à se commisso , *l. apud Celsum 4. §. illa etiam 21. ff. de doli except.* Cujac. *ad l. heredibus 13. ff. de dolo.* Ita rectè notat Bulgar. *ad d. l. neque in interdicto 198. inf. eod.*

A D L. L X X V.

Papinianus lib. 3. Quæstionum.

Nemo potest mutare consilium suum in alterius injuriam.

E X P L I C A T I O.

ET si sapientis viri sit consilium suum mutare in melius, *gl. in l. 8. per illum text. ff. de collat. bon.* Nunquam enim præstantibus in Repub. gubernanda viris laudata est perpetua permanſio in unâ eâdemque ſententiâ, *teſte Cicer. in officiis.* Attamen in alterius detrimentum & perniciem conſilium mutare, durum & iniquum foret, *text. hic.* Exempli gratia: Ex judicis ſententia victori jus eſt quæſitum, ex contractu utrinque nata eſt obligatio inter contrahentes, ex aditione hereditatis vires teſtamenti ſunt impletæ, & heres legatariis & creditoribus factus eſt obnoxius. Non poteſt ergo judex ſententiam ſemel latam revocare in præjudicium partis victricis, *l. judex poſteaquam 55. ff. de re jud.* Nec poteſt quis, alterâ parte invitâ, à contractu ſemel perfectò recedere, *l. ſicut 5. C. de obligat. & actionib.* Nec is qui ſemel adiit hereditatem, eam repudiare poteſt, *l. 4. ſicut, C. de repud. hered.* Sic etiam legatarius cui optio vel electio aliquarum rerum eſt legata,

ta,

ta, si semel quod voluit elegit, mutare consilium & aliud eligere non potest, quia jus legati prima optione consumitur; *l. Servi* §. *l. hujusm.* 48. §. *Stichum*, de legat. 1.

Limitatur regula, quod in rebus diversis seu alternativis obligationibus liceat mutare consilium, veluti si quis vendidit domum reservatâ sibi habitatione donec vivat, aut in singulos annos decem, emptor potest primo anno præstare decem, & secundo anno, si malit, habitationem ei concedere. Potestatem enim liberam mutandæ voluntatis habet, *l. si sterilis* 21. §. *fin. supra de actionib. empti*. Potest etiam quis mutare consilium suum & pœnitere, si nulla captio ex ejus pœnitentia sit adversario, ut in specie, *l. de atate* 11. §. *fin. de interr. in jure fac.*

AD L. LXXVI.

Papinianus libr. 24. Quæstionum.

In totum omnia quæ animi destinatione agenda sunt, non nisi vera & certa scientia perfici possunt.

EXPLICATIO.

Cum nihil tam contrarium scientiæ & consensui sit, quam error, qui imperitiam detegit, *l. si per errorem* 15. *sup. de jurisd.* recte in hac regula traditur, ea quæ animi judicio & ex certa scientia peragi debent, erroris

erroris interventu vitari. Quæ regula procedit in testamentis, contractibus; delictis & in omnibus negotiis, in quibus consensus & voluntas requiritur. Unde heres institutus dubitans, an testator vivat, nec ne, repudiando nihil agit, sicut nec adeundo hereditatem sibi præjudicat, *l. is qui heres* 13. §. 1. *l. heres* 32. *de acquir. heredit.* Nam ut quis adeundo hereditatem, vel pro herede gerendo obstringat se hereditati, certus esse debet defunctum esse testatorem, *l. qui hereditat.* 19. *ff. de acquir. her.* quia viventis nulla est hereditas, *l. 1. ff. de hered. & act. vend.* Scire etiam debet heres, ex qua causa hereditas ad eum pertineat, utrum ex testamento, an ab intestato, *l. si is ad quem.* 22. *dict. tit.* Ita demum igitur aliquis pro herede gerendo acquirit hereditatem, si & eam sibi delatam esse credat, & revera delata sit, *l. si quis extran.* 21. *& l. sequ. ff. eod.*

Similiter nec errans rem suam conducere potest, neque per hoc in locatorem dominium transtulisse videtur, quod ignorans rem propriam conduxit, *l. ad probationem* 23. *C. de locato.* qui error impedit translationem domini. In delictis quoque nocendi animus & scientia requiritur. Vulgatum enim est quod dicitur, voluntas & propositum distinguunt maleficia, *l. qui injuria*

53. ff. *de furt.* Hinc est, quod excusatur ab adulterio, qui ignoranter infert stuprum uxoris sorori, quæ sese in lectum sui affinis collocaverat, *c. in lectum 35. quest. 1.* Item vasallus, qui dormit cum sua domina ignoranter, feudo non privatur. Veluti si domina larvata ad domum vasalli venerit, *Zaf. nu. 27. de feud. privat. in commentar. ad feuda.*

AD L. LXXVII.

Papinianus lib. 28. *Questionum.*

Actus legitimi qui non recipiunt diem vel conditionem, veluti mancipatio, acceptilatio, hereditatis aditio, servi optio, datio tutoris, in totum vitiantur per temporis vel conditionis adjectionem; nonnunquam tamen actus supra scripti tacite recipiunt, quæ aperte comprehensa vitium adferunt: nam si acceptum feratur ei; quæ sub conditione promissæ, ita demum egisse aliquid acceptilatio intelligitur, si obligationis conditio extiterit, quæ si verbum nominatim acceptilationis comprehenditur, nullius momenti facies actum.

Hic quoque satisfiit l. nemo. 123. & Lex pressa 195. ff. h. t.

EXPLICATIO.

Actus legitimi sunt ritus & actiones quædam solemnes, certis verborum formulis conceptæ; quæ ex legibus XII. Tabul. descendunt, ut *Cujac. lib. Obs. 15. c. 16. eleganter tradit.* Quidam autem actus legitimi conditionem & diem recipiunt. Sic enim

enim stipulatio, heredis institutio, sub conditione & in diem fieri potest, §. *omnis stipulatio* 2. *Inst. de verb. oblig.* §. *heres* 9. *Inst. de hered. instit.* Actus tamen legitimi, qui in hac regula recensentur, omnino vitiantur diei vel conditionis adjectione: ubi notandum, quod hæc particula *Qui* in regula posita restrictivè, non declarativè, intelligi debet, ut restringatur tantum ad exempla in hac l. relata. Ratio redditur ab Alciato *lib. 3. præleg. cap. 4.* Quod hi actus ab executione præsentis nomen habent, & legis fictione vel interpretatione sunt introducti, ideoque nec suspendi debent, per conditionis aut diei eventum; cum ea, quæ à lege statuta sunt, præsentem executionem secum trahant, & dies vel conditio nomini ipsius actus executionique repugnent, *l. non quemadmodum* 35. *ff. de iudic.* Unde aditio hereditatis nulla est, si ita quis dixerit: Adeo hereditatem si solvendo sit, *l. eum, qui duob. § 1. in fin. ff. de acquir. hered.* Non obstat *l. primo gradu* 13. *ff. Quæ in fraud. cred.* ubi heredes, ejus, qui solvendo non erat, ea conditione adierunt hereditatem, ut creditoribus partem duntaxat æris alieni solverent. Nam ibi conditio significat pactionem cum creditoribus factam, veluti inter heredem & fideicommissarium simile pactum

ctum interpositum memoratur in *l. apud Iulianum* 11. §. 1. ff. *Ad SC. Trebell.* post illam verò pactionem purè adita hereditas fuit. Sic hereditatis aditio isto casu non censetur facta sub conditione. Eadem ratione nulla est aditio: *Ex hoc die adeo hereditatem, vel in eum usque diem.* Nam à morte testatoris & in perpetuum heres esse debet, omnisque hereditas quamvis postea adeatur, tamen cum tempore mortis continuatur, *l. omnis hereditas* 138. inf. eod. *l. heres quandoque* 54. ff. *de acqu. hered.* Simili modo nec tutoris dati conditionem aut diem admittit: quod verum est, si à magistratu vel iudice tutor detur. Nam in testamento sub conditione tutor dari potest, §. *ad certum tempus* 3. *Instit. qui testam. tutores, &c.* Ratio diversitatis hæc est, quod in testamentaria tutela defectus diei vel conditionis per iudicem potest suppleri; quod secus est in dativa tutela, *l. si quis sub conditione* 11. ff. *de testam. tutel.* Itaque si à Iudice vel magistratu sub conditione tutor datus sit, inutilis & vitiosa est datio, quia actio magistratus imperfecta esse non debet, *l. muto* 6. §. 1. ff. *de tutel.* Sed & auctoritatis interpositio quæ fit à tutore in contractibus pupilli, purè fieri debet, non in tempus, vel conditionaliter, *l. etsi conditionalis* 8. ff. *de aucto. & consen.*

consen. tut. Alii assignant hanc rationem hujus regulæ, quod ex legis actionibus stabile & perpetuum jus nascatur, unde constet purè hos actus fieri debere. Hâc de causâ neque adoptatio filii, neque emancipatio ad tempus vel sub conditione fieri potest. Certum enim ac perpetuum jus patris & filii esse oportet, nec temporalem filium quis habere potest, *l. quasitum 34. sup. de adoptionibus.*

Limitatur regula duobus casibus.

I. Si conditio non respiciat substantiam ipsius negotii, sed magis admonitionis & executionis vim habeat. Unde tutor à magistratu sub hac conditione recte datur, si satis dederit, *l. tuto 6. §. sub conditione 1. de tutel.* Hæc enim conditio inest dationi tutoris, quamvis non exprimatur; ideoque abusivè conditio tantum appellatur, nec ullam vim suspendendi negotium quod geritur, habet.

II. Limitatur regula, si sub tacitâ conditione actus legitimus fuerit initus; quod acceptilationis exemplo illustratur, veluti, si Titius 10. promiserit Cajo sub conditione, *si Cæsar hostes devicerit*: deinde pendente conditione, Cajo volens liberare debitorem accepto ille tulit, ibi tacite repetita censetur conditio in ipsa promissione ex-

pressa, & tum demum vires habebit acceptilatio; cum ipsa obligationis conditio extiterit, *l. quod in diem 12. ff. de accept.* Cujus hæc est ratio, quod sæpe expressa noceant, quæ non expressa non nocent, *l. expressa 195. infra eod.*

Quærit hic Accurs. *An matrimonium sub conditionem vel in diem contrahi possit?* Et putat posse. Cujus sententia hic à Petro Fabro reprobatur, & vera non est quoad diem, quia ad tempus contrahi non potest matrimonium, cum in matrimonio individua vitæ consuetudo inter conjuges promittatur. Sed sub honesta & possibili conditione nuptiæ contrahi possunt, puta si quis ita contrahat matrimonium cum puella, Si tantum mihi nomine dotis dederit. Vel si parentes mei præbuerint assensum in nuptiis. Ita probatur *per tex. in c. de illis & c. super eo. ex. de cond. appof.* Plane ad diem contrahi non posse matrimonium, ex nuptiarum definitione liquiddò constat; in qua ponitur individuum vitæ consuetudinem ea conjunctione contineri.

AD L. LXXVIII.

Papinianus lib. 31. Quæstionum.

Generaliter cum de fraude disputatur: non quid habeat actor, sed quid per adversarium habere non potuerit, considerandum est.

EXPLICATIO.

MAlæ fidei possessor tanto à legibus nostris odio habetur, ut non solum perceptos fructus, sed etiam percipiendos cum re restituere cogatur: quia quotiescunque de fraude agitur, non quid habeat actor, sed quid per adversarium habere non potuit, inspicitur. Unde qui prædium alienum emit, cum ei verus dominus denunciatet ne emeret, prædium cum omni sua causa, hoc est, fructibus tam perceptis, quam percipiendis restituere cogitur, l. domum §. C. de rei vend. l. si navis. 62. §. ult. ff. eo tit. Disputant autem hic & anxie se torquent interpretes, utrum fructuum illorum qui percipi possunt, æstimatio referenda sit ad actorem, an vero ad rem. Hæc tamen communior & melior est sententia, quod æstimatio referenda sit ad id, quod communiter diligens paterfam. ex tali re percipere potuit. Nec illud considerabitur, si quid ultra communem morem à possessore aut petitore ex singulari indu-

striapercipi potuerit. Quam sententiam si sequaris, nulla erit legum pugna, quarum aliæ fructus percipiendos referunt ad peti-
torem, *l. si navis* 62. §. *fin.* ff. *de rei vend. text. hic*: aliæ ad possessorem, *l. domum* 5. C. *de rei vendic. l. 2. C. de pignorat. act.* Quinimo etiamsi titulum habeat malæ fidei possessor, tamen tenetur ad fructus percipiendos malæ fidei possessor, *d. l. domum. & d. l. 2.* Nec obstat *l. si fundum* 17. C. *de rei vend.* Quia quod ibi deest mentio fructuum percipiendorum, ex modo alleg. legibus supplendum est. Ex eo enim, quod ibi dicitur, malæ fidei possessorem qui titulum habet, de fructibus perceptis teneri, malè colligitur, eum non teneri de fructibus percipiendis. Nam quod ibi deest de fructibus percipiendis, sive quos percipere potuit, hoc ex aliis legibus supplendum est, quæ expressè dicunt, malæ fidei possessorem, licet titulum habeat, tam teneri de fructibus quos percepit, quam quos percipere potuit, uti clarè & expressè deciditur in *d. l. domum. C. de rei vend. & l. si navis* 62. §. *ult.* ff. *eod. l. ait Prator* 10. §. *per hanc actionem* 15. ff. *Qua in fraud. credit. l. cum servus* 39. §. *1. de leg. 1. in verb. quos legatarius percipere potuit.*

AD L. LXXIX.

Papinianus libr. 32. Quæstionum.

Fraudis interpretatio semper in jure civili non ex eventu duntaxat, sed ex consilio quoque consideratur. Dilucidantur etiam l. non fraudantur 134. & l. nemo 145. ff. h. t.

EXPLICATIO.

Pertinet hæc regula ad revocationem alienationis factæ in fraudem creditorum, quo casu datur actio Pauliana, ad alienationem rescindendam, creditori contra debitorem, qui bona sua in fraudem creditorum alienavit, & contra eum qui sciens dolo malo cum debitore contraxit, & fraudem participavit, puta in emptorem donatarium & legatarium, *l. 1. & l. is qui à debit. 9. ff. Quæ in fraud. credit.* Quæ actio ut competat, duo concurrere debent, scilicet, ut debitor habuerit animum & consilium fraudandi creditores: tum etiam, ut ex eventu & re ipsa appareat fraus facta, & diminutum debitoris patrimonium, hoc est, ut eventus consilio respondeat, ita quod bona ejus non sufficiant creditoribus, *l. ait Prat. 10. & l. si quis 15. ff. quæ in fraud. cred.* Quare si debitor prædium suum alienaverit, non fraude ulla, sed ex necessitate rei familiaris: licet revera creditores inde fraudati sint, non poterit tamen alienatio revo-

cari, quia consilium fraudandi defuit. Sæpe enim de facultatibus suis amplius quam in iis est, sperant homines, § *in fraudem* 3. *Institut. quib. ex caus. manum. non licet*. Praxis hujus regulæ est, ut qui agit revocatoria, seu actione Pauliana, primo narret bona esse vendita in fraudem creditorum; secundo atticulet, emptorem fraudis esse participem; tertio quod fraus suum effectum sit sortita, *Zasius ad §. Item si quis in fraudem* 6. *Instit. de act.* Illud bene notandum est, quod per actionem Paulianam ita demùm alienatio in fraudem creditorum facta revocetur, si etiam is, qui à debitore rem accepit, fraudis particeps fuerit: si verò ignoravit alienationem factam in fraudem creditorum, non tenetur hac actione, *l. quod autem* 6. §. *hoc edictum* 8. *ff. Qua in fraud. credit. facta sunt*. Quod verum est si titulo oneroso rem accepit. Nam si titulo lucrativo, puta ex causa donationis rem accepit, alienatio revocabitur, si ve accipiens fraudem scivit, si ve ignoravit, *l. pen. C. de revoc. his qua in fraud. cred. d. l. quod autem* 6. §. *simili modo* 11. ubi dicitur, quod si revocentur ea quæ in fraudem creditorum donationis titulo sunt alienata, quod nulla fraudis scientia exigatur in donatario, sed sufficit creditores per alienationem ex eventu esse fraudatos.

AD

AD L. LXXX.

Papinianus lib. 33. Quæstionum.

In toto iure generi per speciem derogatur: & illud potissimum habetur, quod ad speciem directum est. Exponitur l. semper specialia. 147. ff. infr.

EXPLICATIO.

CUm genus nihil aliud sit, quam species omnes simul conjunctæ, seu comprehensæ; posito genere, necesse est, ut quælibet ejus species inferantur. Semper enim generalibus specialia insunt, *l. semper 147. infra eod.* Unde qui legavit alimenta, cibum, potum, vestem & habitationem legasse intelligitur, quia sine his corpus ali non potest, *l. legatis 6. ff. de alim. legat.* At non econtra sequitur, ut quicquid de una specie dicitur, de universo genere statim prædicetur: sed ibi hæc regula sequenda est, quod species semper generi solet derogare, quotiescunque species & generis simul, vel separatim fit mentio. Quæ regula trifariam enarratur à Dd. in legibus videlicet, contractibus, & ultimis voluntatibus. De legibus exemplo sunt regulæ nostræ juris, à quibus simul atque exceptio aliqua dari potest, vitiantur, & officium suum perdunt, *l. 1. supra eod.* In contractibus exemplum esse potest, quod transactio vel libe-

ratio generalis restringatur tantum ad eas species, de quibus nominatim est actum, *l. si de certa* 31. *C. de transact. l. emptor* 47. §. *Lucius* 1. *supra de pact.* Pertinet quoque hæc regula ad ultimas voluntates & legata. Unde si cui legata sint omnia vestimenta, & alteri vestis muliebris, per legatum speciei derogatur generi, *l. 1. ff. de aur. & argen. leg.* Quod verum est, si diversis personis generale & speciale legatum relictum sit. Si vero uni & eidem species & genus legetur, tum si primo mentio speciei facta sit, deinde generis, hoc casu species generi non derogat, sed illud potius speciem ampliat & legatum auget, *l. hoc legatum* 45. & *l. seq. de legat. 3.* At si primo generis mentio fiat, deinde speciei, tum si per imperitiam testatoris id factum est, generi per speciem non derogatur, *l. legata* 9. *ff. de supell. leg.* Quia non mutat substantiam rei non necessaria verborum multiplicatio, *l. pediculis* 32. §. *Labeo* 6. *de aur. & argen. leg.* Si autem causa limitationis species sint adjectæ generi, tum certus modus, ut ait JC. generi datus videtur, *d. l. legata* 9. Multum tamen hac in parte voluntas testatoris operabitur, *d. §. Labeo.*

AD L. LXXXI.

Papinianus libr. 3. Responforum.

Quæ dubitationis tollendæ causa contractibus inferuntur ; jus commune non ledunt.

Concordat l. 94. infr.

EXPLICATIO.

Vulgatum & tutum est juris axioma, *Abundans cautela non nocet.* Quod in hâc regulâ rectè etiam ad contractus applicatur. *Ea enim quæ dubitationis tollendæ causa inferuntur contractibus, jus commune non ledunt.* Concordat l. 94. infra eod. Ratio regulæ est, quod ex iis, quæ supervacua sunt, nulla solet oriri obligatio, l. 2. sup. mand. Unde Florentinus scribit: Quæ verba extrinsecus, & nihil ad præsentem actum pertinentia stipulationi adjecta sunt, pro supervacuis habentur, nec vitiant obligationem, veluti; *Arma virumque cano, decem dare spondes?* nihilominus valet stipulatio, neque propter superflua aut otiosa verba vitatur, l. quæ extrins. 65. de verb. oblig. Exemplum accommodatum regulæ depromitur ex l. qui mutuam 56. ff. Manda. ubi creditor qui mandato alterius mutuam pecuniam dederat, caverat, ut omisso reo principali, & pignoribus non distractis, ad mandatorem regressum haberet, cautio illa tanquam superflua juri communi non de-

rogat. Nam alias jure communi veteri, etiam cautione illa non interveniente, potest creditor, vel reum, vel ejus fidejussorem, vel eorum pignus eligere, & uno electo potest ad alium redire, & residuum ac superfluum debiti ab alio obtinere, *l. non recte 3. l. jure nostro 5. & l. pignorib. 25. C. de fidejuss.* Jure tamen novo debitor principalis prius conveniendus est, quam fidejussor, *Authent. presente. C. de fidejuss.* Sic etiam in testamentis abundans cautela non solet nocere; Nam si in testamento scriptum sit, quod Titius condidit suum testamentum, codicillos aut ultimam voluntatem, propterea testamentum non debet infirmari. Satius enim est plura accumulare, quam necessaria omittere, *l. testamentum 17. C. de testament.* Eadem ratione pactum illud, quod in pignoribus dandis adjici solet, ut quo minus pignus venisset, reliquum debitor redderet, supervacuum est, quia ipso jure ita se res habet, etiam eo non adjecto, *l. quasitum 9. §. ult. ff. de distr. pign.* Et tradunt Canonistæ in *c. nimis, de excessib. pralator.* quod ad tollendam Sophisticam rationem verba non possunt supra modum specificari, *Decius h. fac. tex. elegans. in l. pediculis 22. §. Labeo 6. ff. de aur. & arg leg. ubi dicitur, quod non mutat substan-*

stantiam rerum non necessaria verborum multiplicatio.

AD L. LXXXII.

Papinianus lib. 9. Responsorum.

Donari videtur, quod nullo jure cogente conceditur.

EXPLICATIO.

Donatio ex sola liberalitate & mera munificentia constat, *l. 1. supra de don.* Unde donari id demum videtur, quod nulla juris naturalis, civilis aut prætorii necessitate cogente, sed ultro & sponte alicui conceditur. Ex quibus inferitur, quod donatio, quæ sit remunerationis causa, propter bene merita, propria & vera donatio non sit, sed potius ad permutationis quoddam genus respiciat, cum ad ἀντίδωρον quisque naturaliter obligetur, *l. sed etsi 25. §. consuluit 11. de hered. petit.* Ideoque nec insinuatione omissa talis donatio vitatur, etiamsi summam 500. aureorum excedat. Veluti si discipuli munificentiam exerceant erga suos præceptores, propter memoriam rectæ institutionis, *l. Aquilius 27. & l. si pater 34. §. ult. ff. de donat.* Unde etiam donatio remuneratoria, prætextu ingratitude revocari non potest, licet hoc in aliis simplicibus & propriis donationibus regulariter

lariter obtineat, *l. penult. §. 1. ff. donat. l. ult. C. de revoc. dona.* quia hæc donatio remuneratoria non est propria donatio, sed officiorum merces & compensatio, & est extra causam donationis, *ut ait l. G. Labeo in hoc jure 19. §. 1. ff. de donat.*

AD L. LXXXIII.

Papinianus libr. 2. Definitionum.

Non videtur, rem amittere, quibus propria non fuit. Exponitur l. nemo potest. 208. infr.

EXPLICATIO.

Tantum in jure nostro usum habet illud Dialecticorum axioma, Privatio præsupponit habitum, *l. decem 116. sup. de verb. oblig.* ut aliquot juris regulis confirmatum sit. Potest enim referri ad illud hæc nostra regula: *Nemo potest amittere rem, cujus propria non fuit*, id est, nemo amittit rei dominium & proprietatem, cujus nunquam fuit propria. Concordat *l. 208. infra eod.* *Non potest videri desisse habere, qui nunquam habuit.* Unde qui non est verus rei dominus, ut colonus & quilibet extraneus, non potest rem pro derelicto habere, ad hoc, ut ab apprehendente acquiratur: quia non potest quis rem pro derelicto habere, cujus propria non fuit, *l. 2. ff. pro derel.* Eadem ratione amittere possessionem dicitur

citur is, non qui primum non admittitur, sed qui prius eam adeptus de ea dejicitur, *l. 1. §. eum qui 26. sup. de vi & vi arm.* Regula nostra intelligitur de propria significatione admittendi:improprie tamen ea amitti dicuntur, quæ propria & nostra non fuerunt. Sic in *l. Aquilia* amittere dicimur, quod necdum habemus, & consequi saltem potuimus, *l. si serv. 33. sup. ad l. Aquil.* Veluti si servus heres institutus ante aditam hereditatem ab aliquo occisus sit. Nam hereditatis, quam nunquam consecuti sumus, æstimatio spectatur, eaque nobis debetur, *l. inde Neratius 23. ff. eod.*

AD L. LXXXIV.

Paulus lib. 3. Quæstionum.

Cum amplius solutum est quam debebatur, cujus pars non invenitur, qua repeti possit, totum esse indebitum intelligitur, manente pristina obligatione.

EXPLICATIO.

SI quid amplius solvitur, quam debitum fuit, quatenus est indebitum, repetitur. Quod limitatur in hac regula, nisi species aut individuum quid solutum sit per errorem pro pecunia. Quo casu tota res tanquam indebita repetitur, ut si, cum centum aureos tibi deberem, putans me ducenta debere,

debere, fundum solverim ducentorum, hoc casu competit mihi repetitio totius fundi, & pristina obligatio centum aureorum integra manet: Fundus autem retinebitur, donec pecunia solvatur. Cujus hæc est ratio, quod nemo invitus cogatur in communione manere, *l. si non sortem 26. §. si centum 4. de condict. indeb. l. ult. C. Com. divid.* quia communio plerumque rixas & discordias parere solet, *l. cum pater 77. §. dulcissimis 20. supra de leg. 2.*

Ad §. Is natura.

Is natura debet, quem jure gentium dare oportet, cujus fidem secuti sumus.

EXPLICATIO.

Naturalis obligatio est, quæ ex jure gentium descendit; hæc non habet adminiculum à jure civili, utpote cum alicujus fidem secuti sumus, solo consensu, vel nudo pacto contenti, *l. 1. ff. de pact.* Hujus naturalis obligationis hi sunt effectus, quod licet actionem non pariat, parit tamen exceptionem, *l. 7. §. sed cum nulla 4. ff. de pact.* Soluti repetitionem impedit, hoc est naturale debitum solutum non condicitur, *l. naturaliter 13. & seq. ff. de condict. indeb.* gignit compensationem, *l. etiam 6. ff. de compensat.* ad constituendum & novandum

dum sufficiens est, *l. 1. §. debitum 7. de constit. pec. l. 1. §. 1. ff. de novat.* Potest etiam fidejussor ei accedere cum effectu, *§. 1. Institut. de fidejussor.*

A D L. LXXXV.

Paulus lib. 6. Quæstionum.

In ambiguis pro dotibus respondere melius est.

E X P L I C A T I O.

Ratio Regulæ est, quod maximus & incomparabilis favor sit dotium. Publicè enim expedit fœminas esse dotatas ad sobolem procreandam, replendamque liberis civitatem: Deinde ut maritis succurrant in oneribus matrimonii sustinendis: Denique ne soluto matrimonio bonis mariti ad suos agnatos redeuntibus, uxor inops & egena relicta dedecori sit marito, *l. 1. ff. solut. matrim.* Exempli gratia, Licet donatio sub conditione, mortuo ante conditionis eventum donatore, non valeat, tamen res traditæ, ut securis nuptiis dotis efficiantur, mortuo ante nuptias donatore, favore dotium res dotales manent, & mortuo donatore injungitur heredi ejus necessitas dotem dandi. Idque favori dotium receptum est ne fœminæ indotatæ maneant, pro quibus in dubio respondere melius est,

*l. in ambig. 7. ff. de jur. dot. l. si ego 9. § si res
 1. de jur. dot. l. interest 18. ff. de reb. auct. jud.
 poss.* Aliud notabile exemplum, huic regulæ
 conveniens, hoc est: Quidam pater filiam
 suam elocavit nuptui, promittendo futuro
 genero certam dotem, hanc cum pater ex
 bonis maternis filiæ solvere vellet, gener
 restitit, asserens dotem promissam non ex
 bonis filiæ, sed ex ipsius patris bonis pro-
 priis solvendam esse. Cum hæc controversia
 in iudicium Cameræ imperialis deducta es-
 set, unanimi sententia ab Assessoribus deci-
 sum fuit, quod pater ex suo proprio patri-
 monio dotem solvere obnoxius esset, *per
 text. notab. & sing. in l. ult. C. de dot. promiss.*
 ubi expresse dicitur, quod pater pro-
 mittens dotem pro filia, intelligitur eam
 de suo, id est, de bonis paternis dotare vel-
 le, etiamsi filia propria bona habeat, & per
 se sit dives, ut commodè ex propriis bonis
 dos illi constitui possit, *l. qui liberos 10. inci-
 pienti Capite trigesimo quinto ff. de rit. nupt.*
 ubi traditur, officium paternum esse filias
 dotare: *Ita eleg. tradit. Mynsing. cent. 5. ob-
 serv. 32.* Aliud quoque exemplum accom-
 modatum adfertur ex *l. Gaj. Sejus 45. ff. Sol.
 matr.* ubi avus maternus cum daret dotem
 pro nepte, stipulatus est eam sibi vel nepti
 reddi soluto matrimonio; & quæreretur an

an nepti ex hac stipulatione danda esset : Et quamvis stipulatione alteri facta non competat actio in cuius personam collata est stipulatio, tamen hoc casu ex avita stipulatione datur nepti utilis actio ad repetendam dotem. Idque favore dotis specialiter receptum est, ut mulieres dotatæ facilius nubere possint.

Ad §. Non est novum.

Non est novum, ut qua semel utiliter constituta sunt, durent, licet ille casus extiterit, à quo initium capere non potuerunt.

EXPLICATIO.

Non debet id, quod rite & secundum leges ab initio actum est, ex alio eventu vitari, quantumvis casus is emergat, à quo negotium incipere non potuit. Quæ regula in testamentis, contractibus, matrimoniis, usucapionibus, aliisque actibus locum habet. Exempli gratia; Testamentum, quod quis legitimè fecit, non infirmatur, licet furor, aut captivitas, aliudque impedimentum superveniat, §. *præterea* l. *Inst. quib. non est permiss. fac. test.* Nam omnia, quæ ex testamento proficiuntur, ita statim eventus capiunt, si initium sine vitio cœperit, l. *omn.* 201. *inf eod.* Similiter matrimonium à sanæ mentis homine contractum propter furorem subsequentem non dirimitur,

tur, *l. oratione 16. §. ult. ff. de ritu nuptiar.* Sic in usucapione mala fides superveniens non nocet, si initium à bona fide cœperit, *§. diutina 12. Inst. de usuc.* Sic etiam vitium superveniens ex postfacto, senatorium ordinem judicandi munus, vel magistratum non impedit. Unde cæcus ad novum magistratum adspirare non potest, adeptum tamen magistratum retinet, quia sufficit actum ab initio fuisse legitimum, *l. 19. casum. ff. de postul. l. quod initio 28. supra eod.*

Limitatur Regula, si præcedens actus non fuerit plane perfectus & consummatus. Unde si fundum, cui servitutem stipulatus fueram, ante servitutem constitutam alienaverim, inutilis est stipulatio, *l. si sub una 136. §. 1. de verb. oblig.*

Ad §. final.

Quoties æquitatem desiderii naturalis ratio aut dubitatio juris moratur, justis decretis res temperanda est.

EXPLICATIO.

HÆc est Justi mens & sententia, quoties aliud videtur dictare stricti juris regula, aliud æquitas, hoc ratio naturalis in mente boni viri posita, tum res justis decretis est temperanda, ita ut in utramque partem nec ratione rigidi juris, nec ratione æquitatis nimium concedatur. Quæ
regula

regula cum latissime pateat, & omnibus juris partibus accommodari possit, certis exemplis restringi non potest. Vult enim in dubitatione ex pugna rigidi juris & æquitate exorta, iudicem temperamentum quoddam sequi debere, cujus exempla quotidie in causarum decisionibus iudici occurrunt. Quia enim omnes casus, qui quandoque inciderint, legibus aut constitutionibus comprehendi non possunt, ideo decretis opus est, quæ ad ipsa negotia, de quibus nihil jure proditum est, accommodentur, *l. neque leges* 10. *sup. de leg.* Ad hanc regulam rectè notant interpretes, quod naturalis ratio ad decisionem causarum allegari potest, *l. scire oportet* 13. § *sufficit* 6. *ff. de excus. tut.* ubi dicitur, quod ex ipso jure naturali seu naturali justitia sufficit fidem facere. Hinc Bald. scitè dixit, quòd *naturalis ratio optimus est Legis clypeus, Iudexque non minus debet moveri naturali dicto seu dictamine naturalis rationis, quam lege scripta; quia querere legem, ubi habemus rationem naturalem, est infirmitas intellectus.*

AD L. LXXXVI.

Paulus lib. 8. Quæstionum.

Non solet deterior conditio fieri eorum, qui litem contestati sunt, quam si non: sed plerumque melior.

Item L. LXXXVII.

Nemo enim in persequendo deteriore causam, sed meliorem facit. Denique post litem contestatam heredi quoque prospicitur, & heres tenetur ex omnibus causis.

Facit huc l. omne 139. & l. pœnalia 164. h.t.

EXPLICATIO.

TRactatur his duabus regulis de vi & effectu litis contestatæ. Est autem litis contestatio, cum Judex per narrationem actoris, & responsionem Rei conventi, de principali negotio factam; causam audire cœpit, *l. i. C. de lit. contest.* Litis autem contestationis multi & insignes sunt effectus.

Primus est, quod auferat reo potestatem exceptiones dilatorias opponendi, *l. fin. C. de exceptionib.*

Secundo per litis contestationem constituitur quis in mala fide, & in stricti juris judiciis à lite contestata fructus & usuræ debentur, *l. videamus 38. §. si actionem 7. de usuris, l. certum 22. C. de rei vindicat.*

Tertio interruptit præscriptionem 10. vel

vel 20. annorum, *l. præstat firmam 2. C. de longi temp. præscript.*

Quarto omnes actiones temporales perpetuas facit, & in heredes transmittit, *l. fin. C. de præscript. 30. vel 40. ann.* Sic tempore perit actio injuriarum, & uno tantum durat anno; si tamen lis sit contestata, ad triginta annos potest exerceri, & contra heredes intentari, §. 1. *Inst. de perp. & temp. act.* Sic in actione *Quod metus causa*, & interdicto, *Vnde vi*, heres non tenetur, nisi in quantum ad eum pervenit, sed lite contestata cum defuncto heres tenetur in solidum, *l. unic. C. Ex delict. defunct.* Excipitur actio de dolo, quæ non perpetuatur litis contestatione, sed intra biennium à die admissi doli debet moveri, atque etiam finiri, *l. fin. C. de dolo.* Non temere autem adjecit Jurisconsultus particulam *plerumque*. Quandoque enim litis contestatione conditio actoris fit deterior, quia tollit actori potestatem mutandi libelli, aut variandæ actionis, *l. si quis stipulatus 112. ff. de verb. oblig. l. edita 3. & ibi DD. C. de edendo.*

AD L. LXXXVIII.

Scævola libr. 5. Quæstionum.

*Nulla intelligitur mora ibi fieri, ubi nulla petitio est.**Lex nulla 88. explicata est supra, in l. qui sine dolo 63.*

AD L. LXXXIX.

Paulus libr. 10. Quæstionum.

Quamdiu possit valere testamentum, tamdiu legitimus non admittitur.

EXPLICATIO.

Testamenti condendi facultas ideo est introducta, ne quis, quem noller, heredem haberet, sed potius, quem vellet, heredem sibi eligeret: ideoque optima ratione hic constitutum est, tamdiu heredem legitimum ab intestato non admitti, quamdiu defuncti testamentum valere possit, *concord. l. quamdiu 39. ff. de acqu. her.* Ratio est, quia provisio hominis tollit provisionem legis, *l. ult. C. de pact. convent. &c.* Et ultima voluntas defuncti pro lege servanda est, §. *disponat. Auth. de nuptiis.* Accidit autem diversis modis, ut quis intestatus decedat.

Primò si nullum fecerit testamentum.

Se-

Secundò, si id, quod fecerit, irritum ruptumve factum est.

Tertiò, si nemo heres ex condito testamento hereditatem adierit, §. 1. *Instit. de hered. quæ ab intestato.*

Huc pertinet l. 181. infr. eod. *Si nemo subiit hereditatem, omne jûs testamento solvitur.* Cujus hæc est ratio, quod heredis institutio caput atque fundamentum sit testamenti, ex quo omnia pendent, quæ in testamento sunt disposita. Nullum enim testamentum valere potest, quod heredem non habet, §. *ante heredis* 34. *Inst. de legat.* Proinde libertates ipso jure valent, nec legata aut fideicommissa debentur, neque tutoris datio subsistit, si hereditas ex testamento non adeatur, l. *Papinianus* 8. §. *penul. & ult. ff. de inoffic. testam. l. si nemo* 9. *supra de testam. tutela.* Limitatur superior regula, nisi ita heres instituatur, *Si legitimus heres nolit vindicare hereditatem, Titius heres esto.* Hic nulla est institutio legitimorum heredum nominatim facta, sed tamen ex voluntate testatoris ante testamentarium heredem admittuntur heredes ab intestato & sic causa intestati præcedit causam testati, l. *si quis ita* 82. *de hered. instit.* Alia exceptio depromi potest ex l. *hac consultissima* 21. §. *ult. C. de testam.* ubi statuitur,

tur, quod testamentum prius solenne tollitur per aliud minus solenne confectum coram quinque testibus, in quo scripti erant heredes, qui aliàs ab intestato erant successuri, ubi additur, posteriorem voluntatem non quasi testamentum, sed quasi ultimam voluntatem intestati valere, ubi notatur casus specialis, quo casu intestati trahit ad se causam testati, *Vide Clar. lib. 3. sentent. §. testamentum. quast. 97.*

AD L. XC.

Paulus libr. 15. Quæstionum.

In omnibus quidem, maxime tamen in jure, æquitas spectanda sit.

Concordat l. *et si nihil* 183. infr. h. t.

EXPLICATIO.

CUM in omnibus rebus, tum in jure æquitatis maxime habenda est ratio, *text. h. & in l. placuit. 8. C. de lud. Summum enim jus, ut dicitur, summa crux & injuria est.* Et si stricti juris ratio semper habenda esset, sub autoritate juris scientiæ perniciosè aliquando erraretur. Est autem ÆQUITAS, autore Oldendorpio, in libello de jure & æquitate, *mitigatio legis scriptæ ob diversitatem circumstantiarum, rerum scilicet, personarum, locorum & temporum.* Vel Æquitas est ratio naturalis in mente viri boni

ri boni posita; quam Aristoteles teste Duaren-
no lib. 3. disputat. annivers. c. 18. ἐπιείκεια
 Cicero in *Oratione pro Cluentio legis laxa-*
mentum vocat, quod legem scriptam ob a-
liquam circumstantiam mitigat, & mode-
ratur. Ab Hostiense definitur, quod *æquitas*
sit justitia dulcore misericordia temperata.
 Alii definiunt æquitatem & *γενναμύχης*
νόμος ἐκδεμμεύει, id est, scriptæ legis supple-

Strictum jus est, quod nulla circumstan-
tiarum habita ratione, in univrsum ali-
quid decedit: sic dictum, quasi stricte & exa-
cte compressum, ac plus æquo durum.
 Hoc strictum jus sive rigor juris æquo &
 bono seu æquitati plerunque opponitur, *l. 2.*
§. Item Varus 5. ff. de aq. & aqua plu. arc.
 ubi dicit J.C. Hæc æquitas suggerit, etiamsi
 jure deficiamus. Hinc requiritur in iudice,
 ut æquitatem semper ante oculos habeat in
 condemnando & absolvendo, *l. 4. §. fin. de*
eo, quod certo loc. Item, quod iudex in prin-
 cipio sui officii jurare debeat, quod in ju-
 dicando velit æquitatem sequi, *Novell. const.*
8. §. Et subditos. Hinc est quod ex æquitate
 pacta interpretanda sint, *l. si soc. 81. ff. pro so-*
cio. Et propter æquitatem à natura contra-
 ctus & verbis testatoris aliquando receditur,
l. si & me & Tit. 32. ff. si cert. pet. l. qui si-

lium 74. §. *fin.* ff. *ad SC. Trebell.* Item & solemnia juris propter æquitatem quandoque negliguntur, *l. etsi nihil* 183. *infra eod. l. Divus* 7. ff. *de in int. restit.* Ex quibus constat, æquitatem menti & verbis legis esse præferendam. Quod verum est in casu dubio; alioqui si mens legis certa esset, aut verbo ejus manifesta & aperta essent, nulla consideraretur æquitas, sed rigor juris strictè servandus esset, *l. prospexit.* 12. ff. *qui & à quib.* Ubi Jurisconsultus inquit: *Quod quidem perquam durum est, sed tamen lex ita scripta est.* Et solius Principis est legem duram scriptam mollire, & propter æquitatem interpretando moderari, *l. i. & 9. C. de legib. ubi DD.* Approbat hanc distinctionem *Fachin. lib. i. controuv. jur. c. 3.*

AD L. XCI.

Paulus libr. 17. *Quæstionum.*

Quoties duplici jure defertur alicui successio, repudiato novo jure, quod ante defertur, supererit vetus.

EXPLICATIO.

Vetus jus vocatur jus succedendi ab intestato. Quia jure naturæ, quod antiquius est, bona nostra debentur liberis, & iis, qui sanguinis necessitudine proximè nobis devincti sunt. *Successio testamentaria est*

est ex jure novo profecta, qua eum, quem volumus, heredem instituimus. Quoties igitur qui heres institutus est in testamento, qui ab intestato erat successurus, si hic repudiet testamentariam successionem, nihilominus tanquam legitimus ad hereditatem potest admitti ab intestato. Sed è contra; si quis repudiet, quasi legitimus heres, hereditatem sibi delatam ab intestato, is siquidem se heredem institutum esse sciat, credendus est utramque repudiasse: si nesciat se institutum heredem, nihil ei nocebit repudiatio, *l. nec is 17. §. 1. ff. de acqu. hered.* Ratio diversitatis hæc est, quod testamentariæ successioni renunciâns, legitimæ renunciare nequit; quia eam nondum est consecutus, seu nondum ei delata est, *l. quamdiu 89. sup. eod.* At qui renunciât successioni legitimæ, censetur etiam testamentariam repudiasse, quia alias prior renunciatio nihil operatur.

Limitatur regula, si quis testamentariæ successioni nominatim & expressè renunciât. Nam si simpliciter vel generaliter fuerit renunciatum hereditati vel successioni alicujus defuncti, toti hereditario juri renunciatum censebitur, licet ex mille capitibus succedere potuerit, *Bart. ad d. l. nec is 17.* Aliud exemplum poni potest in filio

emancipato, qui si præterit patrem, duplici jure ei hereditas filii defertur. Jure novo per bonorum possessionem contra tabulas, *l. i. §. ultim. ff. Si à par. qui manu. sit* & *l. si à milite 29. §. ult. ff. de testamen. mil.* Jure antiquo competit ei querela inofficiosi testamenti, *l. 14. & 15. ff. de inoff. test.* Sed prius defertur patri bonorum possessio contra tabulas, quam querela inofficiosi, quæ est ultimum & extremum juris subsidium, *§. Tam autem 2. Inst. de inoff. test.* Igitur repudiata bonorum possessione contra tabulas, superest jus vetus, & relictus est locus querelæ inofficiosi. Ita eleganter explicant hanc *l. Cuj. lib. Obser. 8. cap. 23. Vigl. ad §. 1. inst. de inoff. testam.* Adferri etiam potest aliud exemplum hujus regulæ, in filia renuntiante hereditati paternæ: nam non prohibetur fratri postea succedere in hereditate paterna, quæ ex persona fratris sibi defertur, cum illa ex novo jure defertur, *Decius h. num. 6. Costal. ad l. Avus 33. ff. de pact.* Ratio est, quia bona patris post ejus mortem fratri quæsitæ, non amplius dicuntur paterna, sed fraterna, *l. si avia 19. C. de donat. Guid. Pap. decis. 192.*

AD L. XCII.

Scævola libr. 5. Responsorum.

Si librarius in transscribendis stipulationis verbis errasset, nihil nocere, quo minus & reus & fidejussor teneatur.

EXPLICATIO.

Regula simpliciter docet, errorem Notarii in scribendo instrumento commissum non vitare contractum aut stipulationem, nec partibus nocere. Ratio hæc est, quod magis valeat, quod inter contrahentes actum est, quam quod scriptura simulatè aut perperam conceptum est, *l. 1. C. plus valere, quod agitur*. Unde si Notarius in instrumento stipulationis, fidejussoris dationem omiserit, aut responsionem interrogationi præposuerit, nihil obest, quo minus reus & fidejussor teneantur, *l. 1. C. de contr. stip. l. Titia 134. §. idem respondit 2. ff. de verb. obl.* Quæ regula procedit, non solum in contractibus, sed etiam in testamentis, *l. ambiguitates 24. C. de testam.* Ubi Imperator Antoninus eleganter rescripsit: *Quod errore scribentis testamentum, juris solennitas mutilari non potest, quando minus scriptum, plus nuncupatum est, l. errore 7. C. de test.* Procedit autem regula, quando de errore Notarii aperte constat.

Nam *in dubio error non præsumitur*, standumque est verbis scripturæ, vel instrumenti, *l. si alii 19. de usufr. leg.* ubi dicitur, *interdum plus valet scriptura, quam quod actum est.* Et Notarius censetur à partibus rogatus, ut in instrumento eas clausulas inserat, quæ moribus inseri consueverunt. Militat igitur pro instrumento præsumptio, ut quicquid in eo scriptum sit, de voluntate contrahentium insertum videatur, *l. cum precibus 18. C. de probat.* ubi dicitur, *quod præsumuntur omnia vera esse, quæ in instrumento scripta sunt, donec probetur contrarium.* Decius hic num. 3. Illud quæri potest, *an error à Notario commissus emendari possit?* Et dicendum, si minus latina, & obscura, & mendosa verba sunt, emendari, restitui & illustrari posse, modo de sententia ejus, quod inter contrahentes actum est, nihil immutetur; *Notat Petr. Faber hic per l. actorum 46. ff. de re judic.* ubi dicitur, *quod actorum verba tenore sententiæ perseverante, emendare non est prohibitum.*

AD L. XCIII.

Marcianus libr. 1. Fideicommissorum.

Filiusfamilias neque retinere, neque recuperare, neque adipisci possessionem rei peculiaris videtur.

EXPLICATIO.

Ratio legis est, quod quicquid filius acquirit, patri acquirit, in cuius est potestate, adeo quidem, ut ne momento in persona filii subsistat acquisitio, *l. placet 79. ff. de acquir. hered.* Unde etiam quicquid filius peculiati nomine apprehendit, statim pater ejus possidet etiam ignorans, *l. 4. de acquir. possess.* Qua ratione quoque fit, ut de peculio pater ex contractu filii, non autem ipse filius teneatur, *l. depositi 5. l. si quis cum 44. ff. de pecul.* Sed hæc novo jure non obtinent. Nam filiusfam. in adventitio peculio sibi proprietatem quærit, retento tantum patri usufructu. In castrensi vero vel quasi castrensi peculio solidum sibi filiusfam. acquirit, *l. cum oportet 6. C. de bon. qua liber.* In profectitio ergo peculio hæc regula tantum locum habet.

AD L. XCIV.

Ulpianus libr. 2. Fideicommissorum.

Non solent, qua abundant, vitare scripturas.

Hæc lex 94. *supra* in l. *qua dubitation.* 81. est explicata.

AD L. XCV.

Ulpianus libr. 6. Fideicommissorum.

Nemo dubitat, solvendo, videri eum, qui defenditur.
Explicatur hic quoque l. in eo 110. §. 1. & l. qui rem 166. ff. h. t.

EXPLICATIO.

Qui reum conventum in judicio sine mandato defendit, is defensor dicitur, l. minor 51. ff. de procurat. Nemo autem ad defensionem admittitur, etiamsi sit locupletissimus, nisi satisfdet se judicatum, hoc est, litis æstimationem soluturum. Quo pertinent hæc duæ juris regulæ: *Qui rem alienam defendet, nunquam locuples habetur*, subaudi nisi satisfdet, judicatum solvi. Item reg. 110. §. 1. *Nemo alienæ rei expromissor idoneus videtur, nisi cum satisfdatione*, id est, fidejussorum datione, l. pratoria 7. ff. de prator. stipul. Ratio autem cur ab illis, qui lites alienas sine mandato defendunt, tam stricte exigatur satisfdatio judicatum solvi, hæc est; ne elusorium reddatur judicium. Periculum enim erat, ne si condemnatio secuta esset, dominus verus judicium contra se intentatum sine suo mandato, ratum non haberet, tanquam inter alios gestum, *vulgata* l. sæpe 63. de re jud. Hujus satisfdationis effectus traditur in hac regula,

la, nimirum quod debitor per hanc cautionem efficiatur solvendo & idoneus. Qui enim per alium solidum solvere potest, solvendo esse dicitur, *l. solv. 114. ff. de verb. signific.* Nam si defensor succumbat in iudicio, æstimationem litis nomine principalis solvere cogitur. Et licet principalis Reus solvendo non sit, tamen propter inopiam domini non liberatur defensor, sed nihilominus in solidum condemnatur, & de suo iudicatum solvere cogitur, *l. Titius antepen. ff. de procur.* Quod eo pertinet, ut, qui per alium defenditur, vel fideiussorem dare potest, in carcerem conjici propter debitum non possit, cessabitque hoc casu hoc axioma: *Qui non habet in are, luet in corpore.* Ferrar. hic per *l. si quis id quod 7. §. in servos 3. ff. de iurisd. om. jud.*

AD L. XCVI.

Mæcianus lib. 12. Fideicommissorum.

In ambiguis orationibus maximè sententia spectanda est ejus, qui eas protulisset.

Recurrere ad *l. semper in obscuris 9. supr. h. e.*

EXPLICATIO.

Generaliter hæc regula docet, quando profertur obscura aliqua aut dubia sententia, tunc ad intentionem auctoris confugiendum, ejusque interpretationem sequendam. Sic in legibus interpre-

K 5 tandis

tandis ad ipsum legislatorem recurrimus. Nam *cujus est legem condere, ejusdem est legem interpretari*, *l. ult. & pen. C. de ll.* Sic in sententia lata si emergat obscuritas, ad Judicem recurritur, ejusque spectatur interpretatio, *l. ab executore 4. ff. de appell.* Sic in legatis, & in testamentis, defuncti mens & voluntas potissimum consideratur, eaque domina & regina dicitur in ultimis elogiis, *l. in cond. 19. ff. de cond. & dem.* Huc pertinet regula 168. §. 1. *Quod factum est in obscuro, ex affectione cujusque capit interpretationem.* Unde qui rem alienam legat ignoranter uxori suæ aut conjunctæ personæ, tamen valet hoc legatum, licet alienæ rei legatum ab ignorante testatore relictum regulariter non valeat. Quia propter affectionem & benevolentiam videtur etiam legaturus fuisse, licet scivisset esse rem alienam, *l. cum alienam 10. C. de legat.* Aliud exemplum habes in *l. 3. C. de inoffi. test.* Fallit regula in contractibus, in quibus contra proferentem ambiguum pactum interpretatur, quia in ejus potestate fuit legem aptius dicere contractui, *l. veterib. 39. ff. de pact. c. contra eum, extr. eod.* Huc pertinet regula 172. *infr. eod.* *Ambiguum pactum contra venditorem interpretandum est. Ambigua autem intentio sic accipienda est, ut*

res

res salva sit aëtori. Quæ postrema verba denotant, in judiciis faciendam interpretationem pro aëto, ne iudicium reddatur elusorium, *l. si quis intentione 66. ff. de iudiciis. l. inter stipulantem 83. §. si Stichum 1. de verb. oblig.* Ratio inquam est, quia aliàs iudicium redderetur elusorium, & nullus esset iudiciorum exitus, si sequeremur, quid Reus sensisset: quippe ne condemnaretur Reus, semper id de quo agitur, convenisse, aut se consensisse sit negaturus. Deinde non ut in contractibus utriusque consensum & voluntatem exigimus, ita etiam in judiciis, quæ invito Reo exercentur. Unde si aëtor Stichum petendo alium cogitaverit, de alio Reus senserit, aëtori potius quam Reo creditur, *d. l. int. stipulantem. §. si Stichum 1. & ibi pulchre Cujacius, ff. de verb. oblig.*

AD L. XCVII.

Hermogenianus lib. 3. Juris Epitomarum.

Ea sola deportationis sententia aufert, quæ ad fiscum perveniunt.

EXPLICATIO.

Deportatio est perpetua in exilium condemnatio; qui ita deportantur, per sententiam bona amittunt: *l. 2. C. de bon. præscript.* Quod in hac regula ita declaratur,

ut ea sola bona deportato auferantur, quæ ad fiscum perveniunt, ad quem ea tantum deferuntur, quæ deducto ære alieno supersunt. Fiscus enim non potest præjudicium facere creditoribus. Et id in bonis cujusque esse intelligitur, quod deducto ære alieno superest, *l. non possunt 11. de jur. fisci.* ubi dicitur, quod *non possunt ulla bona ad fiscum pervenire, nisi quæ creditoribus superfutura sunt.* Regula hæc correctæ est hodie per *Auth. bona, C. de bonis proscriptor.* Ubi decisum est, bona damnatis non auferri, excepto crimine læsæ Majestatis, sed vel ascendentibus vel descendentibus, vel conjunctis ex latere ad tertium usque gradum deferri. Præterea sublata est moribus deportationis poena, eique successit bannum Imperiale, *die Kæiserliche Acht*/de quo eleganter Oldend. *in libel. de jur. & acquit.*

AD L. XCVIII.

Hermogenianus lib. 4. Juris Epitomarum.

Quoties utriusque causa lucri ratio vertitur, is præferendus est, cujus in lucrum causa tempore præcedit.

EXPLICATIO.

QUoties duo de lucro concertant, ejus causa potior habenda est, qui tempore

pore præfertur. Qui enim prior est tempore, potior est jure, *c. qui prior, extr. h. t.* Unde si eadem res duobus diverso tempore donata est, is præferendus est, cui prius res donata tradita est, *l. quoties 15. in fin. C. de rei vind.* Item si duo idem beneficium impetraverunt, is qui prior id obtinuit, præferendus est, *c. si pro te. de rescript. in 6.* Quæ regula obtinet etiam in causis onerosis, ut is præferatur, qui tempore potior est. Si tamen eadem res duobus sit vendita diversis temporibus, non præfertur is, qui prius causam obligationis habuit, sed cui prius tradita est possessio, *vulg. l. quotiens 55. C. de rei vind.* Idque propterea decisum est, quod ex contractu non prius transferatur dominium, nisi secuta traditione, *l. tradition. 20. C. de pact.* Sed pugnant in hac questione, *l. siue autem 9. §. si duob. 4. ff. de Publ. act. cum l. si ea res 31. §. ult. ff. de act. emp.* In priori L. dicitur, si duo emerunt eandem rem à diversis non dominis, possessoris melior est conditio; si ab uno, prioris, seu ejus, cui res prius tradita est, *in d. §. ult.* Lex duobus eumentibus eandem rem separatis contractibus, priorem facit potiore indistinctè, id est, eum cui primum res tradita est; siue ab eodem non domino, siue ab alio atque alio emerunt, id est, à diversis non domi-

230 IN TIT. DIG. DE REG. JUR.
dominis, semper prior potior est. Res ita
explicatur à Bulgaro rectissime *in h. l.* Cum
duo emerunt eandem rem diverso contra-
ctu, neutro possidente, si agant adversus
extraneum, is potior non est, qui prius e-
mit, sed qui prius rem accepit ex causa em-
ptionis. Extraneus priori rem tradere cogi-
tur, id est, qui prior habuit possessionem.
At uno ex iis possidente, id est, cum inter
se agunt, possessoris conditio melior est,
sed in specie, *l. si ea res* 31. neuter possidebat.
Confirmat etiam hanc solutionem & ap-
probat Pacius *centur. 5. conciliat. quaest. 14.*

L. XCIX.

Venulejus libr. 12. stipulationum.

*Non potest improbus videri, qui ignorat, quantum
solvere debeat.*

Lex non potest 99. explicata est *ad l. qui
sine dolo* 63.

L. C.

Cajus libr. 1. Regularum.

*Omnia quae jure contrahuntur, contrario jure per-
eunt.*

Lex omnia quae 100. explicata est cum
l. nihil tam naturale 35.

A D

AD L. CI.

Paulus libro singulari de cognitionib.

Vbi lex duorum mensum facit mentionem, & qui sexagesimo & primo die venerit, audiendus est: Ita enim & Imperator Antoninus cum Divo Patre suo rescripsit.

EXPLICATIO.

Mensis dies dispares sunt, & inæquales. Alii 30. nonnulli 31. dies habent. Placuit ergo in hac disparitate, quoties duorum mensum fit mentio, si quis 61. die id fecerit, eum non esse excludendum, sed perinde erit, atque si fecisset in præfiniti temporis articulo. Exemplum pete ex *l. si venditor* 28. & *l. quod si nolit* 31. §. *si quid ita* 22. ff. de *Ædil. edicto*. Venditor si rem morbosam aut vitiosam vendidit, datur contra eum actio redhibitoria intra duos menses, ut venditor rem vitiosam venditam recipiat, & pretium reddat. Si igitur emptor die 61. agere incipiat, audiendus est. Aliud exemplum extat in *l. ult. C. de temp. appellat.* ubi in causis appellationum accipiuntur pro nonaginta & tribus diebus tres menses, & in *l. pen. C. de fidejussorib.* ubi talis proponitur facti species: Fidejussor intervenit pro debitore, & promisit creditori, quod in iudicio eum exhibebit; si actor
intra

232 IN TIT. DIG. DE REG. JUR.
intra duos menses non agat, liberatur à fidejussione. Unde si sexagesimo primo die creditor Reum sisti & exhiberi à fidejussore petat, audiendus erit, *d. l. penult.* Plane si nomen mensis simpliciter à lege proferatur, de 30. diebus intelligitur, *l. fin. §. 1. & ibi gl. C. de jur. deliber.* Huc referri potest vulgatum illud axioma: *Dies termini non computatur in termino.* Guid. Pap. *decis. 270.*

AD L. CII.

Ulpianus libr. 1. ad Edictum.

Qui vetante Pratore fecit, hic adversus edictum fecisse proprie dicitur.

EXPLICATIO.

ADversus Prætoris edictum tam is facit, qui contra simplicem prohibitionem Prætoris vivi peccat, quam qui ejus edicto non obtemperat. Uterque enim majestatem & jurisdictionem Prætoris contemnit. Exempli causa, Prætor parentem vel patronum sine venia in jus vocari prohibet, *l. si libertus 12. l. penult. ff. de in jus vocan.* Non minus punitur is à Judice, quam qui edictum Prætoris in albo publicè jurisdictionis perpetuæ causæ propositum dolo malo corrumpit, *l. 7. supr. de jurisdict.* Ex quo observandum, paria esse, adversus Prætoris edictum quid facere, vel contra ejus

eius simplicem prohibitionem, *facit l. adversus 29. de recept. arbitris.*

Ad §. Ejus est.

Ejus est actionem denegare, qui possit & dare.

EXPLICATIO.

DAre & denegare actionem ex eodem jurisdictionis capite profisciscuntur. Quocirca cui unum denegatur, alterum non conceditur. Regula eo pertinet, quod nemo possit confugere ad superiorem judicem, & conqueri justitiam sibi denegatam, nisi prius inferior judex competens fuerit. Nam qui dare non potest, non potest dici negasse, & ideo nec actor repessalium subsidium impetrare poterit, quasi denegata sit ei justitia, cum in reum jurisdictionis nulla judici competeret, de quo vide Bart. *in suo tract. de repress.* Sunt autem *repressalia*, pignorationes rerum vel personarum, quando unus pro alio, & res alterius pro rebus alterius conveniuntur & apprehenduntur, ob id solum, quod sit ejusdem civitatis vel vici civis vel incola. Quæ tantum à principe, vel magistratu, non recognoscente superiorem, conceduntur ob denegatam justitiam, *c. i. ex de injur. in 6.* And. Gail. *in tract. de pignorat. cap. i. §. 2.*

AD L. CIII.

Paulus libr. i. ad Edictum.

Nemo de domo sua extrahi debet.

EXPLICATIO.

Qui latitat & se repræsentare recusat, quo minus in jus vocari possit, is de domo sua extrahi non debet, quanquam alias repertus obtorto collo in judicium rapi poterat. Ratio est, quod domus sua sit cuique tutissimum refugium & receptaculum, & satis pœnæ subit, qui non defenditur & latitat, si in bonorum ejus possessionem ob contumaciam actor mittatur, eaque possideat & vendat, *l. plerique 18. l. satisque 19. ff. de injus voc. l. item ait Prator 21. §. 2. supr. Ex qu. cau. majo. l. in possessionem 6. & l. Fulcinius 7. §. 1. ff. Ex qu. cau. in poss. eat.* Itaque qui vocatum in jus adversarium domo invitum extraxerit, actione injuriarum tenetur, *l. qui in domum 23. sup. de injuriis.* In matrefam. id constitutum est, ut si quis eam ob debita de domo extrahat, sine ulla indulgentia capite plectatur, *l. 1. C. de offic. divers. judi.* Domum autem intellige, siue sit propria, siue conducta, siue gratis quis in ea habitet, *l. 5. §. domum 2 ff. de injur.*

Limitatur regula, ut solum procedat in causis civilibus, non etiam in criminalibus
& de-

& delictis publicis, propter quæ quis domo extrahi invitus potest, *Novell. constit. 134. §. si quis eorum.*

Secundo locum non habet regula in debitis fiscalibus, *l. 2. Cod. d. exactor. trib. lib. 10.* ubi dicitur, quod ob fiscalia debita, vel tributa, non solum quis invitus ex domo sua vocati ab exactore tributorum, sed etiam in aperta & libera custodia detineri potest, quod nos in praxi appellamus *gyselen.*

Tertio limitatur, ut de Apotheca, taberna, & hospitio publico quis invitus extrahi possit, *d. l. 5. §. 5. fin. Tantum igitur. ff. de injur.* quia ea mercium recondendarum, non habitationis causa sunt ædificata. Postremò diligenter notandum, quod si conductor domus meæ non apparet, & mercedem habitationis solvere recusat, domusque clausa sit, possum curare eam iudice præsentem aperiri, & coram eo & testibus præsentibus describere quæ ibi reperiuntur, ut ex eorum venditione mercedem domus conductæ consequar, *l. cum domini 56. ff. loca.*

AD L. CIV.

Ulpian. lib. 2. ad Edictum.

Si in duabus actionibus alibi summa major, alibi infamia est: Praeponenda est causa existimationis: ubi autem equiparantur famosa judicia, etsi summam imparē habent, pro paribus accipienda sunt.

EXPLICATIO.

PAulus scribit in *l. per minor. § 4. sup. de jud. Per minorem causa majori cognitioni praejudicium fieri non oportere, ideo quod major questio minorem ad se trahat.* Dubitatur quæ major sit questio; respondet hic Ulpianus majorem causam censeri, quæ infamiam irrogat, etiamsi minorem summam contineat. At si ex duobus judiciis utrumque famosum est, etsi summam disparem habeant, pro paribus accipienda sunt. Concordat quod rescribit Constantinus Imp. in *l. ult. C. de ord. judic.* Pecuniariam causam criminali utpote majori cedere debere. Exemplum; ex uno eodemque delicto concurrat actio furti & condictio furtiva: Si actionem furti, quæ famosa est, contra te instituerim, deinde conductione furtivâ agam, quæ non infamat, rectè repellar exceptione, quod praejudicium actioni furti non fiat, & prius de actione furti pœnali disceptabitur, quam de conditione furtiva, quæ rei persecutoria

ria est. At si utraque actio famosa sit, etiam si summam imparem habeant, pro paribus tamen habentur, veluti concurrit actio commodati cum actione furti. Itaque si primo commodati egero, tum furti experiri velim, neutra alteri præjudicatur, etiam si summam habeant imparem, una rem & id quod interest, altera poenam persequente, & ideo quæ prior ex his cœpta est, prius finietur. Potest & hæc sequens interpretatio commodè huic legi adhiberi, & hoc modo declarari. Si quis debitor ex pluribus causis & actionibus creditori obligatus sit, quarum altera famosa est, sed minorem debiti quantitatem continet, altera sine infamia est, sed majorem comprehendit summam, tunc solutio generaliter facta à debitore, non expresso eo, in quam summam imputanda sit, in dubio videtur facta in causam, quæ irrogat infamiam. Nam quod solutum est, in duriores & graviores causas solutum accipi debet, *l. 1. cum seqq. & l. si quid 7. ff. de solut.* Gravior autem est causa, quæ infamiam irrogat, cum fama sit præponenda omnibus divitiis, imò periculum fame & vite æquiparantur, *l. iusta 9. ff. de manu. vind.* Unde si debitor ex actione mutui in grandiore summam tenebatur, quæ non infamat, præterea ex actione

ne

ne tutelæ, quæ famosa est, minorem summam debeat, si non exprimit debitor, in quam summam solvat, jus disponit in eam summam solvisse, quæ irrogat infamiam, *l. cum ex pluribus* 97. ff. de solut. Judicia ergo famosa majora sunt non famosis, etiamsi non famosa majorem pecuniæ summam continent. Quod si omnia debita sunt similia & æqualia, puta si omnia sunt ex contractu profecta, & indefinitè est solutum, creditore etiam accipiente indefinitè, in electione creditoris est, in quam causam accepto vult ferre solutum, ita tamen ut prius acceptum ferat in debitum liquidum quam controversum, prius in proprium, quam illud quod fidejussorio nomine debetur, *l. 1. ff. de solut. l. C. eod.* Hæc in solutionibus obtinent. Sed alius etiam usus regulæ in ordine judiciorum consistit, ut liquet in duabus actionibus, utra prius in judicio instituenda sit. Major præponitur minori, *l. ult. C. de ord. judic.* Minor actio non movetur, dum speratur major, *l. per minorem* 54. ff. de judic. Sic petitio hereditatis, quæ universi juris est actio, præfertur rei vendicationi, quæ res singulas concernit, *l. post litem* 13. ff. de except.

L. CV.

Paulus libr. 1. ad Edictum.

*Ubiunque causa cognitio est, ibi Prator desideratur.**Hæc lex explicata est sup. ad l. omnia quacunque 71.*

L. CVI.

Paulus libr. 2. ad Edictum.

Libertas inestimabilis est.

L. CVII.

Gajus lib. 1. ad Edictum Provinciale.

*Cum servo nulla actio est.**Duas has seqq. ll. quæ tractant de servis, consulto omittimus, quia servorum usus apud nos abolevit.*

AD L. CVIII.

Paulus libr. 4. ad Edictum.

*Fere in omnibus pœnalibus judiciis & ætati, & imprudentiæ succurritur.**Explicationem hic simul accipit, l. pupillum 111. h. t.*

EXPLICATIO.

DUO notantur in hâc regulâ. Primò, quod propter ætatem pœna aliquando remittatur. Secundò, quod delictum per imprudentiam commissum mitius plecti debeat. Prima pœna ratione ætatis miti-

gatur in pupillo, sub hac distinctione: si pupillus infans est, vel infantiae proximus, ex delicto prorsus non obligatur, *l. 1. C. de fals. moneta*, *l. infans*, 12. ff. *ad l. Corn. de sicar.*

Si sit doli capax & pubertati proximus, tenetur ex delicto, sed propter ætatem mitiori pœnâ plectitur, *l. impuberem* 23. *de furt. l. 5. §. & ideo*, 2. ff. *ad l. Aquil.* Ratio est, quia in pueris non ita puniri debent delicta sicut in maioribus, *c. 1. extr. de delict. puerorum*. Quod etiam extenditur ad minores 25. annis, in quibus & misratio ætatis iudicem quandoque ad mediocrem seu mitiorem pœnam perducit, quod in arbitrio iudicis attendita personæ causa & qualitate consistit, *l. auxilium* 37. §. *in delictis*. 1. *supr. de min.* Decius *hic n. 4.* Exemplum est in *l. si adulterium* 38. §. *fratres*, 4. *sup. ad l. lul. de adulter.* Ubi crimen incestus ratione ætatis minoribus xxv. annis remittitur. Sic etiam statuitur in *l. de minore* 10. ff. *de quest.* minores xiv. annis quæstioni & torturæ subijci non debere. Senes etiam propter ingravescentem ætatem mitiori pœna afficiuntur, *l. 2. ff. de term. moto. l. 3. §. ignoscitur*, 7. ff. *ad SC. Syllan.*

Secundo dicitur hic, quod propter imprudentiam pœna delicti moderanda est, quando

quando inconsideratè & temerario impetu quis deliquit. Sic qui per imperitiam vel rusticitatem album Prætoris corrumpit, veniam meretur, *l. si quis id 7. ff. de jurisd.* Exemplum aliud est in *l. 3. §. 1. ff. ad l. Corn. de sicar.* Ubi mulier relegata fuit, quæ medicamentum dederat non malo animo, sed malo exemplo ad parandam conceptionem, ex quo ea quæ acceperat, mortua est. Sic qui per lasciviam homicidium perpetravit, non dolo, ei capitalis pœna remittitur, & per quinquennium in insulam saltem relegari jubetur, *l. 4. §. cum quidam 1. ff. eod.*

L. CIX.

Paulus libr. 5. ad Edictum.

Nullum crimen patitur is, qui non prohibet, cum prohibere (non) potest.

Lex hæc 109. explicata in *l. culpâ caret 50.*

AD L. CX.

Paulus lib. 6. ad Edictum.

*In eo quod plus sit, semper inest & minus.
Satisfit hic l. in toto & pars 113. infr. h. t.*

EXPLICATIO.

IN majori summa semper continetur minor. Unde si stipulanti mihi 20. tu promittas 10. debebuntur 10. quia numerus

L

minor

minor inest majori, *l. i. §. si stipulanti 4. ff. de V.O.* Item si unus ex tribus arbitris in quindecim, alius in 10, tertius in quinque condemnaverit, 5. præstabuntur; quia in hanc summam omnes consenserunt, *l. diem proferre 27. §. si plures 3. sup. de recept. qui arbit.* Limitatur regula, quando is qui protulit maiorem summam, non consensit minori. Ut si testator heredem iussit tantum centum aureos erogare in funus seu monumentum, non potest heres minus exponere, *l. cum in testamento 202. de verb. sign.* Quod si amplius vellet erogare, licet, neque ob eam rem contra testamentum facere videtur, *d. l. in testamento*: ubi notat Rebuffus, se istam *L.* vidisse in iudicio praticari.

Secundò limitatur regula in mandato; Quia enim fines mandati diligenter sunt custodiendi, nec eos excedere licet, minor quantitas non inest majori. Unde qui mandat alteri, ut vendat ei domum vel fundum suum centum aureis, - non poterit minoris fundum vendere, *l. diligenter 5. in princip. & §. item si manda vero 3. ff. Manda.* Huc pertinet regula 113. inf. cod. *In toto & pars continetur.* Unde qui totum fundum petiit, & succubuit, si postea partem petat, exceptione rei iudicatæ submovebitur, quod in toto pars inest, *l. si quis cum totum 7. de except. rei judic.*

Ad

Ad §. Nemo 1.

Nemo aliena rei expromissor idoneus videtur, nisi cum satisfactione.

Explicui hunc §. ad l. nemo dubitat p.

Ad §. Pupillus 2.

Pupillus pati non posse intelligitur.

EXPLICATIO.

CUM in pupillo desit justus & legitimus consensus, sequitur pupillum pati non posse, ut ex eo damnum sentiat, aut obligatione adstringatur. Quod duobus elegantissimis exemplis illustratur, veluti si pupillo patiente vicinus novum opus faciat, ex quo aqua pluvia ei noceat, nihil obest, quin actione pluviae arcendae vicinus reneatur, quia pupillus patientia sua consensum præbere non potest, sicut major, l. Labeo 19. ff. de aq. & aq. plu. arc.

Aliud exemplum depromitur ex l. qui ad certum 14. & l. seq. ff. loc. Qui patitur conductorem finito conductionis tempore in fundo morari, tacite censetur contractum renovasse, & tamdiu ex integro locasse, quamdiu prius locaverat. Quod tamen in pupillo dici non potest, quia deficit in eo consensus, ex quo hic contractus conva-



lescit, non secus atque si furiosus esset, qui pateretur id fieri.

Terriò, potest huc quoque referri aliud accommodatum exemplum, si tutoris vel curatoris culpa non est solutus canon emphyteuticus de prædio minoris, summo quidem jure prædium emphyteuticum cecidit in commissum, sed damnum quod passus est minor vel pupillus, reperet actione tutelæ à tutore, vel in integrum restitueretur contra caducitatem à prædio emphyteutico, *l. si tutoris 23. C. de adm. tuto. l. etiam 3. C. Si tut. vel curat. interv.* Ita notat Placent. h. per hanc regulam, quia pupillus jacturam pati posse non intelligitur, per socordiam vel fraudem tutoris, *l. ideoque 5. ff. de dol. mal.*

Ad §. Ubi verba 3.

Vbi verba conjuncta non sunt, sufficit alterutrum esse factum.

EXPLICATIO.

USitatum est, quod dicitur: *Ad veritatem copulativa requiritur, utramque partem esse veram: Sed ad veritatem disjunctiva sufficit, si altera pars vera sit, l. si heredi 5. ff. de condit. instit. Mynsing. ad §. pen. Inst. de hered. instituend.* Quod postremum in hac regula explicatur. Quo pertinet

pertinet regula Canonica, *In alternatiuis electio est debitoris, & sufficit alterum adimpleri.* Unde qui promisit Stichum aut Pamphilum, alterutrum dando liberatur. Item si maritus soluto matrimonio dotem vel æstimationem dotis restituere promisit, utrum solvere velit, mariti est electio, *l. plerumque 10. §. si res 6. ff. de jur. dot.*

Ad §. fin.

Mulieribus tunc succurrendum est, cum defraudantur, non ut facilius calumnientur.

EXPLICATIO.

Ratio est, quod deceptis & non decipientibus jura subveniant, fœminarumque simplicitas & infirmitas, non calliditas auxilium mereatur, *l. 2. §. 1. ad SC. Vell.* Quocirca si mulier bona sua per maritum patiaturs obligari, marito affirmante res esse proprias, & sic creditori mutuam pecuniam danti imponat, SCto non juvatur, *l. si sine voluntate 5. Cod. eod.* Quemadmodum nec juvatur, si per se & pro se contrahat, prædiumque emat vel conducatur, *l. si adversarius 10. C. eod.*

AD L. CXI.

Cajus lib. 2. ad Edictum provinciale.

*Pupillum, qui proximus pubertati sit, capacem esse & furandi, & injuria facienda.**§. 1. In heredem non solent actiones transire, quæ pœnales sunt ex maleficio, veluti furti, damni, injuria, vi bonorum raptorum, injuriarum.**Hujus l. primam partem exposui in l. fere 108. sup. eod. Alteram partem in l. sicuti pœna 38. sup. h. t.*

L. CXII.

Paulus libr. 8. ad Edictum.

*Nihil interest, ipso jure quis actionem non habeat, an per exceptionem infirmetur.**De hac l. dixi ad l. non videtur cepisse 13. sup. h. t.*

L. CXIII.

Gajus lib. 3. ad Edictum Provinciale.

*In toto & pars continetur.**Hanc l. exposui in l. in eo, quod plus 110.*

L. CXIV.

Paulus libr. 9. ad Edictum.

*In obscuris inspicere solere, quod verisimilius est, aut quod plerumque fieri solet.**Hæc l. exposita est in l. semper in obscuris 9. sup. eod.*

AD

AD L. CXV.

Idem libr. 10. ad Edictum.

Si quis obligatione liberatus sit, potest videri cepisse.

EXPLICATIO.

Paria sunt pecuniam accipere, vel ab obligatione liberari; quod hæc regula in effectu tradit, & tali exemplo potest declarari: Calumniatores, qui pecuniam accipiunt, ut alicui litem injustam moveant, tenentur parti læsæ in quadruplum. Porro hæc poenâ tenebitur, non solum cui pecunia realiter numerata est, ut alteri injustam litem moveret, sed & qui ab obligatione creditoris liberatus est: nam & hic accepisse videtur, *l. 2. ff. de calumniator.* Quemadmodum & qui alicui remisit debitum, donasse videtur. Paria enim sunt dare & remittere, *l. si fundum 81. §. Titio 5. ff. de leg. 1. l. si mulier. ff. de condict. ob causam.*

§. Non potest.

Non potest videri accepisse, qui stipulatus potest exceptione summovere.

§. *Non potest, explicatus in l. non videtur 13. supr. h. t.*

AD L. CXVI.

Ulpianus libr. 11. ad Edictum.

*Nihil consensui tam contrarium est, qui & bona fidei
judicia sustinet, quàm vis atque metus: quem
comprobare, contra bonos mores est.*

Dicitur hic etiam d. l. Vani timoris 184. inst. b. t.

EXPLICATIO.

Nullus omnino contractus sine consensu iniri & perfici potest, qui consensus debet esse liber & spontaneus ab omni errore, vi & metu vacuus. Unde si quid per errorem, vim aut metum gestum est, eoque nomine quis in captionem incidit, Prætor restitutionem in integrum pollicetur, l. 1. & 2. *sup. de restit. in integr.* Prætor enim tamquam æquitatis custos & interpretes illam obligationem non approbat, quæ per vim aut metum extorta est. Requiritur autem ut sit enormis vis & justus metus, qui non in vanum hominem, id est, stultum & ratione carentem, seu meticulosum, sed qui in constantissimum virum cadit, l. *metum* 6. ff. *quod metus caus.* Ille itaque justus metus dicitur, propter quem Prætor aliquem in integrum restituit, & quod factum est, rescindit, quando quid ab aliquo extortum est per metum mortis, cruciatum corporis, carceris, verberum, l. 4. 5. & 7. C. *De his qua vi metus caus.*
l. in-

l. interpositas 13. C. de transact. Hæc omnia Prætor tanquam illicitè gesta improbat & rescindit, *quia nihil consensui tam contrarium est, quam vis atque metus, quem comprobare contra bonos mores est.*

Ad §. fin.

Non capitur, qui jus publicum sequitur.

EXPLICATIO.

Qui iniquis modis circumscriptus læditur, is decipitur, non autem qui juris publici rationem & præscriptum secutus contraxit. Quæ regula tam ad majores quam ad minores refertur. Proinde si minor xxv. annis rem necessariam emit, eaque postmodum casu fortuito interiit, cum jure communi sit usus, non est restituendus. Conatus enim fuit rem suam meliorem facere publico juris auxilio, *l. verum 11. §. sciendum 3. ff. de minor.* Sic nec majores restituantur, licet dicant se rem minoris vendidisse, aut pluris emissee, quàm valebat, quia *naturaliter* permissum est contrahentibus, se invicem in precio circumvenire, *l. in causa 16. sup. de minor.* nisi ultra dimidium justî pretii quis deceptus sit, quo casu habet remedium, *l. 2. C. de rescin. vend.* Aliud exemplum notabile ad hanc l. pro-

L §.

poni.

250 IN TIT. DIG. DE REG. JUR.
ponitur in *l. inter eos* § 1. §. *pen. ff. de fidejuss.*
Ubi minor xxv. annis, qui ex præscripto juris communis, actionem inter fidejussores, tum temporis solvendo existentes, divisit, restitui in integrum non potest, si post litem contestatam quidam ex fidejussoribus solvendo esse desierit, cum jure communi hoc casu usus sit, atque idcirco deceptus videri non possit.

Sequens §. 2. in prioribus Editionibus non existit, nos illum jure merito inferendum putavimus, qui habet hæc.

§. 2.

Non videntur, qui errant, consentire.

EXPLICATIO.

Consensus est duorum pluriumve in idem placitum, eandem causam, idemque negotium conspirantium voluntas, *l. 1. §. 1. ff. de pact.* Voluntas nempe libera, non coacta, neque vi, neque metu, neque errore impulsæ. De vi metuque egit Author *supr. in Explicat. l. 116. h. t.* De Errore hoc addimus; quod nihil consensui tam sit contrarium, quàm Error, *l. si cum Te* § 1. *ff. de pact.* qui consensum omni modo impedit, *l. si per errorem* 15. *ff. de jurisd.* conventionemque adeo annihilat. Rectè ergo *1Ctus*
Ulpianus

Ulpianus restitutionis beneficium, illis, qui errore lapsi sunt, largitur. Nam dum quis se errasse videt, etiam illum hoc, in quo erravit, non voluisse collige, dum à consensu (quasi) adhibito discedit, dum detegitur error, qui imperitiam detegit, *l. fin. 7. ff. de rescind. vendition.* paria quippe sunt aliquid non fieri, vel errore fieri. *Blasius.*

L. CXVII.

Paulus libr. 11. ad Edictum.

Prator bonorum possessorem heredis loco in omni causa habet.

Lex *Prator* 117. declarata est in *l. heredem* 59.

L. CXVIII.

Ulpianus libr. 12. ad Edictum.

Qui in servitute est, usucapere non potest: nam cum possideatur, possidere non videtur.

Legem 118. non explicuimus propter materiam servorum obsoletam.

AD L. CXIX.

Ulpianus libr. 13. ad Edictum.

Non alienat, qui duntaxat omittit possessionem.

EXPLICATIO.

Qui prohibitus est alienare, prohibetur dominium transferre, usucapionem permittere, servitutem constituere vel non utendo amittere, usumfructum concedere, hypothecam dare, in emphyteusim elocare, & id genus plura, *text. in l. sancimus 7. Cod. de reb. alien. non alienand. l. alienationis 28 ff. de verb. signific.* Ab his excipe eum, qui tantum occasione acquirendi non utitur. Unde *qui omittit possessionem, non dicitur alienare, text. hic.* Notandum autem, quod legendum sit hoc loco, *non alienat, qui omittit possessionem*, non vero, *amittit*, id est, qui possessionem non adipiscitur, & acquirit, quæ nondum ad eum pervenerat; alias certum est eum alienare, qui possessionem amittit, id est, quæsitam derelinquit, *l. item si res 4. §. Padius 2. ff. de alie. jud. mut. cau. fact.* Sic non alienat debitor quasi in fraudem creditorum, qui duntaxat omisit possessionem eam, quam potuit acquirere, *l. quod autem. 6 ff. Quæ in fraud. cred. l. alienationis 28. §.*

1. ff. de

l. ff. de V. S. ubi dicitur, Non videtur alienare, qui occasione acquirendi non utitur, veluti qui hereditatem omittit, aut opinionem intra certum tempus datum non amplectitur.

AD L. CXX.

Paulus lib. 12. ad Edictum.

Nemo plus commodi heredi suo relinquit, quam ipse habuit.

Hæc lex exposita est in *l. nemo plus juris* 54.

AD L. CXXI.

Idem libr. 13. ad Edictum.

Qui non facit quod facere debet, videtur facere adversus ea, quæ non facit; & qui facit, quod facere non debet, non videtur facere id, quod facere iustus est.

EXPLICATIO.

PER ænigma quoddam Jurisconsultus hic indicat, culpam consistere tam in omittendo, quam in committendó, veluti si heres non impleverit in testamento disposita, incurrit in pœnam facientis contra voluntatem testatoris, & hereditate omni-que lucro, quod ex testamento accepit, privatur, §. *Principio igitur, Novel. 1. de her. & Falcid.* Proinde qui cessat, & non facit quod facere debet, æque est in culpa, at-que

254 IN TIT. DIG. DE REG. JUR.
que si aliter quam jussus est, faceret. Nam
paria sunt non facere, vel minus legitime,
aut non debito modo quid facere, *l. quoties.*
6. sup. qui satisfd. cog. Sic si quis testamentum
fecerit, & in eo (quod facere non debet)
silentio filium quem habet in potestate
præterierit, non videtur testamentum fe-
cisse, §. 1. *Inst. de exhered. lib.* Paria enim
sunt non fieri aliquid, vel nulliter fieri.

L. CXXII.

Gajus lib. 5. ad Ediçt. Provinc.

Libertas omnibus rebus favorabilior est.

EXPLICATIO.

AB authore in prioribus editionibus ad
h. l. facta est nulla, quia agit de Li-
bertate & Servitute, &, ut colligere est ex
superioribus, omnes, quæ egerunt de Ser-
vis ll. silentio præterit Author: dumque
servi apud nos extant nulli, eorum intuitu
quoque nihil in præsens subjungemus, for-
san in Editione sequenti, quam notis no-
stris auctiorem molimur, aliquid de anti-
qua illâ materiâ dicturi. *Blasius.*

AD

AD L. CXXIII.

Ulpianus libr. 14. ad Edictum.

*Nemo alieno nomine lege agere potest.**Revolve l. Actus Legitimi. 77. ff. h. t. supr.*

EXPLICATIO.

Olim in usu fuit, ut alieno nomine agi non posset, nisi pro populo, pro libertate, pro tutela, *Inst. de his per quos ag. poss.* nos omissis juris antiqui ambagibus, regulam ad usum fori accommodabimus. Nemo ergo sine mandato alterius nomine actionem instituere potest, etiamsi de rato cavere paratus sit, nisi sit conjuncta persona, *l. sed & ha 35. l. Pomponius 40. in fin. ff. de procur.* Ratio est, quia sine actione nemo potest experiri, *l. si pupilli, 6. in fin. ff. de neg. gest. l. si is à quo. 3. §. si procur. 2. ff. Ut in poss. legat. &c.* Quod verum est, quando constat procuratorem mandatum non habere. Si vero incertum est, negotium ei mandatum sit, nec ne, tunc admittitur ad agendum cum cautione de rato, *l. i. C. de procur.* Quod verum est, si probabiliter dubitetur de mandato procuratoris, puta si proferatur mandatum mutilum, insufficiens, vel minus plenum; tunc enim admittitur pro-

procurator ad agendum, præstita cautione de rato, *d. l. 1. C. de procur. d. l. si is à quo 3. §. si procurator 2. ff. Ut in poss. legat. ubi dicitur, si dubitetur de mandato, tunc procuratorem satisfacere debere de rato.* Alioqui ubi nulla est probabilis præsumptio procuratorem habere mandatum, non aliter procurator ad agendum admittitur, quam si mandatum Judici insinuaverit. Quæ fuit sententia Placentini, de qua disputat *Accur. in l. non solum 39. §. 1. ff. de procur.* Sed verior est sententia Placentini, quod procurator non aliter admittatur ad agendum, nisi habeat mandatum, vel nisi probabiliter dubitetur de sufficientia sui mandati. Si tamen sit procurator de conjunctis personis actoris, tunc etiam admittitur ad agendum nomine alieno sine mandato, *l. exigendi 12. C. de procur.* Cujac. *ad No. 128. de exactor. publ. tribut.*

Ad §. Temporaria.

Temporaria permutatio jura provincia non innovat.

EXPLICATIO.

ELegans est hujus §. sententia, quæ hoc paucis indicat, juxta gloss. communiter hic approbatam, quod jus provinciae, id est, consuetudo aut statutum brevi per-

mutatione non soleat antiquari, id est, si semel aut bis contrarium est observatum; id est, Consuetudo semel tempore firmata non tollitur, si semel aut bis contrarium sit observatum. Sicut enim consuetudo à lege definito tempore, & certis actibus, quibus jus hoc verisimiliter ad notitiam populi potuit pervenire, tacito populi consensu introducitur: ita necesse est, ut factis contrariis & statuto tempore per contrarium populi consensum tollatur; *arg. l. nihil tam naturale 35. supr. eod. Tract. Dd. ad l. de quib. 32. sup. de ll.* Unde per unum vel alterum actum intervenientem contra consuetudinem completam, non censetur interrupta consuetudo, nisi contrarium toties & tanto tempore esset observatum, ut priori consuetudine abrogatâ contraria censeretur introducta. Ita determinat Gl. h. quam sequitur Raven. *de consuet. sect. 4. num. 29.* ubi notat, tunc tolli consuetudinem etiam uno actu contrario quando populus scienter & collegialiter facit actum contra consuetudinem. Quod & probat h. Decius. Exempli gratia. Consuetudo est præscripta, quod vulneranti aliquem in æde sacra vel curia amputetur caput: postea quidam nobilis vulneravit aliquem in templo vel in curia; huic imposita est pœna pecuniaria.

Cl. h.

Cl. h. determinat, propterea non esse sublatam consuetudinem, ut à capitali poenâ sit recessum, nisi toties & tanto tempore observatum sit contrarium, quod prima consuetudo esset abolita & abrogata. Petrus Ravennas *in tracta. de consuet. sect. 4. n. 29. & 36.* ubi notat, tunc tolli consuetudinem, quando populus scienter & collegialiter facit actum contra consuetudinem.

AD L. CXXIV.

Paulus lib. 16. ad Edictum.

Vbi non voce, sed præsentia opus est, mutus, si intellectum habet, potest videri respondere. Idem in surdo, hic quidem & respondere potest.

EXPLICATIO.

Hoc vult regula ubi non verbis, hoc est, solemni stipulatione opus est, sed præsentia animi, id est, intellectu & consensu tantum, ibi mutus ac surdus si intelligent, contrahere possunt, & obligantur. Hinc est quod surdus ac mutus propter consensum rectè procuratorem constituent, *l. mutus 34. sup. de procurat.* matrimonio rectè contrahant, *l. mutus 73. sup. de jur. dot.* legitimè donent, *l. qui id quod 33. §. mutus 2. sup. de donat.* & omnes contractus, qui consensu perficiuntur, commodè celebrare possint, *l. in quibuscunque 48. ff. de act.*

de act. & oblig. Nota ex hac lege, quod præsentia significet animi intellectum & iudicium. Id enim in præsentia alicujus fieri dicitur, quod coram intelligente & prudente fit, *l. coram 209. de V. O.*

Ad §. Furiosus I.

Furiosus absentis loco est, & ita Pomponius libro primo Epistolarum scribit.

Nota. Neque Textus hic neque Explicatio in prioribus Editionibus invenitur: nos addimus, & Lectorem ad *l. Furios. 40. ff. de R. l. supr.* quoad *explicationem* remittimus.

AD L. CXXV.

Gajus libr. 5. ad Edictum provinciale.

Favorabiliores rei potius, quam actores habentur.

EXPLICATIO.

Ratio legis hæc est, quod proniora sint jura ad absolvendum, quam ad condemnandum, satiusque sit impunitum manere facinus nocentis, quam innocentem condemnare, *l. Arrianus. 47. sup. de act. & obligat. l. absentem. 5. ff. de pænis.* Procedit autem regula, tam in civilibus quam in criminalibus causis. Unde decisum est, quod actore non probante, reus, etsi nihil præstiterit,

terit, nihil probaverit, sit absolvendus, *l. qui accusare, 4. C. de edendo*. Hinc & constitutum est, quod in criminalibus causis, nisi meridiana luce clariores probationes afferantur, reus sit liberandus, *l. fin. C. de probat.* Procedit autem hæc regula, in iis quæ spectant ad decisionem causæ; non autem in præparatoriis iudiciorum, puta satisfactione, libelli oblatione, in quibus magis favetur actori quam Reo. Unde initio litis Reus tenetur satisfacere iudicio sibi, & iudicatum solvi, non autem actor, *l. de die 8. ff. Qui satisfd. cog.* Item in libello ab actore proposito potius actori favetur quam Reo, *l. si quis intentione 66. ff. de iudic. l. inter stipulantem 83. §. si Stichum 7. ff. de V. O.* ubi dicitur, quod si actor perat in iudicio Stichum, & dubium sit, quis servus sit petitus, actori potius, quam Reo credendum est; quia Reus semper, ne condemnari posset, negaret se consensisse. Verum in medio causæ, ubi agitur de probationibus, & decisione litis, plus favetur Reo quam actori. Hinc actor tenetur Reo edere instrumenta pro exceptione sua probanda: è contra verò Reus non tenetur edere actori instrumenta pro intentione sua fundanda: nam actore non probante Reus absolvitur, *l. 1. l. non est novum §. C. de edend. Decius h.* Similiter

ter in probationibus dubiis, & testimoniis hinc inde paribus, favorabiliores sunt Rei, quam actores. Unde in causâ dubiâ, quando pares sunt probationes, Reo potius quàm actori defertur iuramentum, *l. admonendi* 31. ff. de jurejur. c. ult. extr. eo tit.

Limitatur notabiliter regula in causis favorabilibus, veluti si agatur de libertate, pro dote, pro matrimonio, & pro testamento. Tunc enim in dubio plus favoretur actori, quam reo, & favor causæ prævalet favori Rei, *l. in ambiguis* 85. ff. eod. *l. inter pares*, 38. ff. de re judicat. *l. si pars* 10. ff. de inoff. test. c. fin. de re jud.

AD L. CXXVI.

Ulpianus libr. 15. ad Edictum.

Nemo prado est, qui pretium numeravit.

EXPLICATIO.

PRado in jure dicitur is, qui rem aliquam vi aufert, nec ullam possessionis suæ justam causam assignare potest, qui interrogatus cur possideat, responsurus sit, quia possideo, *l. pro herede* 11. §. fin. & *l. sequ. de her. pet.* Et hic tenetur tam de fructibus perceptis, quam percipiendis, hoc est, qui nunquam percepti sunt, sed tamen percipi potuerunt, *l. domum*, §. C. de rei vendic. Qui autem

autem pretium pro re numeravit, prædo dici non potest, ideoque contra eum, ut titulo possidentem directa petitio hereditatis non dabitur, sed tantum utili actione convenietur tanquam universitatis emtor, *l. nec ullam* 13. §. *si quis sciens*, 8. *de pet. hered.* Est tamen prædo, qui rem sibi venditam, & non traditam, propria auctoritate occupat, *l. si ex stipulatione* 5. *ff. de acq. pos.*

Ad §. Locupletior.

Locupletior non est factus, qui libertum adquisierit.

EXPLICATIO.

Pertinet & hic §. ad materiam petitionis hereditatis. Certum enim est, in petitione hereditatis bonæ fidei possessores in id tantum teneri, quatenus locupletiores facti sunt, *l. sed etsi*, 25. §. *consultuit* 11. *ff. de pet. hered.* Proinde si servum hereditarium justâ ex causâ manumiserint, eo nomine petitione hereditatis non convenientur, quia locupletior non est factus, qui libertum acquisivit: quod tamen dubitationem recipit. Nam ob spem successionis, quam patronus liberto intestato decedente habet; item propter operas, quas libertus patrono præstare debet, videbatur factus esse locupletior; sed hereditas delata, etiamsi ad cundo acquiri possit, non tamen facit eum, cui

cui delata est, interim locupletiozem, *l. qui superstitis* 94. *de acquir. hered. l. spem*, 5. *C. Qua res pign. oblig. pos.*

§. fin.

Cum de lucro duorum queratur, melior est causa possidentis.

§. fin. explicatus est in *l. in eo* 33. *supr. h. t.*

AD L. CXXVII.

Paulus libr. 20. ad Edictum.

Cum prator in heredem dat actionem, quatenus ad eum pervenit, sufficit, si vel momento ad eum pervenit ex dolo defuncti.

EXPLICATIO.

Heres tenetur ex delicto defuncti tantum in id, quod ad eum pervenit: Quod ita declaratur hac regula, ut si vel momento temporis apud heredem permanferit, efficaciter conveniri possit: ut puta, defunctus à Sempronio furto vel rapina quædam abstulit, hoc nomine convenitur heres, qui excipit, se prima hora id, quod ad eum pervenerat, consumsiffe, & sic se locupletiozem factum non esse. Quæritur, an teneatur heres? Respondetur hic, heredem hac exceptione non adjuvari, & nihilominus eo nomine condemnandum, quia sufficit, si vel momento res apud eum permanferit, *tex. in l. Videamus* 17. *ff. Quod met.*

met. cau. ubi deciditur, quod in actione quod metus causa, heres ejus qui metuum intulit, tenetur, licet res metu ablata statim atque ad eum pervenit, extincta vel consumpta est: addita hac ratione, quia sufficit semel ad heredem pervenisse, licet in ejus persona acquisitum non duret, vel perseveret. Notandum porrò, quod hæc regula obtineat in delictis. In petitione verò hereditatis diversum obtinet: possessor enim hereditatis bonæ fidei tenetur, quod ad eum pervenit, restituere petitori; sed si rem hereditariam vel pretium ex venditione rerum hereditariarum redactum consumsit, vel perdidit, non tenetur: quia non sufficit semel pervenisse, sed necesse est ut duret, ut manserit apud eum pecunia, ut dicatur factus locupletior, *l. utrum 23. ff. de pet. her.* Hanc differentiam inter actiones ex delictis, & petitionem hereditatis, notavit diligenter Bulgarus hic.

AD L. CXXVIII.

Paulus libr. 19. ad Edictum.

In pari causa possessor potior haberi debet.

V. l. Cujus per errorem § 3. ff. supr. h. t.

EXPLICATIO.

Magnus est favor, summaque utilitas possessionis, ut merito gl. beatos possi-

possidentes appellarit, §. *Retinenda* 4. *vers. commodum. Inst. de interdict.* Quod & confirmat hic JC. dum vult in pari causa possessorem potio- rem habendū esse: veluti, duo rem eandem emerunt à non domino: is potior habetur, atque tuendus est, cui prius tradita est possessio: quod si à diversis non domi- nis emerunt; is tuendus est, qui in possessione deprehenditur, *l. siue autem* 9. §. *si duob.* 4. *de Publiciana.* Item si duobus eadem res pignori obligata est, & ignoratur cui prius obligata est, melior est conditio possidentis, *l. si debitor* 10. ff. *de pignor.* Qualiscun- que enim possessor, hoc ipso quod possidet, plus juris habet, quam qui non possidet, *l. 2. ff. uti possidet.* Quæ regula etiam in delictis procedit. Cum enim par est delictum duorum, melior est causa possessoris, *l. cum par* 154. *infr. eodem.* Veluti si mulie- ri quid sit datum, ut copiam sui corporis fa- ceret, cessat soluti repetitio. Quia ubi dan- tis & accipientis turpitudine versatur, melior est causa possidentis. *Illam enim quidem turpiter facit, quod sit meretrix, non tamen turpiter accipit, cum sit meretrix, l. 4. §. sed quod meretrici* 3. ff. *de condict. ob turp. causam.* Aliud exemplum depromitur ex *l. 3. ff. de condict. ob turp. caus.* ubi deciditur, quod pecunia data iudici, ut malè iudicet, repeti

266 IN TIT. DIG. DE REG. JUR.
ab eodem non potest: quod utriusque &
dantis & accipientis turpitudine hoc casu ver-
setur, ac potior sit is, qui eam pecuniam
accepit & habet seu possidet, quia in pari
delicto melior est conditio possidentis.

§. fin.

*Hi, qui in universum jus succedunt, heredis loco ha-
bentur.*

§. Hic explicatus est *in l. heredem* 59.

AD L. CXXIX.

Paulus libr. 21. ad Edictum.

Nihil dolo creditor facit, qui suum recipit.

Lex Nihil dolo, sup. in l. nullus videtur
55. declarata est.

§. Cum principalis.

Istum §. hic non explicabimus, quia inf.
repetitur *in l. cum principalis* 178. inf. eod.

AD L. CXXX.

Ulpianus libr. 18. ad Edictum.

*Nunquam actiones, praesertim poenales, de eadem re
concurrentes, alia aliam consumit.*

Lex nunquam, sup. in l. nemo 43. exposi-
ta est.

AD

AD L. CXXXI.

Paulus lib. 22. ad Edictum.

*Qui dolo defierit possidere, pro possidente damnatur:
quia pro possessione dolus est.*

*Agitur ic simul de l. parem 150. & l. ad ea 157.
§. f. infr. h. t.*

EXPLICATIO.

CUM nemo debeat ex delicto suo commodum sentire, rectè hic traditur, cum qui dolo malo rem alienavit, quo minus possideret, possessoris loco conveniendum esse. Exempli causa: Qui hereditatem possidet, pro herede aut possessore, petitione hereditatis convenitur: item qui rem nostram tenet aut possidet, rei vindicatione obstrictus est. Hæ actiones optima ratione in eum etiam competunt, qui dolo possidere desiit: Nam dolus rem ipsam repræsentat, *l. sed et si 25. §. 1. ff. de petit. hered. l. si autem 27. §. sed & is 3. ff. de rei vendic.* Intelligitur autem regula, quod is, qui dolo possidere desiit, pro possessore habeatur, quoad suum incommodum, non quantum ad commodum. Nec enim præscribere potest, aut alia possessionis commoda percipere, qui dolo possidere desiit, Ferrar. *hic Dynus in c. pro possessore. ex. de Reg. jur. in 6. num. 2.*

AD L. CXXXII.

Gajus lib. 7. ad Edictum provinciale.

Imperitia culpa adnumeratur.

Lex Imperitia explicata est supr. in l. culpa 36.

AD L. CXXXIII.

Gajus lib. 8. ad Edict. provinc.

Melior conditio nostra per servos fieri potest; deterior fieri non potest.

Nota. Textus hic in priorib. editionibus non habetur, adeoque non est, quod authoris explicationem hic moremur, quia more suo servorum materiam præterit.

AD L. CXXXIV.

Ulpianus lib. 21. ad Edictum.

Non fraudantur creditores, cum quid non acquiritur à debitoribus: sed cum quid de bonis diminuitur.

EXPLICATIO.

Pertinet hæc regula ad edictum, ut quæ in fraudem creditorum à debitoribus alienata sunt, revocentur. Qui itaque cum aliquid posset bonis suis adjicere, id non fecit, nihil videtur in fraudem creditorum commisisse, quia prætoris edictum pertinet ad eos, qui patrimonium suum deminunt, non ad eos, qui id agunt, ne locupletentur, l. 6. ff. *quæ in fraud. cred.* Proinde qui

qui legatum aut hereditatem sibi delatam repudiat, sive qui pecuniam, quam domi otiosam habebat, ad usuras non collocat, nec ad merces lucri faciendi causa adjicit, hoc edicto non tenentur.

§. Nemo.

Nemo ex suo delicto meliorem suam conditionem facere potest.

EXPLICATIO.

Plena æquitatis & justitiæ hæc est regula. Nam non est rationi consentaneum, ut quis ex eo præmium consequatur, quod pœnam meretur. Unde si vir pactus sit dotem sibi reddi post mortem uxoris, & eam occiderit, vel medicum nullum in morbo ejus adhibuit, aut eum qui imperitus est artis, ea fraude adhibuit, ut eò citius moreretur, non est marito dos reddenda. Nec enim æquum est, virum ob facinus suum dotem lucrifacere, *l. si ab hostib. 11. §. fin. ff. sol. matrim.* Sic socius definit esse socius propter delictum suum & dolosam renunciationem in lucris: in damnis vero in societate emergentibus manet socius, ne ex malignitate sua actionem sibi acquirat; *l. actione 65. §. diximus 3. ff. pro socio.* Similiter nemo contractum, transactionem, vel quodcunque pactum rescin-

270 IN TIT. DIG. DE REG. JUR.
dere potest, ex ea causa quod dolum ex sua
parte intervenisse dicat, quia dolus suus
nemini patrocinari debet, *l. transactio*
30. C. de transact.

AD L. CXXXV.

Ulpianus libr. 23. ad Edictum,
Ea qua dari impossibilia sunt, vel qua in rerum na-
tura non sunt, pro non adjectu habentur.

De hac L. dicam in *l. quod nullius* 182.
inf. eodem.

AD L. CXXXVI.

Paulus libr. 18. ad Edictum.

Bona fides tantundem possidenti prestat, quantum
veritas, quoties lex impedimento non est.

EXPLICATIO.

TRaſtat hæc regula de bonæ fidei pos-
ſeſſore, & oſtendit, quod loco do-
mini pene habeatur. Quantum enim jus
civile tribuit veritati, id eſt, domino, tan-
tum prætor tribuit bonæ fidei poſſeſſori.
Sic prætor eum qui rem bona fide à non
domino traditam accepit, & nondum uſu-
cepit, loco domini haber, data actione Pu-
bliciana, qua eam rem perſequitur, ac ſi do-
minus ejus factus eſſet, *toto tit. ff. de Publ.*
in rem

in rem act. Ex hac regula & illud rectè colligitur, quod bonæ fidei possessor tam fructus naturales, qui sola operante natura absque hominis factō proveniunt, ut sunt pomum, fœnum, silva cædua, quàm industriales lucratur, hoc est, qui culturam & curam hominis requirunt, ut sunt frumentum, vinum, oleum, &c. §. *si quis à non domin.* 35. *Inst. de rer. divis. l. qui scit.* 25. *vers. porro, ff. de usur. tex. fortissimus qui eludi nequit, in l. bonæ fidei* 48 *ff. de acqui. rerum domin.* Quod tamen ita distinguendum est, ut consumptos fructus ante litem contestatam bonæ fidei possessor lucretur: Extantes autem Judicis officio restituere cogatur, *l. certum, C. de rei vindic. 22. l. 4. §. 2. ff. Fin. reg.* Denique observa, quod bonæ fidei possessor non in omnibus loco domini habetur. Impedit enim Lex aliquando, ne gaudeat effectibus dominii, veluti cum Lex inhibet usucapionem propter vitium reale, ut sunt res furtivæ & vi occupatæ. Hæ enim res usucapione acquiri non possunt. Quia ut res aliqua usucapi possit, nullo vitio reali laborare debet. Quia itaque res furtivas vei vi possessas bonæ fide emit, nulla ratione eas usucapere potest, etiamsi longo tempore eas bonâ fide possedit, §. *furtiva*, 2. *Inst. de usucap.*

AD L. CXXXVII.

Ulpianus libr. 25. ad Edictum.

*Qui auctore iudice comparavit, bona fidei possessor est.**De hac L. dicam commodius in L. non videntur, i67. §. qui jussu fin. inf. eod.*

AD L. CXXXVIII.

Paulus libr. 27. ad Edictum.

*Omnis hereditas, quamvis postea adeatur, tamen cum tempore mortis continuatur.**Dixi de hac l. quædam ad l. actus legitimi. sup. eo. Et plura dicam ad l. omnia fere 193. infr. eod.*

Ad §. Nunquam crescit. 1.

Nunquam crescit ex postfacto præteriti delicti æstimatio.

EXPLICATIO.

Delictum ante perpetratum non debet ex postfacto augeri, ut crescere possit ejus æstimatio aut pœna. Exempli gratia si quis non lethaliter sit vulneratus, & tamen postea ex negligentia chirurgi vel sua ipsius incuria, vel propter malum regimen mortuus sit, vulnerans non de occiso, sed de vulnerato tantum tenebitur.

Nam

Nam delicti commissi æstimatio propter negligentiam post adhibitam crescere non debet, *l. qui occidit 30. §. fin. ff. l. Aquil.* Illud hic notandum, quod si delictum sæpius iteretur, aggravari pœnam delicti. Nam crescentibus delictis exasperandæ sunt pœnæ, *l. aut facta 16. §. ult. l. capitalium 28. §. solent 3. ff. de pœnis.* Unde fur qui propter unicum rei modicæ furtum laqueo suspendi nequit, si tamen assidua contrectatione & frequenter iterando famosus fur sit effectus, jam ultimo supplicio afficiendus est; *Tractant Dd. in authent. sed novo jure. C. de servis fugit.*

L. CXXXIX.

Gajus lib. ad Edictum Prætoris Urbani.

Omnes actiones, quæ morte aut tempore pereunt, semel inclusa judicio, salva permanent.

Legis omnes actiones initium exposui in *l. sicuti, 38. sup. h. t. V.*

Ad §. Non videtur. 1.

Non videtur perfecte cujusque id esse, quod ex casu auferri potest.

EXPLICATIO.

REs illa in bonis nostris esse non dicitur, quæ nobis invitis ex causa auferri potest. Hinc est, quod heres rem sub conditione

ditione alicui legatam neque alienare, neque pignori obligare possit, quia ex conditionis eventu res ab eo auferri potest, *l. fin. §. sed quia 2. C. communia de leg.* Huc etiam referri potest emptio, quæ facta est cum pacto de retrovendendo. Ea enim res perfectè emptoris esse non videtur, quia ex casu redditu pretii, auferri non minus, quam pignus potest, *l. 2. C. de pact. inter empt. & vend.*

L. CXL.

Ulpianus lib. 56. ad Edictum.

Absentia ejus, qui Reipublica causa abest, neque ei, neque alii damnosa esse debet.

E X P L I C A T I O.

ABsentes Reipub. causa sunt, qui publica legatione funguntur, *l. legatis 8. ff. ex quibus causis majores, &c.* Item qui in expeditione militari sunt occupati, *l. 1. & tot. tit. C. de restit. milit.* Hi, quoniam pro utilitate publicâ laborant, ita adjuvantur à Prætorè, ut si interim, dum fungerentur hisce muneribus, læsi sint, si res eorum usufructu sit, aut quid de bonis eorum diminutum sit, restituantur in integrum. Item si qua actio eo tempore competebar, quo Reip. causa aberant, ea non privantur, *§. rursus 5. Instit. de act. l. si qua 40. sup. ex quibus*

bus causis majores &c. E diverso, si absens Reip. causa, rem ejus, qui in civitate est, suscepit, succurrit etiam prætor illi contra absentem. Nec enim officium publicum sibi compendio aut aliis damno esse debet, *l. videlicet 29. ff. eod.*

A D L. CXLI.

Paulus lib. 54. ad Edictum.

Quod contra rationem juris receptum est, non est producendum ad consequentia.

Satisfit hic *l. quæ propter. 162. infr. h. t.*

E X P L I C A T I O.

Quoties propter certam aliquam rationem à jure communi receditur, illud non debet produci ad consequentia, hoc est, ad similia extendi, *l. quod vero contra 14. sup. de ll.* Ubi hæc regula iisdem omnino verbis posita est. Sic privilegia, quæ propter certæ personæ rationem specialiter alicui conceduntur, non debent aliis extraneis impertiri, quorum in tenore privilegii non sit mentio, *§. sed & quod Principi 6. Inst. de jur. natur. gent. & civil.* Eadem ratione quod utilitatis causa jure singulari receptum est, non debet trahi ad consequentiam. Sic ex peculii causa ignorantibus dominis per servum quaeritur possessio, ne cogantur domini per singula momenta species & causas possessionis inquirere, *l.*

peregre 44. §. quasitum 1. ff. de acq. possess. non tamen hic produci ad consequentia debet, ut in aliis quam peculiaribus causis animo servi possessionem acquiramus ignorantes, *l. 2. §. Celsus 11. pro empt.* Eadem ratione cum hoc contra rationem juris receptum sit, ut quod servi ignorantibus dominis in rebus peculiaribus possident, per hos domini etiam ignorantes possideant & usucapiant, non debet per consequentiam produci ad procuratores nostros: Quamvis enim per ipsos non minus quam servos aut filiosfam. ignorantes possessionem acquiramus, tamen non aliter acquiritur nobis ex procuratoris possessione usucapio, nisi scientibus nobis quod procuratores nomine nostro possederunt, *l. 1. C. de acqu. possess. l. possessio 49. §. ult. ff. de acq. poss. l. si emptam 47. ff. de usucap.* Cujac. lib. 24. obser. c. 9.

Ad §. fin.

Vni duo pro solido heredes esse non possunt.

EXPLICATIO.

DUO unam & eandem rem in solidum possidere non possunt. Neque enim fieri potest, ut quod ego teneo, tu quoque id videaris tenere, non magis, quam ut tu videaris stare eodem loco in quo ego sto, *l. 3. §. ex contrario. de acqu. possess.* Eadem ratione

tione nec uni plures heredes singuli in solidum existunt. Nam heres pro domino habetur. Constat autem, plures ejusdem rei in solidum dominos non esse, *l. si ut certo §. §. ff. commodati*. Unde si plures heredes sint instituti, non in solidum singuli succedunt, sed in partes, quas nominavit testator, aut si partes non expressit, ex æquis partibus heredes fiunt, *§. si plures, 6. Inst. de hered. instit.*

AD L. CXLII.

Paulus lib. 56. ad Edictum.

Qui tacet, non utique fatetur, sed tamen verum est, cum non negare.

EXPLICATIO.

TAcere medium est inter Fateri & Negare. Quando verò tacens videatur confiteri vel negare, tali distinctione solet explicari: Si factum tale sit, quod possit à tacente contradicendo impediri, tacens consentire videtur, *l. sape 63. vers. scientib. ff. de re judic.* Unde si fidejussor tutoris patiat nomen suum in actis scribi, neque contradicat, habetur pro consentiente, quia potuit contradicendo fidejussionem evitare, *l. 4. §. ult. ff. fidejuss. tutor.* Similiter, qui se præsentem patitur rem suam pignori obli-

obligari, & non contradicit, consentire videtur, *l. fidejussor 16. ff. de fidejuss.* Si autem talis sit actus, qui possit etiam tacente invito expediri, taciturnitas pro consensu non habetur, *l. Cajus, 39. de pignor. act.* ubi dicitur, quod ille qui tanquam testis subscribit instrumento, in quo alius se emisse rem subscribentis dicit, hæc subscriptio ei non nocet, quia res aliena etiam invito domino vendi potest, *l. rem alienam 28. ff. de contr. empt.* Taciturnitas etiam testatur consensum, quoties actus alicujus favorem respicit. Quæ latius examinat Dyn. in *cap. qui tacet. ext. eo.* Huc referri potest, quod qui recipit literas in præjudicium suum scriptas, puta si dicebatur in literis, quod is ad quem mittuntur literæ erat debitor mittentis, si is non in continenti protestatur in contrarium, videtur consentire omnibus, quæ in literis sunt comprehensa, *l. si filiusfamil. 16. ad SC. Maced.* Observandum & illud est in casu matrimonii, si quis virgini det anulum matrimonii, vel aliud quid arrhæ loco, licet taceat sponsa, tamen taciturnitas illa consensum matrimonii operatur, *c. honorantur 32. qu. 2. c. tua fraternitati, ext. de sponsa.* Notanda denique est in hac quæstione, *Antacens habeatur pro consentiente*, hæc communis & recepta

cepta D. D. *distinctio*. Aut actus tendit ad utilitatem tacentis, & tunc tacens censetur consentire, *l. 2. §. voluntatem 2. ff. Solut. matr.* Aut actus tendit in damnum & præjudicium tacentis, & tunc tacens non habetur pro consentiente, *l. invitum 5. ff. de serv. urb. præd. nisi favore Reip. l. 1. & ibi Bart. C. de decur. lib. 10. Costal. ad l. filiusfam. 16. ff. ad SC. Macedq.* Illud postremò benè notandum, quod si quis præsens fuit, & tacuit, quando res sua furto auferebatur, non censetur consensisse, sed competit illi actio furti, perinde atque si eo invito res fuisset contrectata, *tex. in l. pen. ff. de furt.* Cujus decisionis hæc est ratio, quod odio furum hoc est specialiter receptum, qui quod tacuit dominus, objicere, & sic propriam turpitudinem allegare non debuerunt. Ita eleganter tradit *Peck. ad c. qui tacet. num. 4. ext. de R. l. in 6.*

AD L. CXLIII.

Ulpianus libr. 60, ad Edictum.

Quod ipsis, qui contraxerunt, obstat, & successoribus eorum obstat.

EXPLICATIO.

Geneiale hoc est axioma, quod nemo melioris conditionis esse debeat, quam author suus à quo jus suum habet.
Ex

Ex quo recte infertur, *quod ipsis, qui contraxerunt, obstat, & successoribus eorum ob stare.* Unde si dolo vel metu quis contraxerit, hæc exceptio obstat quoque ei, qui causam habet à contrahente, & in vitium ejus succedit, *l. apud Celsum 4. §. de auctoris 27. de doli except.* Item si quis fundum per sententiam obtinuerit, quemadmodum victum iterum agentem repellit exceptione rei judicatæ: ita quoque repellit eum, qui à victo causam habet, *l. si mater 11. §. idem Iulian. 3 ff. de except. rei judic.* Proccedit etiam regula in iis, qui ex testamento vel legato causam habent à defuncto. Unde si defunctus dolo malo rem legatam consecutus est, ea exceptio obstat quoque heredi & legatario, *l. si rem legatam 6. sup. de exception.*

AD L. CXLIV.

Paulus libr. 62. ad Edictum.

Non omne quod licet, honestum est.

Interpretatur hic etiam *l. semper 197. infr. b. t.*

EXPLICATIO.

E Leganter Bart. scribit in *l. pecunia 8. de alimen. legat. non modo obligationem, verum etiam verecundiam nos obligare.* Unde etiam constat, in contrahendis matrimoniis pudorem & verecundiam inspicendam esse, *l. adoptivus 14. §. 1. sup. de rit.*

rit. nupt. Quo pertinent illæ duæ regulæ, quarum prior hæc est : *Non omne quod licet, honestum est.* Altera est in *l. semper.* inf. eod. *Semper in conjunctionibus, non solum quod liceat considerandum est, sed & quod honestum est.* Exempli gratia: Si uxor tua post divortium ex alio filiam procreaverit, hæc non est quidem privigna tua, sed Julianus ab hujusmodi nuptiis abstinere debere ait, ob publicam honestatem, §. *si uxor 9. Inst. de Nupt.* Ex qua ratione nec vulgo quæsitam filiam pater naturalis potest uxorem ducere, *d. l. adoptivus.* Neque filius concubinam sui patris; in uxorem ducere potest, *l. 4. C. de nupt.* adeo ut si quis contra faciat, poena stupri plectatur, *d. l. 4.*

§. fin.

In stipulationibus id tempus spectatur, quo contrahimus.

§. *In stipulationib. explicatus sup. in l. qua legata 18.*

AD

AD L. CXLV.

Ulpianus lib. 66. ad Edictum.

Nemo videtur fraudare eos qui sciunt, & consentiunt.

Repete quæ dixit author ad l. Generaliter 78. supr.
h. t.

EXPLICATIO.

Scienti & consentienti non fit injuria, neque dolus, *c. scienti, extr. eod.* Unde si emptori tempore venditionis constabat, rem esse vitiosam, quam emebat, non videtur fraudem esse. Proinde nec actione ex empto contra venditorem poterit experiri, quia qui certus est, non debet amplius certiorari, *l. 1. in fi. de act. empt.* Sic mulier, quæ de consensu liberorum convolat ad secunda vota, non incurrit poenas, quæ favore liberorum secundo nubentibus imponuntur, quia illis volentibus non fit injuria, *Decius hic nu. 5. Coras. lib. 3. miscell. cap. 1.* Videtur tamen & consentienti fieri injuria. Nam si quis virginem etiam volentem rapit & abducit, poena capitis plectitur, *l. 1. §. poenas, C. de rapto virgin.* Sed dicendum, quod hoc faciat dolosa persuasio abducantis. Præsumitur enim consensus virginis blanditiis & illecebris raptoris esse extortus, & dolosè persuadere plus est, quam violenter compellere, *l. 1. §. persuadere 3. ff. de*

de servo corrupt. Jure tamen Pontificio (cui hac in re stamus) rapi non intelligitur, quæ volens sequitur procum, etiamsi invitis parentibus puella sit abducta, *cap. pen. & ult. ext. de raptor.*

AD L. CXLVI.

Paulus libr. 62. ad Edictum.

Quod quis, dum servus est, egit, proficere libero factum non potest.

Legem quod quis 146. præterimus, quia servorum jus & usus apud authorem non tractatur.

L. CXLVII.

Gajus lib. 24. ad Edictum provinciale.

Semper specialia generalibus insunt.

Lex *Semper specialia, sup. in l. in toto 80.* explicata est.

AD L. CXLVIII.

Paulus libr. 16. brevis Edicti.

Cujus effectus omnibus prodest, ejus & partes ad omnes pertinent.

EXPLICATIO.

Juris effectus est omnibus communis, itaque etiam juris partes ad omnes pertinent. Quisque enim degere vult sub tutela juris,

juris, ex hoc sibi auxilium petit. Unde est, quod pro conservando suo jure, acquirendo vel alienando, alius utatur Imperatoria constitutione, alius lege, alius SCto, alius denique edicto prætoris, *l. jura 8. ff. de ll.* Recitat & accommodatum exemplum Petrus Faber hic: Creditore uno in possessionem misso, rei servandæ causa, vel possidere jussu, hujus rei effectus prodest omnibus creditoribus. Possidere enim videtur non sibi, sed omnibus creditoribus, *l. cum unus 13. sup. de reb. autor. judic. &c.* Ideoque & partes istius possessionis ad omnes pertinent. Nam & fructus, qui ex ea re percepti sunt, communicabuntur reliquis creditoribus, & impensæ omnes similiter ad creditores omnes pertinent, quia commune negotium gessit, *l. prætor ait 9 §. his verbis 3. l. creditore 14. §. 1. ff. d. t.*

AD L. CXLIX.

Ulpianus libr. 67. ad Edictum.

Ex qua persona quis lucrum capit, ejus factum præstare debet.

EXPLICATIO.

Regula hæc locum habet non solum in universalibus, verum etiam in singularibus successoribus: & hoc paucis explicat, quod qui lucrum ex persona sui authoris

thoris affectat, etiam incommodum sentiat. Quare filius, aut etiam quilibet alius extraneus heres non potest venire contra factum testatoris. Si itaque mater rem filii vendidit, filius non potest rem venditam vindicare aut evincere, si matris hereditatem obtinet, *l. cum à matre* 14. *C. de rei vendic.* Item si pater filium tabernæ, vel negotiationi præfecit, convenitur de pecunia mutuo filio data, actione institoria, ut puta ex cuius persona lucrum quoque exspectat, *l. 1. & l. in eum* 19. *ff. de instit. act.* Ad hanc regulam pertinet, *l. Pomponius* 13. *ff. de acq. poss.* ubi dicitur, quod si quis velit uti adminiculo & accessione possessionis ex persona sui authoris, cum sua causa & suis vitiis uti debebit. Limitatur hæc regula in donatariis. Nam donatarius non tenetur propter æs alienum donatoris, quia non est universalis successor donatoris, *l. æris alieni* 15. *C. de dona.* Secundo heres qui succedit defuncto, facto inventario, non tenetur præstare factum defuncti, neque tenetur ad debita defuncti exsolvenda ultra vires hereditatis, *l. ult. §. etsi præfatam* 4. *C. de jur. delib.* Dec. *h. nu. 2.* Illud singulariter notandum, quod aliud obtinet in renuntiatione hereditatis, quæ à matre facta nepotibus non nocet in bonis avi, si mater ante filiam vivo

286 IN TIT. DIG. DE REG. JUR.
vivo adhuc avo moriatur : secus si post ; nam
filii seu nepotes non petunt , quod ad ma-
trem pertinuit , jure hereditario , sed ve-
niunt jure proprio , cui renunciatum non
fuit ; ergo filii non sunt obligati hoc pacto
matris renunciantis , arg. l. si ex patronis 10.
§. in fin. ff. de bon. libertat.

AD L. C L.

Ulpianus libr. 68. ad Edictum.

*Parem esse conditionem oportet ejus , qui quid possi-
deat vel habeat : atque ejus , cujus dolo malo fa-
ctum sit , quo minus possideret vel haberet.*

Lex , *Parem* , explicata sup. in l. qui dolo
131.

L. CL1.

Paulus libr. 64. ad Edictum.

*Nemo damnum facit , nisi qui id fecit , quod facere
jus non habet.*

Lex *nemo* , sup. l. nullus videtur 55. expo-
sita est.

AD L. CLII.

Ulpianus libr. 69. ad Edictum.

Hoc jure utimur, ut quicquid omnino per vim fiat, aut in vi publica, aut in vi privata crimen incidat.

EXPLICATIO.

Vis duplex est, publica aut privata. Ergo qui vim fecit, in vi publica vel privata poenam incidit, *tex. hic.* Vis publica est, quæ armis infertur; videlicet si villa, navis, aut domus alicujus oppugnetur, si turbæ seditionisve faciendæ causa, homines quis in armis habeat, si quis dolo malo hominem concludat, obsideat, & diripiat, *tot. tit. ff. & Cod. ad leg. Juliam de vi public.* Hujus vis publicæ poena est deportatio, §. *item lex Julia 8. Instit. de public. jud.* In cujus locum hodie moribus successit bannum Imperiale, cujus poena est publicatio omnium bonorum cum libertate omnibus permessa violandi personam, corpus & bona banniti. Vulgò, *Sein Leib und Gut ist den Vögeln in der Luft frey / Sich. in l. 3. C. de pig. Mynsing. ad d. §. item lex Julia.* Privata vis est, quæ sine armis committitur; veluti si quis convocatis hominibus alium sine armis de fundo suo dejecit, pulsavit aut verberavit, *l. 5. ff. ad l. Jul. de vi priv.*

priv. Item qui res debitoris sine Judicis auctoritate occupavit, *l. 1. & 2. ff. ad l. lul. de vi privata.* Hujus poena est publicatio tertiae partis bonorum, una cum irrogatione infamiae, *l. ult. ff. Ad l. lul. de vi priv.* Sensus hujus legis hic esse videtur, eum qui vim fecit, non solum criminaliter ex lege Julia de vi publica & privata, sed etiam civiliter per interdictum *unde vi & de vi armata* conveniri posse, *l. si praeses 82. sup. de poenis. l. si de possessione 4. C. unde vi.*

§. De jicit 1.

De jicit, qui vel jussit, vel mandavit, vel ratum habuit. Rati enim habitio mandato comparatur.

Hic §. explicatus *sup. in l. semper 60.*

§. fin.

In contractibus quibus doli praestatio vel bona fides inest, heres in solidum tenetur.

§. ult. explicatus est cum *l. sicuti 38. supr. h. t.*

L. CLIII.

Paulus libr. 65. ad Edictum.

Fere quibuscunque modis obligamus, iisdem in contrarium actis liberamur: cum quibus modis acquirimus, iisdem in contrarium actus amittimus. Ut igitur nulla possessio adquiri, nisi animo & corpore potest: Ita nulla amittitur, nisi in qua utrumque in contrarium actum.

De hac lege 153. dixi ad *l. Nihil tam naturale 35.*

L. CLIV.

L. CLIV.

Ulpianus libr. 60. ad Edictum.

Cum par delictum est duorum, semper oneratur petitor, & melior habetur possessoris causa, sicut fit cum de dolo excipitur petitoris: neque enim datur talis replicatio petitori, AUT SI REI QUOQUE IN EA RE DOLO ACTUM SIT.

Initium hujus legis exposui ad l. in pari
128. etiam explicavit author in l. 33. sup. h. t.

Ad §. fin.

Illi debet permitti pœnam petere, qui in ipsam non incidit.

EXPLICATIO.

Qui ipse pœnæ est obnoxius, non potest alium ad pœnæ solutionem compellere. Unde si quis rem aliquam furto subtrahit, cujus possessione deinde cadat, fur actionem furti non habebit, sed dominus, cui furtum factum est, furti actionem intentabit, l. qui re 67. §. 1. ff. de furt. ubi dicitur, quod nulli datur actio furti, nisi ei, cujus ex honestâ causâ interest. Aliud exemplum finge; Convenit inter locatorem domus & inquilinum, ut si locator expulserit inquilinum intra quadriennium, pœnæ nomine 10. persolvat. Conductor non solvit annuam pensionem pro conductione debitam, quæritur, an sine metu pœnæ expelli

N

pelli

PELLI POSSIT? Respondetur, licite id fieri posse, neque conductorem pœnæ nomine aliquid exigere posse, quia & ille in pœnam incidit, quod pensionibus pro locatione domus promissis non satisfecit, *l. quaro* 54. §. *inter locatorem* 1. ff. *locati*. Eandem ob causam periniquum quoque videtur esse, ut maritus pudicitiam ab uxore exigat, quam ipse non exhibet, ut refert Ulpianus *in l. si uxor* 13. §. *judex* 5. *supra ad L. lul. de adult.*

AD L. CLV.

Paulus lib. 65. ad Edictum.

Factum cuique suum, non adversario nocere debet.

Legis *factum*, principium conjungi debet cum *l. non debet* 74. *supra h. t.*

§. Non videtur 1.

Non videtur vim facere, qui jure suo utitur, & ordinariâ actione experitur.

Hic §. explicatus est *supr. in l. nullus videtur* 55.

§. fin.

In pœnalibus causis benignius interpretandum est.

De hujus §. sententia dixi ad *l. semper in dubio* 56. V. etiam quæ notavit author ad *l. 9. & l. 21. supr. h. t.*

AD

AD L. CLVI.

Ulpian. lib. 70. ad Edictum.

Invitus nemo rem cogitur defendere.

EXPLICATIO.

EXemplum ponitur in procuratore. Nam invitus nemo potest constitui procurator, *l. filiusfam. 8. §. Invitus 1. ff. de procur.* Semel autem susceptum munus adimplere cogitur, nisi justam & probatam à lege causam habeat renunciandi officio procuratoris, semel suscepto. Quod & ad defensorem extenditur, qui sine mandato alterius causam defendit, qui & invitus defensionem absentis suscipere non compellitur, *l. invitus 17. C. de proc.* Tradit eleganter Decius hic, quod omnes illi, qui autoritate publica exercent officia, cogi possint ut operam suam inviti hominibus impendant. Sic Doctor ad consilium dandum; Advocatus ad postulandum potest compelli, *l. 7. C. de postul.* Similiter Notarius ad conscribendum instrumentum cogi potest; Syndicus ut res collegii vel universitatis defendat & exequatur; Caupo vel tabernarius cogi potest, ut aliquem suscipiat hospitio, *l. 1. §. ult. ff. Furt. adv. nau. caup. stapul.* ubi dicitur, *quod caupo vel stabularius repellere non potest inter agentes, quo minus eos hospitio excipiat.*

Ad §. Cui damus I.

Cui damus actiones, eidem & exceptionem competere multo magis qui dixerit.

EXPLICATIO.

Concordat regula Canonica, *Qui ad agendum admittitur, ad excipiendum multo magis admittendus est.* Ratio regulæ est, quod favorabiliores sint rei, quibus competunt exceptiones, quam actores. Cui hoc accedit, quod in exceptione agitur de retentione, quæ facilius conceditur, quam petitio vel actio, *l. per retentionem 4. C. de usuris.* ut puta qui 30. vel 40. annis in possessione alicujus rei vel juris fuit, & cadat postea possessione sua, si malam fidem ab initio habuit, non habet actionem ad jus suum persequendum, sed tantum datur illi retinendi exceptio, si forte iterum possessionem recuperet, *l. si quis emtionis 8. C. de præsc. 30. annorum.* Fallit singulariter regula, si actionis & exceptionis diversa sit ratio. Unde fit, quod spoliato, agenti interdicto recuperandæ possessionis, non possit à Reo objici exceptio dominii, quippe spoliatus ante omnia restituendus est, *l. si quis ad se fundum 7. C. ad l. Iuliam, de vi publica.* etiamsi prædo sit, *l. Prator 1. §. qui à me 30. ff. de vi & vi arm. l. si coloni 14. C. de agric. & cens.*

¶ cens. lib. xi. Quemadmodum nec conductor alicujus fundi, exceptionem proprietatis locatori objicere potest, sed in continenti locatori possessionem restituere cogitur, & tunc de proprietate litigare debet, *l. si quis conductionis 15. C. locat.*

§. Cum quis. 2.

Cum quis in alicujus locum successerit, non est aequum ei nocere hoc, quod adversus eum non nocuit, in cuius locum successit.

§. 3. Plerumque Emptoris eadem causa esse debet, circa petendum ac defendendum, qua fuit auctori.

§ Cum quis, cum §. seqq. explicatus est sup. in *l. heredem 59.* Vide etiam quæ dixi ad *l. quod ipsis 143.*

§. 4. Quod cuique (pro eo) praestatur, invito non tribuitur.

§. Finalis explicatus est sup. ad *l. invito 69.*

AD L. CLVII.

Idem lib. 71. ad Edictum.

Ad ea quæ non habent atrocitatem facinoris vel sceleris, ignoscitur servus, si vel dominus, vel his qui vice dominorum sunt, veluti vel curatoribus vel tutoribus obtemperaverunt.

EXPLICATIO.

RECTÈ JC. Alphenus notat in *l. servus 20. de obl & act.* Servum non in omnibus rebus domini dicto audientem esse debere. Nam regula juris vult, quod in atrocioribus delictis iussus dominorum eos, qui in

potestate sunt, non excuset: in levioribus autem criminibus servo vel filiofam. propter necessitatem obtemperandi ignoscitur. Ideoque si filius vel servus, jussu patris vel domini, damnum injuriâ dederint, actio legis Aquiliæ datur in eum qui jussit, non qui patris vel domini imperio obtemperavit, *l. liber homo 37. ff. Ad l. Aquil.* Eadem quæ hic dicuntur de servis, & de aliis hominibus, qui alterius potestati & juri subiecti sunt, extendit hic Decius, seu ad alios liberos homines, quibus loco servorum utimur, quales sunt famulus, filiusfam. mercenarius, uxor, & aliæ personæ domesticæ, quibus imperandi jus habemus; ut in levioribus delictis si obtemperantes mandatis dominorum delinquant, excusentur; in atrocioribus verò criminibus ipsi ex dominorum jussu delinquentes, meritis pœnas luant, *d. l. servus l. liber homo 37. ff. Ad l. Aquil. l. servos 8. C. Ad l. lul. de vi pub.* ubi servus qui domino opem præstitit in violentiâ publicâ committendâ, in metallum damnatur. Sane procurator non excusatur, si quid jussu domini deliquerit, sed conveniri potest, præsertim in atrocioribus criminibus, si quem occiderit, sive de possessione vi detruserit, *l. 1. §. quoties 13. de vi & vi armata.*

Notandum autem hic, quod licet servus
in

in facinoribus domini dicto audiens esse non debeat; *l. si mulier 21. §. 1. ff. rerum amot.* solet tamen mitius puniri, si domini jussu, quam si ignorante domino facinus proprio motu & instinctu commisisset, *d. l. servos 8. C. ad l. lul. de vi publ.* Vide plenius & exactius de hac quæstione, quatenus personæ alienæ potestati subjectæ teneantur, si ex mandato dominorum delinquant, Gomez. *tomo 3. var. resolut. cap. 3. num. 42.* Menoch. *de arbitr. iud. quæst. lib. 2. cent. 4. casu 354.*

§. Semper 1.

Semper qui dolo fecit, quod minus haberet, pro eo habendus est ac si haberet.

§. Semper, *sup. in l. qui dolo 131.* declaratus est.

§. fin.

In contractib. successores & dolo eorum (quibus) successerunt, non tantum in id, quod pervenit, verum etiam in solidum tenentur: hoc est unusquisque pro eâ parte, quâ heres est.

Hunc §. exposui cum *l. toties 44.*

L. CLVIII.

Cajus lib. 26. ad Edictum provinciale.

Creditor qui permittit rem venire, pignus amittit.

EXPLICATIO.

Jus pignoris semel constitutum, non potest citra consensum creditoris alienari, *l. pen. C. de remiss. pign.* Si itaque creditor

alienationi pignoris consentiat, jam pignoris obligatio sicut nudo consensu contrahitur, ita & dissolvitur. Venditionis autem appellatio generaliter hic accipienda est, ut & si legare, permutare, in dotem dare, donare creditor debitori permittat, pignus liberatum dicatur, *l. 4. §. 1. ff. quib. modis pig. solv.* Regula autem intelligi debet, si creditor expressè in alienatione consentiat, sin autem alienante debitore taceat, & non contradicat, nihil sibi præjudicat alienatio, quia scit ubique pignus sibi durare, *l. sicut 8. §. non videtur 15. d. tit.* Illud hic obiter notandum, quod creditor expressè permittens vendi pignus, licet remittat pignus, non tamen debitum principale remisisse censeatur. Qui autem debitori suo chirographum reddidit, debitum remittit, *l. 2. & 3. ff. de pac.* Ratio diversitatis est, quod in syngrapha reddita nulla sit utilitas, nisi remissio debiti. Pignoris autem redditi magnus potest esse usus, scil. quia vendi potest & alteri repignorari.

AD L. CLIX.

Paulus libr. 70. ad Edictum.

Non ut ex pluribus causis deberi nobis idem potest, ita ex pluribus causis idem possit nostrum esse.

EXPLICATIO.

DUO ex hâc regulâ notantur. Primo, quod ex diversis causis seu obligationibus res eadem nobis deberi potest, *l. non est novum* 10. ff. de act. empt. Unde cui fundus legatus est, si fundum emat vivo testatore, ab herede nihilominus æstimationem consequi potest, §. *si res aliena* 6. Inst. de legat. Item qui egit actione personali ad decem, si illo iudicio succumbat, licebit illi novo iudicio ex alia causa, eadem decem repetere. Quia singulas obligationes singulæ causæ, id est, petitiones sequuntur, *l. an eadem* 14. §. *actiones* 2. de except. rei iudic.

- Secundò nota, quod ex pluribus causis res nostra fieri non potest. Ratio diversitatis est, quod dominium, semel acquisitum, perfectum est, cuius perfectioni nihil potest accedere: & quod semel meum est, amplius meum fieri non potest, §. *sed si rem* 5. Inst. de leg. Et ideo semel rem nostram factam acquirere non possumus, nec stipulatione, nec legato, nec emptione, nec ullis aliis titulis, vel modis, *l. nemo rem suam*

AD L. CLX.

Ulpianus libr. 76. ad Edictum.

Aliud est vendere, aliud est vendenti consentire.

EXPLICATIO.

TAmetsi alienare, & alienationi consentire æqualia sint, quoties eadem subest ratio, adeo ut qui alienare possit, alienationi quoque possit consentire; & contra qui alienare prohibitus est, alienationi quoque consentire prohibeatur, *l. cum quis possit* 165. *infr. h.t.* tamen ubi diversa subest ratio, aliud est alienare, aliud consentire alienationi, *tex. hic.* Exempli gratia: Venditor tenetur de evictione, licet de eo nihil sit conventum; si tamen alio vendente extraneus consensit venditioni, hic non tenetur de evictione, nisi pretium recipiat, *l. quidam* 12. ff. de evict. Qui enim pretium rei suæ accipit, eam vendidisse præsumitur, & proinde de evictione tenetur. Unde inferunt Dd. quod licet venditor deceptus ultra dimidium justii pretii restituto pretio rem venditam recuperare possit, non tamen is, qui venditioni consensit, *Bart. ad l. 2. C. de rescind. vend.* At e contra, ubi eadem ratio est alienationis & consensus, qui prohibetur

hibetur alienare, prohiberi etiam alienationi consentire. Unde quemadmodum minor 25. annis sine decreto magistratus prædia sua non potest vendere, ita nec vendenti consentire, *l. 2. C. si advers. donat.* Et ita hæ duæ regulæ aliquo modo discordantes conciliantur.

Ad §. refertur 1.

Refertur ad universos, quod publicè fit per maiorem partem.

EXPLICATIO.

CUm naturalis sit, ad dissentiendum, hominum facilitas, & ideò difficilior universitatis negotia expedirentur, si omnium consensus desideraretur, rectè hic decisum est, quod à majori universitatis parte statutum est, ab omnibus censi statutum. Concordat, *l. quod major 19. ff. ad Municipalem.* Quod tamen ut procedat, requiritur, ut omnes qui sunt de collegio vel universitate citentur. Est enim regulare, quod ad omnes actus ii necessario vocari debeant, de quorum agitur præjudicio. Aliter enim quod actum est, ratum non habetur, *l. de unoquoque 47. ff. de re judic.* Quod si ergo non omnes citati veniant, tunc inspiciendum est id, quod à majori parte gestum est. Facit huc quod traditur in

l. 7. §. ult. ff. de pact. ubi statuitur, quod si heres debitoris alicujus obærat non vult adire hereditatem, nisi creditores remittant sibi certam partem debiti, tunc si major pars creditorum remittat aliquam debiti partem, coguntur & cæteri creditores ejusmodi pacto stare, & contenti esse eâ summâ, quam major pars creditorum statuit esse remittendam. Limitatur autem regula in his, quæ communia sunt pluribus ut universis, secus si intersit singulorum. Nam tunc quod omnes tangit, debet ab omnibus approbari, *c. quod omnes ex eodem*. Sic per fundum, qui plurium est, jus eundi, agendi concedi non potest, nisi omnes consentiant, quorum est fundus, *l. per fundum 11. ff. de servit. rustic. prad.* Quod adeò verum est, ut, etsi centum domini essent unius fundi, & omnes, excepto uno, servitutem alicui cesserint, nihil adhuc sit actum: penderque omnis cellio prima, donec sequatur ultima, *l. ult. ff. Com. pred.*

Ad §. Absurdum 2.

Absurdum est plus juri habere eum, cui legatus sit fundus, quam heredem, aut ipsum testatorem si viveret.

§. fin explicatus sup. in *l. nemo plus juris* 54.

AD

AD L. CLXI.

Ulpianus libr. 77. ad Edictum.

In jure civili receptum est, quoties per eum, cujus interest conditionem non impleri, fiat, quo minus impleatur: perinde haberi ac si impleta conditio fuisset. Quod ad libertatem & legata & ad heredum institutiones perducitur. Quibus exemplis stipulationes quoque committuntur, cum per promissorem factum esset, quo minus stipulator conditioni pareat.

EXPLICATIO.

QUotiescunque tam in contractibus, quam in ultimis voluntatibus quid rejicitur in conditionis eventum, habetur ea pro impleta, si per ejus, cujus comodo est, conditionem non impleri, improbitatem aut contumaciam fiat, ne impleatur. Eaque regula in libertatibus, legatis, heredum institutionibus, stipulationibus, & omnibus aliis civilibus negotiis procedit: veluti, si mihi bibliothecam tuam ita vendideris, si magistratus locum mihi concesserit, ubi eam collocarem, si per te stet, quo minus locum impetrem, habebitur conditio pro impleta, *l. Labeo, 50. de contrah. empt.* Item si Titius mihi legavit fundum Tusculanum, aut heredem me instituit, sub conditione, si Cajo heredi ejus ab intestato centum numeraverim, & heres

heres ea accipere nolit, conditio pro impleta habetur, *l. 3. de condit. Instit.* Quia conditio, quæ deficit culpa ejus, in cujus personâ implenda est, pro impleta habetur, *l. 5. §. item si qua §. ff. Quan. di. leg. ced. l. 1. C. de inst. & subtit.* Aliud illustre exemplum est in *l. Titia 34. §. si ea condition. 4. de leg. 2.* Si ea conditione liberto fideicommissum relatum est, ne à filiis ejus recederet, & per tutores factum est, quo minus conditionem impleteret, iniquum est, eum, cum sit inculpatus, emolumento fideicommissi carere. Idem respondit in simili casu J. C. Scævola in *l. Mavia 13. ff. de ann. Lega.* Ex quo illud eleganter deciditur, quod si quis alicui Ecclesiæ centum legaverit, sub ea conditione, si ibi sepultus fuerit, & testator propter delictum suum impedierit, quo minus in loco sacro sepeliri possit, legatum nihilominus debetur, quia per eum impedita est conditio. *Additio marg. ad l. miles 11. §. fin. ad l. Iul. de adult.* Conditio enim, cui debitor est impedimento, quo minus impleatur, pro impleta habetur, *l. jure civili 24. ff. de cond. & dem. l. in testamento 31. & ibi Cujac. in tract. ad Africa. ff. eod.*

AD L. CLXII.

Paulus libr. 70. ad Edictum.

Qua propter necessitatem recepta sunt, non debent in argumentum trahi.

Repetitur hic l. Quod contra 141. ff. supr. h. s.

EXPLICATIO,

TAnta est necessitatis vis, ut licitum quid faciat quod est illicitum: quia necessitas non habet legem, sed se ipsa legem facit, cum nulli legi subjecta sit, *l. penul. §. ult. ff. de excusat. tutor.* ita tamen ut quod propter vim ejus permissum est, non debeat extendi ad consequentia vel similia; veluti patri permissum est, ob necessitatem famis filium vendere, ne fame atque inedia, quod durum est telum, miserè illi sit per-eundum, quod in argumentum non debet trahi, ut in alio casu filium vendere liceat, *l. 1. & 2. Cod. de patrib. qui filios distrax.*

Secundò, propter redemptionem captivorum permissa est rerum sacrarum alienatio, quod tamen non oportet ad similes casus protrahere, *l. sancimus 21. C. de SS. Eccles.* ubi additur elegans ratio, quod *anima hominum debent quibuscunque vasis, vel vestimentis praferri: & scitum est dictum D. Ambrosii, Aurum habet ecclesia, non ut*

ut servet, sed eroget, & subveniat in necessitatibus.

Tertiò propter necessitatem famis esculenta furari licet, quantum satis est, *c. si quis propter, de furt.* Quod in extremâ paupertate verum est, quando nihil pecuniæ superest, unde necessaria emas, & nisi rapuisses fame moriendum esset, *c. discipulos; de consecrat. dist. 5.* Ratio est, quod in necessitate omnia debeant esse communia, & maxime cibaria, *l. 2. §. 3. ff. ad l. Rhodiam de jactu.* Non tamen ignoscendum est ei, quæ obtentu paupertatis turpem & meretriciam vitam degit: semper enim luxuriosa vita peccatum est, ideoque perpetuò prohibita, *l. palam 43. §. non est ignoscendum §. ff. de rit. nup.* Ratio diversitatis, cur potius permittatur furtum tempore necessitatis, quam fornicatio, hæc adferri potest; quod in extrema rerum penuria omnia sint communia. Unde facilius meretur veniam, qui subtrahit, quod sibi dati propter sociam vitam conveniebat. Non item caro hominis in commune exposita est, in quam peccat, qui his modis turpiter agit, *d. l. palam 43. §. non est ignoscendum §. Ferrar. h.*

AD L. CLXIII.

Ulpianus lib. 55. ad Edictum.

Cuius est donandi, eidem & vendendi, & concedendi jus est.

Hæc lex 163. *sup. ad l. non debet 21.* explicata est.

Revolve Explicationem *l. quod contra. 141. ff. supr. h. t.*

AD L. CLXIV.

Paulus libr. 51. ad Edictum.

Pœnalia judicia semel accepta, in heredes transmitti possunt.

De lege pœnalia, dixi in *l. sicuti 38. sup. h. t.*

V. etiam, quæ author habet ad *l. Sicuti. sup. h. t.*

L. CLXV.

Ulpianus lib. 53. ad Edictum.

Cum quis possit alienare, poterit consentire alienationi: Cui autem donare non conceditur, probandum erit, nec si donationis causa consenserit, ratam ejus voluntatem habendam.

L. cum quis 165. declarata est sup. in l. aliud est vendere 160. & l. non debet 21.

L. CLXVI.

Paulus libr. 40. ad Edictum.

Qui rem alienam defendit, nunquam locuples habetur.

De

De hujus legis sententia dixi in *l. nemo dubitat* 95.

AD L. CLXVII.

Paulus libr. 49. ad Edictum.

Non videntur data, qua eo tempore, quo dentur, accipientis non sunt.

EXPLICATIO.

Verbum *dare* significat dominium transferre. Unde non videtur datum, quod accipientis non est factum, §. *sic itaque* 14. *Inst. de action.* Unde qui promisit fundum dare, cogitur efficere dominium stipulatoris, nec liberatur, si eum simpliciter tradiderit, aut alienum dederit, *l. ubi autem* 75. §. *fi. de V. O.* Pro subjectâ tamen materiâ & naturâ contractus *dare* interdum significat *tradere*. Sic venditor obligatur ad dandum, hoc est, ad tradendum illud jus, quod in re habet, *l. si ita* 25. *de contrahend. empt. l. si stipulatus* 4. *ff. de usuris.*

Ad §. fin.

Qui jussu judicis aliquid facit, non videtur dolo malo facere, quia parere necesse habet.

Dicitur hic quoque ad *l. qui auctore* 137. *supr. h. t.*

EXPLICATIO.

Ratio in lege subjicitur, quia necesse fuit parere: quæ necessitas fraudis & doli

doli suspensionem excludit. Unde si prætor decreverit solvendam pecuniam minori sine creditoribus, & solverit debitor, excusatur propter jussu judicis, nec minor in integrum restitui volens audietur, *l. ait Prator 7. §. 1. ff. de minor.* ubi multa exempla adfert Accurs. in quibus excusat mandatum judicis.

Huc pertinet reg. 137. *sup. eod. qui auctoritate judice comparavit, bona fidei possessor est;* itaque fructus suos faciet, at usucapiendi conditione potietur: Sicut alius quilibet bonæ fidei possessor, *l. juste 11. ff. de acquir. possess.*

Plane si ea judex mandat, quæ præter ejus officium sunt, non est ei parendum, *l. factum 170. infr. eod.* In his enim quæ sui officii non sunt, judex, tanquam privatus homo censetur; veluti si extra territorium suum jus dicat: quare impunè ei non paretur, *l. ult. ff. de jurisdict.* Item si alicui injuriam faciat magistratus, cum hoc ad officium ejus non pertineat, conveniri potest actione injuriarum, *l. nec magistratib. 32. sup. de injur.* Illud singulariter notandum, quando manifestum est, quod factum Judicis est injustum, tum licitum sibi est resistere etiam propria auctoritate, *text. est notabilis in l. devotum 5. C. de metat. & epidemet. lib. 12.*

308 IN TIT. DIG. DE REG. JUR.
*lib. 12. ubi statuitur, quod si metator, vel
designator hospitiorum, velit aliquem co-
gere, ut recipiat in ædes suas milites, qui
ab hoc onere est immunis; quod ille possit
illi propria auctoritate resistere, possitque
ipsum metatorem ex agro vel ædibus de
facto sine Judice expellere. Idem traditur
in l. contra 5. C. de executor. lib. 12. ubi sta-
tuitur, quod si executor aliquis faciat illicitè
executionem in alicujus bonis, tunc lice-
bit illi propria auctoritate resistere, execu-
toremque repellere.*

L. CLXVIII.

Paulus lib. 1. ad Plautium.

*Rapienda occasio est, qua præbet benignius respon-
sum.*

§. 1. *Quod factum est cum in obscuro sit, ex affectio-
ne cujusque capit interpretationem.*

Principium hujus legis exposui in l. sem-
per in dubiis 56.

§. finalis expositus sup. in l. ambiguus 96.

L. CLXIX.

Paulus lib. 2. ad Plautium.

*Is damnum dat, qui jubet dare. Ejus vero nulla
culpa est, cui parere necesse sit.*

Principium hujus legis explicatum cum
l. ad ea 157. sup. eod.

Ad

Ad §. fin.

Quod pendet, non est pro eo, quasi sit.

EXPLICATIO.

OMnis actus qui sub conditione geritur, antequam conditio existat, nullum effectum sortiri potest. Sic conditionalis debitor ante eventum conditionis interpellari non potest. Item venditio facta sub conditione non prius impletur neque perfecta est, quam conditio existat. Recte ergo hic dicitur, quod per conditionis vel dici adjectionem, suspensum est, non esse pro eo, quasi sit. Expectandum enim est, donec conditio eveniat, aut dies existat, §. *sub conditione* 4. *vers. ex conditionalis. Inst. de V. O.*

AD L. CLXX.

Paulus lib. 3. ad Plautium.

Factum à Iudice quod ad officium ejus non pertinet, ratum non est.

¹ Lex *factum*, in l. *non videntur*, 67. §. *qui jussu*, l. explicata est.

AD

AD L. CLXXI.

Paulus libr. 4. ad Plautium.

Nemo ideo obligatur quia recepturus est ab alio quod præstiterit.

EXPLICATIO.

Diversi sunt ad hanc l. intellectus. Probabilior tamen hæc est *Ioannis Rami* sententia; Cum certos & legitimos obligationum constituendarum modos jus civile introduxerit, *Inst. tit. de obl.* qui sibi vult alium obligatum ad solvendum habere idcirco quod ab alio fortassis recepturus sit, quod præstiterit, in errore versatur. Sic enim tutor & negotiorum gestor non ideo creditoribus pupilli, aut ejus cujus negotia gerunt, tenentur, quod contraria negotiorum gestorum vel tutelæ actione, si quid impenderint, facile recuperare possint, §. 1. *¶ §. tutores 2. Inst. de obligat. quæ ex q. contractu.* Unde notabilis infertur doctrina, quod creditor creditoris mei ad solutionem urgere me non potest, ullamque efficacem in me habet actionem, *l. eum cui, C. de obligat. ¶ act.* Nisi illi à creditore meo actio credatur, *l. fin. C. quando fis. vel privatus, ¶ c.* Exemplum etiam huic regulæ accommodatum hoc adferri potest. Titius non potest centum à domino fundi sibi

sibi debita petere ab ejus colono, quasi colonus ea centum facillè in solutum sit domino reputaturus, in exolutione mercedis, quam debet domino, aut negotiorum gestorum actione à domino recepturus; quia nemo invitus pro alio solvere cogitur, *l. invitum* 11. *C. de cont. emp. l. nec emere* 16. *C. de jur. dolib.*

L. CLXXII.

Paulus lib. 5. ad Plautium.

In contrahenda venditione, ambiguum pactum contra venditorem interpretandum est. Ambigua autem intentio ita accipienda est, ut res salva auctori sit.

Lex in contrahenda 172. *sup. in l. in ambiguis* 69. explicata est.

AD L. CLXXIII.

Paulus libr. 6. ad Plautium.

In condemnatione personarum, qua in id quod facere possunt, damnantur, non totum, quod habent, extorquendum est, sed & ipsarum ratio habenda est, ne egeant.

Legis hujus principium explicatur sup. in l. Divus Pius 28.

AD

Ad §. Cum verbum 1.

Cum verbum RESTITUAS in lege invenitur, et si non specialiter de fructibus additum est; tamen etiam fructus sunt restituendi.

EXPLICATIO.

Restitutionis verbum plenam habet significationem, ut & fructus, partus, accessiones, & omnis rei utilitas eo verbo contineatur, *l. cum prator 81. de verb. sing. l. videamus 38. §. in Faviana 4. ff. de usur.* Et ideo cum prator restitui jubet fundum in interdicto *unde vi*, etiam fructus restituendi sunt. Sic Paulus: *si in vendendo fundo circumscriptus sit minor, jus suum recipiet. Itaque jubebit prator emptorem fundum cum fructibus reddere, & pretium recipere, l. 24. §. restitutio 4. ff. de minor.*

Praxis hujus regulæ est, quod si judex aliquem condemnet ad rei restitutionem, non factâ fructuum mentione, fructus tamen venient, *l. restituere 35. ff. de V. S. si modo certi sint; alias sententia tanquam incerta non valeret, l. in sententiis 59. §. qui sortis 2. de re judic. Costal. ad l. videamus 38. de usuris.*

Ad §. Unicuique 2.

Unicuique sua mora nocet, quod & in duobus reis promittendi observatur.

Dictum de h. l. sup. in l. 74.

EXPLICATIO.

MOra sua cuilibet est nociva, ne ex alterius delicto alius prægravetur. Nocet tamen mora rei principalis seu debitoris fidejussori, *l. mora 88. ff. de V. O.* Nocet autem mora multifariam, quia post moram tenetur quis de interitu rei, etiamsi casu fortuito perierit, *l. quod te 5. ff. si cert. pet. l. si ex legati causa 23. ff. de V. O.* Item à tempore moræ fructus & usuræ, & id genus accessiones in bonæ fidei judiciis debentur, *l. mora 32. §. in bona fidei 2. de usur.* Adeo autem mora cuique sua nocet, ut unius correorum mora alteri minime noceat, *tex. h.* Cui gravissime obstat, *l. pen. ff. de duob. reis.* ubi dicitur, *quod ex duobus reis promittendi factum alterius, alteri noceat.* Sed hoc ita intelligendum est; si ex facto alterius correi persona solum eximatur ab obligatione, veluti si alter reorum esset capite minutus aut deportatus. Nam tum alter nihilominus obligatur, *l. ult. ff. de duobus reis.* Multum enim interest, utrum res ipsa solvatur, an persona liberetur, cum

O

per-

persona liberatur manente obligatione, alter correus manet obligatus : cum verò res solvitur, uterque correus promittendi liberatur. Ita *l. penult. per l. fin. eod. tit.* restringitur, & declaratur.

Ad §. fin. *Dolo facit.*

Dolo facit, qui petit, quod redditurus est.

EXPLICATIO.

EXemplum est in debitore, cui testator liberationem legavit, qui si ab herede conveniatur, exceptione doli mali uti potest contra heredem: quia dolo facit heres, quod id petat, quod actione ex testamento restituet, *l. dolo facit 8. ff. de dol. except.* Fallit regula, si res quidem sit restituenda, sed non statim: quia tunc petitor habet commodum medii temporis, *l. fin. §. 1. ff. ut leg. nom. caus.* Secundo fallit, si restitutio alii facienda sit, non ei, qui petit. Casus est in *l. si socer 44. §. Lucius 1. ff. sol. matr.* Tercio fallit in spoliato, spoliatus enim ante omnia restituendus est, etiam si nihil juris in re habeat; nec potest ei objici exceptio dominii; quin prius ei restituenda est possessio, qua dejectus est, & postea quaestio proprietatis discuti debet, *l. si de vi 37. de judic. l. 1. C. Si per vim vel alio mod. posses. l. si quis ad se fundum 7. C. ad L. lul. de vi pub.*

c. in

c. in litteris. ext. d. t. Ultimò non procedit regula, si heres proponat *interdictum quod Legatorum* contra legatarium, qui propria auctoritate occupavit legatum, ad hoc ut is heredi restituat legatum, ut is Falcidiam ex legatis detrahat; nec potest heres repellì exceptione doli, licet post teneatur ad legata præstanda, deductâ Falcidiâ; quia non debuit legatarius sibi ipsi jus dicere propriâ auctoritate occupatis legatis, sed ex manu heredis legata petere, *l. 1. in princ. ff. Quod legat.*

AD L. CLXXIV.

Idem libr. 8. ad Edictum.

Qui potest facere ut possit conditioni parere, jam posse videtur.

Facit huc Explicatio authoris in *l. divus pius* 28. *supr. h. t.*

EXPLICATIO.

SUpra dictum est in *l. in iure Civili* 161. *Quoties per eum stat, cujus interest conditionem non impleri, quo minus impleatur, perinde haberi ac si impleta esset:* dicitur hic amplius, cum quis potest facere, ut impleatur conditio, hoc est; qui potest impedimentum aliunde allatum submovere, perinde esse ac si conditio extiterit. Potentia enim faciendi factum repræsentat, *l. si bona fide* 12. *ff. de nox. act.* Exempli causa, qui abest Reipublic. causa, restituitur in integrum;

316 IN TIT. DIG. DE REG. JUR.
 grum, si modo abiens procuratorem domi
 relinquere non potuit: sed si non reliquit,
 relinquere tamen potuit, restitutio in in-
 tegrum ei non conceditur, *l. sed etsi* 26. §.
 1. ff. *ex quibus caus. major*, &c. Similiter si
 obligatus sub conditione, curaverit, ne
 existeret conditio, nihilominus obligabitur,
 quasi eam implere possit, *l. in executione* 85.
 §. ult. ff. *de verb. obl.* Limitatur regula, si
 conditio facili modo impleri posset. Nam
 quod arduum & difficile est, pro impossibi-
 li quodammodo habetur: & excusatur, qui
 fecit, quod potuit, *l. qui commeatus* & ibi
Bart. 14. ff. *de re milit.* & postea quis dici-
 tur, cum commodè potest, *l. nepos* 125. ff. *de*
verb. sing. l. eum servus 39. §. ult. ff. *de legat. 1.*

Ad §. Quod quis.

*Quod quis, si velit, habere non potest, id repudiare
 non potest.*

EXPLICATIO.

Regula vulgata est, Quod *privatio*
presupponat habitum. Itaque ea non
 possumus repudiare, quæ, si vellemus, ha-
 bere non possemus. Unde qui sub condi-
 tione vel in diem heres institutus est; ante
 conditionis vel dici eventum frustra repu-
 diat hereditatem, quia etsi vellet adire, non
 posset,

posset, *l. nolle adire 4. l. is potest 18. ff. de acq. hered.* Repudiari igitur hereditas vel legatum conditionale, pendente conditione, non potest: & talis repudiatio non impedit, quo minus postea purificata conditione hereditas acquiri possit ab eo qui repudiavit, *l. is qui heres 13. ff. de acqu. her. l. homine legato 18. ff. de opt. leg. Decius hic.* Non obstat *l. 1. C. de pact.* ubi hereditas sub conditione relicta, pendente conditione pacto remitti potest, quia jus de futuro repudiatione non tollitur, sed benè pacto. Ratio diversitatis est, quod pactum duorum consensu nititur, sicque majoris efficaciz est, quam renunciatio seu repudiatio, quæ solo renunciantis consensu nititur & fundatur, *d. l. 1. & ibi Gl.*

AD L. CLXXV.

Idem lib. 11. ad Plautium.

In his qua officium per liberar fieri personas leges desiderant, servus intervenire non potest. §. 1. Non debeo melioru conditionis esse, quam auctor meus, a quo jus in me transit.

Prior pars l. de servis tractat, qui hoc seculo mortui & incogniti sunt. §. 1. explicatus est ad *l. nemo plus juris § 4.*

AD L. CLXXVI.

Idem libr. 13. ad Plautium.

Non est singulis concedendum, quod per magistratum publice possit fieri, ne occasio sit majoris tumultus faciendi.

EXPLICATIO.

CUM magistratum defensio & iudiciorum observantia idcirco prodita sit, ne privatus quilibet sibi ipsi jus dicat, sed & si quam injuriam aut offensionem patiatur, ad magistratus auxilium confugiat, *l. nullus 13. C. de iuda.* Hinc recte traditur hic, non concedendum privato cuilibet, quod publica magistratus autoritate constitui debet, ut occasio omnis tumultus & dissensionis in Repub. evitetur. Unde si creditor propria autoritate debitum extorqueat à debitore, iudice ad hoc non requisito, jus crediti amittit, *tex. elegans. in l. extat 13. ff. quod met. caus. & in l. penult. & ult. ff. Ad L. iul. de vi pub. vel priv. l. si quis in tantam. 7. C. Unde vi.* Sic qui possessionem aliquam sine iudicis autoritate violenter ingreditur, eam restituere cogitur, & præterea dominium aut jus in re, si quod habet, amittit, *d. l. si quis in tantam 7. C. unde vi.* Sunt tamen aliquot casus, quibus privatus
sua

sua auctoritate facit, quod ad magistratum pertinet, ut puta vim vi repellere licet in continenti, & cum moderamine inculpatæ tutelæ, *l. ut vim 3. ff. de just. & jur. l. 1. C. Unde vi.* Item possessionem suam armis tueri cuique licet; atque propriâ auctoritate in continenti possessionem recuperare concessum est, qua vi quis dejectus est, *l. 3. §. eum igitur 9. ff. de vi & vi arm.* Tertiò potest quis contra nocturnum populatorem agrorum, & itinerum aggressorem res suas vindicare: imò licet eum propriâ auctoritate occidere, & telo ipsi tanquam latroni obviare permittitur. Melius est enim in tempore occurrere, quam post exitum se vindicare, & remedium quærere, *l. 1. & 2. C. Quan. lic. unic. sine jud. se vindic.* Quartò potest creditor vi pacti inter se & debitorem initi propria auctoritate possessionem pignoris ingredi, quamvis urbanus & civilis faciat, si adhibita Prætoris auctoritate hoc faciat, *l. 3. C. de pignor.* Quintò potest etiam quis debitorem de fuga suspectum propria auctoritate apprehendere, & pecuniam secum ferentem illicò auferre sine Judice. Ratio est, quia non habuit copiam magistratus adeundi: nam timendum erat, ne dum Judicem expectaret, suum amitteret, fugiente debitore.

Eleganter Cujac. libr. Observ. 16. cap. 91. l. ait prator 10. §. si debitorem 16. ff. qua in fraud. creditor. Denique potest quis propriâ auctoritate rem suam accipere & recuperare, quando aliter per Judicem illam consequi non potest, *Gloss. in c. jus gentium. 1. dist. Decius h. num. 2.* Postremò objicitur huic *L. l. qui vas. 48. ff. de furt. ubi dicitur, quod dominus impunè furi rem furtivam aufert: ergo videtur quod sibi ipsi quis possit jus dicere, neque teneatur adhibere auxilium magistratus.* Resp. cum *Accursio & Cujacio*, quod hoc non intelligendum est de violenta ablatione, sed quod ibi legitimè & per auctoritatem judicis dominus rem abstulit furi. Ita notant *Accurs. ad d. l. qui vas 48. & Cujac. ad l. extat. 13. ff. quod met. cau.*

Ad §. infinita 1.

Infinita est æstimatio libertatis & necessitudinis.

Hic addimus textum, quem author præterierat, explicationem nullam, quia materia servilis est, subjuncturi.

AD L. CLXXVII.

Paulus lib. 14. ad Edictum.

Qui in jus dominiumve alterius succedit, jure ejus uti debet.

Principium hujus legis *sup. in l. nemo plus juris §4. exposui.*

§. fin.

§. fin.

Nemo videtur dolo exequi, qui ignorat causam, cur non debeat petere.

EXPLICATIO.

Sicut is, à quo petitur, non videtur facere dolo, cum ignorat, quantum aut cui solvere debeat, *l. qui in alterius 42. sup. eod. l. non potest 99. sup. hoc tit.* ita non videtur actor exequi aut petere dolo, qui causam ignorat, cur petere non debeat. Proinde si heres petit pecuniam, quam ignorat à defuncto remissam aut accepto latam, petendo non facit dolosè, *l. 2. §. & generaliter 5. de except. dol.* Si tamen postea cognito errore petat, dolo petere videtur. Quod & ad ignorantiam juris extenditur. Nam qui in jure errat, dolo caret, nisi lex id facere prohibeat, *l. sed & si 25. §. scire 6. ff. de pet. hered. l. si quis id 7. §. doli 4. ff. de jurisd.* ubi dicitur, quod dolo caret qui in jure errat, & quod error seu ignorantia Juris excusat à dolo. *Decius hic, num. 2.*

O S

AD

AD L. CLXXVIII.

Paulus lib. 15. ad Plautium.

*Cum principalis causa non consistat, plerumque nec ea quidem, quæ sequuntur, locum habent.**Hic simul explicatur §. cum principalis 1. l. nihil dolo 129 ff. supr. h. t.*

EXPLICATIO.

U Sitatum est axioma, *Accessorium sequi naturam principalis, c. accessorium, ex eod.* Quia principalet, tanquam dignius, trahit ad se accessorium, tanquam minus principale, etiamsi accessorium sit pretiosius, quemadmodum gemma, inclusa annulo aureo, annulo cedit licet pretiosior sit, si auri ornandi gratia est inclusa, *l. cum aurum 19. §. perveniamus 13 ff. de aur. & arg. l. §. si tamen alienam 26. Inst. de rerum div.* Si itaque consistit principale, consistit quoque accessorium, si corrui principalis, corrui & accessorium. Unde venditâ vel legatâ domo, venit quoque hortus domui contiguus, *l. prædiis 91. §. qui domum 5. de leg. 3.* Similiter vendito equo agi quoque potest ad ephippium seu sellam, item frenum, & alia ornamenta, quibus præsertim equus tempore venditionis erat ornatus; quia hæc tanquam accessoria simul quoque vendita censentur, *l. adiles 38. in prin. ff. de adil. edic. l. eum qui 14. §. non solum 15. ff. de furt.*

furt. Costal. ad d. l. adiles. Coras. lib. 2. miscell. c. 8. Item matrimonio non subsistente, neque dos aut donatio propter nuptias exigipotest, §. *si adversus* 12. *Inst. de nupt.* quia dos sine matrimonio esse non potest, l. 3. *ff. de jur. dot.*

Regula tamen hæc subinde fallit, quod indicat verbum *plerumque* in regula positum. Potest enim fieri, ut rescisso principali consistat nihilominus accessorium, nimirum si sit specialis provisio aut singularis ratio in ipso accessorio, l. *et si is* 9. *C. de prad. minorum.* ubi quidem rescinditur alienatio prædiorum minorum xxv. annis facta sine decreto Prætoris, sed tamen res propria tutoris, quam pro evictione prædii minoris emptori obligavit manet obligata: præterea & fidejussores, qui sunt accessiones, subsistunt, licet contractus principalis rescindatur & extinguatur. Cujus hæc videtur ratio, quod lex non tam resistit contractui, quam translationi domini, Costal. *ad l. 7. §. si uxor.* 6. *ff. de don. int. vi. et ux.* Secundò fallit regula in juramento. Licet enim principalis actus per se nullus sit, si tamen accedat juramentum, confirmatur, quia omne juramentum, quod sine periculo æternæ salutis servari potest, præcise servandum est, c. *cum contingat*, *extr. de jurejur.*

Tertiò fallit regula in pulchro & notabili casu in *l. 1. & 2. C. de luit. pign.* ubi hæc facti species deciditur. Debitor sub pignore decessit duobus heredibus relictis, in eos est duplex actio, principalis vel personalis, & hypothecaria seu accessoria. Ex personali actione tenentur saltem singuli heredes pro partibus hereditariis; actione verò hypothecaria tenentur, singuli heredes in solidum: si vel unus nummus solvendus restat, tota res est in pignoris causa. Igitur si unus ex heredibus debitoris solvit debitum pro parte suâ hereditariâ, sublata est actio personalis, tenetur tamen hypothecariâ in solidum. Itaque in cujus personâ sublata est principalis & personalis actio, non est sublata hypothecaria seu accessoria. Ita eleganter explicat has *ll. Cujac. lib. Observ. 5. c. 32.* Aliam interpretationem adfert, *ad d. l. 2. C. de luit. pign.* Antonius Fab. acutissimus *JC. lib. 7. conject. jur. c. 18.*

AD L. CLXXIX.

Paulus libr. 16. ad Edictum.

In obscura voluntate manumittentis favendum est libertati.

Hæc lex, quia de servis tractat, omit-
titur.

AD

AD L. CLXXX.

Paulus libr. 17. ad Plautium

Quod jussu alterius solvitur, pro eo est, quasi ipsi solutum esset.

EXPLICATIO.

Quod quis per alium facit, perinde est atque si faciat per semetipsum, *cap. qui per alium, ex. eod.* Exempli loco hæc est regula, quæ loquitur in specie solutionis. Quemadmodum enim liberor, si ipse solvam: Sic liberabor quoque si alius pro me solvat, ut obligatio non solum dissolvatur per eos, qui contraxerunt, sed etiam per alios jussu eorum: Veluti, debeo tibi 100. mando debitori meo, ut tibi solvat, debitor meus à me liberatur, quia perinde est atque si mihi solvisset, & ego à creditore meo liberor, quia cum mando solvi per alium, videor ipse solvere, *l. qui mandat § 6. l. cum jussu § 4. sup. de solut.*

AD L. CLXXXI.

Paulus libr. 1. ad Vitellium.

Si nemo subiit hereditatem, omnis vis testamenti solvitur.

Lex si nemo 181. sup. in l. quamdiu 89. explicata est.

AD

AD L. CLXXXII.

Paulus libr. 3. ad Vitellium.

Quod nullius esse potest, id ut alicujus fieret, nulla obligatio valet efficere.

Adjungitur hic Explicatio l. ea qua dari 13 §. supr. h. t.

EXPLICATIO.

EXemplo sunt res sacræ, sanctæ & religiosæ. Quod enim divini juris est, id nullius in bonis est, & in hominum commercium pervenire nequit, §. nullius 7. *Inst. de rerum divis.* Unde nulla obligatio valet efficere, ut quis privatus ædem sacram vel donaria divinis consecrata officiis acquirat. Quare nec emptio rei sacræ valet. Si tamen quis ignorans emat rem sacram, ager ex empto, quanti sua interest, se deceptum non esse emendo rem sacram pro prophana, §. *fi.* *Inst. de contrah. empt.* Huc pertinet regula 185. *Impossibile nulla est obligatio.* Quatuor autem modis dicitur quid impossibile. I. Natura, veluti digito cœlum attingere, virum parere. II. Impossibile quid est de jure, veluti quicquid fit contra bonos mores vel juris dispositionem. Quia id demum posse dicimur, quod honestè possumus, & quod contra bonos mores est, id non facere nos posse jus præsumit, l. *filius* 15. *de cond. inst.* Hujus generis sunt, hominem

nem occidere, patrem captivum non redimere, adulterium committere. III. Impossibile quid est propter perplexitatem, ut puta, si tibi fundum promittam, si eum Titio non dederò. Hæc stipulatio quoque propter perplexitatem impossibilis, & proinde inutilis censetur, quia exitus ejus reperiri non potest, *l. si Titius 16. ff. de condit. instit.* IV. Impossibile quid est de facto, quod ob eventus difficultatem pene est impossibile, veluti ut si quis servum liberum esse jubeat, si millies dederit, quæ summa est ditissimi hominis patrimonium, continens ex Budæi computatione vices quinque centena millia aureorum nummorum quibus hodie utimur, *l. 4. §. 1. ff. de statu lib. Anton. August. lib. 2. emendat. c. 6. in fin.* Hæc impossibilia, quarto genere excepto, contractui si adjiciantur, vitiant & labefactant contractum: ex hac ratione, quod contractus nitatur duorum consensu & voluntate, & partes potius ludere, quam se obligare voluisse præsumuntur, qui sub impossibili conditione contraxerunt, *l. non solum 31. ff. de oblig. & act.* In ultimis voluntatibus adjecta conditio impossibilis, non vitiat actum, sed ipsa conditio vitatur, & pro non adjectâ habetur, salva manente institutione, vel legato. §. *impossibilis 10. & ibi*
Myns.

Myns. ad tit. de hered. instit. in fin. Idque ob singularem favorem ultimarum voluntatum receptum est, qui postulabat, ut valerent potius, quam corruerent suprema hominum judicia, *l. in testamentis 12. sup. h. t.* Præterea æquum non est heredi vel legatario eas condiciones nocere, quæ impossibiles sunt, quia præter eorum voluntatem testator eas apposuit, cum sibi cavere heres vel legatarius non potuerint. Hisce addi potest & hæc ratio, quod hæc impossibilis conditio potius mendo & errore quodam, quam ex proposito & certa voluntate testatori excidisse videtur, *l. 1. ff. de cond. inst.* Multi enim mortis cogitatione perturbati aliud scribunt, & aliud cogitant: ideoque in dubio pro ultima voluntate respondendum est. Postremò accedit & hæc ratio; quod non sit verisimile id quenquam ultimæ suæ voluntati adjicere voluisse, per quod impugnetur & convellatur suum extremum judicium, *l. 3. ff. de milit. testam.*

AD L. CLXXXIII.

Marcellus lib. 3. Digestorum.

Et si nihil facile mutandum est ex solemnibus, tamen ubi æquitas evidens poscit, subveniendum est.

Lex 183. explicata est *supra in l. in omnibus 20. h. t.*

AD

AD L. CLXXXIV.

Celsus libr. 7. Digestorum.

Vani timorū iusta excusatio non est.

Lex 184. refertur ad l. in omnibus causis
39. & explicata est in l. nihil Consensui 116.
supr. h. t.

L. CLXXXV.

Celsus lib. 8 Digestorum.

Impossibile nulla obligatio est.

Lex 185. declarata est ad l. verum est 31.
& l. quod nullius 182. ff. de R. l. supr.

AD L. CLXXXVI.

Celsus libr. 12. Digestorum.

*Nihil peti potest ante id tempus, quo per rerum natu-
ram persolvi possit, & cum solvendi tempus obli-
gationi additur, nisi eo præterito peti non potest.*

V. l. Cum tempus 17. supr. h. t.

EXPLICATIO.

Duo sunt hujus regulæ membra. Pri-
mum est, quod in iis obligationibus,
in quibus tacitè inest dies, ex rei naturâ, &
qualitate negotii, id tempus expectari de-
beat, antequam solvatur: ut puta, qui Fran-
cofurti stipulatus est, 10. sibi dari Parisiis,
non ante petere potest, antequam com-
modè Parisios venire possit. Sic si terræ fru-
ctus sint promissi, non præstantur, antequam

330 IN TIT. DIG. DE REG. JUR.
 quam maturuerint, *l. interdum* 73. ff. de V.
 O. Secundum membrum est, si tempus ad-
 jectum sit in obligatione, non potest effi-
 caciter peti, nisi elapso die, *l. si ita stipula-
 tus* 114. de verb. obl. Et qui ante diem petit,
 in pœnam plus petitionis incidit, §. *si quis
 agens* 33. vers. *plus autem*, Inst. de action. Cu-
 jus pœna est, ut qui ante diem pactionis vel
 obligationis litem movet, id quod reliquum
 est temporis, in quo præmaturè petiit, de-
 bitori in duplum cedere cogatur, eique
 sumptus prioris litis refundere teneatur, §.
Temporales 10. vers. *hodie autem*. Inst. de
 except. Planè ipse dies solutioni adjectus to-
 tus pro solvente est, ut dici non possit non
 solvisse, nisi ipso die elapso, *tex. h. & in §.
 omnis stipulatio* 2. Instit. de verb. oblig. *l. quic-
 quid adstringenda* 99. §. 1. ff. de V. O. *l. qui
 hoc anno* 42. ff. d. t.

AD L. CLXXXVII.

Celsus libr. 16. Digestorum.

*Si quis pregnantem uxorem reliquit, non videtur
 sine liberis decessisse.*

EXPLICATIO.

QUæ in utero sunt, quoties de commodo
 eorum agitur, pro jam natis habentur,
l. 7. ff. de stat. hominum. Quod & hac re-
 gula confirmatur. Quæ decisio ad has quæ-
 stiones

stiones conducit & pertinet. Si quis fuerit substitutus alicui heres, si sine liberis decesserit, is excluditur, si mulier prægnans relicta sit, quæ si unum etiam pariat, conditio impleta erit. Quia vox *Liberi* plurali numero continet etiam singularem, *l. non est sine liberis* 148. ff. de verb. sig. Secundo proximus heres à partu, qui in utero esse creditur, hereditatem adire non potest, quamdiu incertum est, an nascatur nasci-ve possit, qui in utero est, *l. cum quidam* 30. §. quod dicitur 1. ff. de acquir. hered.

Tertio ob spem nativitatis venter in bonorum possessionem mittitur, *d. §. quod dicitur l. 1. §. toties 2. C. §. sequ. ff. de vent. in poss. mit.* Procedit autem regula, si quod in utero sit vivum nascatur. Nam qui mortui nascuntur, neque nati, neque procreati videntur, *l. qui mortui* 129. ff. de verb. sig. Unde est quod filii abortivi testamentum non rumpant: licet in eo præteriti sint, sicut nec monstrosi vel prodigiosi partus testamentum paternum rumpunt, quia liberorum loco non censentur, *l. 2. C. 3. C. de posth. hered.*

Vbi pugnancia inter se in testamento iuberentur, neutrum ratum est.

EXPLICATIO.

Ratio legis est quod contraria simul stare non possunt: uno enim ^{posito} necesse est tolli alterum; item sublato altero, poni alterum, *l. hac verba 124. de V. S.* Unde deciditur, quod duo testamenta, quorum non apparet utrum prius vel posterius sit, invicem coincidunt, vel collabascant: ut plenè notat *Glos. in l. ult. in verb. missus est C. de edic. C. Adria. toll.* Sic Julianus ait, duas orationes pugnancia continentes simul falsas esse, *l. si 16. qui 13. §. utrum 3. de reb. dubis.*

Et aliàs in jure contrarietas maxime rejicitur. Unde qui contraria allegat, à limine judicii repellendus est, *l. 1. C. de fur.* Et contrarietas in instrumentis quæ ab una eademque parte sunt prolata, fidem scripturæ derogat, *l. scriptura 14. C. de fide instr.* Quod intelligendum est de ea contrarietate, quæ nullo distinctionis fœdere conciliari potest. Semper enim laborandum est, tum in testamentis, tum in testibus,
tum

tum in instrumentis, ut pugnancia potius concilientur, quam ut actus erroris arguatur, *l. quoties 12. ff. de reb. dub. l. quoties in stipulationibus 80. ff. de verb. obl.* Decius hic num. 4.

Ad §. fin.

Quæ rerum natura prohibentur nulla lege confirmata sunt.

De §. hoc dixi ad *l. quod nullius 182.*

AD L. CLXXXIX.

Celsus libr. 13. Digestorum.

Pupillus nec velle nec nolle in ea etate, nisi adposita tutoris auctoritate creditur: nam quod animi iudicio sit, in eo tutoris auctoritas necessaria est.

Hæc lex *Pupillus*, sup. in *l. in negotiis §.* explicata est.

AD L. CXC.

Idem lib. 24. Digestorum.

Quod evincitur, in bonis non est.

EXPLICATIO.

EVincere est rem emptam vel ex alio justo titulo acceptam per iudicis sententiam auferre. Generaliter autem tenetur venditor de evictione, licet nihil de ea conventum sit; etenim oportet venditorem

rem rem accipientis seu emtoris facere, *l. non dubitatur 6. C. de evictionib.* Cum autem ea res in bonis nostris esse dicatur, quoties eam possidentes exceptionem, aut amittentes pro ea actionem ad recuperandum habemus, *l. rem in bonis 52. de acquir. rer. dominio. l. bonorum 49. ff. de V. S.* Inde sequitur, quod à nobis evincitur, id in bonis nostris non esse, nam ipse evincens rem in bonis habere censetur, cum, ad eam persequendam, actionem habeat.

AD L. CXCI.

Idem libr. 33. Digestorum.

Neratius consultus, an quod beneficium dare se quasi viventi Caesar rescripserat, jam defuncto dedisse existimaretur? Respondit: Non videri sibi Principem, quod ei, quem vivere existimabat, concessisset, defuncto concessisse, quem tamen modum esse beneficii sui vellet, ipsius aestimationem esse.

EXPLICATIO.

SUMMA hujus legis hæc est. Beneficium quod Princeps tanquam viventi, quem vivere existimabat, concessit, mortuo eo non competit, quia privilegium personale personam non potest egredi, & sic ad heredes transire non solet, *fac. l. 2. ff. Quasi sent. sine app. rescind.* Exempli gratia, procurator debitoris inducias quinquennii postulavit

stulavit à Principe, ne interea à credito-
ribus conveniri posset, *l. 2. C. de prec. imp.
offer.* quæ indultæ literæ quinquennales ap-
pellantur, vel *lettres de respits.* Faber *h. in
fine.* quas cum Princeps ei concessisset, pu-
tarunt aliqui, id beneficium ei defuncto
competiturum, ne ipsius bona per credito-
res intra quinquennium distrahi possent.
Sed cum beneficium tanquam vivo tribu-
tum sit, non existimandum est, id benefi-
cium etiam ei defuncto profuturum, vel
heredibus commodatum, nisi Princeps
modum beneficii sui interpreteretur, *tex. hic
in fin.* Beneficia enim principalia per ipsos
Principes commodissimum & tutissimum
est interpretari, *l. cum de novo II. C. de ll.
text. optimus. in l. ex facto 43. ff. de vul. subst.*

AD L. CXCI.

Marcellus lib. 29. Digestorum.

*Ea quæ in partes dividi non possunt, solida à singu-
lis heredibus debentur.*

EXPLICATIO.

Actiones hereditariæ inter heredes di-
viduntur pro portionibus heredita-
riis, ita ut singuli pro suâ quotâ convenian-
tur. Quod verum est, si obligatio sit divi-
dua,

dua, ut si pecunia vel certa species sit promissa, *l. 2. C. de act. hered.* Quoties autem consistit obligatio in iis rebus quæ sua natura sunt individua, ut sunt servitutes, iter, actus, via, &c. hoc casu obligatio non dividitur inter heredes, sed singuli heredes promissoris tenentur in solidum pro servitute præstanda. Servitutum enim usus individuus est, *l. via 17. ff. de servit.* Ipsi vero heredes cautiones inter se exponere coguntur, ut si quis solidum præstiterit, pro parte à reliquis coheredibus recuperet iudicio familiæ herciscundæ, quod ultra suam partem solvit, *l. heredes 25. §. an ea, 9. ff. fam. hercisc.* E contra etiam singuli heredes stipulatoris in solidum petere possunt, si quid indivisum hereditati debeat, *l. 2. C. ibi Cujac. ff. de V. O.*

§. fin.

In re dubia benigniorem interpretationem sequi, non minus justius est, quam tutius.

De hoc §. dixi in l. semper in dubiis 56.

A D

AD L. CXCIII.

Celsus libr. 38. Digestorum.

Omnia ferè jura heredum perinde habentur, ac si continuò sub tempore mortis heredes extitissent.

Exponitur hic l. omnis 138. h. t.

EXPLICATIO.

NE quis temere damnosam hereditatem adeat, permissum est heredi à jure tempus deliberandi, intra quod hereditatis vires exploret, utrum expediat illi adire nec ne., *l. si. C. de jur. delib.* Interim itaque, hereditate jacente, foetus pecorum, partus ancillarum & fructus hereditatem augent, & per usucapionem multa hereditati accedere possunt, quæ omnia ad heredem post deliberationem adeuntem pertinebunt. Quia hereditas, quamvis postea adeatur, tamen cum tempore mortis continuatur, & aditione facta omnium rerum hereditariarum dominium transit in heredes à tempore mortis defuncti, *l. omnis hereditas 118. sup. eod.* Hinc est, quod si defunctus rem usucapere cœpit, tempus usucapionis quod currit hereditate jacente, proficiat heredi, non aliter ac si statim post mortem eam adiisset, *l. nunquam 31. §. vacuum 5. ff. de usurp. & usucap.* Fere autem ait J.C. hic, quod denotat regulam non esse perpetuam. Unde licet possessio defuncti proficit

P

heredi

heredi ad usucapionem continuandam, in reliquis tamen causis possessio defuncti non transfertur in heredem, nisi ab eo apprehendatur, *l. 1. §. Scaevola 15. ff. Si is quis test. lib. esse ius. dic. l. cum heredes 25. ff. de acqu. poss. Vide Coras. lib. 6. Miscel. c. 12.*

AD L. CXCIV.

Modestinus lib. 6. Differentiarum.

Qui per successionem quamvis longissimam defuncto heredes constiterunt, non minus heredes intelliguntur, quam qui principaliter heredes existunt.

Lex hæc sup. in l. hered. 52. explicata est.

AD L. CXCV.

Modestinus libr. 7. Differentiarum.

Expressa nocent, non expressa non nocent.

EXPLICATIO.

Regula hæc non est universaliter vera. Quædam enim expressa nocent, quæ tacite intellecta non officiunt. Exempli causa: Legatum in alterius voluntatem collatum non valet, ut puta, *lego tibi fundum, si Titius voluerit*, si tamen non expressè conferatur in voluntatem alterius, sed tacite, puta si dicatur, *lego tibi fundum, si Titius Romam venerit*, legatum valebit, *l. nonnunquam 52. ff. de condit. & demonst.* Quod & in heredis institutione obtinet, *l. si*

l. si quis Sempronium 68. de hered. instis. Sic quoque expressa conditio vitiat actus legitimos, tacita non item, *l. actus legitimi 77. sup. eod.* Sic juramentum calumniæ expressè remissum vitiat processum, tacitè omissum non vitiat, *l. 2. C. de jurejur. propter calum. dand. c. 1. extr. eod.* Denique licet hereditas ex die nominatim dari non possit, veluti, post quinquennium quam moriar, heres esto, *l. hereditas 32. ff. de her. inst.* tacitè tamen in diem conferri potest, veluti cum capere poteris, cum adoleveris, cum morieris, heres esto, *l. in tempus 62. ff. de her. inst. l. si mater 33. ff. de vulg. subst.* & ita sæpè fit, ut quæ expressa non valent, tacita tamen valeant.

Quædam porro expressa profunt, non expressa nocent. Ita si à contrahentibus expressa fiat novationis mentio, quod videlicet contrahentes expressè declarent, se propterea convenisse, ut priorem obligationem novarent, tunc contractus novatur; non item si hoc non sit expressum, quia hodie jure novo non fit nec inducitur novatio, nisi hoc expressè agatur, §. *præterea 3. Inst. quib. mod. toll. obl. l. ult. C. de novat.* Huc pertinet *l. 99. de V. O.* *Quicquid adstringenda obligationis causa dictum sit, id nisi palam verbis exprimat, omissum esse intelligitur.*

L. CXCVI.

Modestinus lib. 8. Regularum.

Privilegia quadam causa sunt, quadam persona, & ideo quadam ad heredem transmittuntur, qua causa sunt: qua persona sunt, ad heredem non transeunt.

Lex Privilegia, explicata sup. l. in omnibus causis 68.

L. CXCVII.

Modestinus libro singulari de ritu nuptiarum.

Semper in conjunctionibus non solum quid liceat, considerandum est: sed & quid honestum sit.

Hæc lex 197. explicata in l. omne 144.

L. CXCVIII.

Javolenus libr. 13. ex Cassio.

Neque in interdicto, neque in ceteris causis pupillo nocere oportet dolum tutoris, siue solvendo est, siue non est.

Lex 198. exposita est ad l. non debet 74.

AD L. CXCIX.

Javolenus lib. 6. Epistolarum.

Non potest dolo carere, qui imperio magistratus non paruit.

EXPLICATIO.

Quemadmodum is, qui jussu judicis aliquid facit, à dolo excusatur, *l. non viden-*

videntur 167. §. *qui jussu fin. sup. eod.* Ita qui
 judici imperanti non obtemperat, dolo
 non caret, imo puniri debet. Permissum e-
 nim est judici jurisdictionem suam poena-
 li judicio defendere. Veluti si quis non pa-
 tiatur rem mobilem à se vendicari, ob judi-
 cis contemptam jurisdictionem dolo non
 potest carere, & idcirco quanti ea res est,
 puniendus est, *l. 1. ff. si quis jus dic. non ob-*
temp. Et qui punitus fuit ob contemptum ju-
 dicis decretum, non habet injuriarum ac-
 tionem, cum decreto parendum fuerit, *l.*
injuriarum 13. §. 1. & 2. *ff. de injur.* Sic e-
 tiam qui à magistratu in jus vocantur, si
 non compareant, dolo non carent. Ubi ta-
 men ita distinguendum est: Aut certum est
 te ejus jurisdictioni non esse suppositum,
 veluti cum extra territorium tuum vocaris,
 & tunc impune Judici non pares, *l. ult. ff. de*
jurisd. Aut constat te ejus jurisdictioni esse
 subiectum, & tunc citatus non potes ema-
 nere, *l. 1. ff. Si quis jus dic. non obtemp.* Aut
 dubium est, an ad illud tribunal pertineas
 nec ne, & tunc judici te sistere debes, ad
 hoc ut cognoscatur, cujus sit jurisdictio, *l. 2.*
& ibi gl. ff. Si qu. in jus voc. & c. l. si quis ex
aliena 5. *ff. de judic.* Dynus ad c. *ea qua sunt.*
ex h. t. & Ferrar. h.

AD L. CC.

Javolenus libr. 7. Epist.

Quoties nihil sine captione investigari potest, eligendum est, quod minimum habeat iniquitatis.

EXPLICATIO.

HOc paucis definit regula: Quoties dubia quædam occurrit quæstio, quæ in quancumque partem accipiat, suas habet rationes, & tamen quandam iniquitatem continet, tutius & melius est id eligere, quod minus habet iniquitatis. Sic Imp. in perplexis sæpe rebus mediam viam secutus est, §. *fin. quib. manumit. non licet*, §. *cum ex aliena* 25. *Instit. de rer. divis.* Sic & apud Jurisconsultos nostros observatum fuit, ut quando in aliquâ facti specie dubii hærent, meliorem viam eligerent. Exemplum est in *l. filio* 7. *ff. ut leg. nom. cau.* Huc facit, quod dici solet, *Ex duobus malis eligendum esse minimum*: de quo text. & gloss. in *l. si procurator* 9. *ff. de except. doli.* Ubi procurator rei passus est se corrumpi ab ætore & judicio vinci: Actor deinceps rem judicatam petendo à reo, exceptione doli removeretur, quia procuratorem pecunia corripit, neque repetere potest, quod procuratori dedit, ut pateretur se vinci in lite.

lite. Eo casu minus iniquum existimat J. C. ut apud accipientem & deceptum procuratorem maneat turpiter accepta pecunia, quam ad decipientem actorem revertatur.

AD L. CCI.

Javolenus libr. 10. Epistolarum.

Omnia quæ ex testamento proficiuntur, ita statum eventur capiunt, si initium quoque sine vitio ceperint.

Hæc lex sup. ad l. in ambiguis 85. §. non est novum 1. explicata est.

Adde L. 29. sup. cod.

AD L. CCII.

Javolenus libr. 11. Epist.

Omnis definitio in jure civili periculosa est. Parum est enim ut non subverti possit.

Consule explicationem Authoris ad l. 1. sup. h. s.

EXPLICATIO.

DUplex hujus regulæ interpretatio adfertur à Dd. Alii putant Jctum loqui hic proprie de vera & *Dialectica* definitione, quæ est oratio explicans quid sit id, quod definitur. Alii & recentiores accipiunt definitionem pro regula juris, hoc est, brevi quadam oratione & sententia, qua plurium rerum breviter, summam & absolute fit traditio. Sic definitionem in hac L. Græci interpretes *ῥησιν* appellant. Uterque tamen sensus per se verus & conf-

est. Nam definitiones juris præcipuè periculosa & imperfecta sunt propter materiae subjectae latitudinem, & verarum differentiarum paucitatem & penuriam. Exempli gratia: *Furtum* definitur *fraudulenta contractatio rei aliena, invito domino facta*, §. 1. *Inst. de obl. qua ex delicto*. l. 1. §. 3. ff. *de furt.* Infringitur hæc definitio, quod rei suæ aliquando furtum fiat: veluti si debitor rem suam pignori datam creditori subtrahat. *Actio* definitur, quod sit *jus persequendi in judicio, quod sibi debetur*. Quæ definitio si exactius discutiatur, non continet actiones in rem, quia per eas, non quod nobis debetur, sed quod nostrum est petimus. Similiter regulæ juris periculosa sunt propter exceptionum multitudinem, quæ regulam vitiant & subvertunt. Diximus ad l. 1. *sup. h. t.* Unde rectè *Placentinus* h. loquitur, quod *omnis definitio, id est, regularis traditio periculosa est & difficilis; ferè enim omnis regula subvertitur, si species id quod excipitur*. Itaq; omnes juris regulas ita accipere debemus, ut non perpetuò, sed plerumque obtineant: quod multis exemplis demonstrat *Pet. Fab. ad l. 1. supra h. t.* Aliquas tamen regulas *Placentinus* h. & in l. *in toto sup. eo.* putat extare in jure, à quibus nulla dari potest exceptio, sed perpetuò obti-

obtineant; uti sunt hæ: Invitus nemo procuracionem suscipere cogitur, *l. invitus 17. C. de procu. l. invitus, 56. supr. eo.* Item nemo ab initio invitus agere vel accusare cogitur, *l. unic. C. ut nemo invitus, &c.* Item & huic regulæ non derogatur: Liberum corpus non recipit æstimationem, *l. 3. Si quadrup. paup. fec. &c. l. ult. ff. De his qui de se. vel effud.* ubi statuitur, si liber homo læsus aut vulneratus est, iudex quidam habebit rationem operarum, quibus caruit aut cariturus est, ob id quod inutilis factus est. Cicatricum autem aut deformitatis nulla habetur æstimatio, quia liberum corpus nullam recipit æstimationem.

AD L. CCIII.

Pomponius lib. 8. ad Quintum Mucium.

Quod quis ex culpâ suâ damnum sentit, non intelligitur damnum sentire.

EXPLICATIO.

DAmnum quod quis ex suâ culpâ sentit, sibi, non aliis, imputare debet. Ideoque nec juris auxilium implorare potest, ut damnum hoc sibi ab alio resarcia-
tur, cum ipse sibi obfuerit, suâque culpâ incommodum senserit. Unde si procurator

ob suam contumaciam à iudice poena aliqua mulctatus est, non potest damnum id à domino repetere contrario mandati iudicio, cum ex sua culpa hoc pertulerit, *l. qui proprio 46. §. item contra 5. de procurat.* Sic & si culpa emtoris res evincatur, non committitur stipulatio duplæ, *l. si ideo 55. ff. de evict.*

Similiter fidejussor, qui scit debitorem suum esse tutum exceptione pacti, transactionis vel præscriptionis, nec eam objecit creditori, si solverit pro debitore, solum non repetit, quia sua culpa damnum sentit, *l. si fidejussor 29. ff. mand.* Ex quibus eleganter inferunt interpp. si victus victori fuit condemnatus in expensas, hoc tamen casu victus non præstabit eas expensas, quas victor ob suam contumaciam pertulit, quia culpa sua id damnum sensit. *Specul. tit. de expensis. §. nunc de expensis.* Denique & hinc commodè colligitur, quod promissio indemnitis ab omni lite movendâ, facta alicui intelligatur, nisi damnum vel lis culpâ ejus venerit, *Cagnol. hic num. 5. in fin.* Denique aptum & elegans hujus regulæ exemplum adfertur in hac facti specie, quæ proponitur in *l. si ex plagis 52. §. 1. ff. ad l. Aquil.* Caupo in semita noctu super lapidem lucernam posuerat, & quidam præteriens eam sustulerat. Caupo, eum consecutus,

tus, lucernam repositabat, & fugientem retinebat. Ille flagello quod in manu habebat, in quoq. dolon inerat, (id est, flagellum, intra cuius virgam latet pugio) verberare cauponem cœperat, ut se dimitteret, ex eo maiore rixa facta, caupo ei qui lucernam sustulerat, oculum effodit. Consultus Alphenus respondit. Nisi data ad hoc opera effodisset oculum, non videri damnum iniuria fecisse. Culpam enim penes eum, qui prior flagello percussisset, residere. Igitur actionem ex lege Aquilia non habet, qui sua culpa damnum effosso oculo passus est; quia prior ipse lucernam alienam abstulerat, flagelloque ac dolone percusserat cauponem, & sic sua culpa damnum senserat, tum quia cauponi furto lucernam abstulerat, tum quia cauponem, lucernam ablatam repetentem, flagello seu dolone recondito in ligno prius percusserat.

L. CCIV.

Pomponius libr. 28. ad Quintum Mucium.

Minus est actionem habere, quam rem.

Hæc lex explicata est *sup. ad l. is, qui actionem* 15.

AD L. CCV.

Pomponius libr. 39. ad Quintum
Mucium.

Plerumque fit, ut etiam ea, quæ à nobis abire possint, perinde in eo statu sint atque si non essent ejus conditionis, ut abire possent, & ideo quod fisco obligamus, vindicare interdum, & alienare, & servitutem in pradio imponere possumus.

EXPLICATIO.

SUMMA hujus regulæ hæc est: Nonnulla sunt apud nos, quæ ex causæ aut conditionis eventu à nobis abire possunt, interim tamen ita habentur, ac si in totum nostra essent. Exempli gratia: quod sub conditione vel in diem legatum est, id interim ab herede verè possidetur, ideoque ob spem conditionis non exstaturæ interim id heres alienare & pignori dare potest; ex tante autem conditione, tunc retro fingitur nihil alienatum, ut nec usucapio, vel longi temporis præscriptio contra legatarium procedat, l. 3. §. *sin autem* 3. C. *communis de lega.* Quod in emptione, quæ fit sub additione in diem, etiam locum habet, quando nimirum ita alicui res venditur, ut allatâ meliori conditione ab emptione recedatur: pendente conditione res in eo statu apud emptorem est, ac si ab eo abire possit,
inte-

interim tamen habetur perinde, ac si plene res ejus esset, quia potest eam alteri diven-
dere, quæ tamen venditio meliori allata
conditione resolvitur, quasi nihil sit actum,
l. 2. de in diem addict. Quia resolutio jure
datoris resolvitur jus acceptoris, *l. lex ve-
tigali, 31. ff. de pign.* Ex quibus recte colligit
Ictus hic, quod si res alicujus fisco sit obli-
gata, forte sub ea conditione, ut si ad diem
pecunia soluta non esset, ea fisco commit-
teretur; licet pecunia ad diem non soluta
res à debitore avocari possit, potest tamen
debitor interim eam rem, si ad alium per-
venerit, vindicare, alienare aut servitute
gravare. Quia integrum dominii jus, con-
ditione pendente, penes debitorem manet.
Et rectè dominium, ut nostrum, vindicare
possumus, quod abire à nobis conditione
aliqua existente potest, *l. non ideo 66. ff. de
rei vend.* ubi dicitur, quod *vindicari e-
tiam ab eo res potest, qui habet dominium
revocabile.*

L. CCVI.

Pomponius lib. 9. ex variis lectionibus.

Iure natura æquum est, neminem cum alterius detrimento & infuria fieri locupletio-rem.

EXPLICATIO.

L Ex hæc præclara & elegans est, ex jure naturali & divino petita. Quid enim aliud sanctissimum Evangelii præceptum sibi vult? *Quod tibi non vis fieri, alteri ne feceris.* Concordat *l. nam hoc natura* 14. ff. de *condict. indeb.* ubi deciditur, quod pupillus sine auctoritate tutoris, mutuum accepit, & locupletior factus est, si pubes factus solverit, non repetit, addita hac regula pro ratione, quia natura æquum est, neminem cum alterius detrimento, fieri locupletio-rem, *l. 13. in fi. & l. 14. ff. de cond. indeb. l. si pupilli 6. in princ. ff. de neg. gest.* Sic etiam pupillus rem venditam sine auctoritate tutoris vindicare non potest, nisi restituto pretio, quod in suam utilitatem converterat, *l. ult. C. de usuca. pro empt.* Pulchre hac de re Cicero in *offic. lib. 3.* ubi inter cætera sic ait: *Alteri aliquid detrahere, & suum augere commodum cum alterius incommodo, magis est contra naturam, quam ipsa mors, dolor, & paupertas.* Nam primo tollit convictum humanum & societatem com-
munem;

munem ; Nam si ita sumus affecti, ut propter suum quisque emolumentum violet aut spoliet alterum, disrumpi necesse est eam, qua maxime secundum naturam est, humani generis societatem.

Contra hanc regulam non est introducta usucapio, ubi res invito dominis auferitur, & cum alterius injuria alter locupletari videtur, quia bono publico, ne rerum dominia in incerto jaceant, inventa est usucapio, tum etiam ut litium aliquis sit finis, quas amputari & finire multum Reipubl. interest, *l. 1. ff. de usucap. l. ult. ff. Pro suo.*

Nec obstat etiam huic regulæ, quod malæ fidei possessor sumptus, quos impendit in rem alienam, non recuperet, cum sibi hoc imputare debeat, quia sua culpa & volens hoc damnum sentit; donare enim videtur, qui sciens in alieno quid impendit; Quod tamen intellige de impensis non necessariis: nam necessarios sumtus quilibet, tam malæ, quam bonæ fidei, possessor deducit; utiles verò sumtus tantum eos deducit, quos sine læsione status prioris rei auferre potest, *l. domum §. & ibi ordinarie tractant D. D. C. de rei vend.* Ex hac regula etiam rectè infertur & concluditur, quod debitor qui in chirographo

pho confessus est se debere pecuniam mutuam, quam revera non accepit, obligatur quidem ex chirographo jure civili, si intra biennium non opposuit exceptionem non numeratæ pecuniæ, *l. si intra 8. C. de non num. pecun.* Attamen si post biennium hanc exceptionem opponat, & probet pecuniam sibi non esse numeratam, adhuc audiendus est debitor, idque ex ratione hujus regulæ, quod non debet creditor locupletari cum damno & injuria debitoris: quod fieret, si debitori denegaretur post biennium exceptio non numeratæ pecuniæ, cum probare paratus esset sibi pecuniam verè non esse numeratam. Itaque ex æquitate Juris Canon. exceptio non numeratæ pecuniæ non excluditur biennio, si debitor probet se pecuniam non accepisse. Quod tunc maximè procedit, si creditor scivit se pecuniam non numerasse, cum malæ fidei possessor nullo unquam tempore præscribit, *c. possessor. de R. l. in 6.* Ita sentit Dynus *in c. locupletari de R. l. in 6.* ubi notat, hanc sententiam esse æquiores, & in foro conscientiæ tutiores, quod debitor etiam post biennium opponere possit exceptionem non numeratæ pecuniæ, si modo probet pecuniam sibi non esse numeratam. Quam opinionem communis DD. schola

am.

amplectitur, teste *Schneidevv. ad tit. Instit. de oblig. nu. xi.* Quam & tueretur Bart. *ad l. generaliter 13. C. de non nu. pec.* Postremò ob-
 jicitur locus *ex c. Exod. 12.* Populus Israël
 prætextu commodati omnia vasa aurea &
 argentea ab Ægyptiis abstulit, & ea secum
 transportavit in desertum, & sic locupleta-
 tus fuit cum injuriâ & jacturâ Ægyptiorum.
Resp. Populus hoc facto injuriam & furtum
 non intulit Ægyptiis, sed in compensatio-
 nem non solutarum mercedum hæc vasa ab-
 stulit: quia multis annis illis inservierant Is-
 raëlitis coquendo lateres & lapides, nulla
 accepta mercede. Deinde accedit manda-
 tum Dei: cujus sunt omnia, cujus voluntas
 est certissima justitiæ regula, *c. dixit domi-
 nus 14. qu. 5.*

AD L. CCVII.

Ulpianus libr. 1. ad legem Juliam &
 Papiam.

Res judicata pro veritate accipitur.

EXPLICATIO.

REs judicata proprie dicitur, quæ fi-
 nem controversiæ imponit, per pro-
 nuntiationem judicis, & paratam habet
 executionem: utpote cum sententia ap-
 pellatione suspensa non est, nec ex aliâ
 causâ potest restaurari. *Ulpianus* appellat
 eam

eam sententiam, indubitatam, quæ nullo remedio appellationis, vel supplicationis attentari potest, *l. eleganter 25. § si post 1. de condict. indeb.* Hæc res judicata propter publicam judiciorum auctoritatem, pro veritate accipitur, ut sit aliquis litium finis, & actor vel reus certus sit de jure suo, alioqui dubius futurus. Itaque qui ex causâ judicatâ solvit, repetere non potest, quasi indebitum, licet revera non debeat, *l. cum putarem 36. ff. famil. ercis.* quia res judicata propter auctoritatem judicis pro veritate habetur, *l. 1. in verb. ex causa judicati. C. de condict. indeb. l. 2. C. de compensat.* & sententia de indebito facit debitum, & dicit *Glos. in l. si non sortem 26. § hereditatis 11. ff. de condict. indeb.* quod Judices faciunt de non jure jus, & de non ente ens. Unde recte infertur, quod sententia lata contra rem judicatam non valeat, *leg. 1. C. quando provoc. non est nec.* Quemadmodum nec rescriptum Principis valet contra rem judicatam impetratam, *l. fin. C. sentent. rescindi non posse. l. causas vel lites 16. C. de transact.* Quod limitat hic Decius, nisi præcisè constaret de mente Principis volentis rei judicæ derogare. Id enim potest, cum sententia sit juris civilis. Limitatur regula, nisi sententia sit ipso jure nulla forte expresse

preſſe contra jus lata: quia illa etiam ſine appellatione infringitur, & ideo non tranſit in rem judicatam, *l. 2. C. quando provoc. non eſt nec. l. ſi expreſſim 19. ff. de appell. & l. cum prolati 32. ff. de re jud.* ubi dicitur quod ſententia lata contra leges, SCta, vel conſtitutiones Principum, eſt ipſo jure nulla, & ideo citra appellationem cauſa de novo in judicium deduci poteſt.

Secundo limitatur, niſi rei judicate ſit renunciatum vel expreſſe, *l. juris gentium, 7. §. ſi paciſcar. 13. de pact.* vel tacite, veluti ſi pars adverſa vel pars victrix patiatuſ victum conqueri de iniquitate ſententie: probatâ enim iniquitate ſententie judex poteſt rem judicatam reſcindere, & ſecundum jus denuo judicare, cum re judicatâ potior debeat eſſe juſtitia & veritas, *Decius & Ferrarius hic in fine.* Imò ſententia quæ tranſit in rem judicatam, ſi xxx. annorum ſpatio petente victore ad executionem non ſit perducta, nullius efficaciæ erit, & propter decurſum tempus contrarium pronuntiari poterit, *Jaſon. in l. in actionibus 5. ff. de in lit. jur. Ferr. ad l. is damnum dat. 169. §. quod pendet. fin. ſupr. h. s.* Poſtremò notandum, quod ſententia lata contra aliquem abſentem, & contumacem, quem nemo in judicio defendit, non habet rei judi-

judicatæ auctoritatem, nisi tantum contra absentem & indefensum, reliquis verò ea sententia non præjudicat. Exempli gratia: si cum filius exheredatus intentasset querelam inofficiosi testamenti, & cum heres absens judicium deseruisset, pronuntiavit judex contra heredem contumacem & absentem, testamentum esse inofficiosum, ipsi quidem heredi nocet hæc sententia, sed legatariis non præjudicat. Ideoque nihilominus iis actio salva manet ad legata & fideicommissa consequenda, perinde ac si nihil contra illos esset judicatum, *l. qui repudiantis 17. §. ult. ff. de inoff. test. l. si pro lusorio 14. §. ult. sup. de appell.* Ratio est, quia de unoquoque negotio, presentibus omnibus, quos causa contingit, judicari oportet; aliter enim judicatum tantum inter presentes tenet, *l. de unoquoque 47. ff. de re jud.*

L. CCVIII.

Paulus lib. 3. ad legem Juliam & Papiam.

Non potest videri desisse habere, qui nunquam habuit.

Lex non potest videri, sup. in l. non videtur 83. explicata est.

L. CCIX.

L. CCIX.

Ulpianus libr. 4. ad legem Juliam & Papiam.

Servitutem mortalitati fere comparamus.

Hæc lex ad conditionem servorum pertinet.

L. CCX.

Licinius Rufinus libr. 2. Regularum.

Quæ ab initio inutilis fuit institutio, ex postfacto convalescere non potest.

Hæc lex sup. in l. quod ab initio 29. declarata est.

L. CCXI.

Paulus libr. 69. ad Edictum.

Servus Reipublica causa abesse non potest.

Lex ult. tractat de servis, qui inter Christianos sunt incogniti.

REGULARUM JURIS FINIS.

INDEX



I N D E X

Legum & Paragraphorum hujus
Commentarii ordine Alpha-
betico dispositus.

A

A bsentia ejus.	<u>274</u>
A ctus legitimi.	<u>190</u>
Ad ea, quae non habent.	
	<u>29</u> ;
§. Semper.	<u>295</u>
§. In Contractibus.	
	<i>ibid.</i>
Aliud est vendere.	<u>298</u>
§. Refertur.	<u>299</u>
§. Absurdum.	<u>300</u>
Alterius Circumventio.	
	<u>131</u> .

B

B ona fides.	<u>149</u>
Bona fides tantun- dem.	<u>170</u>

C

C apienda	occafio.
	<u>308</u>

§. Quod factum. <i>ib.</i>	
Consilii non fraudulent.	<u>124</u>
§. Socii mei socius.	
	<u>127</u>
Creditor.	<u>295</u>
Contractus quidam.	<u>57</u>
Cuius est donandi.	<u>305</u>
Cujus effectus.	<u>283</u>
Cujus per errarem.	<u>138</u>
Culpâ caret.	<u>132</u>
Culpa est.	<u>96</u>
Cum amplius solutum est.	<u>205</u>
§. Is naturâ.	<u>206</u>
Cum par delictum.	<u>289</u>
§. Illi debet.	<u>289</u>
Cum Prator.	<u>263</u>
Cum principalis.	<u>312</u>
Cum quis possit.	<u>305</u>
Cum servo.	<u>239</u>
Cum tempus.	<u>44</u>

Divus

INDEX LL. & §. §.

D

- D** *Iuvus Pius.* 78
Domum suam. 158
Donari videtur. 203

E

- E** *A est natura.* 163
Ea quæ dari impossibilia. 270
Ea quæ in partes. 335
 §. *In re dubiâ.* 336
Ea quæ raro. 160
Ea sola deportationis. 227
Ejus est nolle. 11
Etsi nihil. 328
Ex pœnalibus causis. 151
Expressa nocent. 338
Ex qua persona. 284

F

- F** *Actum à Iudice.* 309
Factum cuique suum. 290
 §. *Non videtur.* 290
 §. *In pœnalibus.* 290
Favorabiliores. 259
Ferè in omnibus. 239
Fere quibuscunque. 288
Filius familias. 223
Fœmina. 6
 §. *Item impubes.* 10

Fraudis interpretatio.

197

Furiosus. 105

G

- G** *Generaliter.* 195
 §. *Generaliter probandum.* 15

H

- H** *Eredem ejusdem.* 153
Hæreditas. 158
Hoc jura utimur. 287
 §. *Dejicit qui.* 288
 §. *In Contractibus.* 288

I

- I** *D quod nostrum est.* 30
Imaginaria venditio. 42
Imperitia. 268
Impossibilium. 329
In ambiguis. 207
 §. *Non est novum.* 209
 §. *Quoties.* 210
In ambiguis orationibus. 225
In condemnatione. 311
 §. *Cum verbum.* 312
 §. *Unicuique.* 313
 §. *Dolo facit.* 314
In

INDEX LL. & §§.

<i>In contrabendâ.</i>	311	§. Quod pendet.	309
<i>In eo, quod plus.</i>	<u>241</u>	<i>Is qui actionem habet.</i>	<u>41</u>
§. Nemo alienæ.	243	<i>Iura sanguinis.</i>	<u>24</u>
§. Pupillus.	<u>243</u>	<i>Iura natura.</i>	350
§. Vbi verba.	<u>244</u>	<i>Ius nostrum.</i>	21
§. Mulieribus.	245		
<i>In eo, quod vel is.</i>	<u>89</u>	L	
<i>In his, quæ officium.</i>	317	<i>Libertas.</i>	239. & <u>254.</u>
<i>In Iure Civili.</i>	<u>301</u>		
<i>In negotiis.</i>	<u>17</u>	M	
<i>In obscurâ voluntate.</i>	324	<i>M Arcellus.</i>	<u>166</u>
<i>In obscuris.</i>	<u>246</u>	<i>Melior Condicio.</i>	<u>268</u>
<i>In omnibus causis.</i>	103	<i>Minus est actionem.</i>	<u>347</u>
<i>In omnibus causis id ob-</i>			
<i>serv.</i>	<u>168</u>	N	
<i>In omnibus obligationi-</i>		<i>Nec ex pratorio.</i>	75
<i>bus.</i>	<u>39</u>	<i>Nemo alieno nomi-</i>	
<i>In omnibus quidem.</i>	<u>216</u>	<i>ne.</i>	<u>255</u>
<i>In pari causa.</i>	<u>264</u>	§. Temporaria.	<u>256</u>
§. Hi qui.	<u>266</u>	<i>Nemo damnum facit.</i>	<u>286</u>
<i>In personam.</i>	55	<i>Nemo de domo.</i>	<u>234</u>
§. Generaliter.	<u>55</u>	<i>Nemo dubitat.</i>	<u>224</u>
<i>In Testamentis.</i>	<u>34</u>	<i>Nemo enim in persequen-</i>	
<i>In toto & pars.</i>	<u>246</u>	<i>do.</i>	<u>212</u>
<i>In toto jure.</i>	<u>199</u>	<i>Nemo ex his.</i>	<u>114</u>
<i>In totum omnia.</i>	<u>188</u>	§. Quoties.	<u>116</u>
<i>Inuito beneficium.</i>	<u>172</u>	<i>Nemo ideo obligatur.</i>	310
<i>Inuitus nemo.</i>	<u>291</u>	<i>Nemo plus Iuris.</i>	<u>141</u>
§. Cui damus.	292	<i>Nemo plus commodi.</i>	253
§. Cum quis.	<u>293</u>	<i>Nemo potest gladiis.</i>	<u>173</u>
§. Plerumque Empto-		<i>Nemo</i>	
<i>ris.</i>	<u>293</u>		
§. Quod cuique.	<i>ibid.</i>		
<i>Is damnum dat.</i>	<u>308</u>		

INDEX L.L. & §.§.

Nemo potest mutare. 187

Nemo prado est. 261

§. Locupletior. 262

§. Cum de Lucro. 263

Nemo, qui condemnare. 98

Nemo videtur fraudare. 282

Neque in interdicto. 340

Neque pignus. 119

§. Privatorum conventio. 121

Neratius. 334

Nihil consensui. 248

§. Non capitur. 249

§. Non videntur. 250

Nihil dolo. 266

§. Cum principalis. 266

Nihil interest. 246

Nihil peti potest. 329

Nihil tam naturale est. 93

Non alienat. 252

Non debet auctori. 108

§. In re obscurâ. 109

Non debet alteri. 185

Non debet, cui plus licet. 52

Non defendere videtur. 136

Non est singulis. 318

§. Infinita. 320

Non fraudantur. 268

§. Nemo ex suo. 269

Non omne quod licet. 280

§. In stipulationib. 281

Non potest dolo. 340

Non potest improbus. 230

Non potest videri defuisse. 356

Non solent, quæ abundant. 223

Non solet exceptio. 51

Non solet deterior. 212

Non videtur data. 306

§. Qui iussu. ibid.

Non videtur cepisse. 36

Non videtur quisquam. 135

Non videtur rem amittere. 294

Non ut & pluribus. 297

Non vult heres esse. 19

Nulla intelligitur. 214

Nullum Crimen. 241

Nullus videtur. 144

Nunquam actio. 266

Nuptias non concubitus. 85

O

Omnēs actiones. 273

§. Non videtur. 273

Omnia fere. 337

Q

Omnia

INDEX LL. & §§.

<i>Omnia quaecunque.</i>	176
<i>Omnia qua ex Testam.</i>	343
<i>Omnia qua jure.</i>	270
<i>Omnis definitio.</i>	343
<i>Omnis hereditas.</i>	272
§. <i>Nunquam.</i>	272

P

P <i>Arem esse conditio-</i>	
<i>nem.</i>	286
<i>Plerumque fit.</i>	348
<i>Plus cautionis.</i>	71
<i>Pœnalia judicia.</i>	305
<i>Prator.</i>	251
<i>Privilegia.</i>	340
<i>Pupillum qui.</i>	246
§. <i>In heredem.</i>	246
<i>Pupillus nec velle.</i>	333

Q

Q <i>uidiu.</i>	214
<i>Quatenus cujus.</i>	68
<i>Qua ab initio.</i>	357
<i>Qua dubitationis.</i>	201
<i>Qua legata.</i>	47
<i>Quæ propter.</i>	303
<i>Qui actionem habet.</i>	41
<i>Qui auctore Iudice.</i>	272
<i>Quidquid in calare.</i>	128
<i>Qui cum alio.</i>	49
§. <i>Non solet.</i>	51
<i>Qui dolo defertis.</i>	267

<i>Qui in alterius locum.</i>	111
<i>Qui in lus.</i>	320
§. <i>Nemo.</i>	321
<i>Qui in servitute.</i>	251
<i>Qui non facit.</i>	253
<i>Qui per successionem.</i>	338
<i>Qui potest invitus.</i>	73
<i>Qui rem alienam.</i>	305
<i>Qui sine dolo.</i>	159
<i>Qui potest facere.</i>	315
§. <i>Quod quis.</i>	316
<i>Qui tacet, non utique.</i>	277
<i>Qui verante.</i>	232
§. <i>Ejus est actionem.</i>	233
<i>Quod à quoquam.</i>	122
<i>Quod attinet.</i>	88
<i>Quod contra.</i>	275
§. <i>Vni duo.</i>	276
<i>Quod evincitur.</i>	333
<i>Quod initio.</i>	80
<i>Quod ipsis.</i>	279
<i>Quod jussu.</i>	325
<i>Quod nullius esse potest.</i>	326
<i>Quod quis dum servus.</i>	283
<i>Quod quis ex culpa.</i>	345
<i>Quoties concurrunt.</i>	116
<i>Quoties dubia.</i>	52
<i>Quoties duplici jure.</i>	218
<i>Quoties idem sermo.</i>	166
<i>Quoties nihil.</i>	342
<i>Quo-</i>	

INDEX LL. & §§.

Quoties utriusque causa. 228

Quo tutela reddit. 179

§. Nemo potest. *ibid.*

§. Vifactum. 180

§. Quæ in testam. 181

§. Nec paciscendo. 182

R

Rapienda occasio. 308

§. Quod factum. *ibid.*

Regula est. 3

Res judicata. 353

S

Secundum naturam est. 30

Semper in Conjunctionib. 340

Semper in dubiis. 147

Semper in obscuris. 27

Semper in stipulation. 90

Semper qui non prohibet. 155

Semper specialia. 283

Servitutem. 357

Servus Republica. 357

Sicuti pœna. 100

Si in duabus. 236

Si Librarius. 221

Si nemo subiit. 325

Si quis obligatione. 247

§. Non potest videri. *ibid.*

Si quis pragnantem. 330

T

Toties in heredem. 117

V. U.

Vani timoris. 328

Velle non creditur. 14

Verum est. 87

Ubique causa. 239

Ubi Lex. 231

Ubi non voce. 258

§. Furiosus. 259

Ubi pignantia. 332

§. Quæ rerum naturâ. 333

F I N I S

Totius opusculi.



) -





